


〔重刊訂正本〕

中國醫學大成

錢肅劄題



〔重刊訂正本〕

中國醫學大成

〔四九〕

上海科學技術出版社

期

末

中國醫學大成 (全套共五十冊)

上海科學技術出版社出版

(上海瑞金二路四五〇號)

新華書店上海發行所發行

上海市印刷十廠印刷

開本七八七×一〇九二

三十二開

精裝

總字數二一,七九〇,〇〇〇

總印張八六二

一九九〇年六月第一版 一九九〇年六月第一次印刷



C0159019

劉涓子鬼遺方

〔宋〕龔慶宣 撰

醫方考

〔明〕吳鶴皋 原著

原 編 曹炳章

總審定 裘沛然

總審閱 蕭敏材 朱邦賢 沈麗君

重刊訂正《中國醫學大成》序

《中國醫學大成》一書，我鄉先輩四明曹炳章先生所輯集，爲發揚中醫學，保存古醫籍，以饗同道並惠後學作也。曹氏纂集是書時，正值西學東漸，國內淺見倖進之徒，競尙浮華，大肆鞭撻我國文化固有之精英，如民族醫學，悉在消滅之列，中醫學不絕如縷。而先生乃在此時從事中醫叢書巨著之編輯，姑不論其學術價值，獨其保存民族文化精粹之苦心孤詣令人可敬，其卓識遠見，又何其可欽也。

楊志一在原書序中有說：『大凡學術之成立，歷久而不敗者，必有其真實之價值在。』善哉言乎！中華民族立國數千年而得以生存繁衍，如無優秀之文化及可貴之醫學，則亦何逃於優勝劣敗之例。尤

其在科學迅猛發展之今日，百技更新，而古老之中醫藥學日益引起國內外有識之士之重視。各類中醫藥研究所之建立，亦爲保護人民健康之需要，順應世界醫學發展之潮流而設。凡此種種，夫豈偶然。

惟中醫學歷史悠久，濫觴於炎黃，昌盛於漢唐，歷代醫家多有創見，其學術經驗載於文獻者浩如煙海，遺佚者可弗論，僅就先生纂集之時，存書尙達萬種，學者既不能盡讀，又無力購置，且諸書精粗雜糅，版本文字舛誤殊多，使學習中醫者常興望洋之嘆。先生乃爲之博採精選，上自先秦，下迄近代，凡理論、方藥、臨床各科咸備，別爲十三類，書計三百六十五種，分醫經、藥物、診斷、方劑、通治、外感病、內科、外科、婦科、兒科、針灸、醫案及外集雜著各類。其中傷科、眼科及五官病歸入外科，推拿、手術歸入針灸，醫論、醫話、醫史歸入雜著。所收各書，皆中醫要籍，大都內

容精粹，切合實用，版本亦從精選，並加句斷。各書之首，皆列著作校刊略歷及內容提要，以便讀者入門粗知梗之助。

中醫學歷來叢書頗少，是書搜羅廣而選擇精，洵爲前所未有的巨著。惜全書印刊未半而抗戰軍興，烽煙迷漫，醫籍出版被迫中輟。而已印行之一百三十六種，今亦散佚不全。上海科學技術出版社爲應學者需求，重爲付梓，並影印以存原貌。書中明顯錯訛者，由我院及中醫文獻研究所等有關單位專業人員校勘改正，使之益臻完善。

夫文以載道，中醫學爲我國醫學之重要財富，文獻則是寶庫中之重要內容。故有志斯道者，務求先通中醫之理論法則、方藥效用和臨床處置，使對中醫學有全面之理解，更須驗之臨床，以汲取其理論精華與豐富經驗。學問之事，原恃艱苦以求而非獵取可得。昔張仲景勤求古訓，博採衆方；孫思邈青衿之歲，高尚是典，白首之

年，未嘗釋卷；葉香岩以不讀破萬卷，不敢輕言醫。茲三人者，皆由勤奮好學而成一代高醫，故學習中醫宜下一番札實工夫。在此基礎上運用現代科學技術研究和整理中醫學，才有闡明和提高希望。中西醫結合，亦將另具特色。以務實精神，走中醫現代化循序而進之道路，勇於繼承，敢於創新，使傳統醫學有所發現與創造。苟能如此，不僅爲祖國爭光，並將爲人類造福。

本叢書一百三十六種，分爲五十冊；每冊後並皆附有全部書目。它的出版，爲中醫和愛好中醫者提供珍貴之醫學文獻，讀者勤習而深研之，必能奠定中醫學根柢，大有助於中醫事業之繼承與發展。

裘沛然

一九八八年六月作於
上海中醫學院

〔宋〕

龔慶宣

撰

劉涓子鬼遺方

中國醫學大成

劉涓子鬼遺方提要

相傳鬼遺方之由來。係晉時劉涓子於丹陽郊外打獵。忽見一物高二丈許。射而中之。光如雷電。聲若風雨。其夜不敢前追。詰旦率門徒子弟數人。尋蹤至山下。見一小兒提罐。問何往。謂我主被劉涓子所射。取水洗瘡。問主人是誰。曰黃父鬼。乃隨小兒行。及門聞搗藥之聲。門內遙見有三人。一人閱書。一人搗藥。一人仰臥。怪而叫之。三人俱亡。遺有癰疽方一卷。并藥一臼。時劉方從宋武北征。有患瘡者。以是藥塗之。即愈。說者謂是天助武王也。嗣後有患者。用方爲治。無不立效。當時涓子寄姊書。嘗備述此段故事。附方一卷。以證其所言非妄。方用丹陽白薄紙所寫。並無刻本。龔慶宣原序。紀錄得方之原委如此。是否可信。以年代久遠。亦莫可窮詰。惟是書爲希世之珍。終當重視之。本書昔嘗刊於讀畫齋叢書中。嘉慶庚申。蘇州掃葉山房亦有刻本。惟訛字缺字太多。今就讀畫齋本考校印行。

劉涓子鬼遺方目錄

卷一

卷二

治金瘡止血散方·····	一
治金瘡血肉癰蝙蝠消血 散方·····	一
治金瘡肉癰蒲黃散方·····	二
治金瘡箭肉中不出出箭 白欬散方·····	二

治金瘡中腹腸出不能內 小麥散方·····	二
治金瘡腸出欲入磁石散 方·····	三
治金瘡煩悶心煩白芷散 方·····	三
治金瘡先有散石煩悶二 便不通消石散方·····	三
治金瘡痛不可忍止痛當	一

歸散方·····	四
治金瘡弓弩所中悶絕琥	
珀散方·····	四
治金瘡弓弩所中筋急屈	
伸不得敗弩散方·····	四
治金瘡內傷蛇螫散方·····	五
治金瘡中筋骨續斷散方·····	五
治金瘡煩疼麻黃散方·····	六
治金瘡煩滿白薇散方·····	六
治金瘡去血多當歸散方·····	六
治金瘡去血多虛竭內補	
莢蓉散方·····	七
治金瘡內塞澤蘭散方·····	七
治金瘡內塞黃耆散方·····	八
治金瘡中茵藥藍子散方·····	八
治金瘡大渴嬰麥散方·····	九
治被打腹中瘀血蒲黃散	
方·····	九
治癰疽金瘡續斷生肌膏	
方·····	一〇
治金瘡癰疽止痛生肌甘	
菊膏方·····	一〇

卷二

治癰疽金瘡生肌膏方·····	一一
治金瘡腹內有瘀血烏雞	
湯方·····	一二
治金瘡內有瘀血未及得	
出烏雞湯方·····	一二
治金瘡有瘀血桃核湯方·····	一三
治金瘡驚悸狃心湯方·····	一三
治金瘡癰疽生肉膏方·····	一四
治被打腹中有瘀血白馬	
蹄散方·····	一四

治強壯熱癰疽大黃湯方·····	一
治發癰疽兼結實淡竹葉	
湯方·····	二
治發背發乳癰疽生地黃	
湯方·····	二
治乳癰已服前湯又淡竹	
葉湯方·····	三
治癰疽虛熱生地黃湯方·····	三
治癰疽內虛熱渴甚黃耆	
湯方·····	四
治背生地黃湯方·····	五

治癰疽內虛黃耆湯方·····	五
治癰疽五味竹葉湯方·····	六
治癰疽發背遠志湯方·····	六
治發背乳下復住白石脂湯方·····	七
治發癰疽取利竹葉湯方·····	七
治發癰疽小便不利竹葉湯方·····	八
治癰疽取利後熱小便不利竹葉湯方·····	八
治發背癰兼味竹葉湯方·····	九

治發背已潰白石脂湯方·····	一〇
治發背大去膿汁少氣力黃耆湯方·····	一〇
治癰疽內虛生地黃湯方·····	一一
治發背黃耆湯方·····	一一
治炎疽枳實湯方·····	一二
治腸癰大黃湯方·····	一二
治背上欲有疹大黃湯方·····	一三
治婦人妬乳辛夷湯方·····	一三
治婦人乳結腫黃耆湯方·····	一三
治癰腫熱盛黃耆湯方·····	一四

治發癰疽去膿血多內補

黃耆湯方……………一四

治癰疽去膿多虛滿竹葉

湯方……………一五

治癰疽腫增損竹葉湯方……………一五

治癰疽後黃耆湯方……………一六

卷四

九江黃父癰疽論……………一

相癰疽知是非可灸法……………六

相癰疽知有膿可破法……………六

治癰疽腫松脂貼方……………七

治癰疽腫松脂貼方……………七

治癰疽松脂貼腫方……………八

治癰疽升麻薄極冷方……………八

治癰白斂薄方……………九

治癰疽始一二日痛猪膽

薄方……………九

治癰腫熱盛除熱止渴黃

耆湯方……………一〇

治客熱鬱積在內或生癰

黃耆湯方……………一〇

治癰未潰黃耆湯方·····	一一
治癰內補竹葉湯方·····	一一
治補度冷下赤石脂湯方·····	一一
治取冷過寒下溫中湯方·····	一二
治斷下補胃附子湯方·····	一二
治癰及惡瘡猪蹄湯洗方·····	一三
治癰腫壞多汗猪蹄湯方·····	一三
治肘疽方·····	一四
治癰疽最膿增損散方·····	一四
治癰消膿木占斯方·····	一四
治發背婦人發房并腸癰	

木占斯散方·····	一五
治諸癰腫未潰雙麥散方·····	一六
治癰食惡肉散方·····	一六
治癰疽食惡肉散方·····	一七
治癰疽兌膏方·····	一七
治食肉青龍膏方·····	一八
治癰疽金瘡生肉膏方·····	一八
治丹癰疽始發炊熱浸淫	
長成擒湯方·····	一九

卷五

治癰疽敗壞生地黃膏方	一
治癰疽瘡生肌黃耆膏方	一
治發背乳口已合急痛丹	
參膏方	二
治癰疽腫痛堅強不消黃	
芩膏方	三
治癰疽止痛生肌鷓鴣脂膏	
方	三
治癰疽金瘡續斷生肉膏	
方	四
治癰疽金瘡止痛甜竹葉	

膏方	四
治癰疽敗壞生肉苘草膏	
方	五
治癰疽敗壞膿爛蛇噉膏	
方	五
治癰疽食肉膏方	六
治癰疽食肉大黃膏方	七
治癰疽食惡肉蘆茹膏方	七
治癰疽始作硬敗壞膏方	七
治久病疥癬惡瘡膏方	八
治久病疥癬諸惡瘡毒五	

黃膏方·····	八
治病疥癬散熱水銀膏方·····	九
治面黥炮麝香膏方·····	九
治面瘡炮木蘭膏方·····	〇
治瘡炮鷓鴣屎膏方·····	〇
治頭頰生髮白芷膏方·····	一
治婦人乳腫痛丹參膏方·····	一
治頭白頰瘡經年不差五	
味子膏方·····	一
治疽漏癰疥惡瘡膏方·····	二
治久癰疽諸瘡野葛膏方·····	三

治丹沙膏方三首·····	一四
赤膏治百病方·····	一六
治癰疽丹沙膏方·····	一七
治癰疽麝香膏方·····	一八
治丁腫生芎藭膏方·····	一九
治癰疽始發丹砂膏方·····	一九
治風溫癰疽諸惡瘡膏方·····	二〇
治癰疥諸惡瘡丹砂膏方·····	二一
治小兒頭瘡紫草膏方·····	二二
治小兒熱瘡水銀膏方·····	二二
治火瘡柏皮膏方·····	二二

治標疽浸淫廣大爛壞成	
瘡羊髓膏方·····	二二
治熱毒瘡升麻膏方·····	二三
治熱瘡生地黃膏方·····	二三
治惡瘡皆爛雄黃膏方·····	二四
治癰疽癰水銀膏方·····	二四
治非癰癰瘡白斂膏方·····	二四
治皮膚中熱非癰癰白斂	
膏方·····	二五
治熱瘡生地黃膏方二首·····	二五
治溫熱諸瘡黃連膏方·····	二六

治熱瘡蛇床子膏方·····	二六
治熱瘡木蘭膏方·····	二七
治熱瘡黃連膏方·····	二七
治熱炙瘡甘草膏方·····	二七
治諸癰破後大去膿血黃	
膏方·····	二八
治癰疽已潰白芷摩膏方·····	二八
治諸疽瘡膏方·····	二九
治鼻中塞利鼻白芷膏方·····	二九
治竹木所刺手足疼痛羊	
屎膏方·····	二九

治湯淚人肉爛壞朮膏方	三〇
治火燒爛壞柏皮膏方	三〇
治癰疽疥癬及惡瘡蘆茹膏方	三一
治婦人妬乳生瘡雌黃膏方	三一
治諸惡瘡麝香膏方	三一
治頭瘡骨疽牛屎熏方	三二
治諸傷六物滅癰膏方	三二
治滅癰小品方二首	三二

劉涓子鬼遺方

宋 龔慶宣撰

卷一 井序

昔劉涓子。晉末於丹陽郊外照射。忽見一物。高二丈許。射而中之。如雷電聲。若風雨。其夜不敢前追。詰旦。率門徒子弟數人。尋蹤至山下。見一小兒提罐。問何往。爲我主被劉涓子所射。取水洗瘡。而問小兒曰。主人是誰人。云黃父鬼。仍將小兒相隨。還來至門。聞搗藥之聲。比及遙見三人。一人閱書。一人搗藥。一人臥爾。乃齊唱叫突。三人並走。遺一卷癰疽方。并藥一臼。時從宋武北征。有被瘡者。以藥塗之。卽愈。論者云。聖人所作。天必助之。以此天授武王也。於是用方爲治。

千無一失。姊適余從祖叔。涓子寄姊書。具敘此事。并方一卷。方是丹陽白薄紙本寫。今手跡尙存。從家世能爲治方。我而不傳。其孫道慶與余隣居。情款異常。臨終見語。家有神方。兒子幼稚。苟非其人。道不虛行。尋卷診候。兼辨藥性。欲以相傳屬。余旣好方術。受而不辭。自得此方。於今五載。所治皆愈。可謂天下神驗。劉氏昔寄龔方。故草寫多無次第。今輒定其前後。族類相從。爲此一部。流布鄉曲。有識之士。幸以自防。齊永元元年。太歲己卯。五月五日撰。道慶曰。王祖劉氏。有此鬼方一部。道慶祖考相承。謹按處治。萬無一失。舅祖涓子兄弟自寫。寫稱云無紙。而用丹陽錄。永和十九年。資財不薄。豈復無紙。是以此別之耳。

黃父曰。夫言癰疽。何以別之。岐伯答曰。榮衛稽留於經脈之中。久則血澁不行。血澁不行。則衛氣從之不通。壅遏不得行。火不止熱勝。熱勝則肉腐爲膿。然不能陷膚於骨髓。不爲焦枯。五藏不爲傷。故曰癰。

黃父曰。何爲疽。岐伯曰。熱氣浮盛。當其筋骨。良肉無餘。故曰疽。疽上皮肉以堅。狀如牛領之皮。癰者薄以澤。此其候也。

黃父曰。及如所說。未知癰疽之性。名發起處所。診候形狀。治與不治。死活之期。願一一聞之。

岐伯曰。癰疽圖曰。

赤疽發額。不寫。十餘日死。其五日可刺也。其膿赤多血死。未有膿可治。人年二

十五 三十一 六十 九十五者在額。不可見血。見血者死。

禽疽發如軫者。數十處。其四日。腫合牽核痛。其狀若顰。十日可刺。其肉發身振寒。

齒如噤欲痊。如是者十五日死。

杼疽發頂。若兩耳下。不寫。十六日死。六日可刺。其色黑。見膿而癰者死。不可治。人

年 十九 二十三 三十五 三十九 五十一 五十五 六十一 八

十七 九十九 百神在耳下。不可見血。見血者死。

丁疽發兩肩。此起有所逐惡結。血流內外。榮衛不通。發爲丁疽。三日身腫痛甚。口噤如瘞狀。十一日可刺。不治二十日死。

蜂疽發髀背。起心膈。若連肩骨。二十日不治死。八日可刺。其色赤黑。膿見青者死。不可治。人年一十八 二十四 三十五 六十七 七十二 九十八者。百神在肩。不可見血。見血者死。

陰疽發髀。若陰股。始發腰強。內不能自止。數飲不能多。五日堅痛不治。三歲而死。刺疽發起肺膈。不寫。二十日死。其八日可刺。發而赤。其上肉如椒子者死。不可治。人年 十九 二十五 三十九 五十七 六十 七十三 八十一 九十七 百神在背。不可見血。見血者死。

脈疽發頸。項如痛。身隨而熱。不欲動。悄悄或不能食。此有所大畏恐。駭而不精。上

氣嗽。其發引耳。不可以腫。二十日可刺。不刺八十日死。

龍疽發背。起胃俞。若腎俞。二十日不寫。死。九日可刺。不刺其上赤下黑。若青膿黑死。發血膿者不死。

首疽發熱。八十日。一方云八九日。大熱汗。頭引血。盡如嗽。身熱同。同如沸者。皮頗腫。淺刺之。不刺二十日死。

榮疽發脅。起若兩肘頭。二十五日不寫。死。九日可刺。膿多赤白而可治也。人年

一歲	十六	二十六	三十二	四十八	五十八	六十四	八十	九十六
----	----	-----	-----	-----	-----	-----	----	-----

百神在脇。不可見血。見血即死。

行疽發如腫。或後合相從。往來不可。要其所在刺之。即愈。

勇疽發股。起太陰。若伏鼠。二十五日不寫。死。其十日可刺。勇疽發膿。青黑者死。白

者尙可治。	不可治。	人年	十一	十五	二十	三十一	三十三	四十六
-------	------	----	----	----	----	-----	-----	-----

五十九 六十三 七十五 九十一 百神皆此尻尾。不可見血。見血者死。
標疽發背。熱同。同耳聾。後六十日。腫如聚水。其狀若如此者。可刺之。但出水後。
及有血出。即除。愈也。不可治。人年 五十七 六十五 七十三 八十一
九十七者 百神在背。不可見血。見血者死。

癰疽發足趺。若足下。三十日不寫。死。其十二日可刺。癰疽者。白膿不太多。其瘡上
痒。赤黑者死。不可治。人年 十三 二十九 三十五 六十一 七十三
九十三 百神在足。不可見血。見血者死。

衝疽發小腸。痛而振寒熱。四日五日悄悄。六日而變。刺之。五十日死。

敦疽發兩指頭。若五指頭。七八日不寫。死。其四日可刺。其發而黑擁者。不堪。未過
指節可治。一方不呼爲敦疽。恐是刺寫明堂引爲敦疽。

疥疽發腋下。若兩臂。兩掌中振寒熱而噬乾者。飲多即嘔。心煩悄悄。六十日而漸

合者。如此可有汗。如無汗者死。一方云淋疽明堂亦引爲淋瘻

筋疽皆發脊兩邊大筋。其色蒼。八日可刺。若有膿在肌腹中。十日死。

陳乾疽發兩臂。三四日。痛不可動。五十日。身熱而赤。六十日可刺。如刺無血。三四日病愈。

搔疽發手足五指。頭起節。其色不變。十日之內。可刺。過時不刺。後爲蝕。有癰在脈腋。三歲死。

叔疽發身。腫牽核而身熱。不可以行。不可以屈伸。成膿。刺之以除。

白疽發脾。若肘後。痒自痛傷。乃身熱多汗。五六處有者死。心主癰疽。在股脛。六日死。發膿血。六十日死。

黑疽發腫。居背大骨上。八日可刺。過時不刺。爲骨疽。骨疽膿出不可止。壯熱碎骨。六十日死。脇少陽。有癰腫在頸。八日死。發膿血者。十日死。

倉疽發身。痒後痛。此故傷寒氣入藏。篤發爲倉疽。九日可刺之。不刺。九十日死矣。
腰太陽脈有腫。交脈屬於陽明。在頸十日死。發腫七十日死。

尻太陽脈有膿腫。在足心。少陽八日死。發膿血六十日死。或八十日死。

頭陽明脈有腫。在尻六日死。發膿血六十日死。

股太陰有腫。在足太陽十七日死。發腫血百日死。

肩太陽脈有腫。在頸八日死。發膿血百日死。

足少陽脈有腫。在脇八日死。發膿血六十日死。

手陽明脈有腫。在腋淵一歲死。發膿血三歲死。

黑疽發腋淵死。

黑疽發耳中。如米大。此疽不治。死。

黑疽發肩死。黑疽發缺盆中。名曰伏疽。不治。死。

赤疽發於脾。半歲可治。出歲死。

黑疽發肘上下。不死可治。

脾解除指本黑。頭赤死。

黑疽發掌中。不死可治。

赤疽發陰股。軟可治。堅死。

赤疽發肥腸死。

黑疽發臍臙。軟可治。堅不可治。

赤疽發掌中。不可治。

黑疽發趺上。堅死。

足下久腫癰。色赤死。

癰高而光者。不大熱。用薄雍。其肉平平無異。而紫色者。不須治。但以黃耆并淡竹

葉湯。申其氣耳。癰平而痛。用八物黃膏。薄大癰七日。小癰五日。其自有堅強。色診寧生破。發背及乳。若熱手近不得者。令人之熱。熱先服王不留行散。外散。外摩發背。大黃膏。若背生破無善。在乳者。熱之候。手按之。若隨手起。便是熱。針法要膿。看以意消息之。胸背不可過一寸針。良久不得膿。即以食肉膏散差。釜頭肉癰口中。人體熱氣歇。服木瓜散。五日後癰欲差者。排膿內塞散。

凡破癰之後。病人便連綿欲死。內寒熱腫。自有似癰而非者。當以手按。腫上無所連。是風毒耳。勿針。可服昇麻湯。外摩膏。破癰口。當合流下三分。近一分針。唯令極熱。便不痛。破癰後。敗壞不差者。作猪蹄湯洗之。日再下湯。二日故可用。冬六七日。湯半劑亦可用。胸中斷氣。斷氣者。當入闇中。以手按左眼。視右眼。見光者。胸中結癰。若不見光者。燍疽內發。針傷脈。血不出。住實不寫。留成癰。腎脈來者大。漸小陰結。若肌肉痺癰癰爲發。寸口如此來大。如未漸小矣。

有黑色者。是石留黃毒。有赤色者。是丹砂毒。有青色者。是硃砂毒。有似鹽
類者。是鍾乳毒。有黃水者。是杏桃仁毒。有白水者。是附子乾薑毒。有膿者。
熱肉麵等毒。硃砂發。白雄鴨頂上血一合。已來取黑鉛湯一茶碗。調服之解。
鍾乳發。雄鷄肘上血一合。將鐵粉湯一茶碗。調服之解。附子發。取附子皮
三半。豉半升相和。以水一升。煎約一茶碗。服之解。丹砂發。取黑鉛、黃耆、防風、
伏龍肝各半兩。水一升。煎半茶碗。去滓服之解。

劉涓子鬼遺方 卷一

劉涓子鬼遺方

宋龔慶宣撰

卷二

治金瘡。止血散方。

烏章根三兩

白芷一兩

鹿茸二兩
燒灰分

當歸一兩

芎藭一兩

乾地黄一兩
蒸焙切

續斷一兩

右七味。搗篩令調。着血出處。即止。

治金瘡血肉癰。蝙蝠消血散方。

蝙蝠三枚。燒令煙盡。末下。絹篩之。

右以水服方寸匕。一日服令盡。當下如水。血消也。

治金瘡肉癰。蒲黃散方。

七月七日麻勃一兩

蒲黃二兩

右二物搗篩爲散。溫酒調服一錢匕。日五服。夜再兩服。

治金瘡箭肉中不出。出箭白斂散方。

白斂二兩

半夏三兩湯洗七遍生薑浸一宿熬過

右二味爲末。調水服方寸匕。日三服。若輕淺瘡。十日出。深。二十日出。終不停住肉中。

治金瘡中腹。腸出不能內之。小麥飲噴瘡方。

取小麥五升。水九升。煮取四升。去滓。復以綿度濾之。使極冷。傍含噴之。瘡腸自上。漸漸入。以冷水噴其背。不中多人見。亦不欲令傍人語。又不可病人知。

或晚未入。取病人席四角。令病人舉搖。須臾腸便自入。十日之內。不可飽食。頻食而宜少。勿使病人驚。驚則煞人。

治金瘡腸出欲入。磁石散方。

磁石三兩 滑石三兩

右二物下。篩理令調。食飲方寸匕。日五服。夜再服。

治金瘡煩悶止煩。白芷散方。

白芷二兩 芎藭二兩 甘草二兩

右三味。熬令變色。搗爲散。水調服方寸匕。日五服。夜再服。

治金瘡先有散石。煩悶欲死。大小便不通。止煩消血。解散消石散方。

消石 澤瀉 白斂 芍藥

寒水石 苦葶一已上各

右六味。搗篩爲散。水服方寸匕。日夜各一服。或未通。稍增之。

治金瘡不可忍。煩疼不得住。止痛當歸散方。

當歸

甘草炙

葦本

桂心

木占斯已上各一兩

右五味合搗篩令調。水服半方寸匕。日三服。夜一服。

治金瘡弓弩所中。悶絕無所識。琥珀散方。

琥珀隨多少搗篩。以童子小便服之。乃熱不過。三服便差。

治金瘡弓弩所中。筋急屈伸不得。敗弩散方。

乾地黄十分

乾棗三枚

杜仲二分

當歸四分

附子炮四分

故敗弩筋燒灰五分

右七味合搗篩理令勻。溫酒服方寸匕。日三服。夜一。增一至三。

治金瘡內傷。蛇咬散方。

蛇咬

甘草炙

芎藭

白芷

當歸各一兩

續斷

黃芩

澤蘭

乾薑

桂心各三分

烏頭炮五分

右十一味合搗。篩理令勻。酒服方寸匕。日三服。夜一服。

治金瘡中筋骨。續斷散方。

芎藭半兩

地黃二兩

蛇咬二兩

當歸半兩

菴蓉半兩

乾薑炮三分

續斷三兩

附子炮三分

漢椒汗三分出目

桂心三分

人參一兩

甘草炙一兩

細辛二分

白芷三分

一本用芍藥一兩半

右十四味搗。篩理令勻。調溫酒服之。方寸匕。日三服。夜一服。

治金瘡煩疼。麻黃散方。

麻

黃去節六分

甘

草炙五分

乾

薑三分

附

子炮三分

當

歸三分

白

芷三分

續

斷三分

黃

芩三分

芍

藥三分

桂

心三分

芎

藭三分

右十一味搗篩理令勻。調溫酒服方寸匕。日三服。夜一服。

治金瘡煩滿。疼痛不得眠睡。白薇散方。

白

薇

苦

薑

枳

實炒

辛

夷去毛

甘

草炙

石

膏已上各一兩

厚

朴炙二分

酸

棗炙二分

右八味爲末。調溫酒服方寸匕。日三服。夜一服。

治金瘡去血多。虛竭。內補當歸散方。

當

歸三分

芍

藥五分

乾

薑三分

辛

夷去毛二分

甘草三分

右五味搗篩理令勻。調溫酒服方寸匕。日三服。夜一服。

治金瘡去血多。虛竭。內補莢蓉散方。

莢蓉

當歸

甘草炙

芎藭

黃芩

桂心

人參

芍藥

乾薑

吳茱萸

白及

厚朴炙

黃耆各一兩

蜀椒三分出汗

右十四味。篩理令勻。調溫酒服方寸匕。日三服。夜一服。

治金瘡內塞。澤蘭散方。

澤蘭

防風

蜀椒去目

石膏末

附子炮

乾薑

細辛

辛夷去毛各

芎藭三分

當歸三分炒

甘草四分炙

右十一味。篩理令勻。調溫酒服方寸匕。日三夜一。膿多倍甘草。渴加苦蘘二分。煩加黃芩二分。腹滿氣短。加厚朴二分。瘡中血瘀。加辛夷一倍。

治金瘡內塞。黃耆散方。

黃耆三兩

芎藭

白芷

當歸

麻黃去節

鹿茸

黃芩

細辛

乾薑

芍藥

續斷

桑蟲屎已上各一兩

附子炮半兩

山茱萸一兩

右十五味。搗篩理勻。調溫酒服方寸匕。日三服。夜一服。漸可至二匕。

治金瘡中茛藥。解毒藍子散方

藍子五合

升麻八兩

甘草四兩

王不留行四兩

右四味搗篩理令勻。調冷水服二方寸匕。日三夜二。及以方寸匕。水和勻。塗瘡上。毒即解去矣。

治金瘡大渴。內補雙麥散方。

雙麥

芎藭

當歸

甘草炙

乾薑

桂心

續斷

厚朴炙

白斂

蜀椒

去目閉

辛夷

牡蠣末

芍藥

桔梗

乾地黄

防風

各三分

細辛二分

苦蕒一分

人參三分

右十九味搗篩理令勻。調溫酒服方寸匕。日三夜一。或筋骨斷。更加續斷三分。治被打。腹中瘀血。蒲黃散方。

蒲黃一升

當歸二兩

桂心二兩

右三味。搗篩理勻。調酒服之。方寸匕。日三夜一。不飲酒。熱水下。
治癰疽金瘡。續斷生肌膏方。

續斷

乾地黄

細辛

當歸

芎藭

黃耆

通草

芍藥

白芷

牛膝

附子炮

人參

甘草炙各二兩

臙月猪脂四升

右十四味。㕮咀。諸藥內膏中。漬半日。微火煎三上。候白芷色黃。膏即成。傅瘡上。日四五。膏中是猪脂煎。

治金瘡癰疽。止痛生肌甘菊膏方。

茵草

芎藭

甘草炙

防風

黃芩

大戟已上各一兩

生地黄四兩

芍藥一兩

細辛

大黃

蜀椒去目閉

杜仲

黃耆各半兩

白芷一兩

右十四味。㕮咀。以臈月猪脂四升。微火煎五上下。白芷候黃成膏。一方添甘菊二兩。以傅瘡上。日易兩次。

治癰疽金瘡生肌膏方。

大黃

芎藭

芍藥

黃耆

獨活

當歸

白芷已上各一兩

薤白方二兩別

生地黄方一兩別

右九味。合薤㕮咀。以猪脂三升。煎三上下。白芷黃。膏成。絞去滓用。磨之多少。隨其意。

治金瘡腹內有瘀血。烏雞湯方。

烏雌雞一隻

大黃三兩

細辛三兩

人參一兩

甘草炙一兩

地黃三兩

杏仁皮雙仁去

蟲蟲一兩

當歸二兩

芍藥一兩

黃芩一兩

桃仁皮碎仁去

大棗二十枚

右十三味。理烏雞如食法。以水二斗。煮雞取一斗。呋咀。諸藥內雞汁中。更煮取三升。絞去滓。通寒溫傷出。困甚者。初服五合。以一日二夕盡湯。便應下。食之粥。慎食他物。

治金瘡內有瘀血。未及得出。而反成膿。烏雞湯方。

烏雞一隻

白芷

麥門冬去心

甘草炙

芍藥

常歸一兩已上各

桂心二兩

瓜蒌練二兩

右八味。先理雞如食法。以水二斗。煮取七升。呋咀。諸藥內汁中。更煮取三升。去

滓。服七合。日三。夜勿食。

治金瘡有瘀血。桃核湯方。

蟾 蟲三十枚熬

蟲 蟲

水 蛭各三十枚熬

桂 心二分

大 黃五兩

桃 核五枚去皮切

右六味。酒水各五升。㕮咀。合煮取三升。去滓。服一升。日三服。

治金瘡驚悸。心中滿滿。如車所驚怛。独心湯方。

独 心一具

人 參

桂 心

甘 草炙

乾地黄

桔 梗

石 膏末

芎 藭各一兩

當 歸二兩

右九味。細切。剉諸藥。㕮咀。先以水二斗。煮心。取汁八升。內諸藥。煮取一升。一服八合。一日令盡。

治金瘡癰疽生肉膏方。

黃耆

細辛

生地黄

蜀椒去目汗

當歸

芍藥

薤白

芎藭

獨活

茯苓

白芷

丹參

黃芩

甘草已上各一兩

臙月猪脂二斤

右十五味。㕮咀。以苦酒一升。合漬諸藥。夏一夜。冬二夜。浸以微火煎三上。候苦酒氣成膏用之。

治被打腹中瘀血。白馬蹄散方。

白馬蹄燒令烟盡。搗篩。溫酒服方寸匕。日三夜一。亦治婦人血疾消為水。

劉涓子鬼遺方

宋龔慶宣撰

卷二

治年四十已還強壯。常大患熱癰。無定處。大小便不通。大黃湯方。

大黃三兩

梔子五十

升麻二兩

黃芩三兩

芒消方一兩別
方二兩

右五味切。以水五升。煮取二升四合。去滓。下消。絞調。分溫三服。快利爲度。

治發癰疽兼結實。大小便不通。寒熱。已服五疳湯。吐出不得下。大渴煩悶。淡竹葉湯方。

淡竹葉切四升

苦薑四兩

通草

前胡

升麻

茯苓

黃芩

知母

甘草炙

石膏末已上
各二兩

生地黄十兩

芍藥一兩

大黃三兩

黃耆三兩

當歸半兩

人參一兩

右十六味。先以水一斗六升。煮竹葉。去葉。取九升。內諸藥後。煮取三升二合。分四服。日三夜一。快痢便止。不必盡湯。湯盡不痢。便合取痢。治發背發乳。四體有癰疽。虛熱大渴。生地黄湯方。

生地黄十兩

竹葉四升

黃芩

黃耆

甘草

茯苓

麥門冬去心已上
各三兩升麻

前胡

知母

芍藥各二兩

苦薑四兩

大棗二十枚
去核

當歸半兩

人參一兩

右十五味。先以水一斗五升。煮竹葉。取一斗。去葉。內諸藥。煮取三升六合。分爲四服。日三夜一。

治發背乳癰。已服生地黄湯。取利後服此淡竹葉湯方。

淡竹葉四升

麥門冬去心

黃耆

芍藥

乾地黄

生薑已上各三兩

前胡

黃芩

升麻

遠志去心

苦蘘各二兩

大棗十四枚

當歸一兩

右十三味。先以水一斗八升。煮竹葉及小麥一斗。去滓。內諸藥。再煮取三升。分

溫三服。右語責竹葉小麥恐是麥門冬也。不是小麥也。

治癰疽虛熱。生地黄湯方。

生地黄五兩

人參

甘草炙

黃耆

芍藥

茯苓各三兩

當歸

芎藭

黃芩

通草各二兩

大棗二十枚

淡竹葉切成

右十二味。先以水二斗。煮了水。取一斗五升。去滓。復煮諸藥。再煮取四升八合。一服八合。日三夜再。能頓服為佳。

治癰疽內虛熱渴甚。黃耆湯方。

生地黃八兩

竹葉切成

小麥二升

黃耆

黃芩

前胡

大黃各三兩

苦蕒四兩

通草

芍藥

升麻

茯苓

甘草

知母各二兩

人參

當歸各一兩

右十六味。先以水二斗。煮竹葉及小麥。取一斗二升。去滓。復煮諸藥。取四升。分四服。日三夜一。小便利。除通草、茯苓。加麥門冬。腹滿加石膏三兩。熱盛去人參。

當歸。

治背。生地黄湯方。

生地黄八兩

人參

甘草炙

芍藥各二兩

通草

茯苓

黃耆

黃芩各三兩

淡竹葉切二升

大棗二十枚

當歸

芎藭各一兩

右十二味。先以水三斗。煮竹葉取一斗。去滓。內諸藥。再煮四升。一服八合。日三夜再。若能每服一升。佳。

治癰疽內虛。黃耆湯方。

黃耆

人參

甘草炙

芍藥

當歸

生薑各三兩

大棗二十枚

乾地黄

茯苓各二兩

白朮一兩

遠志半兩

右十一味。以水一斗三升。煮取四升。去滓。分溫四服。

治癰疽。五味竹葉湯方。

竹葉升切二

五味子

前胡

當歸

乾地黄

人參各二兩

小麥二升

黃耆

黃芩

麥門冬去心

生薑各三兩

甘草半兩炙

升麻一兩

大棗枚十四

桂心半兩

右十五味。先以水二斗。煮竹葉、小麥。取一斗。去滓。內諸藥。煮取三升。分溫四服。日三夜一。

治癰疽發背。乳大去膿後。虛憊少氣欲死。服此遠志湯方。

遠志去心

當歸

甘草炙

桂心

芎藭各一兩

黃耆

人參

麥門冬去心各三兩

茯苓二兩

乾地黄二兩

生薑五兩

大棗十四枚

右件十三味。以東流水一斗。煮取三升二合。分溫四服。日三夜一。

治發背乳下復住。服此白石脂湯方。

白石脂四兩

龍骨三兩

當歸

桔梗

女萎

黃連去毛

甘草二兩上各

白頭翁一兩

乾薑三兩

右九味。水九升。煮取三升二合。分四服。下住便止。不必盡服。當下。未即來日止。治發癰疽。取利熱。小便退。不用食物。竹葉湯方。

淡竹葉切三

小麥二升

乾地黄

人參

黃芩

前胡

升麻各二兩

麥門冬去心

生薑

黃耆

芍藥各三兩

大棗十四枚

桂 心半兩

遠志去心半兩

當歸一兩

甘草炙

右十六味。切。先以水一斗八升。煮竹葉、小麥。取一斗。去滓。內諸藥。又煮取三升。分二服。羸者分四服。日三夜一。

治癰疽取下後。熱少退。小便不利。竹葉湯方。

淡竹葉切一

小麥三升

乾地黄四兩

黃膏

人參

甘草炙

芍藥

石膏末

通草

升麻

黃芩

前胡各二兩

大棗枚十四

麥門冬去心三兩

右十四味。先以水一斗六升。煮竹葉、小麥。取九升。去滓。內諸藥。煮取三升二合。強卽分三服。羸卽四服。日三夜一。

治癰疽取利後熱。小便不利。竹葉湯方。

竹葉切三

小麥二升

人參

黃芩

前胡

芍藥

甘草炙

乾地黄

當歸

桂心各二

黃耆三兩

麥門冬三兩

龍骨碎三兩

牡蠣末一兩

赤蛸條三升

大棗去核十四枚

右十六味。以水二斗。煮竹葉、小麥。取一斗。去滓。內諸藥。煮取四升。分四服。日三夜一。

治發背癰及發乳。兼味竹葉湯方。

淡竹葉切三

小麥三升

黃耆

黃芩

五味子

人參

前胡

乾地黄

當歸各二

大棗十四枚

麥門冬二兩

升麻一兩

桂心半兩

甘草炙一兩

生薑三兩

服。右十五味以水二斗。煮竹葉小麥。取一斗。去滓。內藥。煮取三升。分溫三服。一日

治發背已潰。而下不住。白石脂湯方。

白石脂四兩

龍骨三兩

當歸二兩

桔梗二兩

女萎

白頭翁各四兩

黃連二兩

乾薑三兩

右八味。以水九升。煮取三升三合。去滓。服八合。日三夜一。

治發背已潰。大膿汁。虛憊少氣力。內補黃耆湯方。

黃耆三兩

乾地黄

人參

茯苓各二兩

當歸

芍藥

芎藭

桂心

遠志去心各一兩

甘草半兩

麥門冬去心三兩

生薑五兩

大棗十四枚

右十三味。以水一斗。煮取三升二合。去滓。分溫四服。日三夜一。

治癰疽內虛熱。生地黄湯方。

生地黄五兩

人參

甘草炙

芍藥

茯苓

芎藭

通草

黃芩

當歸各二兩

大棗二十枚

竹葉切三升

右十二味。以水三斗。煮竹葉取半。去滓。內諸藥。煮取四升。分五服。日三夜二。能

服一升。可佳。

治發背。黃耆湯方。

黃耆

黃芩

遠志

麥門冬去心各

乾地黄

人參

芎藭

甘草炙

芍藥

當歸各一兩

大棗二十枚

生薑五兩

鷄臍脰二具皮勿去

桑螵蛸十四枚炙

右十四味。㕮咀。以水一斗。先煮取四升五合。一服九合。日三服。夜一服。

治炎疽。枳實湯方。甘林所得

枳實炙

夜干

升麻

乾地黄

黃芩

前胡各三兩

犀角半兩

大黃二兩

麝香半兩

一方用甘草二兩

右九味。㕮咀。以水九升。煮取分溫。三服須差也。

治腸癰。大黃湯。癰之為病。診小腹腫痞堅。按之則痛。或在膀胱左右。其色或赤或白色堅。大如掌。熱。小便欲調時。色色汗出。時復惡寒。其脈遲。堅者。未成膿也。可下之。當有血。脈數。膿成。不可服此方。

大黃四兩

牡丹三兩

芥子半升

消石三合

桃仁五十枚去

右五味。㕮咀。以水六升五合。分爲兩服。膿下無者。下血大良。

治背上初欲作疹。便服此大黃湯方。

大黃三兩 梔子去心一百枚 升麻 黃芩

甘草炙各三兩

右五味。以水九升。煮取三升半。分爲三服。得快下數行。便止。不下更服。

治婦人妬乳。辛夷湯方。

辛夷去毛一升 大棗三十枚 桂枝長一尺 防風二分

白朮 甘草炙一尺 生薑二分 澤蘭切一升

右八味。切。以水一斗。煮取三升。分溫三服。

治婦人客熱。乳結腫。或潰或作癰。內補黃耆湯方。

黃耆

茯苓各三兩

芍藥二兩

麥門冬去心三兩

甘草炙二兩

厚朴炙一兩

人參三兩

生薑四兩

乾地黄三兩

右九味。切。以水一斗二升。煮取三升。分五服。日三夜一。
治癰腫。患熱盛。黃耆湯方。

黃耆

麥門冬去心三兩

黃芩六分

梔子十四枚

芍藥三兩

苦蘘二兩

乾地黄二兩

升麻一兩

右八味。剉。以水一斗。煮取三升。分溫三服。

治發癰疽腫潰。去膿多。裏有虛熱。內補黃耆湯方。

黃耆二兩

茯苓

桂心

人參各二兩

麥門冬去心三兩

甘草炙六分

生薑一兩

遠志去心二兩

當歸二兩 五味子四兩 大棗二十枚

右十一味。切。以水一斗。煮取四升。分六服。日四夜二。

治癰去膿多。虛滿上氣。竹葉湯方。

竹葉切二升 半夏二兩 甘草二兩 厚朴三兩

小麥四升 生薑五兩 當歸一兩 麥門冬二兩

人參 桂心各一兩 黃芩三兩

右十一味。切。以水一斗半。先煮竹葉、小麥。取九升。去滓。又煮諸藥。取二升。分溫三服。

治癰疽腫煩熱。增損竹葉湯方。

竹葉切一握 當歸 茯苓 人參

前胡 黃芩 桂心 芍藥各二兩

甘草炙三兩

大棗二十枚

小麥一升

麥門冬去心一升

右十二味切。以水一斗六升。煮竹葉小麥。取一斗一升。去滓。內諸藥。煮取三升。分服。日三。夜重加黃耆二兩。胸中惡。加生薑六兩。下者。減芍藥。黃芩各六分。如體強羸者。以意消息之。

治癰疽後補塞。去客熱。黃耆湯方。

黃耆

生薑

石膏末

甘草炙

芍藥

升麻

人參二兩上各

知母

茯苓各一兩

桂心六分

麥門冬去心二兩

大棗十四枚

乾地黄一兩

右十三味切。以水一斗二升。煮取四升。分溫四服。日三夜一。

劉涓子鬼遺方

宋龔慶宣撰

卷四

黃父癰疽論

九江黃父問於岐伯曰。余聞腸胃受穀。上焦出氣。以溫分肉。而養骨節。通腠理。中焦出氣如露。注谿谷而燥經脈。津液和調。變化而赤爲血。血和則乘脈。先滿乃注經絡。經絡皆盈。乃注於經絡。句有脫誤陰陽已張。因息乃行。行有經紀。周有道理。與天合同。不得休止。切而調之。從虛去實。寫則不足。疾則氣留。去虛補實。則有餘。血氣已調。形神乃持。余已知血氣平與不平。未知癰疽之所從生。成敗之時。

死生之期。期有遠近。何以度之。可知聞乎。

岐伯曰。經脈流行不止。與天同度。與地同紀。故天宿失度。日月薄蝕也。經始紀。水道流溢。草叢不成。五穀不植。經路不通。民不往來。菴聚邑居。別離異處。血氣猶然。則言其故。

夫血脈榮衛。周流不休。上應星宿。下應經數。寒客於經絡之中。則血泣。泣則不通。不通則歸之不得復及。故癰腫。與寒氣化爲熱。熱勝則肉腐。肉腐則爲膿。膿不寫。則爛筋。筋爛則傷骨。骨傷則水。髓消不當。骨肉不寫。筋枯空虛。筋骨肌肉。不得相親。經脈敗漏。熏於五藏。五藏傷。故死矣。

黃父曰。願聞於癰疽之形。與其期日。

岐伯曰。略說癰疽。極者一十八種。癰發於嗑。名曰猛疽。猛疽不治。則化爲膿。膿塞其咽。半日死。其爲者寫則已。含豕膏無冷。寫三日而已。一方無發於頸者名曰

天疽。其狀癰大而赤黑。不急。則熱氣下入淵脈。腋前傷任脈。內熏肝脈。十餘日死。陽氣大發。消腦。名曰腦漂。其色不樂。項痛如刺。以藏頭。乘心者不治。本作發於肩及臑者。名曰雌癰。其狀赤黑。急治之。此令人汁出至足。不害五藏。發於腋下赤堅者。名曰米疽。治之砭石。欲細長疏。或云塗豕肉膏。日以勿裹其疽。堅而不潰者。馬刀夾纓乃治之。

發於胸者。名曰井疽。其狀如大豆。三四日起。不早治。下入腹。不治。十日死。

發於臆者。名曰甘疔。其狀如穀實。萎黃。常寒熱。急治之。去其寒。十歲似誤死。死後膿自出。

發於脅者。名曰改訾。改訾者。女子之病也。久之其疾大。癰膿治之。其中乃有生肉。大如赤小豆。剉陵翹草。陵根各一升。水六升。煮之竭。爲三升。卽強飲厚衣。坐釜上。令汗出至足已。

發於股陽明。名曰股蠃疽。其狀不甚變。而癰膿附骨。不急治。四十日死。

發於股陰。名曰赤施疽。不急治。六日死。在兩股之內。不治六日死。六日方死。十發於尻。名曰兌疽。其狀赤堅大。急治之。不速治。三十日死。

發於膝。名曰雌疽。其狀癰色。不寒熱而堅。勿破。破之死。須以手緩柔之。乃破。諸疽發於節而相應之者。不可治之也。

發於陽者。百日死。

發於陰者。四十日死。

發於腦。名曰菟齧。其狀疾赤。至胃。急治之。不治煞人。

發於踝。名曰走緩。其狀癰也。急不變。灸而止其寒熱。不死。

發於足上。名曰四淫。其狀如癰。不急治之。百日死。

發於足。名曰厲疽。其狀初小指發急。治之去其黑者。不輒益。不治。百日死。

發於足指。名曰脫疽。其狀赤黑不死。治之不衰。急漸去之。治不去。必死矣。

夫癰疽者。初發始微。多不爲急。此實奇患。惟宜速治之。急治不若速。成病難救。以此致禍。能不痛哉。具述所懷。以悟後賢。謹按黃父癰疽論。所著緩急之處。生死之期。如有別癰之形色。難易之治。如左。僧納私撰。是用非是先賢。恐後高雅。故記之名字。令惑之耳。

發皮肉淺腫。高之赤卽消。不治亦愈。

發筋肉深腫。下之堅。其色或青或黃白黑。或復微熱而赤。宜急治之。成消中。半發附骨者。或未覺肉肉。肉肉已殃者。癰疽之甚也。

凡發背。外皮薄爲癰。皮堅爲疽。如此者多現先兆。宜急治之。皮堅甚大者。多致禍。夫癰壞後。有惡肉當者。以猪蹄湯洗其穢。次傳食肉膏散。惡肉盡。乃傳生肌膏散。乃摩四邊。令善肉速生。當須絕房室。慎風冷。勿自勞動。須筋脈復常。乃可自勞。

耳。不爾。新肉易傷。則重發。便益潰爛。慎之慎之。

相癰疽知是非可灸法

癰疽之甚。未發之兆。肥渴爲始。始發之始。或發日疽。死。似若小癰。或復大痛。皆是微候。宜善察之。欲知是非。重按其處。是便隱。復按四邊。比方得失。審定之後。卽灸第一。便灸其上。二三百壯。又灸四邊。一二百炷。小者灸四邊。中者灸六處。大者灸八處。壯數處所。不患多也。亦應卽怙。卽薄。令得所。卽消。內服補暖湯散。不已。服冷藥。外卽冷薄。不已。用熱貼。貼之法。開其口。泄熱氣。

相癰疽知有膿可破法

癰大堅者。未有膿。半堅薄。半有膿。當上薄者。都有膿。便可破之。所破之法。應在下逆上破之。令膿得易出。用銚針。膿深難見。上肉厚而生肉。火針。若外不別有膿。可當其上數按之。內便隱痛者。肉殃。堅者。未有膿也。按更痛於前者。內膿已熟。

也。膿泄去熱氣。不爾長速。速即不良。

治癰疽腫松脂貼方。

黃蘗

芎藭

白芷

白斂

黃耆

黃芩

防風

芍藥

茵草

白朮

當歸

大黃各一兩

細辛二分

麝香三兩

松脂二斤

右十六味。切。曝乾極燥。微火煎三上下。手不得離。布綿絞去滓貼之。

治癰疽腫松脂貼方。

當歸

黃耆

黃連

芍藥

黃芩

大黃

麝香

芎藭各一兩

脂一斤

脂半合

右十味。細切合煎。微火三上下。膏成。綿布絞去滓。向火塗紙上貼之。
治癰疽。松脂貼腫方。

松脂一斤

大黃三分

臘脂一兩

細辛半分

黃芩半分

防風半分

白芷

白斂

芎藭

當歸

芍藥

茵草

黃連

白朮

黃蘗各一

右一十五味。細切。曝令極燥。先煎脂朮。下松脂烱盡。內諸藥。三上下。候色足。絞以綿布。水中以新竹片上火炙之。施紙上貼之。此藥大秘。實有奇効。不妄傳之。
治癰疽。升麻薄極冷方。

升麻一兩

大黃一兩

白斂六分

黃耆一兩

黃芩六分

白及乾者一分

牡蠣二分

龍骨一兩

甘草二分

芎藭一兩

右十味。篩。和以猪膽調。塗布。傅之。癰上。燥易之。

治癰白欬薄方。

白欬

大黃

黃芩各等分

右三味。搗篩。和雞子白塗布上。薄癰上。乾燥輒易之。亦可治。又以三指撮置三升。水中煮三沸。綿注汁。拭腫上。數十過。以寒水石沫塗腫上。紙覆之。燥復易。一易輒以煮汁拭之。晝夜二十易之。

治癰疽。始一二日。痛微內薄令消。猪膽薄方。

黃耆

龍骨

青木香

梔子仁

羚羊角

乾地黄

升麻

白欬

大黃

黃蘗

黃芩

芎藭

赤小豆

麻黃去節

黃連

犀角一兩

右十六味。各等分。搗篩。以猪膽調令如泥。以故布開口如小豆大。以泄熱氣。治腫熱盛。口燥患渴。除熱止渴。黃耆湯方。

黃耆

苦蘘

乾地黄

升麻各二兩

麥門冬去心三兩

梔子二十枚

芍藥三兩

黃芩一兩半

右八味。以水一斗。煮取三升。分溫三服。

治客熱鬱積在內。或生癰。黃耆湯方。

黃耆二兩

人參一兩

芍藥

當歸

甘草炙各一兩

遠志去心

乾地黄各二兩

大棗二十枚

生薑五兩

麥門冬五兩去心

右十味。切。以水一斗二升。煮取三升。分溫三服。

治癰未潰。黃耆湯方。

黃耆四兩

甘草二兩

桂心三兩

芍藥

半夏

生薑八兩

飴一斤

右七味。以水七升。煮取三升。飴化。分三服。

治癰內補竹葉黃耆湯方。

竹葉切一

黃耆四兩

甘草三兩

芍藥四兩

黃芩一兩

人參二兩

桂心用半兩如冷

大棗十二枚

乾地黄二兩

升麻三兩

茯苓

生薑各一兩

右十二味。以水二斗。煮竹葉澄清。取九升。內諸藥。更煮取三升。分溫三服。

治補度冷下。赤石脂湯方。

赤石脂

人參

甘草炙

乾薑各二兩

龍骨碎一兩

附子大者一枚炮

右六味切。以水八升。煮取二升半。去滓。分溫三服。如人行十里。進一服。
治取冷過寒下。飴見出。溫中湯方。

甘草炙六分

乾薑六分

附子炮去皮六分

蜀椒二百四十粒去目閉口出汗者

右四味切。以水六升。煮取二升。分溫三服。

治斷下補胃附子湯方。

附子炮二分

當歸

人參

黃連

甘草炙各一兩

乾薑

桂心

芍藥各二分

蜀椒三分半去汗目閉

右九味。以水五升。煮取一升五合。去滓。分溫二服。

治癰瘡。及惡瘡有惡肉。猪蹄湯洗方。

猪蹄一具修如食法

白斂二兩

白芷二兩

黃連二兩

狼牙二兩

芍藥三兩

黃芩

獨活

大黃各一兩

右九味。以水三斗。煮猪蹄一斗五升。去蹄。內諸藥。又煮取五升洗瘡。日四次。甚良。

治癰疽腫壞多汗。猪蹄湯方。

猪蹄一具治如食法

芎藭

甘草炙

大黃

黃芩各二兩

芍藥三兩

當歸一兩

右七味。先以水一斗五升。煮蹄取八升。去蹄。內諸藥。更煮取三升。更去滓。及溫洗瘡上。日三。亦可以布內湯中。薄瘡腫上。燥復之。

治肘疽方。

黃連

皂

莢各等分炙去皮子

右二味。搗下。和以淳苦酒。調令如泥。塗滿肘。以綿厚薄之。日三易良。

治癰疽最膿。增損散方。

黃

耆五倍之

小

豆生一倍之

芎

藟生二倍之

白

欬瘡三分有膿

苦

蕒三利倍之

右六味。搗篩。令細。酒調。溫服方寸匕。日三。

治癰消膿。木占斯散方。

木占斯

桂心

人參

細辛

敗醬

乾薑

厚樸

甘草炙

防風

桔

梗已上各一兩

右十味。搗篩酒服方寸匕。入咽覺流入瘡中。若癰及疽亦之。不能發壞者可服之。瘡未壞。去敗醬。已發膿內入敗醬。此藥時有化癰疽成水者。方正桂爲異。故兩存焉。

治發背及婦人發房并腸癰。木占斯散方

木占斯

厚樸炙

甘草炙

細辛

苦蘘

防風

乾薑

人參

桔梗

敗醬已上各一兩

右十味。搗篩。清酒服方寸匕。日七夜四。以多爲善。敗醬。草名也。病在上者當吐。在下者當下膿血。此謂腸癰之屬也。諸病在裏。惟服此藥。卽覺有力及癰疽。便卽復痛。長服治諸瘡及疽。痔瘡已潰。便卽早愈。凡俗流醫。不知用此藥。發背有不善而渴。便勤服之。若藥力行。覺渴心便消散。若雖服壞終无苦。但晝夜服勿

懈也。發此藥消散。不覺腫去時即愈。或長服即去敗醬。偏治婦人乳腫諸症。速愈良。又云。惟服有異。始覺背有不善之也。

治諸癰疽。已潰未潰。瘡中疼痛。膿血不絕。嬰麥散方。

嬰麥

白芷

黃耆

當歸

細辛

芍藥

薏苡仁

芎藭

赤小豆末各一兩

右九味。先以清酒小豆出於銅器中。熬令乾。復漬。漬後復熬五過止。然後治末合搗篩。溫酒服方寸匕。晝夜各五。三日後痛痒者。肌肉也。又方。用苦酒漬小豆。多痛倍嬰麥。瘡口未開倍白芷。多膿倍黃耆。薏苡仁。芍藥等。治癰食惡肉散方。

藜蘆半一分

真珠半一分

石硫黃

雄黃

麝香各三分

馬齒

礬石熬

漆頭

蘆茹各三分

右九味篩搗粉瘡上。亦可爲膏。和傅瘡上。

治癰疽。食惡肉散方。

雄黃一兩

礬石熬一分

蘆茹一兩

右三味篩搗。稍著之。隨用多少。不限一兩。

治癰疽兌膏方。

當歸

芎藭

白芷

松脂各二兩

烏頭一兩

猪脂二升

巴豆十枚

右七味。㕮咀。內膏中。微火合煎三沸已。內松脂合攪相得。以綿布絞之。去滓。以膏著綿絮兌頭丈。作兌兌之。瘡雖深。錢兌之。膿就兌盡卽善。肉瘡錢者不足兌。

着瘡中日三惡肉盡則止。

治食肉青龍膏方。

白礬二兩火煉末

熟梅二枚去核

鹽三合

大錢七枚

右四味。於銅器中。猛火投之。摩滅成末。乃和猪脂搗一千杵。以塗瘡上。甚痛勿怪。此膏食惡肉盡。復着可傅蛇啗膏塗之。令善肉復生。

治癰疽。金瘡生肉膏方。

大黃

芍藥

黃耆

獨活

白芷

芎藭各一兩

當歸一兩

薤白二兩

生地黄三兩

右九味。咬咀。以盛煎猪膏三升。煎三上下。以綿布絞去滓。用兌摩多少。隨意常用之。

治丹癰疽。始發炊熱。浸淫長成。搗湯方。

升麻

黃芩

各三兩

黃連

大黃

各二兩

當歸一兩

甘草

炙一兩

芎藭

二兩

芒硝

三兩

羚羊角屑各一兩

右九味。咬咀。以水一斗三升。煎取五升。絞去滓。鎔中內芒硝。上火攪令成。沸盡滓。稍分適冷熱。貼帛搗腫上數過。其熱隨手消散。王練甘林所秘。不傳此方。

劉涓子鬼遺方 卷四

劉涓子鬼遺方

宋龔慶宣撰

卷五

治癰疽敗壞。生肉地黄膏方。

生地黄一斤

辛夷

獨活

當歸

大黃

芎藭

黃耆

薤白

白芷

芍藥

黃芩各二兩

續斷二兩

右十二味。切。以臙月猪脂四升。微火煎。白芷色黃膏成。絞去滓。傅。日四。治癰疽瘡。生肉黃耆膏方。

黃耆

細辛

生地黄

蜀椒去目閉

當歸

芍藥

薤白

白芷

丹參

甘草炙

茯苓

獨活

黃芩已上各一兩

臙月猪脂半斤

右十四味。細切。以苦酒一升二合。夏即漬一日。冬二夜。微火煎三上下。酒氣盡成膏。傅之極良。

治發背乳口已合。皮止急痛。生肉膏方。

丹參

防風

白芷

細辛

芍藥

黃芩

芍藥

甘草炙

黃耆

牛膝

槐子

獨活

當歸

右十三味。切。以臙月脂五升。微火煎。三上下。白芷黃膏成。病上摩。向火日三四。治癰腫堅強不消。不可用傅貼處。黃芩膏方。

黃耆

黃芩

芎藭

白斂

防風

茵草

白芷

芍藥

大黃

細辛

當歸已上各一兩

右十一味。㕮咀。以猪脂四升。微火上煎。一沸一下。白芷黃即成膏。傅之。堅硬者。日可十易。

治癰疽。止痛生肌。鷓脂膏方。

松脂七兩

芍藥

當歸

芎藭

黃芩各一兩

鷓脂七兩

白臙五兩

右七味。㕮咀。以臙月猪脂二升二合。微火煎。一沸一下。三十過成。以摩於瘡上。

治癰疽金瘡。續斷生肉膏方。

續斷

乾地黄

細辛

當歸

芎藭

黃耆

通草

芍藥

白芷

牛膝

附子炮製

人參

甘草炙已上

臘月猪脂四升

右十四味。㕮咀。著銅器中下膏。諸藥漬之半日。微火煎。三上下。白芷候黃膏成。傅之瘡上。日四五過良。

治癰疽瘡。止痛生肉。甜竹葉膏方。

甜竹葉五兩

生地黄四兩

大戟二兩

臘月脂四升

當歸

續斷

白芷

芍藥

芎藭

防風各二兩

甘草半炙

芍藥半

蜀

椒半兩 閉口去目 細辛

大黃

杜仲各半兩

黃耆半兩

右十七味。㕮咀。以猪脂微火煎。五上下。候白芷黃膏成。傅瘡上甚良。

治癰疽敗壞。生肉。苧草膏方。

苧草

當歸

薤白

黃芩

甘草二兩

生地黄五兩

白芷三兩

大黃四兩

續斷一兩

右九味。㕮咀。以猪脂三升。微火煎三沸。三上下。白芷黃膏成。傅瘡良。

治癰疽膿爛。并小兒頭瘡。牛領馬鞍革。及腸中諸惡。耳聾。痛風腫。脚疼。金木水火

毒螫所中。衆瘡百疹。无所不治。蛇蝮膏方。

蛇蝮

大戟

大黃

芍藥

附子炮

當歸

獨活

茵草

黃芩

細辛

芎藭

蜀椒去目閉口汗

薤白已上一兩

右十三味。㕮咀。以苦酒漬之。淹一夜。以猪脂二升半。微火煎。三上下膏成。綿布絞去滓。病在內。酒下彈丸大。

治癰疽食肉膏方。

松脂五兩

雄黃別研

雌黃

野葛皮各二兩

猪脂一斤

漆頭蘆茹三兩

巴豆皮膜心

右七味。先煎松脂水氣盡。下諸藥。微火煎。三上下膏成。絞去滓。內雄雌二黃。攪調。以膏着兌頭。內瘡內。日方六七。勿肉兼新。故初用病更腫赤。但用如節度。惡肉盡止。勿使過也。

治癰疽。大黃食肉膏方。

大黃

附子

茵草

芎藭

雄黃

真珠末各一兩

白斂

礬石

黃芩

漆頭蘆茹各二兩

雄黃一兩

右十一味。㕮咀。六物以猪脂一升四合。微火煎。三上下。末蘆茹下煎成膏中。以

塗兌頭。傅瘡中。須惡肉盡。勿使過也。

治癰疽食惡肉。蘆茹散方。

漆頭蘆茹

礬石

硫黃

雄黃已上各二分

右四味。搗篩。攪令著兌頭。內瘡口中。惡肉盡止。勿使過也。

治癰疽。始作便敗壞。發瘡膏方。

羊髓一兩

甘草二兩

胡粉五分

大黃一兩

猪脂二升

右五味切。合脂髓煎。二物令烊。內甘草、大黃。三上下。去滓。內胡粉。攪令極調。傅瘡。日四五上。

治久病疥癬惡瘡膏方。

丹砂

雄黃

雌黃

亂髮洗

松脂

白蜜已上各一兩

蘆茹漆頭者三兩

巴豆去皮四個

臙月猪脂二升

右九味。先煎亂髮消盡。內松脂。煎三上下成膏。絞去滓。末茹內膏中。煎攪極調。傅瘡上。日三易之。

治久病疥癬諸惡瘡毒。五黃膏方。

雌黃

雄黃

黃連

黃蘗

黃芩

青木香

白芷各二兩

亂髮子大一團雞

雞舌香一兩

狼跋子四十枚

右十味。㕮咀。以苦酒半升。漬諸藥一夜。以臙月脂三升。先煎髮一沸。內諸藥。三五沸止。絞去滓。成膏。傅瘡上。日五易之。

治病疥癬惡瘡。散熱水銀膏方。

水銀

礬石

蛇床子

黃連已上各一兩

右四物。兩度篩。以臙月猪脂七合。和并水銀。攪令調。打數萬過。不見銀膏成。傅瘡。若膏少。益取。并小兒瘡良。龔慶宣加蘆茹一兩

治面黥皤。麝香膏方。

麝香二兩

當歸

附子

芎藭

白芷

芍藥已上各一兩

細辛二合

杜衡二分

右八味。㕮咀。以臙月猪脂一升二合。煎諸藥。三上下。絞去滓別末。研麝香。安膏中。攪令調。傅炮上。日三易之。

治面瘡炮。木蘭膏方。

木蘭

防風

白芷

青木香

牛膝

獨活

藁本

當歸

芍藥

杜衡

辛夷

芎藭

細辛各一分

麝香一分

附子炮二分

右十五味。㕮咀諸藥。以臙月猪脂一升。微火煎。三沸三上下。去滓末下。攪令調。

膏成。傅炮上。日三。

治瘡炮。鷓鴣屎膏方。

右取鷓鴣屎一升。搗篩。臙月猪脂和傅之。

治頭頰。生髮白芷膏方。

白芷

蔓荊子

附子

防風

芎藭

茵草

細辛

黃芩

當歸

蜀椒

椒

各一兩去口

大

黃

半一兩

馬鬣膏五合

此所用多無

右十二味切。以臠月猪脂三升。合諸藥。微火煎。三上下。白芷色黃膏成。洗頭澤髮。勿近面。

治婦人乳腫痛。丹參膏方。

丹參

芍藥

各二兩

白

芷

一兩

右三味。以苦酒漬一夜。猪脂六合。微火煎。三上下膏成。傅之。

治頭白頰瘡。髮落生白痴。經年不差。五味子膏方。

五味子二分

兔絲子五分

菴

蓉

二分

雄

黃

一分

松脂二分

蛇床子

遠志去心各

雌黃

白蜜各一分

雞屎半分

右十味。以猪膏一升二合煎。先內雌黃。次內雞屎。次內蜜。次內松脂。次內諸藥。並先各自末之。膏成。先以桑灰洗頭。後傅之。

治疽癰癢疥諸惡瘡。連年不差。并小兒頭瘡悉治之。膏方。

黎蘆

附子

蘆茹

桂心

天雄

蛇床子

野葛皮

雄黃

亂髮洗

白芷

半夏湯洗

礬石

細辛

杏仁

芎藭

芍藥

白朮

烏頭各二兩

黃連

當歸

藁本已上各二兩

班貓

茵草

巴豆去皮

黃蘗 吳茱萸 蜀椒各一兩去目閉口汗
右二十七味。㕮咀。以苦酒漬一夜。以臙月猪脂四斤。微火煎。令酒氣盡。膏成。日四五傅。用多妙。

治久癰疽諸瘡。野葛膏方。

野葛皮	黃連	細辛	杏仁
芮草	芍藥	黎蘆	附子
亂髮	蘆茹	芎藭	白芷
蛇床子	桂心	藁本	烏頭
白朮	吳茱萸	雌黃	礬石
天雄	當歸 <small>已上各二兩</small>	班貓	巴豆
蜀椒 <small>去目閉口汗</small>	黃蘗 <small>各一兩</small>		

右二十六味。㕮咀。各搗篩。以猪脂五升。於銅器內微火煎諸藥。七沸上下。絞去滓更煎。攪勻成膏。以傅瘡上。日四五。

治丹砂膏方。三首

丹砂五兩

芎藭三兩

大黃二兩

蜀椒二兩汗去

白芷二兩

麝香三兩

升麻二兩

治葛皮二兩

麻黃五兩去節

丹參五兩

巴豆二升去皮心

桂心二兩

附子十二枚

皂莢二兩去皮子

右十四味。以猪脂六升。春夏共用。調合在後方消停。

又方。

丹砂三兩

芎藭三兩

大黃二兩

蜀椒二兩汗去目

白芷二兩

麝香六兩

白朮二兩

附子十一枚

乾薑五分 治葛二兩 丹參六兩 細辛二兩

巴豆三升去皮心

右十三味。秋冬共用。亦在年中有所宜。以意消息。藥各搗羅之。巴豆細切。以苦酒漬一夜。量足。不須覆之。明旦以猪脂成六升。鐺中微火煎。三上下膏成。勿使傍人及雞犬貓見。其膏同治共敍。此方須是細意事持。

又方。

丹砂二兩 蜀椒去目閉 大黃 白芷

甘草炙已上 巴豆三升去皮心 麝香 芎藭各二兩

附子二枚 升麻二兩 治葛皮 犀角

當歸 烏頭各二兩 丹參一斤

右十五味。切。以苦酒漬之一夜。以猪脂六升。微火煎。三上下膏成。絞去滓用之。

此膏是四時常用。日三。此方无比。

丹砂膏。敍治百病。傷寒溫毒熱疾。服如棗核大一枚。鼻塞取半核大。內鼻中。縮氣令人聰裏。若耳聾。取如兩棗核大。烱之如水。內其耳中。三五年。聾可差。或寒癖腹滿堅脹。及飛尸惡毒楚痛。溫酒服。

霍亂當成未成。已吐未痢。白湯服。棗核大。若已痢一兩行而腹煩痛。更服之。眼中風膜。膜或痛。常下泪。取如粟大。注眼中。自當下止。或半日痛便愈。

又胸背喉頸痛。摩足。口中亦稍稍令常聞有膏氣。人體自有不同者。易爲藥當服。取利爲度。老小增減。服膏之法。得利。若不利。如人行十五里。可與熱飲。發當預作白薄粥。令冷。若過利要止者。多進冷粥便佳。若能忍待藥勢盡。自止便佳。赤膏。治百病方。治病用之

治葛皮一兩

白芷一兩

蜀椒二升去目大黃

芎藭各二

巴豆三升

附子十二枚

丹參一斤

猪脂六升

右九味。㕮咀。以苦酒漬一宿。合微火煎。三上下。白芷黃即膏成。絞去滓用。傷寒
飢鼻溫酒服。如棗核大一枚。

賊風癰疽腫。身體惡氣久溫痺。骨節疼痛。向火摩之。痛疥諸惡瘡。以帛薄之。鼠
瘻疽痔下血。身體隱軫痒。搔成瘡汁出。馬鞍牛領。以藥傅之。即愈。腰背手足
流腫拘急屈伸不快。以膏傅之。日三。婦人產乳中風。及難產。服如棗核大。并以
膏摩腹。立生。如食魚哽。日五服愈。如耳聾。以膏如小豆大。着耳中。患息
肉。以膏內鼻中愈。眼齒痛。以膏如桑。注眥中。白蘆醫當童子視。以膏如粟。注
眥愈。

治癰疽丹砂膏方。

丹砂末

犀角

夜干

大黃

芎藭

麝香末

黃芩各二兩

生地黄切十兩

升麻

前胡

沉香各三兩

青木香一兩

右十二味。㕮咀。以苦酒漬。淹一宿。以猪脂五升。微火煎。三上下。絞去滓。內丹參、

麝香末。攪調。稍稍服之。

治標疽。麝香膏方。

麝香末

凝水石

黃芩

丹砂末

芎藭

雞舌香

青木香各二兩

茵草三兩

升麻三升

羚羊角

夜干

大黃

羊脂各三兩

地黄汁一升

右十四味。切。以苦酒漬一夜。用猪脂六升。微火上煎。三上下。絞去滓。內麝香、丹

砂末攪。令調膏成。以摩病上甚良。

治丁腫。生芎藭膏方。

生芎藭汁一升

丹砂二兩

生地黄二斤

白芷三兩

大黃三兩

麝香末三兩

甘草炙三兩

當歸二兩

升麻二兩

薤白八兩

右十二味。㕮咀。以苦酒漬一夜。猪脂五升。微火煎。三上下。膏成。摩於腫上。

治癰疽始發。未曾治。宜速服丹砂膏方。

丹砂末

犀角二兩

夜干三兩

生地黄十兩

大黃三兩

升麻三兩

芎藭三兩

麝香二兩

前胡三兩

沉香二兩

黃芩三兩

青木香一兩

右十二味。㕮咀。以猪脂五升。微火煎。三上下止。絞去滓。入麝香。丹砂末。攪令調。

溫酒服。如棗核大。日三服。

治風溫癰疽諸惡瘡。經年不差。其著胸臆背。日大。不可視之。恐見肺。肺髓者皆主之。傅當火。須以意用之。

丹砂膏方。

丹砂末

雄黃末

附子

天雄

乾地黄

大黃

當歸

秦膠各二兩

烏頭

桂心

黃連

松脂

茜各四兩

蜀椒目一升去汗

乾薑二兩

巴豆去皮心

蜈蚣四枚去頭足赤者

石南草二兩

右十八味。㕮咀。十六味以苦酒一斗。漬一夜。以猪脂六升。微火煎。三上下。藥色膏成。絞去滓。內二石末。攪令調。傅瘡。有口亦可兌瘡口。此脂多治合。即隨多少。

苦酒不必盡一斗。以意量用之。

治癰疥癬諸惡瘡。丹砂膏方。

蜀椒三升去目

丹砂

細辛

桂心各二兩

附子三十枚

前胡

白芷各切

芎藭切

白朮

吳茱萸升各一

當歸一兩

右十一味。㕮咀。諸藥唯椒、茱萸不搗。以苦酒漬一夜。令淹以猪脂。不中水者十斤。細切。合諸藥於銅器內。煎三上下。白芷黃成膏。以綿布絞去滓。如患風溫腫不消。服如彈丸大一枚。

若鼻塞不通。以膏着鼻中。若青盲風目。爛眦癢痛。茫茫不見細物。以綿絮裹筋頭。注膏中。以傅兩眦。至臥時。再傅之。齒痛亦如耳聾。亦准之。諸惡痛皆治之。金瘡牛領馬鞍瘡。亦可傅之。治下赤。腹中有癰。并癰疾。在外即摩之。在內即

服之。如彈丸大一枚。日三服。此膏无所不治。

治小兒頭瘡并惡瘡。紫草膏方。

紫 草三兩

黃 連

女 青

白 芷各一兩

礬 石三兩燒令汗出

苦 酒五合

生 地榆根一兩

右七味。內三味。礬石、紫草、黃連爲末。入諸藥。煎白芷黃膏成。傅瘡上。

治小兒熱瘡。水銀膏方。

水 銀二兩

胡 粉二分

松 脂二兩

猪 脂四升

右四味。煎松脂。水銀氣出。下三物。攪令不見銀。放冷以傅瘡上。

治火瘡。柏皮膏方。

右皮去黑皮。用白肉。以猪脂少多。煎去滓。候凝隨意使之。

治燥疽。浸淫廣大。赤黑爛壞成瘡。羊髓膏方。

羊髓二兩 大黃二兩 甘草一兩 胡粉二分
右四味。㕮咀。以猪脂二升半。并胡粉。微火煎。三上下。絞去滓。候冷傅瘡上。日四五。

治熱毒并結。及腫成瘡。升麻膏方。

升麻三兩 白朮一兩 牡蠣三分 白芨二兩
白藜二兩 茵草二分 夜干二兩 大黃二兩
黃連三兩

右九味。㕮咀。以猪脂三升。微火煎。膏成。絞去滓。以傅瘡上。日四五。
治熱瘡。生地黄膏方。

生地黄 白藜 白芷 黃連
升麻 黃芩 大黃十兩上各

右七味。㕮咀。以猪脂一升半。微火煎成膏。絞去滓。傅瘡。日四五。
治惡瘡皆爛。雄黃膏方。

雄黃

礬石末

黎蘆

當歸

黃連

附子各二兩

茵草

芎藭

白芨各一兩

巴豆六枚
去皮心

右十味。㕮咀。以猪脂二升。微火煎。膏成。絞去滓。內石末。攪調。傅瘡。日四五。

治癰疽瘻。水銀膏方。

水銀二兩
半

胡粉二兩

松脂二兩

猪脂四升

右四味。先煎松脂。水氣盡。下胡粉。攪令水銀盡不見。可傅瘡。日三。亦治小兒瘡熱瘡頭瘡。

治癰瘰癧瘡。白斂膏方。

白 斂 三兩

白 芷 三兩

芎 藭

大 黃

黃 連 各二兩

當 歸 三兩

黃 蘗 二兩

豆 豉 八合

羊 脂 三兩

猪 脂 二升

右十味。㕮咀。以二脂合煎。內諸藥。微火煎。膏成。去滓。候凝。傅之。

治皮膚中熱。疥癩癰。白斂膏方。

白 斂

黃 連 各二兩

生胡粉 一兩

右搗篩。溶脂。調和。傅之。

治熱瘡。生地黃膏方。

生 地 黃 四兩

黃 連 四兩

大 黃 三兩

黃 蘗

甘 草 炙

白 斂

升 麻 各二兩

右七味。㕮咀。以猪脂二升半。微火合煎。膏成。絞去滓。候凝。可傅之。

又方。治熱瘡。生地黄膏方。

生地黄三兩

黃連五兩

白斂

芍藥

白芨各二兩

苦參

升麻各三兩

右七味。㕮咀。以猪脂二升半。內諸藥同熬。膏成。去滓。候凝。傅之。

治溫熱諸瘡。黃連膏方。

黃連

白斂

白芷各二兩

生胡粉一兩

右四味。細篩。用猪脂調塗之。

治熱瘡。蛇床子膏方。

蛇床子二兩

乾地黄二兩

苦參一兩

大黃二兩

通草二分

白芷

黃連各一兩

狼牙二分

右八味。搗篩為細末。用猪脂以意調和塗之。

治熱瘡。木蘭膏方。

木蘭一兩

白芷

黃連各三兩

黃蘗二兩

芍藥一兩

梔子二十枚

黃芩二兩

狼牙二兩

夜干一兩

蛇床子一兩

右十味。㕮咀。以猪脂二升。合諸藥。微火煎。膏成。去滓。塗傅之。

治熱瘡。黃連膏方。

黃連

生胡粉各三兩

白斂二兩

大黃二兩

黃蘗二兩

右五味爲末。用猪脂。以意調和塗之。

治熱炙瘡。甘草膏方。

甘草一兩

當歸一兩

胡粉半兩

羊脂半兩

猪脂一兩

右五味。㕮咀。以猪羊脂并諸藥。微火煎成膏。絞去滓。候凝傅之。
治諸癰破後。大去膿血極虛。黃耆膏方。

黃耆

附子

白芷

甘草

防風

大黃

當歸

續斷

芍藥各一兩

茯苓一分

生地黄五分

細辛三分

右十二味。切。以猪脂三升。內諸藥。微火慢煎。候白芷黃色。膏成絞去滓。候凝塗瘡。摩四邊口中。日四過。

治癰疽已潰。白芷摩膏方。

白芷三分

甘草三分

烏頭三分

薤白十五枚

青竹皮如雞子大一塊

右五味。以猪脂一升合煎。候白芷黃膏成。絞去滓。塗四邊。
治諸疽瘡膏方。

臙一兩

亂髮

礬石熬各一兩

松脂一兩

猪脂四兩

右五味。先下脂。煎令消下髮。髮消下礬石。礬石消下松脂。松脂消下臙。臙消膏成。濾過。候凝塗傅之。

治鼻中塞。利鼻白芷膏方。

白芷

通草

麝核各一分

薰草二銖

羊髓八銖

當歸一分

右六味。以清酒煉羊髓三過。攷咀。諸藥煎膏成。絞去滓。用小豆大。內鼻中。日三。治竹木所刺。入手足。壯不出膿。疼痛。羊屎膏方。

右取乾羊屎。擣篩。用猪脂。和以塗之瘡口。立出。

治湯淚人肉爛壞。朮膏方。

朮二兩

附子二枚大者炮

甘草一兩

羊脂五兩

松脂雞子大一塊

猪脂五兩不

右六味。微火上煎猪脂。後內羊脂并諸藥。又煎膏成。絞去滓。候凝塗瘡上。日三。

治火燒爛壞。柏皮膏方。

柏樹皮黑皮四兩去

甘草三兩細切

淡竹葉二兩切

右三味。以不中水猪脂一升二合。入藥煎膏成。絞去滓。塗瘡上。日三。又方。

麻子一合取仁

柏皮取一兩白

白芷一兩

生柳皮去一兩白

右四味。㕮咀。以脂一升。同藥煎膏成。濾去滓。候凝傅瘡。日三。

治癰疽疥癬及惡瘡。蘆茹膏方。

蘆茹三兩漆

雄黃

雌黃末各一兩

丹砂研一兩

亂髮洗半兩

右五味。搗篩。令調煎。以先用猪脂二升半。煎髮取盡。內諸藥。微火更煎。候膏成。不令他人雞犬見。傅瘡上。日三。

治婦人妬乳生瘡。雌黃膏方。

雌黃

白斂

雄黃

漆頭蘆茹各一兩

亂髮雞子大一團如

右五味。各研搗篩。以不中水猪脂二升。先煎亂髮令盡。下諸藥。再微火煎。候膏成。放凝塗瘡上。日三四。

治諸惡瘡。麝香膏方。

麝香

冷石

雄黃

丹砂各五

右四味。各細研如粉。以臙月猪脂。量其多少調和。如塗傅瘡時。先用大黃湯。放溫洗了淹乾。然後塗膏。

治頭瘡惡瘡骨疽等牛屎熏方。

取苦瓠截除底。斷其鼻。取牛屎著地上燒。以無底瓠籠屎上。引煙從瓠中出。以瘡著煙上熏之。自然止。過三度即除。

治諸傷六物滅癰膏方。

衣中白魚

雞屎白

鷹屎白

芍藥

白斂

白蜂等分

右藥研如粉。以乳汁和塗癰上。日三良。

治滅癰小品方。

雞矢白一兩

辛夷仁四分

白附子二分

細辛二分

右四味。水浸一宿。以羊脂六合。限火煎。三上三下。去滓。傷癰。以甘草湯洗訖。塗之。一方有桂心二分

又方。

鷹屎白一兩。研白蜜和塗癰上。日三。

劉涓子鬼遺方終

劉涓子鬼遺方 卷五

〔明〕

吳鶴皋

原著

醫方考

中國醫學大成

醫方考提要

明吳崐撰。崐號鶴臯。安徽歙縣人。本書爲萬曆十二年所刊行。四庫全書中未錄。其自序云。取古昔良醫之方七百餘首。揆之於經。酌以心見。訂之於證。發其微義。編爲六卷。題之曰醫方考。蓋以考其方藥。考其見證。考其名義。考其事迹。考其變通。考其得失。考其所以然之故。匪徒苟然誌方而已云。先生分證集方。證列七十有二。方集七百餘首。每列一證。必先敘本證原因。爲風爲火。爲血爲氣。爲濕爲寒。之各現證。再辨諸家治法。然後彙集名方。因證致用。因用則發明愈病方義。條分縷析。綱舉目張。辨證療病之道。無餘蘊矣。

序

上醫治未病。方無尙也。垂經論焉。經論醫之奧者。中醫治已病。於是乎始有方。方醫之粗也。非其得已。視斯民之疾苦。故因病以立方耳。季世人知醫尙矣。習方其簡也。窮經其煩也。乃率以方授受。而求經論者無之。舍斯道之奧。寶斯道之粗。安望其術之神良也。余年十五志醫術。逮今十有八稔。懼辱醫名。蚤夜遑遑。惟經論是覓。不敢自是。遊海內者數年。就有道者而贅謁之。見賤工什九。良工什一。不惟上古之經論昧焉。雖中古之方。猶弗達也。弗明方之旨。與方之證。及諸藥升降浮沉寒熱溫平良毒之性。與夫宣通補瀉輕重滑澀燥濕反正類從之理。而徒執方以療病。惡能保其不殃人乎。迺爲之愍惻。取古昔良醫之方七百餘首。揆之於經。酌以心見。訂之於證。發其微義。編爲六卷。題之端曰醫方考。蓋以考其方藥。考其見證。考其名義。考其事迹。考其變通。考其得失。考其所以然之故。匪徒苟然誌方而已。君子曰。夫夫也。弱齡譴陋。輕議古人。則崐有罪焉爾。世有覺者。觸目而疵之。從而可否之。吾幸吾之得師也。遊藝者。玩索而惜之。存而左右之。吾幸吾之朋與。

也。如山野之陬。湖海之遠。求良醫而不速。得開卷檢方。能究愚論而斟酌自藥焉。則吾濟人之一念也。或者尙論千古。未張孫而本軒岐。劣羣方而優經論。則孟軻氏所謂遊於聖人之門者難爲言矣。安用夫斯籍之贅也。

皇明萬曆十二年歲次甲申孟冬月古歛吳 崐序

醫方考目錄

卷一

中風門第一	一
傷寒門第二	一五
感冒門第三	五七
暑門第四	六〇
濕門第五	六六
瘟疫門第六	七〇
大頭瘟門第七	七七

卷二

火門第八	一
------	---

卷三

癰疹門第九	一三
瘰癧門第十	一八
痢門第十一	三一
泄瀉門第十二	三七
秘結門第十三	四四
霍亂門第十四	四七
痰門第十五	五一
哮喘門第十六	五七
咳嗽門第十七	六一

虛損勞瘵門第十八	一
----------	---

五尸傳症門第十九	二九
氣門第二十	三七
血證門第二十一	四一
脫肛門第二十二	五四
嘔吐門第二十三	五六
呃逆門第二十四	五九
翻胃門第二十五	六一
噎膈門第二十六	六四
情志門第二十七	六八

卷四

脾胃門第二十八	一
傷食門第二十九	六
吞酸門第三十	一三

痞門第三十一	一五
雜門第三十二	一七
鬱門第三十三	一九
五疸門第三十四	二二
消渴門第三十五	三〇
水腫門第三十六	三四
鼓脹門第三十七	三九
小便不通門第三十八	四四
小便不禁門第三十九	四七
淋瀝門第四十	四九
精濁門第四十一	五三
自汗門第四十二	五七
盜汗門第四十三	六〇
積聚癥瘕門第四十四	六二

卷五

痿痺門第四十五	一
厥證門第四十六	七
瘥門第四十七	一〇
癰門第四十八	一二
癲狂門第四十九	一五
驚悸怔忡門第五十	一九
健忘門第五十一	二三
痛風門第五十二	二四
癘風門第五十三	二八
喉閉門第五十四	三二
頭病門第五十五	三六
腹痛門第五十六	四二

卷六

脅痛門第五十七	四七
腰痛門第五十八	四八
七疝門第五十九	五一
脚氣門第六十	五六
眼疾門第六十一	六二
耳疾門第六十二	七一
鼻疾門第六十三	七四
口齒舌疾門第六十四	七七
蟲門第六十五	一
痔漏門第六十六	四
疥瘡門第六十七	六
暴死門第六十八	一〇

醫方考目錄

痘門第六十九	一四
婦人門第七十	四二
廣嗣門第七十一	六〇
延年門第七十二	六三

醫方考

明 歙邑 吳 崐鶴皋原著

鄞縣 曹赤電炳章圈點

卷一

中風門第一

敘曰。風者。百病之長。得行天之象。故其發也暴。然上世論風。主於外感。乃河間主火。東垣主氣。丹溪主濕。而末世之論紛然矣。今考名方二十三首。爲風、爲火、爲氣、爲濕。皆時出而主之。初不泥於一說也。

烏梅擦牙關方

病人初中風筋急。口噤不開。便以鐵物開之。恐傷其齒。宜用烏梅肉擦其牙關。牙關酸軟。則易開矣。此酸先入筋之故也。其中有中風證。而口開不噤者。筋先絕也。不治。

稀涎散

猪牙皂角四條去果皮炙

共爲末。每進三字水下。

白礬一兩枯

病人初中風。暴仆痰涎湧盛。此藥與之。頻吐涎沫。壅塞少疏。續進他藥。○清陽在上。濁陰在下。則天冠地履。無暴仆也。若濁邪風湧而上。則清陽失位而倒置矣。故令人暴仆。所以痰涎壅塞者。風盛氣湧而然也。經曰。病發而不足。標而本之。先治其標。後治其本。故不與疎風補虛而先爲之吐其涎沫。白礬之味鹹苦。鹹能軟頑痰。苦能吐涎沫。皂角之味辛鹹。辛能利氣竅。鹹能去污垢。名之曰稀涎。固奪門之兵也。師曰。凡吐中風之痰。使咽喉疏通。能進湯液便止。若攻盡其痰。則無液以養筋。能令人攣急偏枯。此大戒也。

通頂散

藜蘆

生甘草

川芎

細辛

人參各一錢

石膏五錢

共爲末。

病人初中風。不知人事。口噤不能開。用此藥一字。吹入鼻中。有嚏者。肺氣未絕。可治。○中風不知人事。病則急矣。以平藥與之。不能開其壅塞。故用藜蘆與人參。細辛相反。使其相反而相用也。肺苦氣上逆。故用石膏之重以墜之。甘草之平以緩之。乃川芎之用。取其清氣利竅而已。

蘇合香丸

沉香

青木香

烏犀角

香附子

丁香

硃砂

訶梨勒

白檀香

麝香

葶藶

龍腦

白朮

安息香

蘇合油各二兩

薰陸香一兩

病人初中風。喉中痰塞。水飲難通。非香竄不能開竅。故集諸香以利竅。非辛熱不能通塞。故用諸辛為佐使。犀角雖涼。涼而不滯。訶梨雖澀。澀而生津。世人用此方於初中之時。每每取効。丹溪謂辛香走散真氣。又謂腦麝能引風入骨。如油入麵。不可解也。醫者但可用之以救急。慎毋令人多服也。

許胤宗黃耆防風湯薰蒸法

許胤宗者。唐時常州義興人也。初仕陳。爲新蔡王外兵參軍。時柳太后感風。不能言。脈沉而緊。胤宗曰。口不下藥。宜以湯氣蒸之。令藥入腠理。周時可瘥。遂造黃耆防風湯數十斛。置於牀下。氣如烟霧。次日便得語。由是超拜義興太守。崐謂鼻氣通乎天。故無形之氣。由鼻而入。呼吸傳變。無處不之。黃耆甘而善補。得防風而功愈速。驅風補虛。兩得之矣。自非胤宗之通達。不能主乎此法。醫者能善用之。則亦可以治乎今之人矣。

二陳湯

半夏夏薑製

陳皮去白

白茯苓去皮各等分

甘草炙減半

風盛痰壅。既用稀涎等藥。開其氣道。續以此方主之。○風干於脾。則痰壅然。痰之生。本於濕。半夏所以燥濕也。茯苓所以滲濕也。濕去則痰無由以生。痰之爲患。本於脾虛氣滯。甘草所以補脾也。陳皮所以利氣也。補脾利氣。則土又足以制濕。而痰且無壅滯矣。此二陳之旨也。名曰二陳。以橘半二物貴乎陳久耳。正考見痰門。

四君子湯加竹瀝薑汁方

人參

白朮

茯苓

甘草

竹瀝

薑汁

丹溪曰。半身不遂。在右者屬氣虛。以此方主之。○經曰。左右者。陰陽之道路也。故左屬血而右屬氣。氣虛者。補之以甘。故用人參、白朮、茯苓、甘草。四件稱其爲君子者。謂其甘平。有冲和之德。而無尅伐之性也。其加竹瀝。謂其行痰。其加薑汁。所以行竹瀝之滯。而共成夫伐痰之功耳。

四物湯加桃仁紅花竹瀝薑汁方

當歸酒洗

川芎洗去土

白芍藥酒炒

熟地黃

桃仁去皮尖

紅花酒洗

竹瀝

薑汁

丹溪曰。半身不遂。在左者屬瘀血。以此方主之。○芎、歸、芍、地。生血藥也。新血生則瘀血滑而易去。桃仁、紅花。消瘀藥也。瘀血去則新血清而易生。然亦加夫竹瀝、薑汁者。以痰之爲物。靡所不之。蓋無分於左右而爲患也。

八味順氣散

白朮炒

白茯苓

青皮去穢炒

白芷

陳皮去白

台烏藥

人參各一

甘草五分

中風正氣虛。痰涎壅盛者。宜此方主之。○人參、白朮、茯苓、甘草、四君子湯也。經曰：邪之所湊，其氣必虛。故用四君子以補氣。治痰之法，利氣為先。故用青皮、白芷、台烏、陳皮以順氣。氣順則痰行，而無壅塞之患矣。此標本兼施之治也。

烏藥順氣散

麻黃去節

陳皮去白

烏藥各一

枳殼去穢

炙甘草

白芷

桔梗各一

川芎洗去

白僵蠶炒

乾薑炒黑

中風遍身麻痺。語言蹇澀。口眼喎斜。喉中氣急。有痰者。此方主之。○遍身麻痺。表氣不順也。故治以麻黃、川芎。語言蹇澀。裏氣不順也。故治以烏藥、陳枳。口眼喎斜。面部之氣不順也。故治以白芷、僵蠶。喉中氣急。甘草可緩。肺氣上逆。桔梗可下。痰之為物。寒則結滯。熱則流行。佐以乾薑。行其滯也。此治標之劑也。然必邪實初病之人。方可用之。若氣虛病久者。則勿之與也。宜以補劑兼之。

牽正散

白附子 白僵蠶 全蠍
中風口眼喎斜。無他證者。此方主之。○芫防之屬。可以驅外來之風。而內生之風非其治也。星夏之輩。足以治濕土之痰。而虛風之痰非其治也。斯三物者。療內主之風。治虛熱之痰。得酒引之。能入經而正口眼。又曰白附之辛。可使驅風。蠶蠍之鹹。可使軟痰。辛中有熱。可使從風。蠶蠍有毒。可使破結。醫之用藥。有用其熱以攻熱。用其毒以攻毒者。大易所謂同氣相求。內經所謂衰之以屬也。

星香湯

牛膽南星 八錢 木香 一錢

中風。體肥痰盛。口不渴者。此方主之。○南星。燥痰之品也。曰體肥。曰痰盛。曰不渴。則宜燥也可知矣。故以南星主之。而必入於牛膽者。制其燥也。佐以木香者。利痰氣也。

省風湯

防風 去蘆 半 夏 薑製各一錢 全蠍 二錢 膽南星 木香 各五分

中風。口眼喎僻。痰涎壅盛者。此方主之。○風湧其痰。干於面部。則口眼喎僻。塞於胸中。則痰涎壅盛。是方也。防風、白附、全蠍、川烏。可以活經絡之風痰。而正口眼。南星、半夏、甘草、木香。可以療胸次之風痰。而開壅塞。方名曰省風者。省減其風之謂也。

改容膏

蓖麻子一兩

真冰片三分

共搗爲膏。寒月加乾薑、附子各一錢。

中風。口眼喎僻在左。以此膏傅其右。喎僻在右。以此膏傅其左。今日傅之。明日改正。故曰改容。或以蠅螂、冰片傅之。或以鱧血、冰片傅之。皆良。蓋此三物者。皆引風拔毒之品也。佐以冰片。取其利氣而善走竅。佐以薑附。取其溫熱而利嚴寒。此惟冬月加之。他時弗用也。

小續命湯

麻黃去節

人參去蘆

黃芩酒炒

芍藥酒炒

川芎

炙甘草

杏仁去皮炒

防己去皮

桂枝淨洗

防風去蘆各一錢

附子炮去皮五分

古人以此方混治中風。未詳其證。崐謂麻黃杏仁麻黃湯也。仲景以之治太陽證之傷寒。桂枝芍藥桂枝湯也。仲景以之治太陽證之中風。如此言之。則中風而有頭疼身熱脊強者。皆在所必用也。人參甘草四君子之二也。局方用之以補氣。芍藥川芎四物湯之二也。局方用之以養血。如此言之。則中風而有氣虛血虛者。皆在所必用也。風淫末疾。故佐以防風。濕淫腹疾。故佐以防己。陰淫寒疾。故佐以附子。陽淫熱疾。故佐以黃芩。蓋病不單來。雜揉而至。故其用藥亦兼該也。○熱者去附子。用白附子。筋急語遲脈弦者。倍人參。加薏苡。當歸。去黃芩。芍藥以避中寒。煩燥不大便。去附桂。倍加芍藥。竹瀝。日久大便不行。胸中不快。加枳殼。大黃。語言蹇澀。手足顫掉。加石菖蒲。竹瀝。口渴加麥門冬。瓜蒌。天花粉。身疼發搐。加羌活。煩渴多驚。加犀角。羚羊角。汗多去麻黃。舌燥加石膏。去附桂。

大秦朮湯

秦朮去蘆

石膏生用

當歸酒洗

芍藥酒炒

羌活去蘆

防風去蘆

黃芩酒炒

生胡洗去土音

熟苧

甘草炙

川芎洗

白朮酒炒

白芷

茯苓去皮

獨活錢一

北細辛五分

中風手足不能運動。舌強不能言語。風邪散見不拘一經者。此方主之。○中風虛邪也。許學士云。留而不去。其病則實。故用驅風養血之劑。兼而治之。用秦艽為君者。以其主宰一身之風。石膏所以去胃中總司之火。羌活去太陽百節之風。疼。防風為諸風藥中之軍卒。三陽數變之風邪。黃之細辛。三陰內淫之風濕。黃之苓朮。去厥陰經之風。則有川芎。去陽明經之風。則有白芷。風熱干乎氣。清以黃芩。風熱干乎血。涼以生苧。獨活療風濕在足少陰。甘草緩風邪上逆於肺。乃當歸。芍藥。熟苧者。所以養血於疎風之後。一以濟風藥之燥。一使手得血而能握。足得血而能步也。

三化湯

厚朴薑湯

大黃酒浸

枳實熬炒

羌活等分

中風二便數日不利。邪氣內實者。以此方微利之。○大黃、厚朴、枳實、小承氣湯也。上焦滿。治以厚朴。中焦滿。破以枳實。下焦實。奪以大黃。用羌活者。不忘乎風也。

也。服後二便微行。則三焦之氣無所阻塞。而復其傳化之職矣。故曰三化。此方惟實者可用。虛者勿妄與之。若實者不用。則又失乎通達之權。是當大寇而亡九伐之法矣。非安內之道也。

瀉青丸

龍膽草

川芎

梔子炒黑

當歸酒洗

大黃酒蒸

羌活

防風等分

中風發熱。不能安臥者。此方主之。○肝主風。少陽膽。則其府也。少陽之經行乎兩脅。風熱相干。故不能安臥。此方名曰瀉青。瀉肝膽也。龍膽草味苦而厚。故入厥陰而瀉肝。少陽火實者。頭角必痛。故佐以川芎。少陽火鬱者。必生煩燥。故佐以梔子。肝者將軍之官。風淫火熾。勢不容易以治。故又奪以大黃。用當歸者。培養乎血。而不使其為風熱所燥也。復用乎羌活。防風者。二物皆升散之品。此火鬱發之。木鬱達之之意。乃上下分消其風熱。皆所以瀉之也。

活絡丹

膽南星

川烏炮去

草烏炮去

地龍火乾土

乳香去油 沒藥各二兩

中風手足不用。目久不愈者。經絡中有濕痰死血。此方主之。○南星之辛烈。所以燥濕痰。二烏之辛熱。所以散寒濕。地龍即蚯蚓也。濕土所生。用之者何。易曰。方以類聚。欲其引星烏直達濕痰所聚之處。所謂同氣相求也。亦內經佐以利和以所宜之意。風邪注於肢節。久久則血脈凝聚不行。故用乳香沒藥以消瘀血。

蠲痺湯

黃耆蜜炙

防風去蘆

羌活

赤芍藥酒炒

薑黃炒

當歸酒洗各二分 甘草炙五分

中風表虛。手足頑痺者。此方主之。○內經曰。榮氣虛則不仁。衛氣虛則不用。故用黃耆以實表氣。然黃耆與防風相畏。用之者何。潔古云。黃耆得防風而功愈速。故竝用之。欲其相畏而相使耳。羌活驅散風邪。得當歸不至燥血。薑黃能攻痺血。得赤芍足以和肝。復用甘草調之。取其味平也。

防風通聖散

防風	川芎	當歸	芍藥炒
麻黃去節	大黃蒸	芒硝	連翹
薄荷	梔子炒黑	桔梗	石膏生
黃芩炒	白朮炒	荊芥穗	滑石
甘草			

風熱壅盛表裏三焦皆實者。此方主之。○防風、麻黃、解表藥也。風熱之在皮膚者。得之由汗而泄。荊芥、薄荷、清上藥也。風熱之在顛頂者。得之由鼻而泄。大黃、芒硝、通利藥也。風熱之在腸胃者。得之由後而泄。滑石、梔子、水道藥也。風熱之在決瀆者。得之由溺而泄。風淫於鬲。肺胃受邪。石膏、桔梗、清肺胃也。而連翹、黃芩、又所以祛諸經之遊火。風之爲患。肝木主之。川芎、歸芍、和肝血也。而甘草、白朮、又所以和胃氣而健脾。劉守真氏長於治火。此方之旨。詳且悉哉。

史國公藥酒方

防風去蘆	秦艽去蘆	油松節	虎脰骨酥炙
鱉甲醋炙	白朮各二兩炒	羌活	草薢

晚蠶砂炒

當歸酒洗去土

川牛膝去蘆

杜仲各三兩去皮薑炒

蒼耳子四兩

枸杞子五兩

乾茄根去土

中風之久。語言蹇澀。半身不遂。手足拘攣。不堪行步。痿痺不仁者。此方神良。○
語言蹇澀。風在舌本也。半身不遂。邪併於虛也。手足拘攣。風燥其筋也。不堪行
步。風燥而血不濡也。痿痺不仁。風而濕也。是方也。乾茄根。蒼耳子。羌活。秦艽。防
風。松節。草薢。蠶砂。可以去風。亦可以去濕。風去。則蹇澀拘攣之證除。濕去。則不
遂不仁之患愈。當歸。牛膝。杜仲。枸杞。所以養血。亦所以潤燥。養血則手得血而
能攝。足得血而能步。潤燥則筋得血而能舒矣。若虎骨者。用之以驅入骨之風。
白朮者。用之以致沖和之氣。風痺之久。血必留居。鱉甲之用。所以治風邪之固
血也。

稀莨丸

稀莨草。不拘此草處處有之。其葉似蒼耳。對節而生。用五月五日。七月七日。
九月九日。採來曬乾。鋪入甑中。用好酒層層勻灑。蒸之復曬。如此九次。爲末。
煉蜜爲丸。如梧桐子大。每服五十丸。空心無灰酒下。

病人骨節疼痛。緩弱無力。此方主之良。○骨節疼痛壅疾也。壅者喜通。此物味辛苦而氣寒。用九蒸九曬。則苦寒之濁味皆去。而氣輕清矣。本草云。輕可以去實。蓋輕清則無竅不入。故能透骨驅風。勁健筋骨。若未之九蒸九曬。或蒸曬之數不滿於九。濁味猶存。陰體尙在。則不能透骨驅風而却病也。此陰陽清濁之義。惟明者求之。唐江陵節度使成訥進稀薺丸。知益州張詠進稀薺丸。事考並見痛風門。

傷寒門第二

敘曰仲景傷寒方。羣方之祖也。自晉唐而降。歷朝醫哲。罔不宗之。初學之士。能究其方。識其證。雖施之雜療。不可勝用。豈徒曰傷寒云爾哉。今取其方七十五首。考之如左。有活人之志者。幸教我焉。

桂枝湯

桂枝	三兩	芍藥	三兩	甘草	二兩	生薑	三兩
洗淨		炒		生			
棗	十二枚						
生							

頭痛發熱。汗出惡風。脈緩者。太陽中風也。此湯主之。風之傷人也。頭先受之。故令頭痛。風在表則表實。故令發熱。風爲陽。氣亦爲陽。同類相從。則傷衛外之氣。衛傷則無以固衛津液。故令汗出。其惡風者。衛氣不能衛也。其脈緩者。衛氣不能鼓也。上件皆太陽證。故曰太陽中風。桂枝味辛甘。辛則能解肌。甘則能實表。經曰。辛甘發散爲陽。故用之以治風。然恐其走泄陰氣。故用芍藥之酸以收之。佐以甘草、生薑、大棗。此發表而兼和裏之意。是方也。惟表邪可以用之。若陽邪去表入裏。裏作燥渴。二便秘結。此宜承氣之時也。而誤用之則反矣。論曰。桂枝下咽。陽盛則斃。蓋謂陽邪去表入裏故也。又曰。桂枝本爲解肌。若其人脈浮緊。發熱汗不出者。不可與也。蓋以與之則表益實。而汗益難出耳。故申之以常須識此。勿令誤也。

麻黃湯

麻黃去節三兩

桂枝洗淨二兩

杏仁去皮尖

甘草生一兩

太陽傷寒。頭痛發熱。身疼腰痛。骨節不利。惡寒無汗而喘。脈來尺寸俱緊者。麻黃湯主之。○足太陽經起目內眥。循頭背腰膂。故所過疼痛不利。寒邪外束。人

身之陽。不得宣越。故令發熱。寒邪在表。不復任寒。故令惡寒。寒主閉藏。故令無汗。人身之陽。既不得宣越於外。則必壅塞於內。故令作喘。寒氣剛勁。故令脈緊。麻黃之形。中空而虛。麻黃之味。辛溫而薄。空則能通腠理。辛則能散寒邪。故令爲君。佐以桂枝。取其解肌。佐以杏仁。取其利氣。入甘草者。亦辛甘發散之謂。抑太陽無汗。麻黃之用固矣。若不斟酌人品之虛實。時令之寒暄。則又有汗多亡陽之戒。汗多者宜撲粉。亡陽者宜附子湯。

葛根湯

葛	根	四兩	麻	黃	三兩 <small>去節</small>	桂	枝	二兩 <small>洗淨</small>	芍	藥	二兩 <small>炒</small>
甘	草	二兩 <small>生</small>	生	薑	三兩	大	棗	十二枚			

太陽病。項背強。無汗惡風者。名曰剛瘧。此方主之。○風寒傷經絡之經。則所過但痛而已。未至於強。風寒傷筋骨之筋。則所過筋急強直而成瘧。瘧字之誤也。曰剛瘧者。無汗之名也。本草云。輕可去實。葛根麻黃。形氣之輕者也。此以風寒表實。故加二物於桂枝湯中。又太陽與陽明合病。必自下利。下利裏證也。今之庸醫。皆曰漏底傷寒。不治。仲景則以此方主之。蓋以邪氣併於陽。則陽實

而陰虛。陰虛故下利也。與此湯以散經中表邪。則陽不實而陰氣平。利不治而自止也。斯妙也。惟明者知之。

小青龍湯

麻黃三兩去節

桂枝三兩洗淨

芍藥三兩

五味子半斤炒

半夏半升

北細辛去土

甘草生

乾薑各三兩

傷寒表不解。心下有水氣。乾嘔。或咳。或噎。或喘。小青龍湯主之。○表不解者。頭痛發熱。身疼尚在也。傷寒曾渴。飲水過多。故心下有水氣。有聲無物。謂之乾嘔。名曰水氣。則有形之水已散。但無形之氣仍在耳。故無物可吐。而但有聲。或咳。或噎。或喘。皆水寒射肺故也。青龍者。東方木神。主發育萬物。二方以發散為義。故名之。麻黃。桂枝。甘草。發表邪也。半夏。細辛。乾薑。散水氣也。芍藥。所以和陰血。五味。所以收肺氣。

大青龍湯

麻黃六兩去節

杏仁四十枚去皮尖

桂枝淨洗

甘草生各二兩

生薑三兩

大棗十二枚

石膏如雞子大一塊

傷寒太陽證見風脈者。此方主之。○仲景法。太陽傷寒。治以麻黃湯。太陽中風。治以桂枝湯。今傷寒太陽證見風脈。是有頭痛身熱無汗惡寒。但脈來不緊而緩。爲傷寒且中風矣。故二方併而用之。風寒外盛。則人身之陽鬱爲內熱。此石膏之所加也。名曰大青龍。其發表之尤者乎。而亡陽之戒。筋惕肉瞤之弊。則用青龍之過者也。有此者。急以大溫大補之劑主之。又仲景救弊之方也。

升麻葛根湯

升麻

葛根

芍藥

甘草等分

傷寒。目痛。鼻乾。不眠。無汗。惡寒。發熱者。陽明經證也。此方主之。○足陽明之脈。抵目挾鼻。故目痛鼻乾。其不能眠者。陽明之經屬於胃。胃受邪則不能安臥。此其受邪之初。猶未及乎狂也。無汗惡寒發熱者。表有寒邪也。藥之爲性。辛者可使達表。輕者可使去實。升麻。葛根。辛輕者也。故用之達表而去實。寒邪之傷人也。氣血爲之壅滯。佐以芍藥。用和血也。佐以甘草。用調氣也。

白虎湯

石膏

一斤搗碎

知母

六兩去浮皮

甘草二兩

粳米六合

傷寒傳入於胃。不惡寒。反惡熱。有汗作渴。脈大而長者。此方主之。○傳入於胃。邪入裏矣。表無其邪。故不惡寒。裏有實熱。故反惡熱。熱越故有汗。裏燥故作渴。邪盛故脈大。邪在陽明故脈長。白虎。西方金神也。五行之理。將來者進。功成者退。如秋金之令行。則夏火之炎息。此方名曰白虎。所以行清肅之令而除熱也。石膏大寒。用之以清胃。知母味厚。用之以生津。大寒之性行。恐傷胃氣。故用甘草粳米以養胃。是方也。惟傷寒內有實熱者可用之。若血虛身熱。證像白虎。誤服白虎者死無救。又東垣之所以垂戒矣。

小柴胡湯

柴胡半斤
去蘆

黃芩三兩

人參三兩
去蘆

甘草三兩

半夏半升
製

生薑三兩

大枣十二枚

傷寒寒熱往來。脅痛口苦。脈弦者。此邪在少陽經。半表半裏之證也。本方主之。○邪在表則惡寒。邪在裏則發熱。邪在半表半裏。則惡寒且熱。故令寒熱往來。少陽之脈行於兩脅。故令脅痛。其經屬於膽。膽汁上溢。故口苦。膽者。肝之府。在五行爲木。有垂枝之象。故脈弦。柴胡性辛溫。辛者金之味。故用之以平木。溫者

春之氣。故就之以入少陽。黃芩質枯而味苦。枯則能浮。苦則能降。君以柴胡。則入少陽矣。然邪之傷人。常乘其虛。用人參。甘草者。欲中氣不虛。邪不得復傳入裏耳。是以中氣不虛之人。雖有柴胡證。俱而人參在可去也。邪初入裏。裏氣逆而煩嘔。故用半夏之辛以除嘔逆。邪半在表。則榮衛爭。故用薑棗之辛甘以和榮衛。仲景云。胸中煩而不嘔。去半夏。人參。加括蕢實一枚。若渴者。去半夏。更加人參一兩五錢。括蕢根四兩。若腹中痛者。去黃芩。加芍藥三兩。若脅下痞鞭。去大棗。加牡蠣四兩。若心下悸。小便不利者。去黃芩。加茯苓四兩。若不渴。外有微熱者。去人參。加桂枝三兩。溫覆取微汗。若欬者。去人參。大棗。生薑。加五味子半升。乾薑二兩。以上加減法。皆去其所弊。加其所宜。茲惟明者求之。不復贅也。

大柴胡湯

柴	胡	半斤	黃	芩	三兩	芍	藥	三兩	半	夏	七升
生	薑	五兩	枳	實	四兩	大	黃	二兩	大	棗	十二枚

傷寒陽邪入裏。表證未除。裏證又急者。此方主之。○表證未除者。寒熱往來。脅

痛口苦尚在也。裏證又急者。大便難而燥實也。表證未除。故用柴胡、黃芩以解表。裏證燥實。故用大黃、枳實以攻裏。芍藥能和少陽。半夏能治嘔逆。大棗、生薑。又所以調中而和榮衛也。

調胃承氣湯

大黃酒浸

芒硝半升

甘草二兩

傷寒陽明證俱。大便秘。讞語脈實者。此方主之。○陽明證俱者。不惡寒。反惡熱。作渴是也。傳至陽明。則熱經數日矣。熱久則五液乾涸。故大便秘。液亡則無水以制火。故讞語。讞語者。呢喃而語。妄見妄言也。邪入於裏。故脈實。大黃苦寒。可以蕩實。芒硝鹹寒。可以潤燥。甘草甘平。可以和中。此藥行。則胃中調而裏氣承順。故曰調胃承氣。然猶有戒焉。表證未去而早下之。則有結胸痞氣之患。此大陷胸湯之所以作也。夫人惡可以不慎乎。

小承氣湯

大黃酒浸

厚朴二兩

枳實三枚

傷寒腹脹滿。潮熱狂言而喘者。此方主之。○邪在上焦則作滿。邪在中焦則作

脹。胃中實則作潮熱。曰潮熱者。猶潮水之潮。其來不失時也。陽乘於心則狂。熱干胃口則喘。枳朴去上焦之痞滿。大黃蕩胃中之實熱。此其裏證雖成。病未危急。痞滿燥實堅。猶未全俱。以是方主之。則氣亦順矣。故曰小承氣。

大承氣湯

大黃酒浸

厚

朴半升薑炒

枳

實五枚炒

芒

硝三合

傷寒陽邪入裏。痞滿燥實堅全俱者。急以此方主之。○調胃承氣湯不用枳朴者。以其不作痞滿。用之恐傷上焦虛無氤氲之元氣也。小承氣湯不用芒硝者。以其實而未堅。用之恐傷下焦血分之真陰。謂不伐其根也。此則上中下三焦皆病。痞滿燥實堅皆全。故主此方以治之。厚朴苦溫以去痞。枳實苦寒以泄滿。芒硝鹹寒以潤燥。軟堅。大黃苦寒以泄實去熱。雖然。仲景言急下之證。亦有數條。如少陰屬腎水。病則口燥舌乾而渴。乃熱邪內炎。腎水將絕。宜急下之。以救將絕之水。又如腹脹不大便。土勝水也。宜急下之。陽明屬土。汗出熱盛。急下以存津液。腹滿痛者。為土實。急當下之。熱病目不明。熱不已者死。此腎水將竭。不能照物。則已危矣。須急下之。此皆大承氣證也。若病未危急而早下之。或雖危

急而下藥過之。則又有寒中之患。寒中者急溫之。宜與理中湯。

桃仁承氣湯

桃仁五十枚

桂枝

枝二兩洗淨

黃酒四兩

芒硝二兩

甘草二兩

傷寒外證已解。小腹痛。大便秘。小便利。其人如狂者。有畜血也。此方主之。○無頭痛發熱惡寒者。為外證已解。小腹痛者。邪在下焦也。大便秘者。瘀血漬之也。小便利者。血病而氣不病也。上焦主陽。下焦主陰。陽邪居上焦者。名曰重陽。重陽則狂。今瘀熱客於下焦。下焦不行。則干上部清陽之分。而天君弗寧矣。故其證如狂。桃仁潤物也。能澤腸而滑血。大黃行藥也。能推陳而致新。芒硝鹹物也。能軟堅而潤燥。甘草平劑也。能調胃而和中。桂枝辛物也。能利血而行滯。又曰。血寒則止。血熱則行。桂枝之辛熱。君以桃仁。硝黃則入血而助下行之性矣。斯其制方之意乎。

小陷胸湯

黃連一兩

半夏

夏半升

括蕒實一枚

傷寒下之早。熱結胸中。按之則痛者。小結胸也。此方主之。○三陽經表證未去而早下之。則表邪乘虛而入。故結胸。結胸者。陽邪固結於胸中。不能解散。為鞭為痛也。按之則痛者。不按猶未痛也。故用小陷胸湯。黃連能瀉胸中之熱。半夏能散胸中之結。括蕒能下胸中之氣。然必下後方有是證。若未經下後。則不曰結胸。

大陷胸湯

大黃酒浸六兩

芒硝一升

甘遂一錢

傷寒下之早。從心下至少腹。鞭滿而痛不可近者。大結胸也。此方主之。○三陽經表證未解。而用承氣湯以攻裏者。此下之早也。下之早則裏虛。裏虛則表邪乘之而入。三焦皆實。故心下至少腹鞭滿而痛不可近也。此其為證危急。尋常藥餌不能平矣。故用大黃以瀉實。硝石以軟堅。甘遂以直達。噫。人稱三物之峻矣。抑孰稱其有起死之功乎。用人之勇去其怒。惟善將將者能之。

半夏瀉心湯即甘草湯

半夏製半升

黃芩炒

乾薑

人參去蘆

甘草各三兩

黃連去毛一兩

大棗十三枚

傷寒下之早。胸滿而不痛者為痞。此方主之。○傷寒自表入裏。傳至三陰。三陰亦有在經表證。如太陰有桂枝加芍藥湯。少陰有麻黃附子細辛湯。厥陰有當歸四逆湯之類。若不治其表。而用承氣湯下之。則傷中氣。而陰經之邪乘之矣。以既傷之中氣。而邪乘之。則不能升降。濁痞塞於中。如天地不交而成否。故曰痞。瀉心者。瀉心下之邪也。薑夏之辛。所以散痞氣。芩連之苦。所以瀉痞熱。已下之後。脾氣必虛。人參、甘草、大棗。所以補脾之虛。

附子瀉心湯

附子一枚 去皮臍

大黃酒浸

黃連去毛炒

黃芩炒各一兩

傷寒心下痞。汗出惡寒者。此方主之。○心下痞。故用三黃以瀉痞。惡寒汗出。故用附子以回陽。無三黃。則不能以去痞熱。無附子。恐三黃益損其陽。熱有附子。寒有三黃。寒熱並用。斯為有制之兵矣。張機氏謂醫家之善將將者也。俗醫用寒則不用熱。用熱則不用寒。何以異於膠柱而鼓瑟乎。

生薑瀉心湯

生薑四兩 甘草炙 人參去蘆 黃芩炒各三兩
 半夏製半升 黃連去毛 乾薑各一兩 大棗十二枚

傷寒中風。醫反下之。其人下利日數十行。穀不化。腹中雷鳴。心下痞鞭而滿。乾嘔。心煩不得安者。此方主之。○病在表而反下之。則逆矣。下而虛其中氣。則表邪乘之而入。虛不任邪。故下利日數十行。今人謂之挾熱利也。火性急速。穀雖入而未及化。故穀不化。虛陽奔迫。故令腹中雷鳴。中虛不能化氣。故令痞鞭而滿。胃虛客氣上逆。故令乾嘔。心煩不得安。人參、甘草、大棗。胃虛之聖藥也。生薑、半夏、乾薑。嘔逆之聖藥也。黃連、黃芩。痞熱之聖藥也。

十棗湯

芫花熬 甘遂 大戟各五 大棗十枚

傷寒表證已去。其人濺濺汗出。心下痞鞭。脅痛。乾嘔。短氣者。此邪熱內畜而有伏飲也。本方主之。○芫花之辛能散飲。戟遂之苦能泄水。又曰。甘遂能直達水飲所結之處。三物皆峻利。故用大棗以益土。此戎衣之後而發鉅橋之意也。是方也。惟壯實者能用之。虛羸之人。未可輕與也。

三物白散

桔梗

貝母各三分

巴豆炒一錢

傷寒寒實結胸。無熱證者。此方主之。○此證或由表解裏熱之時過食冷物。故令寒實結胸。然必無熱證者為是。桔梗貝母之苦。用之以下氣。巴豆之辛。用之以去實。又曰。病在膈上則吐。病在膈下則利。此桔貝主上。巴豆主下之意。服後不行者。益以溫湯行之過多者。止以涼粥。

大陷胸丸

大黃酒浸半斤

葶藶炒

杏仁去皮

芒硝各半升

甘遂一錢

白蜜二合為丸

頓服之。一宿乃下。不下者更服之。

傷寒結胸項強。如柔瘥狀。此方下之則和。○結胸項強者。胸滿鞭痛。能仰而不能俛也。有汗項強為柔瘥。此雖有汗。其項強乃胸中滿實而不能俛。非是中風瘥急。故曰如柔瘥。不用湯液而用丸劑何也。湯主蕩滌。前用大陷胸湯者。以其從心下至少腹皆鞭痛。三焦皆實。故用湯以蕩之。此惟上焦滿實。用湯液恐傷

中下二焦之陰。故用丸劑以攻之。大黃、芒硝之苦寒。所以下熱。葶藶、杏仁之苦甘。所以泄滿。甘遂取其直達。白蜜取其潤利。

抵當湯丸

水

蛭三十枚
炒褐色

蟲

蟲三十枚
去翅足炒

桃

仁三十枚
去皮尖

大

黃三兩
酒浸

傷寒不結胸。發狂。少腹鞭滿。小便自利。脈沉結者。以太陽隨經。瘀熱在裏。而有瘀血也。此方主之。○宜結胸而不結胸。故曰不結胸。瘀熱內實。故令發狂。發狂則重於桃仁承氣如狂矣。少腹鞭滿者。下焦實也。小便利者。血病而氣不病也。病深入裏。故脈沉。內有積瘀。故脈結。脈行肌下。謂之沉。遲時一止。謂之結。自經而言。則曰太陽。自府而言。則曰膀胱。陽邪由經而入。結於膀胱。故曰隨經。瘀熱在裏。熱結而燥。是瘀血也。經曰。苦走血。鹹勝血。蟲蟲水蛭之鹹苦。所以除畜血。滑能利腸。苦能瀉熱。桃仁、大黃之苦滑。所以利血熱。

梔子豉湯

梔

子十四枚
炒

香

豉四合

傷寒汗吐下後。虛煩不得眠。心中懊懣者。此方主之。○汗吐下之後。正氣不足。

邪氣乘虛而結於胸中。故煩熱懊惱。煩熱者。煩擾而熱。懊惱者。懊惱悶也。梔子味苦。能湧吐熱邪。香豉氣腐。能剋制熱勢。所謂苦勝熱。腐勝焦也。是方也。惟吐無形之虛煩則可。若用之以去實。則非梔子所能宣矣。宣實者。以後方瓜蒂散主之。

瓜蒂散

苦瓜蒂略炒

赤小豆各五分

傷寒胸中多痰。頭痛者。此方吐之。○胸中多痰。便是實證。與虛煩不同。痰熱交淫。故令頭痛。經曰。苦能湧泄。瓜蒂苦物也。故用之在上。則湧胸中實痰。陶隱君曰。燥可去濕。赤小豆之屬是也。此用之爲佐。亦是燥其濕痰之意。是方也。吐痰誠爲快利。諸亡血虛家。則又在所禁矣。蓋血亡而復用吐。則氣亦去。虛家而復用吐。則損其陰。

文蛤散

文蛤爲末方寸匕

病在陽。反噤以水。熱攻於內。寒更益堅。欲飲水而不渴者。此方主之。○不當與

水而與飲之。故曰反嚙以水。熱雖攻於內。因水寒不散。故欲飲而不渴。此其有停水可知矣。故用文蛤之鹹。以潤下而破水。

五苓散

茯苓

猪苓

白朮各十銖

澤瀉六銖

桂半兩

傷寒小便不利而渴者。此方主之。○水道爲熱所祕。故令小便不利。小便不利。則不能運化津液。故令渴。水無當於五味。故用淡以治水。茯苓、猪苓、澤瀉、白朮。雖有或潤或燥之殊。然其爲淡則一也。故均足以利水。桂性辛熱。辛熱則能化氣。經曰。膀胱者。州都之官。津液藏焉。氣化則能出矣。此用桂之意也。桂有化氣之功。故並稱曰五苓。濁陰既出下竅。則清陽自出上竅。又熱隨溺而泄。則渴不治可以自除。雖然。小便不利。亦有因汗下之後。內亡津液而致者。不可強以五苓散利之。強利之。則重亡津液。益虧其陰。故曰大下之後。復發汗。小便不利者。亡津液故也。勿治之。得小便利。必自愈。師又曰。太陽隨經之邪。直達膀胱。小便不利。其人如狂者。此太陽之邪。不傳他經。自入其府也。五苓散主之。亦是使陽

邪由溺而泄耳。互考見霍亂門。

猪苓湯

猪苓

茯苓

澤瀉

滑石各三錢

阿膠一錢 蛤粉炒

傷寒少陰下利而主此方者。分其小便而下利自止也。傷寒渴欲飲水。小便不利。而主此方者。導其陽邪由溺而泄。則津液運化。而渴自愈也。又曰。猪苓質枯。輕清之象也。能滲上焦之濕。茯苓味甘。中宮之性也。能滲中焦之濕。澤瀉味鹹。潤下之性也。能滲下焦之濕。滑石性寒。清肅之令也。能滲濕中之熱。四物皆滲利。則又有下多亡陰之懼。故用阿膠佐之。以存津液於決瀆爾。

茵陳蒿湯

茵陳蒿半兩

梔子四枚 炒

大黃三錢 酒浸

傷寒頭汗出。渴飲水漿。小便不利者。身必發黃。此方主之。○頭汗出者。祇是頭有汗。躋頸而還。皆無汗也。內有實熱。故渴飲水漿。升降不交。故小便不利。濕熱鬱於中而不得越。故必發黃。經曰。大熱之氣。寒以取之。故用茵陳。苦入心而寒

勝熱。故用梔子。推除邪熱。必假將軍。故用大黃。又曰茵陳梔子。能導濕熱由小便而出。故用之。

甘桔湯

桔梗一兩 甘草二兩

少陰病咽痛者。此方主之。○口燥舌乾而渴。脈來沉者。少陰病也。少陰之脈。循喉嚨。挾舌本。病故咽痛。甘草緩邪熱而兼發散。桔梗下膈熱而治咽喉。

小建中湯

桂枝 甘草 生薑 芍藥

膠飴一升 大棗十二枚

傷寒腹中急痛者。此方主之。○腹中急痛。則陰陽乖於中。而脾氣不建矣。故立建中湯。桂肉與桂枝不同。枝則味薄。故用之以解肌。肉則味厚。故用之以建裏。芍藥之酸。收陰氣而健脾。生薑之辛。散寒邪而輔正。經曰。脾欲緩。急食甘以緩之。故用甘草。大棗。膠飴以緩急痛。又曰。嘔家不可用建中。爲其甘也。則夫腹痛而兼嘔者。又非建中所宜矣。

黃耆建中湯

黃耆

桂枝各半

白芍藥三錢

甘草一錢

傷寒汗後身痛。脈遲弱者。此方主之。○汗後身痛者。此由汗多耗損陰氣。不能榮養筋骨。故令身痛。陽虛故令脈遲。汗後故令脈弱。黃耆、甘草之甘。補中氣也。然桂中有辛。同用之。足以益衛氣而實表。芍藥之酸。收陰氣也。桂中有熱。同用之。足以利榮血而補虛。此方以建中名者。建立中氣。使其生育榮衛。通行津液。則表不虛。而身痛自愈矣。

黃芩湯

黃芩炒三兩

甘草二兩

芍藥二兩

大棗十二枚

太陽與少陽合病。必自下利者。此方主之。○太陽與少陽合病者。有太陽證。頭痛。身熱。脊強。而又有少陽證。耳聾。脅痛。寒熱往來。嘔而口苦也。必自下利者。表實裏虛。邪熱漸攻於裏故也。若太陽與陽明合病。自下利。為在表。當與葛根湯發汗。陽明少陽合病。自下利。為在裏。可與承氣湯下之。此太陽少陽合病。自下利。為在半表半裏。非汗下所宜。故與黃芩湯。師曰。虛而不實者。苦以堅之。酸以

收之。故用黃芩、芍藥以堅斂腸胃。弱而不實者。甘以補之。故用甘草、大棗以補益腸胃。其有加半夏者。爲其嘔也。

黃連湯

黃

連去毛炒

乾

薑炒

桂

枝炒

甘

草各三兩

人

參二兩

半

夏半升

大

棗枚十二

傷寒胸中有熱而欲嘔。胃中有寒而作痛者。與此湯以升降陰陽。○黃連之苦。以泄上熱而降陽。薑、桂、半夏之辛。以散中寒而升陰。人參、甘草、大棗之甘。可緩中急而益胃。是方也。以黃連之寒。佐以薑、桂之辛。則寒者不滯。以薑、桂之熱。君以黃連之苦。則熱者不燥。寒熱之相用。猶奇正之相倚耳。况夫人參、甘草之益胃。又所以宰中而建招搖矣乎。

炙甘草湯

甘

草炙四兩

桂

枝炒

生

薑各三兩

生

地黃一斤

人

參

阿

膠各二兩

麥

門冬

麻

仁各半升

大

棗枚十二

傷寒。脈結代。心動悸者。此方主之。○結與代。皆止脈也。此由氣血虛衰。真氣不能相續。故有此脈。心動悸者。動而不自安也。亦由真氣內虛所致。補虛可以去弱。故用人參、甘草、大棗。溫可以生陽。故用生薑、桂枝。潤可以滋陰。故用阿膠、麻仁。而生地、麥冬者。又所以清心而寧悸也。

茯苓甘草湯

茯苓 去皮

桂枝 炒各一兩

生薑 三兩

甘草 一兩

傷寒水氣乘心。心動悸者。此方主之。○水氣乘心而悸者。以水者。心火之所畏也。故乘之則為動悸。此飲水過多之所致也。淡可以滲水。故用茯苓。辛可以散飲。故用薑、桂。益土可以制水。故用甘草。又曰。飲之為悸。甚於他邪。雖有餘邪。必先治悸。蓋以水停心下。不早治之。浸於肺則為喘。為欬。傳於胃則為噦。為噎。溢於皮膚則為腫。漬於腸間則為利。下故也。經曰。厥而心下悸。宜先治水。後治其厥。厥為邪之深者。猶先治水。則夫病淺於厥者可知矣。

茯苓桂枝甘草大棗湯

茯苓 去皮

桂枝 炒各四兩

甘草 二兩

大棗 十五枚

甘瀾水煎。

傷寒汗後。臍下悸。欲作奔豚者。此方主之。○汗後則心液虛。腎者水藏。欲乘心火之虛而尅之。故臍下悸。欲作奔豚而上凌於心也。茯苓甘淡。可以益土而伐腎邪。桂枝辛熱。可以益火而平腎氣。甘草大棗之甘。可以益脾。益脾所以制腎也。煎以甘瀾水者。揚之無力。取其不助腎氣爾。

真武湯

茯苓去皮

芍藥炒

生薑各三兩

白朮二兩

附子一枚

傷寒發汗過多。其人心下悸。頭眩身瞤。振振欲擗地者。此方主之。○汗多而心下悸。此心亡津液。腎氣欲上而凌心也。頭眩身瞤。振振欲擗地者。此汗多亡陽。虛邪內動也。真武。北方之神。司水火者也。今腎氣凌心。虛邪內動。有水火奔騰之象。故名此湯以主之。茯苓。白朮。補土利水之物也。可以伐腎而療心悸。生薑。附子。益衛回陽之物也。可以壯火而祛虛邪。芍藥之酸。收陰氣也。可以和榮而生津液。

理中湯

人參去蘆

白朮炒

乾薑炮

甘草炮

太陰自利不渴。寒多而嘔。腹痛。鴨溏。霍亂。此太陰有真寒也。本方主之。○太陰者。脾也。自利渴者為熱。不渴者為寒。脾喜溫而惡寒。寒多故令嘔。寒者肅殺之氣。故令腹痛。鴨溏者。後便如鴨之溏。亦是虛寒所致。霍亂者。邪在中焦。令人上吐下瀉。手足揮霍而目瞭亂也。霍亂有陰陽二證。此則由寒而致故耳。病因於寒。故用乾薑之溫。邪之所湊。其氣必虛。故用人參、白朮、甘草之補。

吳茱萸湯

吳茱萸炮一升

人參去蘆

生薑六兩

大棗十二枚

傷寒食穀欲嘔者。屬陽明也。此湯主之。得湯反劇者。屬上焦。此非所宜也。少陰犯真寒。吐利。手足厥冷。煩燥欲死者。此湯主之。厥陰乾嘔吐沫頭痛者。亦此湯主之。○陽明胃也。為倉廩之官。主納水穀。有寒。故令食穀欲嘔。吳茱萸溫之宜矣。若得湯反劇。便非胃中寒。乃是上焦火。宜用涼劑。而吳茱萸非宜矣。少陰犯真寒者。足少陰腎藏中寒。與傳來陽證不同也。腎間陰寒盛。則上格乎陽。而為

吐。經曰。腎主二便。故腎寒則大便不禁而爲利。手足得陽而溫。受氣於內者也。內有陰寒。故令手足厥逆而冷。煩燥者。陰盛格陽。陽氣內爭。故令陽煩而陰燥。斯其爲證亦危矣。故欲死。厥陰者。肝也。寒氣內格。故乾嘔吐沫。厥陰與督脈會於巔。故頭痛。吳茱萸辛熱而味厚。經曰。味爲陰。味厚爲陰中之陰。故走下焦而溫少陰。厥陰佐以生薑散其寒也。佐以人參大棗補中虛也。雖然。張機氏立是方。以治少陰厥陰之寒也。固矣。不又曰。少陰病。吐利煩燥四逆者死乎。厥冷之與四逆。無相遠也。臨病之工。烏可不慎。

白通湯

葱 白四莖

乾

薑炮一兩

附

子炮一枚

少陰下利者。此方主之。○少陰屬腎。水藏也。得天地閉藏之令。主禁固二便。寒邪居之。則病而失其體矣。故下利。葱白所以通陽氣也。薑附所以散陰寒也。是方也能散陰而通陽。故卽葱白而名曰白通。

白通加人尿猪膽汁湯

葱 白四莖

乾

薑炮一兩

附

子炮一枚

人

尿五合

猪膽汁一合

少陰下利脈微者。與白通湯利不止。厥逆。無脈乾嘔煩者。此方主之。服湯脈暴出者死。微續者生。○少陰下利脈微。此少陰有真寒也。故與白通湯散陰復陽。若利不止。厥逆無脈乾嘔煩者。乃寒盛格拒乎陽。藥不能達於少陰。而陽逆亂於上故也。加人尿猪膽者。取其苦寒與陰同類。可以引薑附入拒格之寒而調其逆。內經曰。必同其氣。可使平也。正此之謂。入腹之後。冷體既消。熱性便發。病氣隨去。煩嘔皆除。情且不違。而致大益。此奇正相伏之兵也。惟明者知之。其服湯脈暴出者。正氣因發泄而脫也。故死。脈微續者。陽氣漸復也。故生。

附子湯

附子二枚

茯苓去皮

芍藥三兩

人參二兩

白朮四兩

少陰病。口中和。背惡寒者。此方主之。少陰病。身體痛。手足寒。骨節痛。脈沉者。亦此方主之。○傷寒以陽為主。上件病皆陰勝。幾於無陽矣。辛甘皆陽也。故用附朮參苓以養陽。辛溫之藥過多。則恐有偏陽之弊。故又用芍藥以扶陰。經曰。火

欲實。水當平之。此用芍藥之意也。

四逆湯

甘草二兩

乾薑兩半

附子一枚

煎成涼服。

太陰自利不渴。陰證脈沉身痛。與夫厥逆下利脈不至者。此方皆主之。○論曰。自利不渴屬太陰。太陰主水穀。病故自利。內有真寒。故不渴。陰證者。舉三陰而言。則又非獨太陰矣。病在裏。故脈沉。寒則血脈凝滯。故身痛。四肢受氣於裏。裏寒則陽氣不能宣布於手足。故四肢厥逆而冷。下利亦是裏寒。脈不至者。寒極而脈藏伏也。經曰。寒淫於內。治以甘熱。故用甘草、薑、附。大熱之劑。申發陽氣。祛散陰寒。能溫經煖肌。而回四逆。因以名湯焉。然必涼服者。經曰。治寒以熱。涼而行之是也。否則戴陽者。反增上燥。耳目口鼻皆血者有矣。藥之難用也有如此。

乾薑黃連黃芩人參湯

乾薑炮

黃連炮

黃芩炮

人參三兩

傷寒誤吐下。寒氣內格。食入口即吐者。此方主之。○不當吐下而吐下之。故曰

誤吐下。如用梔子、瓜蒂之類以吐。又用承氣之類以下。其性皆寒。誤用之。則損中氣。中氣既虛且寒。便惡穀氣。故食入口即吐。入口即吐者。猶未下咽之謂也。用乾薑之辛熱。所以散寒。用人參之甘溫。所以補虛。復用芩、連之寒苦者。所以假之從寒而通格也。經曰。有假其氣。則無禁也。正此之謂。自非深得經旨。胡能通其變耶。

當歸四逆湯

當歸去土

桂枝

芍藥

炒各三兩

細辛去土

甘草炙

通草各二兩

大棗

枚廿五

論曰。傷寒脈滑而厥者。裏有熱也。白虎湯主之。手足厥寒。脈細欲絕者。當歸四逆湯主之。○滑陽脈也。故其厥為陽厥。乃火極盛如乾之上九。亢龍有悔之象也。故用白虎。白虎考見前。若手足厥寒。脈細欲絕。則非白虎所宜矣。手足厥寒。則陽氣外虛。不溫四末。脈細欲絕。則陰血內弱。脈行不利。陽氣外虛。故用桂枝。細辛以溫其表。陰血內弱。故用當歸。芍藥以調其裏。通草通其陰陽。大棗、甘草和其營衛。是證也。自表入裏。雖曰傳至厥陰。始終只是陽證。與寒邪直中三陰

不同。故不用吳萸、薑、附、草。而用桂枝湯。加當歸、細辛、通草爾。明者自得之。
當歸四逆加吳茱萸生薑湯

當歸去土

芍藥炒

桂枝各三兩

細辛去土

甘草炙

通草各二兩

大棗廿五枚

吳茱萸炮三錢

生薑六錢

論曰。若其人內有久寒者。當歸四逆加吳茱萸生薑湯主之。○此承上文言。雖有手足厥寒。脈細欲絕證候。若其人內有久寒。則加吳茱萸、生薑以散久寒而行陽氣。曰久寒者。陳久之寒。非時下直中之寒也明矣。

桂枝加芍藥湯

桂枝三兩

芍藥六兩

甘草二兩

生薑二兩

大棗十二枚

本太陽病。醫反下之。因而腹滿時痛者。屬太陰也。桂枝加芍藥湯主之。○表證未罷。而醫下之。邪乘裏虛。當作結胸。今不作結胸。而作腹滿時痛。是屬於太陰裏氣不和。故腹滿時痛耳。時痛者。有時而痛。非大實之痛也。故但與桂枝湯以

解表。加芍藥以和裏。

桂枝加大黃湯

桂枝

芍藥

生

薑各三兩

甘草二兩

大棗十二枚

大黃一兩

表證未罷。因誤下而大實痛者。此方主之。○大凡表證未罷。仍當解表。若誤下以虛其裏。則餘邪乘虛而入。內作大實痛。曰大實痛。則非有時而痛者可例矣。故前方但倍芍藥。而此則加大黃。加大黃者。取其苦寒能蕩實也。論又曰。太陰爲痛。脈弱。其人續自便利。設當行大黃。芍藥者。宜減之。以其人胃氣弱。易動故也。則夫俗醫不辨虛實。而執方治病者。皆仲景之罪人矣。

桂枝加附子湯

桂枝

芍藥

生

薑各三兩

大棗十二枚

甘草二兩

附子三枚

太陽病。發汗。遂漏不止。其人惡風。小便難。四肢微急。難以屈伸者。此方主之。風濕相搏。身體疼煩。不能轉側者。亦此方主之。○發汗遂漏不止。則虛其表而亡

陽。陽虛則無以衛外。故其人惡風。小便難者。經虛府亦虛。而膀胱之氣不化。不化則不出。故小便難。汗多。表亡津液。則無以養筋。故四肢微急。難以屈伸。用桂枝湯。所以和在表之營衛。加附子。所以壯在表之元陽。風濕相搏者。風邪與濕邪相搏激也。然何以知之。若風邪爲患。必分六經。今身體盡是疼煩。不能轉側。則無六經可辯之證。故知其風濕相搏也。用桂枝湯解在表之風。加附子以溫寒濕。

麻黃附子細辛湯

麻黃去節

細辛

附子

去土各二兩

一兩

一兩

少陰病。始得之。反發熱。脈沉者。此方主之。○病發於陰者。當無熱。今少陰病始得之。何以反發熱也。此乃太陽經表裏相傳之證故耳。蓋太陽膀胱經。與少陰腎經相爲表裏。腎經虛。則太陽之邪。由絡直入腎藏。餘邪未盡入裏。故表有發熱。真寒入腎。故裏有脈沉。有太陽之表熱。故用麻黃以發汗。有少陰之裏寒。故用辛附以溫中。

黃連阿膠湯

黃連去毛炒

黃芩炒一兩

雞子黃二枚

芍藥二兩

阿膠三兩

少陰病。心煩不得臥者。此方主之。○寒邪徑中三陰者。名曰陰證。始終只是一經。不復再傳。今自三陽經傳來。雖至三陰。猶曰陽證。所以有傳有不傳者。以陰靜陽動也。少陰病者。有舌乾口燥欲寐諸證也。欲寐而不得寐。故曰心煩不得臥也。少陰者水藏。水為熱灼。不足以濟火。故心煩。陽有餘者。瀉之以苦。故用黃芩。黃連之苦。陰不足者。補之以甘。故用雞黃。阿膠之甘。陰氣耗者。飲之以酸。故復佐以芍藥之酸。

桃花湯

赤石脂一斤

乾薑一兩

粳米一升

少陰病。下利便膿血者。此方主之。○此證自三陽傳來者。純是熱證。成無已因其下利而曰協熱。因其用乾薑而曰裏寒。崑謂不然。蓋少陰腎水也。主禁固二便。腎水為火所灼。不能濟火。火熱尅伐大腸金。故下利且便膿血。此方用赤石脂。以其性寒而澀。寒可以濟熱。澀可以固脫。用乾薑者。假其熱以從治。猶之白

通湯加人尿猪膽乾薑黃連黃芩人參湯用芩連彼假其寒此假其熱均之假以從治爾內經曰寒者熱之熱者寒之微者逆之甚者從之逆者正治從者反治從少從多觀其事也正此之謂用粳米者恐石脂性寒損胃故用粳米以和之向使少陰有寒則乾薑一兩之寡豈足以溫而石脂一斤之多適足以濟寒而殺人矣豈仲景之方乎噫以聊攝之明猶且昧此則下聊攝者可知矣

白頭翁湯

白頭翁

黃柏

黃連

秦皮

傷寒熱利下重者此方主之○熱利者協熱而利下重者下利頻數而重也藥之爲性寒者能除熱苦者能厚腸四件皆苦寒故治熱利而療下重也

四逆散

甘草炙

枳實熱炒

柴胡去蘆

芍藥炒

少陰病四逆者此方主之○此陽邪傳至少陰裏有結熱則陽氣不能交接於四末故四逆而不溫用枳實所以破結氣而除裏熱用柴胡所以升發真陽而回四逆甘草和其不調之氣芍藥收其失位之陰是證也雖曰陽邪在裏甚不

可下。蓋傷寒以陽為主。四逆有陰進之象。若復用苦寒之藥下之。則陽益虧矣。是在所忌。論曰。諸四逆者。不可下之。蓋謂此也。

赤石脂禹餘糧湯

赤石脂

禹餘糧各一斤

傷寒下之利不止。病在下焦者。此方主之。○下之利不止者。下之虛其裏。邪熱乘其虛。故利。虛而不能禁固。故不止。更無中焦之證。故曰病在下焦。澀可以固脫。故用赤石脂。重可以鎮固。故用禹餘糧。然惟病在下焦者。可以用之。若病在中焦而誤與焉。虛者。則二物之寒。益壞中氣。實者。固而澀之。則邪無自而泄。必增腹脹且痛矣。慎之。

旋覆代赭石湯

旋覆花

甘草各三兩

代赭石一兩

人參二兩

半夏半升

生薑五兩

大棗十二枚

傷寒發汗。若吐若下。解後。心下鞭痞。噫氣不除者。此方主之。○汗吐下而解。則中氣必虛。虛則濁氣不降而上逆。故作痞鞭。逆氣上干於心。心不受邪。故噫氣。

不除。內經宣明五氣篇曰。五氣所病。心爲噫是也。旋覆之鹹。能戾痞鞭而下氣。代赭之重。能鎮心君而止噫。薑夏之辛。所以散逆。參草大棗之甘。所以補虛。或曰。汗吐中虛。肺金失令。肝氣乘脾而作上逆。逆氣於心。心病爲噫。此方用代赭石固所以鎮心。而亦所以平肝也。亦是究理之論。

葛根黃芩黃連湯

葛根半斤

黃芩炒

甘草各二兩

黃連三兩

太陽表證。醫反下之。利遂不止。表證尙在。喘而汗出者。此方主之。○病在表而下之。則虛其裏。陽邪乘虛而入。故協熱而利不止。表有頭疼發熱惡寒。故曰表證尙在。裏有熱邪。故喘而汗出。表證尙在。有用葛根。甘草之辛甘以解表。裏有邪熱。故用黃芩。黃連之苦寒以清裏。

脾約丸

麻仁二升去殼

芍藥炒

枳實各半斤

厚朴薑湯炒

大黃酒浸

杏仁去皮尖各一斤

傷寒差後。胃強脾弱。約束津液。不得四布。但輪膀胱。致小便數而大便難者。主

此方以通腸潤燥。○枳實、大黃、厚朴、承氣物也。麻仁、杏仁、潤腸物也。芍藥之酸。欬津液也。然必胃強者能用之。若非胃強。則承氣之物在所禁矣。

竹葉石膏湯

竹葉二把

石膏一斤

半夏製

粳米各半升

人參三兩去蘆

甘草一兩炙

麥門冬一升去心

傷寒差後。虛羸少氣。氣逆欲吐者。此方主之。○傷寒由汗吐下而瘥。必虛羸少氣。虛則氣熱而浮。故逆而欲吐。竹葉、石膏、門冬之寒。所以清餘熱。人參、甘草之甘。所以補不足。半夏之辛。所以散逆氣。用粳米者。恐石膏過寒損胃。用之以和中氣也。

烏梅丸

烏梅三十枚去核

人參去蘆

細辛去土

黃柏去皮

附子炮

桂枝淨洗炮各六錢

黃連一兩六錢炒

乾薑一兩炮

當歸洗淨

蜀椒去目及閉目者各四錢

胃虛藏寒。得食而嘔。就從上出者。此方主之。○烏梅味酸。蛔得之而軟。連、柏味

苦。蛔得之而伏。椒、細、味辛。蛔得之而死。乾薑、附、桂。溫藏寒也。人參、當歸。補胃虛也。

燒棍散

棍

襠取隱處者燒灰方寸匕水
和服男取女者女取男者

傷寒陰陽易者。此方主之。○傷寒男子新差。未及平復。婦人與之交。得病。名曰陽易。婦人傷寒新差。未及平復。男子與之交。得病。名曰陰易。以無病人染着餘毒而病。如換易也。取此物者。亦以病因於陰陽感召而得。故亦以陰陽之理治之。又曰。五味入口。鹹入腎。腐入腎。穢入腎。乃濁陰歸地之意也。棍襠味鹹而腐穢。故能入少陰。燒之則溫。故足以化氣。灰之則濁。故足以溺膀胱。經曰。濁陰歸六府是也。藥物雖陋。而用意至微。不因其陋而忽之。則升仲景之階矣。

枳實梔子豆豉大黃湯

枳

實三枚

梔

子十四枚

豆

豉一升

大

黃一兩

傷寒新差後食復者。此方主之。○傷寒新瘥。胃氣未復。內傷飲食。其熱復至。名曰食復。枳實、大黃。能奪胃中之食。梔子、香豉。能祛胸中之熱。

蜜煎導法

白蜜二合。煎之作挺。長如指許。內便道中。病人以手急抱。欲大便時去之。自汗大便秘者。此法治之。○胃家實則自汗。自汗亡其胃液。則便秘。若以下藥與之。則益亡其液矣。故用導法。導法者。迎而奪之之兵也。

猪膽導法

大猪膽一枚。入醋少許。取竹管五寸許。以一頭入膽。一頭內入穀道中。齎汁灌入肛內。頃當大便出。

陽明自汗。反小便利。尿雖鞭不可攻者。宜行此法。○自汗。則胃亡津液。當小便不利。今小便反利。則熱猶未實。尿雖鞭不可攻也。故以此法導之。猪膽能澤大腸。入醋能斂腸液。故便難者得之則易。經曰。燥者濡之。此法之謂也。

搐鼻法

若瓜蒂不拘多少爲末。令病人嚙水一口。將此藥搐一字入鼻中。出黃水愈。濕家鼻塞頭疼。宜行此法。○濕家頭疼。是濁邪干清陽之分也。鼻者氣竅。上通於腦。下屬於肺。濁邪干之。故清竅不利。瓜蒂苦而善湧瀉。鼻竅受之。則能出濁。

邪而瀉濕熱。經曰。客者除之。此之謂也。

陰毒熏法

大豆二升。炒令極熱。先以淨桶內置熱醋三升。旋扶病人坐桶上。蒸少時。却熱豆傾桶中。又蒸之。有傾囊下。却與陰證藥服。

陰毒逆冷。囊縮者。此方主之。○陰毒者。徑中三陰之寒毒也。寒主收引。故陰盛則囊縮。熱主施張。故熏蒸則囊縱。豆味甘而醋味酸。甘酸合。則能感召厥陰肝木之氣。而行宣發之令矣。經曰。開之發之。適事爲故。此之謂也。

葱熨法

以索纏葱白如臂大。切去根及青。留白二寸許。先以火炙熱一面。以着病人臍下。上用熨斗貯火熨之。令葱併熱氣入腹內。更作三四餅。壞則易之。若病人醒。手足溫。有汗則瘥。否則不治。行此法。更當以四逆湯之類溫之。

陰毒四肢逆冷。腹痛暴絕者。此法主之。○凡人氣之呼出者。心肺主之。氣之吸入者。肝腎主之。陰寒中於肝腎。則不能主吸入之氣。故氣有出而無入。令人逆冷。腹痛暴絕而死。宜外行葱熨法。內服四逆湯。葱有通中之妙。火有回陽之功。

經曰。熱因寒用。此之謂也。

陰毒着艾法

用乾艾葉揉熟去灰作艾炷。取臍下一寸五分名氣海。二寸丹田。三寸關元。灸五十壯至二三百壯。以手足漸溫。人事稍甦爲可治。

陰毒手足厥冷。不省人事者。此法行之。○手足不自溫也。受氣於中而後溫。裏有陰寒。故手足厥冷。陽氣明。陰氣昏。不省人事者。乃陰盛而失神明之官也。甲乙經曰。氣海丹田。任脈所發。關元。足三陰任脈之會。是任脈實貫三陰。而三陰之脈皆會於任脈也。故陰毒中於三陰者。取而灸之。有寒谷回春之妙。

水漬法

疊青布數重。新水漬之。稍拭去水。搭於患人胸上。須臾蒸熱。又以別浸冷布易之。頻換新水。熱稍退。可進陽毒藥。

陽毒漸深。脈洪大。內外結熱。舌捲焦黑。鼻如烟煤者。此法行之。○陽毒者。三陽熱證之毒也。由表入裏。故曰漸深。洪大皆陽脈。表邪未去。裏熱又甚。故曰內外皆熱。此由失汗之所致也。舌捲者。熱燥華池而筋縮急也。舌焦而黑。鼻如烟煤。

此火極而兼水化。亢龍有悔之象也。行此法者。水可以滅火。寒可以却熱。外可以安內。經曰。行水漬之。和其中外。可使畢已。此之謂也。

灸少陰法

少陰。即太谿穴也。在兩足內踝後跟骨上動脈陷中。灸七壯。少陰吐利。手足不冷。反發熱。脈不至者。此法行之。○少陰。腎也。寒中少陰。陰寒格陽上逆。故吐。少陰主二便。病寒故利。陰在內拒陽於外。故手足不冷而反發熱。脈不至者。陰盛於內而脈沉陷也。太谿。腎之俞也。干焉而灸之。所以引外格之陽。使之歸原。如易所謂不遠之復也。

接汗法

薑葱各半斤。煎湯一斛。傾大盆中。用小板一塊。橫加盆上。令患者坐臥其上。蒸之外。以席被圍定。露其口鼻。外可進發汗藥。

朔方嚴寒之地。腠理閉密。汗不易泄。故行此法。蓋薑葱能通腠理。作湯以蒸之。則表疏而汗易泄。迺外合之兵也。

撲粉

龍骨

牡蠣

糯米各等分
爲末

服發汗藥出汗過多者以此粉撲之。○汗多有亡陽之戒。故用龍骨牡蠣之澀以固脫。入糯米者取其粘膩云爾。乃衛外之兵也。

刺期門

期門。穴名。婦人屈乳頭向下盡處是穴。乳小者以一指爲率。陷中有動脈。刺之令病人吸五吸。停鍼良久出鍼。

婦人熱入血室。脅下滿如結胸狀。讞語者。此刺主之。○婦人傷寒發熱。月事適來。血室空虛。邪熱乘虛而入。名曰熱入血室。血室。衝脈也。脅下滿如結胸狀者。衝脈貫肝膈。至胸中而散。故所過皆病也。讞語者。邪熱內甚而神明亂也。期門。肝之募穴。刺之出血。乃隨其實而瀉之。兵之迎奪者也。

大羌活湯

羌活

獨活

防己

防風

蒼朮

白朮

黃連

黃芩

細辛

川芎

甘草各三錢

生地黃一兩

知母三錢

傷寒兩感者。此方主之。○兩感者。一日太陽與少陰俱病。謂有太陽證之頭疼身熱脊強。而又有少陰證之口乾煩滿而渴也。二日則陽明與太陰俱病。謂有陽明證之身熱譫語。而又有太陰證之腹滿不欲食也。三日則少陽與厥陰俱病。謂有少陽證之耳聾脅痛。而又有厥陰證之囊縮厥逆也。凡此兩感之證。欲汗之則有裏。欲下之則有表。表裏不能一治。故內經仲景皆稱必死而無活法。易老意曰。證雖有表裏之殊。而無陰陽之異。傳經者皆爲陽邪。一於升陽散熱。滋養陰藏。則感之淺者尙或可平矣。經曰。氣薄則發泄。故用羌活、獨活、防風、蒼朮、細辛、川芎之氣薄者。以升發其傳經之邪。又曰。寒勝熱。故用黃連、黃芩、防己、生地、知母之寒苦者。以培養其受傷之陰。以升散諸藥而臣以寒涼。則升者不峻。以寒涼諸藥而君以升散。則寒者不滯。白朮、甘草、脾家藥也。用之者。所以益其脾胃而建中營之幟爾。嗚呼。於不可治之中。而求爲可治之策。大羌活者。其萬死一生之兵乎。

感冒門第二

敘曰。六氣襲人。深者爲中。次者爲傷。輕者爲感冒。今世人之論也。古昔明醫未嘗析此。崐也。生乎今之世。則亦趨時人之論矣。故考五方以治感冒。

香蘇散

紫蘇

香附醋製各二兩

陳皮去白一兩

甘草半兩

四時感冒風邪。頭痛發熱者。此方主之。○南方風氣柔弱。傷於風寒。俗稱感冒。感冒者。受邪膚淺之名也。內經曰。卑下之地。春氣常存。故東南卑下之區。感風之證居多。所以令人頭痛發熱。而無六經之證可求者。所感人也。由鼻而入。實於上部。不在六經。故令頭痛發熱而已。是方也。紫蘇。香附。陳皮之辛芬。所以疏邪而正氣。甘草之甘平。所以和中而輔正爾。

芎蘇散

川芎七合

半夏夏製六錢

柴胡去蘆

茯苓各五錢

紫蘇葉

乾葛各三錢五分

陳皮去白

枳殼去穢

桔梗

甘草各三錢

外有頭痛發熱惡寒。內有咳嗽吐痰氣胸者。此方主之。○川芎。蘇葉。乾葛。柴胡。

解表藥也。表解則頭痛發熱惡寒自愈。桔梗、半夏、陳皮、枳殼、茯苓、甘草、和裏藥也。裏和則欬嗽吐痰氣洵自除。

十神湯

川芎

甘草

麻黃

乾葛

赤芍藥

升麻

白芷

陳皮

香附

紫蘇等分

此治外感風寒之套劑也。○古人治風寒。必分六經見證用藥。然亦有只是發熱頭痛惡寒鼻塞。而六經之證不甚顯者。故亦總以疏表利氣之藥主之而已。是方也。川芎、麻黃、乾葛、升麻、白芷、紫蘇、香附、陳皮。皆辛香利氣之品。故可以解感冒氣塞之證。乃赤芍者。所以和陰氣於發汗之中。而甘草者。所以和陽氣於疏利之隊也。

參蘇飲

人

參去蘆

紫蘇

半夏製

陳皮去白

茯苓

去皮

木香

枳殼炒

乾葛

前胡去蘆

桔梗

甘草錢各五

勞倦感冒。妊娠感冒。併宜此方主之。○感冒宜解表。故用紫蘇、乾葛、前胡。勞倦妊娠宜補裏。故用人參、茯苓、甘草。乃木香、半夏、枳殼、桔梗、陳皮。所以和利表裏之氣。氣和則神和。神和則無病矣。

藿香正氣散

大腹皮淨洗

白芷

茯苓去皮

蘇莖葉

藿香各三兩

白朮炒

陳皮去白

厚朴薑湯炒

桔梗

半夏各二兩

炙甘草一兩

凡受四時不正之氣。憎寒壯熱者。此方主之。○風寒客於皮毛。理宜解表。四時不正之氣。由鼻而入。不在表而在裏。故不用大汗以解表。但用芬香利氣之品以主之。白芷、紫蘇、藿香、陳皮、腹皮、厚朴、桔梗。皆氣勝者也。故足以正不正之氣。白朮、茯苓、半夏、甘草。則甘平之品耳。所以培養中氣。而樹中營之幟者也。

暑門第四

絃曰。暑。六氣之一也。實者清其暑。虛者益其氣。此大都也。至於雜病相揉。則變通在我而已。今考九方如左。論證論藥。可謂舉其大綱。觸類而通。弗可勝用矣。

黃連香薷飲

香薷 一兩

厚朴 炒

白扁豆 各半

黃連 三錢

夏至後暑熱吐利煩心者。此方冷服。○暑陽邪也。干於脾則吐利。干於心則煩心。香薷之香入脾清暑而定吐利。黃連之苦入心却熱而治煩心。暑邪結於胸中。非厚朴不散。暑邪陷於脾胃。非扁豆無以和中。然必冷服者。經所謂治溫以清。涼而行之是也。是方也。於伏熱之時。自覺酷暑蒸炎。或遠行而歸。自覺傷於暑熱。服一二劑。誠為切當。今人坐於高堂廣廈之中。身與冰盤水閣相習。口與浮瓜水果相厭。暑邪原淺。每求此藥服之。甚者日日飲之。是謂誅伐太過。弱者寒中之疾作於旦暮。壯者待時而病。秋季為瀉為利矣。慎之。

十味香薷飲

香薷 用一兩

人參 去蘆

陳皮

黃耆 炙

白朮 炒

白扁豆

甘草 炒

厚朴 炒

白茯苓

木

瓜

各半

伏暑身體倦怠。神昏頭重吐利者。此方主之。○暑能傷氣。故身體倦怠。神思昏沉。暑為陽邪。故併於上而頭重。暑邪於胃。故既吐且利。火熱橫流。肺氣受病。人參黃耆益肺氣也。肺為子。脾為母。肺虛者宜補其母。白朮茯苓扁豆甘草皆補母也。火為母。土為子。火實者宜瀉其子。厚朴陳皮平其敦阜。即瀉子也。香薷之香散暑邪而破濕熱。木瓜之酸收陰氣而消脾濕。脾氣調則吐利自息。肺氣復則倦怠皆除。

人參白虎湯

人參

石膏

知母

甘草

暑月中熱。汗出惡寒。身熱而渴。脈虛者。此方主之。○暑陽邪也。中人則傷衛。衛虛則不能固表。故汗出。且惡寒。表有暑邪。故身熱。裏有暑邪。故口渴。暑傷於氣。故脈虛。經曰。壯火食氣。故用人參。甘草以補氣。石膏性寒味甘辛。寒則能除熱。甘則能調胃。辛則能解肌。以其行清肅之令而除煩暑。得西方金神之象。故以白虎名之。用之者。經所謂折其鬱氣是也。知母滋陰益腎。易義曰。火炎則水乾。

故用知母以益水。經所謂滋其化源是也。

六一散

滑石六兩 甘草一兩

共為末。每用五錢。冷水調服。

中暑身熱煩渴。小便不利者。此方主之。○身熱口渴。陽明證也。小便不利。膀胱證也。暑為熱邪。陽受之則入六府。故見證若此。滑石性寒而淡。寒則能清六府。淡則能利膀胱。入甘草者。恐石性太寒。損壞中氣。用以和中耳。經曰。治溫以清。涼而行之。故用冷水調服。是方也。簡易而効捷。暑途用之。誠為至便。但於老弱陰虛之人。不堪與也。此虛實之辯。明者詳之。否則蹈虛虛之戒。惡乎不慎。

清暑益氣湯

人參	去蘆	白朮	炒	陳皮	去白	神麴	炒
澤瀉	各五 分	黃耆	炙	蒼朮	製	升麻	各一 錢
麥門冬	去心	當歸	酒洗	黃柏	炒	甘草	炙各 三分
五味子	九粒	青皮	熬炒	乾葛	各二 分		

長夏濕熱蒸炎。四肢困倦。精神減少。身熱氣高。煩心便黃。渴而自汗。脈虛者。此方主之。○暑令行於夏。至長夏。則兼濕令矣。故此方兼而治之。暑熱蒸炎。表氣易泄。而中氣者。又諸氣之原。黃耆所以實表而固。易泄之氣。白朮神麴。甘草所以調中而培諸氣之原。酷暑橫流。肺金受病。人參。五味子。麥冬。一以補肺。一以收肺。一以清肺。此三物名曰生脈散。經所謂扶其所不勝也。火盛則水衰。故又以黃柏。澤瀉。滋其化源。液亡則口渴。故又以當歸。乾葛。生其胃液。清氣不升。升麻可升。濁氣不降。二皮可理。蒼朮之用。為兼長夏之濕也。

大順散

甘草炙

乾薑炮

杏仁去皮

肉桂等分

夏月引飲過多。脾胃受濕。清濁相干。陰陽氣逆。霍亂嘔吐者。此方主之。○脾胃者。喜燥而惡濕。喜溫而惡寒。時雖夏月。過於飲冷吞寒。則傷之矣。故令氣逆霍亂而嘔吐也。乾薑。肉桂。溫胃而建中。甘草。杏仁。調脾而利氣。此方非治暑。乃治暑月飲冷受傷之脾胃爾。若非飲冷而致諸疾。則勿執方以治也。

桂苓甘露飲

扶苓去皮 澤瀉各一兩 滑石四兩 白朮炒
猪苓去皮 桂心炒各五錢 石膏 寒水石各二兩
夏月引飲過多。小便不利。濕熱為患者。此方主之。○三石所以清六府之熱。五苓所以利三焦之濕。河間此方。誠治濕熱之簡捷者。張子和加人參、甘草。因其脈虛。乾葛之加。解其暑渴。木香之加。化其濕氣。

縮脾飲

砂仁

草果仁

烏梅肉

炙甘草各四兩

扁豆炒

乾葛各二兩

夏月伏熱。為酒食所傷者。此方主之。○砂仁、草果所以消肉食。烏梅、乾葛。却暑而除煩。扁豆、甘草。助脾而益胃。

六和湯

砂仁

半夏

杏仁

人參

白朮

甘草

藿香

木瓜

厚朴

扁豆

赤茯苓

夏月病人霍亂轉筋。嘔吐泄瀉。寒熱交作。倦怠嗜臥。伏暑煩悶。小便赤澀。或利或渴。中酒胎產。皆可服之。○六和者。和六府也。脾胃者。六府之總司。故凡六府不和之病。先於脾胃而調之。此知務之醫也。香能開胃竅。故用藿砂。辛能散逆氣。故用半夏。淡能利濕熱。故用茯苓。甘能調脾胃。故用扁朮。補可以去弱。故用參草。苦可以下氣。故用厚朴。夫開胃散逆。則嘔吐除。利濕調脾。則二便治。補虛去弱。則胃氣復。而諸疾平。蓋脾胃一治。則水精四布。五經並行。雖百骸九竅。皆太和矣。況於六府乎。

濕門第五

敘曰。濕有內外。有陰陽。有上下。今考七方。言其常耳。未及其變也。東南卑下之區。十病九濕。惡能盡其變耶。此在臨證而加察焉可也。

二陳湯

半夏 薑製

陳皮

茯苓 各半

甘草 七分

脾弱不能制濕。內生積飲者。此方主之。○水穀入胃。無非濕也。脾土旺。則能運

化水穀。上歸於肺。下達膀胱。無濕氣之可留也。惟夫脾弱不能制濕。則積而為痰飲。半夏之辛能燥濕。茯苓之淡能滲濕。甘草之甘能健脾。陳皮之辛能利氣。脾健則足以制濕。氣利則積飲能行。東南之人。多有濕飲之疾。故丹溪恆主之。其曰加升提之劑者。亦清氣升而濁氣自降之謂。

平胃散

蒼朮晡五斤 陳皮去白 厚朴薑湯炒 甘草炙三兩

濕淫於內。脾胃不能尅制。有積飲痞膈中滿者。此方主之。○此濕土太過之證。經曰。敦阜是也。蒼朮味甘而燥。甘則入脾。燥則勝濕。厚朴味溫而苦。溫則益脾。苦則燥濕。故二物可以平敦阜之土。陳皮能泄氣。甘草能健脾。氣泄則無濕鬱之患。脾強則有制濕之能。一補一泄。又用藥之則也。是方也。惟濕土太過者能用之。若脾土不足。及老弱陰虛之人。皆非所宜也。

羌活勝濕湯

羌活 獨活各一錢 藁本 炙甘草
防風 川芎各五分 蔓荊子三分

外傷於濕。一身盡痛者。此方主之。○脾胃虛弱。濕從內生者。二陳、平胃之類主之。水停於膈。濕盛濡瀉者。六一、五苓之類主之。水滲皮膚。肢腫黃脹者。五皮、茵陳之類主之。今濕流關節。非上件所宜矣。經曰。風勝濕。故用羌、防、藁、獨、芎、蔓諸風藥以治之。以風藥而治濕。如卑濕之地。風行其上。不終日而濕去矣。又曰。無竅不入。惟風爲能。故凡關節之病。非風藥不可。用甘草者。以風藥悍燥。用以調之。此之謂有制之兵也。

甘草附子湯

炙甘草

白

朮

各二錢

附

子

一分錢五

桂

枝

四錢

風濕骨節疼煩。不欲去衣。小便不利。大便反快者。此方主之。○風濕相搏。故骨節疼煩。傷風則惡風。故不欲去衣。小便不利而大便燥者爲熱。今小便不利而大便反快。則濕可知矣。附子之熱。可以散寒濕。桂枝之辛。可以解風濕。甘草健脾。則濕不生。白朮燥脾。則濕有制。是方也。以桂、附之辛熱而治濕。猶之淖潦之地。得太陽暴之。不終朝而濕去。亦治濕之一道也。

二妙散

黃柏乳潤一宿

蒼朮七日浸

等分爲末。空心酒服三錢。

濕熱腰膝疼痛者。此方主之。○濕性潤下。病則下體受之。故腰膝病。然濕未嘗痛。積久而熱。濕熱相搏。然後痛。此方用蒼朮以燥濕。黃柏以去熱。又黃柏有從治之妙。蒼朮有健脾之功。一正一從。奇正之道也。

四苓散

白朮炒

茯苓去皮

猪苓

澤瀉

濕生於內。水瀉。小便不利者。此方主之。○經曰。濕勝則濡瀉。故濕生於內者。令人水瀉。濕併於大腸。故小便不利。白朮燥而淡。燥則能健脾。淡則能利濕。茯苓甘而淡。甘則能補中。而淡亦滲濕矣。猪苓枯而淡。澤瀉鹹而淡。枯者有滲利而無補益。鹹者直能潤下而兼滲利。丹溪曰。治濕不利小便。非其治也。故主此方。不換金正氣散。

厚朴薑湯炒

陳皮去白

半夏製

藿香去梗

蒼朮製

甘草炙

凡受山嵐瘴氣。及出遠方。不服水土。吐瀉下利者。此方主之。○山嵐瘴氣。谷氣也。內經曰。谷氣通於脾。故令人不服水土而壞腹。是方也。蒼朮。厚朴。陳皮。甘草。前之平胃散也。可以平濕土。敦阜之氣。而消嵐瘴。乃半夏之燥。所以醒脾。藿香之芬。所以開胃。方名曰正氣者。謂其能正不正之氣故爾。

瘟疫門第六

敘曰。瘟疫以六淫致疾。證狀各各不同。自非良醫。鮮有明者。吾嘗執贄遠邇而求學益。叩及瘟疫諸證。卽擅名之士猶訥焉。今考方十二首。詳辯其證。庶幾乎活人之補也。

敗毒散加黃芩湯

羌活

獨活

柴胡

前胡

川芎

黃芩

桔梗

枳殼

人參

茯苓

甘草

壯熱不惡風寒而渴者。瘟疫病也。此方主之。○冬時觸冒寒氣。卽病者名曰傷寒。

不即病者。寒毒藏於肌膚。至春變為溫病。至夏變為熱病。以其陽毒最深。名曰瘟疫。寒變為溫為熱。故病壯熱。不惡風寒而渴也。經曰。治溫以清。又曰。開之發之。適事為故。羌活、獨活、柴胡、前胡、川芎皆輕清開發之劑也。故用之以解壯熱。用黃芩、枳殼、桔梗者。取其清膈而利氣也。用人參、茯苓、甘草者。實其中氣。使瘟毒不能深入也。培其正氣。敗其邪毒。故曰敗毒。

九味羌活湯

羌活

防風

蒼朮

細辛

川芎

白芷

黃芩

甘草

生地黄

觸冒四時不正之氣。而成時氣病。憎寒壯熱。頭疼身痛。口渴。人人相似者。此方主之。○謂春時應暖而反大寒。夏時應熱而反大涼。秋時應涼而反大熱。冬時應寒而反大溫。此非其時而有其氣。是以一歲之中。長幼之病多相似也。藥之為性。辛者得天地之金氣。於人則為義。故能匡正而黜邪。羌、防、蒼、細、芎、芷皆辛物也。分經而主治。邪在太陽者。治以羌活。邪在陽明者。治以白芷。邪在少陽者。

治以黃芩。邪在太陰者。治以蒼朮。邪在少陰者。治以細辛。邪在厥陰者。治以川芎而防風者。又諸藥之卒徒也。用生地所以去血中之熱。而甘草者。又所以和諸藥而除氣中之熱也。易老自序云。此方冬可以治寒。夏可以治熱。春可以治溫。秋可以治濕。是諸路之應兵也。用之以治四時瘟疫。誠為穩當。但於陰虛氣弱之人。在所禁爾。

三黃石膏湯

- 石膏 錢一兩五
- 黃芩 炒
- 黃連 炒
- 黃柏 各五
- 山梔 三十枚
- 麻黃 去節
- 淡豉 各二

瘟疫表裏俱盛。五心煩熱。兩目如火。鼻乾面赤。大渴舌燥者。此方主之。○寒毒藏於肌膚。至夏變為熱病。熱病未除。更遇溫熱。名曰瘟疫。熱病之最重者。寒能制熱。故用石膏。苦能下熱。故用芩。黃。梔。柏。佐以麻黃。淡豉之發散者。以溫熱至深。表裏俱實。降之則鬱。揚之則越。鬱則溫熱猶存。兼之以發揚。則炎熾之勢皆熅矣。此內外分消其勢。兵之分擊者也。

沃漬法

瘟熱內外皆實。喜飲水入水者。取新汲井花水一大缸。使病人坐其水中。復以大杓盛水自頂沃之。水熱則病減矣。病人喜飲冷。亦聽其大啜。毋得阻也。行此法者。易義曰。水盛則火滅。經曰。行水瀆之。和其中外。可使畢已。此之謂也。

姜蕤湯

姜 蕤 半二錢

麻 黃

白 薇

青木香

羌 活

杏 仁

川 芎

甘 草 各五分

石 膏

甘菊花 各一分

風溫憎寒壯熱。頭疼身痛。口渴面腫者。此方主之。○寒毒藏於肌膚。至春變為溫病。溫熱未除。更遇於風。病為風溫。表有邪。故寒熱。裏有邪。故口渴。風之傷人也。頭先受之。故頭疼。風盛則氣壅。故面腫。風溫壅盛。甘能發之。故用姜蕤。甘草。辛能散之。故用羌活。麻黃。清能平之。故用川芎。甘菊。寒能勝之。故用石膏。白薇。佐以杏仁。取其利氣。而青木香者。清熱下氣之物也。

白虎加蒼朮湯

石膏一斤

知母六兩

蒼朮

甘草各二兩

粳米六合

共分四服。

濕溫憎寒壯熱。口渴。一身盡痛。脈沉細者。此方主之。○溫毒藏於肌膚。更遇於濕。名曰濕溫。濕為陰邪。故憎寒。溫為陽邪。故壯熱。溫熱入裏。故口渴。濕流百節。故一身盡痛。濕為陰。故脈沉細。石膏、知母、甘草、粳米、白虎湯也。所以解溫熱。加蒼朮者。取其辛燥能治濕也。白虎考見傷寒門。

大青龍加黃芩湯

麻黃六兩

桂枝淨洗

甘草各二兩

杏仁四十枚

黃芩七錢

生薑三兩

石膏如雞子大

大棗十二枚

寒疫頭疼身熱。無汗惡風煩燥者。此方主之。○春分以後。至秋分節前。天有暴氣。抑遏陽氣。不得泄越。有上件諸證者。皆為時行寒疫。表有風寒。故見太陽證。頭疼身熱。無汗惡風。裏有溫熱。故見煩燥。麻黃、桂枝、甘草、杏仁、生薑、大棗。辛甘物也。辛以解風寒。甘以調營衛。石膏、黃芩。寒苦物也。寒以清溫熱。苦以治煩燥。

升麻葛根湯

升麻

葛根

芍藥

甘草等分

冬溫。無汗發熱口渴者。此方主之。○冬月應寒而反大溫。民受其溫癘之氣。名曰冬溫。非時不正之氣。由鼻而入。皮毛未得受邪。故無汗。病由於溫。故發熱口渴。升麻葛根辛涼而發散者也。故足以解冬溫。芍藥味酸。能養陰而退熱。甘草味甘。能調營而益衛。

太無神朮散

蒼朮製

厚

朴製各一兩

陳皮一兩

石菖蒲

炙甘草

藿

者各一兩五錢

人受山嵐瘴氣。憎寒壯熱。一身盡痛者。此方主之。○山嵐瘴氣。謂山谷間障霧。濕土敦阜之氣也。濕氣蒸騰。由鼻而入。呼吸傳變。邪正分爭。陰勝則憎寒。陽勝則壯熱。流於百節。則一身盡痛。是方也。用蒼朮之燥。以尅制其障霧之邪。用厚朴之苦。以平其敦阜之氣。菖蒲藿香。辛香物也。能匡正而辟邪。甘草陳皮。調脾胃也。能補中而泄氣。內經曰。谷氣通於脾。故山谷之氣。感則壞人脾。太無此方。

但用理脾之劑。而解瘴毒之妙。自在其中。使非深得經旨。不能主此方也。其高識若此。誠不愧為丹溪之師矣。

漏蘆湯

漏蘆

升麻

大黃

藍葉

黃芩

玄參等分

芒硝甚者加至二錢

疫癘積熱。時生疔瘡結毒。俗稱流注。面腫咽塞者。此方主之。○經曰。營氣不從。逆於肉理。乃生毒癰。又曰。熱勝則腫。故疫癘之餘熱。解之未盡。逆留於分肉之間。則作上件諸證。藥之為性。辛能解散。苦能勝熱。漏蘆升麻藍葉。辛而且苦。故足以解結熱。鹹能軟堅。苦能瀉實。大黃味苦。芒硝味鹹。故足以軟堅而瀉實。玄參苦而潤。黃芩苦而枯。潤者去血中之熱。而枯者去氣中之熱。爾况與漏蘆升麻走散之藥同用之。則又無所不至矣。

消毒丸

大黃酒浸

牡蠣炙

蠶等分

疫毒內鬱。時成疔瘡者。此方主之。○內經曰。陷脈為癰。留連肉腠。謂陽毒乘脈

之虛而陷入之便。壅結而爲癰核。留連於肉腠之間。正此疫毒疔瘡之謂也。苦能下熱。故用大黃。鹹能柔堅。故用殭蠶、牡蠣。

辟瘟法

凡覺天行時氣。恐其相染。須日飲雄黃酒一卮。仍以雄黃豆許用綿裹之。塞鼻一竅。男左女右用之。或用大蒜塞鼻。或用阿魏塞鼻。皆良。雄黃氣悍。能辟惡邪。大蒜、阿魏氣之至臭者。臭勝則諸穢皆不足以加之矣。但蒜大熱。阿魏透腦。虛人難用。不若雄黃便於事爾。

大頭瘟第七

敘曰。大頭瘟。前古未之論也。東垣始論之。今上壬午。北方病此者甚衆。死者不啻數萬人。岷居南土。未嘗見其證。鄉人自北來者。皆言患者頭大如斗。躋頭而還。自若也。今考三方。觀其大略。

二黃湯

黃芩酒炒

黃連酒炒

生甘草各一兩

天行大頭疫病。此方主之。○頭大者。炎上作火之象也。故用芩、連之苦以瀉之。甘草之甘以緩之。

普濟消毒飲子

黃芩酒炒

黃連酒炒各

柴胡五分

桔梗三分

人參三錢

陳皮去白

甘草

玄參各二錢

連翹

板藍根

馬勃

鼠黏子各一錢

白殭蠶

升麻各七

便秘加大黃。

泰和二年四月。民多疫癘。初覺憎寒壯熱體重。次傳頭面腫盛。目不能開。上喘。咽喉不利。舌乾口燥。俗云大頭傷寒。諸藥雜治。終莫能愈。漸至危篤。東垣曰。身半已上。天之氣也。邪熱客於心肺之間。上攻頭面而為腫。爾乃主是方為細末。半用湯調。時時呷之。半用蜜丸嚥化。活者甚衆。時人皆曰天方。遂刻諸石。以傳永久。崑謂芩、連苦寒。用之以瀉心肺之火。而連翹、玄參、板藍根、鼠黏子、馬勃、殭蠶皆清喉利膈之物也。緩以甘草之國老。載以桔梗之舟楫。則諸藥浮而不沉。

升麻升氣於右。柴胡升氣於左。清陽升於高巔。則濁邪不得復居其位。經曰。邪之所湊。其氣必虛。故用人參以補虛。而陳皮者。所以利其壅滯之氣也。又曰。大便秘者。加大黃。從其實而瀉之。則竈底抽薪之治爾。

五香麻黃湯

麝香五分

薰陸香

雞舌香錢各一

青木香

沉香

麻黃去節

防風去蘆

獨活去土

白薇

萎蕤

枳實熬炒

秦艽去蘆

甘草錢各二

凡傷寒熱病後。忽發浮腫。或着頭面。或着唇口頸項。或着胸背。或着四肢。或偏着兩足。不痛不赤者。此方主之。○腫而痛者。為實邪。不痛者。為虛邪。腫而赤者。為結熱。不赤者。為留氣。故知上件諸腫。乃是餘邪未去。營衛之行。不相順接。逆於肉理。而為腫爾。是方也。用五香以開氣竅。而麻黃、防風、獨活、秦艽、萎蕤、白薇。皆辛散也。一以解其餘邪。一以流其着氣。乃甘草之補。所以致新。枳實之悍。所以推陳。

醫方考卷一 大頭瘰第七

醫方考

明 歙邑 吳 崑鶴皋原著

鄞縣 曹赤電炳章圈點

卷二

火門第八

敘曰。水火。人身之陰陽也。陽常有餘。故火證恆多。所謂一水不勝五火是也。人能攝理其火。致其沖和。則調元之手矣。或者寒涼太過。斯又弊焉。自有五行以來。不可以無火。故知滅燼之爲非。今考古方二十餘首。以治火。豈曰滅火云哉。

井花水

水足以濟火。故狂燥煩渴。火實之證。內以水飲之。外以水漬之。此既濟之妙。自
大易以來。已有之矣。

甘梨漿

甘梨漿。水類也。生之可平六府之陽。熟之可濟五藏之陰。實火宜生。虛火宜熟。人尿人尿人中白牛屎猪屎馬通驢子小便總考

孫思邈千金方。凡療火證熱證。率用上件取汁飲之。往往稱其神良。何也。經曰。清陽出上竅。濁陰出下竅。尿溺出於二陰。則無分人類物類。皆陰濁也。惟其陰濁。故足以制陽光。或者鄙而遺之。由夫未達醫之妙也。

煉秋石

古昔神良之醫。但用人尿溺白堊耳。未嘗有用秋石之方也。近時多用之。夫藥有氣有味。有精有魄。秋石既經煎煉。則其氣味已易。精華已去。所存者獨枯魄耳。惡能與人尿溺白堊論功效耶。此舉世尙奇之味也。或用陰秋石者。爲近之。防風通聖散

防風	川芎	川歸	白芍藥
大黃	芒硝	連翹	薄荷
麻黃	石膏	桔梗	黃芩
白朮	梔子	荊芥	滑石

甘草

表裏客熱。三焦火實者。此方主之。○麻黃、防風、疎表藥也。火熱之在表者。得之由汗而泄。大黃、芒硝。攻裏藥也。火熱之在裏者。得之由下而泄。荊芥、薄荷。清上藥也。火熱之在顛頂者。得之由鼻而泄。滑石、梔子。清下藥也。火熱之在決瀆者。得之由溺而泄。乃石膏、桔梗。又所以清肺胃而連翹、黃芩。又所以去諸經之客熱也。火熱灼其血。則川芎、當歸。芍藥可以養之。火熱壞其氣。則白朮、甘草可以益之。

導赤散

生地黄

木

通皮去粗

甘草梢等分

心熱。小便黃赤。此方主之。○心與小腸為表裏。故心熱。則小腸亦熱。而令便赤。是方也。生地黄可以涼心。甘草梢可以瀉熱。佐之以木通。則直走小腸膀胱矣。名曰導赤者。導其丙丁之赤。由溺而泄也。

三黃瀉心湯

黃芩

黃連

大黃酒潤各等分

心膈實熱。狂燥面赤者。此方主之。○味之苦者。皆能降火。黃芩味苦而質枯。黃連味苦而氣燥。大黃苦寒而味厚。質枯則上浮。故能瀉火於膈。氣燥則就火。故能瀉火於心。味厚則喜降。故能蕩邪攻實。此天地親上親下之道。水流濕火就燥之義也。

龍膽瀉肝湯

柴胡一錢

黃芩七分

五味子九粒

生甘草

山梔炒黑

知母去毛

天門冬去心

麥門冬去心

黃連炒

人參

龍膽草各五分

謀慮不決。肝熱膽溢。口苦熱盛者。此方主之。○肝主謀慮。膽主決斷。謀慮則火起於肝。不決則火起於膽。柴胡性溫味苦而氣薄。故入厥陰少陽。黃芩黃連。龍膽草。山梔子。得柴胡以君之。則入肝膽而平之矣。制肝者惟金。故用天。麥門冬。五味。知母以益肺。畏肝者惟土。故用人參。甘草以益脾。

左金丸

黃連炒六兩

吳茱萸湯一兩

二共爲末作丸。

肝藏火實。左脅作痛者。此方主之。○左、肝也。左、金者。謂金令行左而肝平也。黃連乃瀉心之物。瀉去心火。不得乘其肺金。則清肅之令左行。而肝有所制矣。吳茱萸味辛熱而氣燥。燥則入肝。辛熱則疏利。乃用之以爲反佐。經曰。佐以所利。和以所宜。此之謂也。

當歸龍薈丸

當歸

龍膽草

梔子

黃連

黃柏

黃芩各一兩

木香一錢

麝香五分

大黃酒浸

青黛

蘆薈各五錢

蜜丸如豆大。

風熱蓄積。時發驚悸。筋惕搐搦。噤塞不利。腸胃燥澀。狂越等證。此方主之。○肝火爲風。心火爲熱。心熱則驚悸。肝熱則搐搦。噤塞不利者。肺亦火也。腸胃燥澀者。脾亦火也。狂越者。狂妄而越禮也。經曰。狂言爲失志。又曰。腎藏志。如斯言之。則腎亦火矣。此一水不勝五火之謂也。故用黃連以瀉心。用黃芩以瀉肺。青黛

龍膽、蘆薈以瀉肝。大黃以瀉脾。黃柏以瀉腎。所以亟亟以瀉五藏之火者。幾於無水。故瀉火以存水耳。用當歸者。養五藏之陰於亢火之時。用木香、麝香者。利五藏之氣於尅伐之際也。互考見咳嗽門。

瀉黃散

藿香二錢

山梔炒黑兩

石膏五錢

甘草三兩

防風四兩

脾家伏火。唇口乾燥者。此方主之。○唇者。脾之外候。口者。脾之竅。故唇口乾燥。知脾火也。苦能瀉火。故用山梔。寒能勝熱。故用石膏。香能醒脾。故用藿香。甘能緩脾。故用甘草。用防風者。取其發越脾氣而升散其伏火也。或問何以不用黃連。余曰。黃連苦而燥。此有唇口乾燥。則非黃連所宜。故惟梔子之苦而潤者為當耳。又問曰。既惡燥。何以不去防風。余曰。東垣已言之矣。防風乃風藥中之潤劑也。故昔人審擇而用之。

升陽散火湯本方去獨活加薄荷白名火鬱湯

升麻去絲

葛根

獨活

羌活

人參去蘆

白芍各五錢

柴胡八錢

防風二錢五分

生甘草二錢

炙甘草三錢

過食冷物。抑遏少陽之火。鬱於脾部者。此方主之。○少陽者。三焦與膽也。經曰。少火生氣。丹溪曰。天非此火。不能生萬物。人非此火。不能以有生。是少火也。牛物之本。揚之則光。遏之則滅。今為飲食填塞至陰。抑遏其上行之氣。則生道幾於息矣。故宜辛溫之劑。以舉之。升麻、柴胡、羌活、獨活、防風、乾葛。皆辛溫上行之物也。故用之以升少陽之氣。清陽既出上竅。則濁陰自歸下竅。而食物傳化。自無抑遏之患。芍藥味酸。能瀉土中之木。人參味甘。能補中州之氣。生甘草能瀉鬱火於脾。從而炙之。則健脾胃而和中矣。東垣氏聖於脾胃者。其治之也。必主於升陽。俗醫知降而不知升。是撲其少火也。安望其衛生耶。

瀉白散

桑白皮

地骨皮各一兩

甘草五錢

肺火為患。喘滿氣急者。此方主之。○肺苦氣上逆。故喘滿。上焦有火。故氣急。此丹溪所謂氣有餘便是火也。桑白皮味甘而辛。甘能固元氣之不足。辛能瀉肺

氣之有餘。佐以地骨之瀉腎者。實則瀉其子也。佐以甘草之健脾者。虛則補其母也。此云虛實者。正氣虛而邪氣實也。又曰。地骨皮之輕。可使入肺。生甘草之平。可使瀉氣。故名以瀉白。白。肺之色也。

阿膠散

阿膠一兩半
蛤粉炒

鼠黏子二錢半
炒香

馬兜鈴半兩
焙

炙甘草五錢

杏仁七箇
去皮尖

糯米一兩

肺虛有火。嗽無津液。咳而哽氣者。此方主之。○燥者潤之。今肺虛自燥。故潤以阿膠杏仁。金鬱則泄之。今肺中鬱火。故泄以兜鈴黏子。土者金之母。虛則補其母。故入甘草糯米以補脾益胃。

大補丸

黃

柏一斤
四君子湯下
色爲末
水丸
氣虛者
四物湯下

腎火從臍下起者。腎水衰也。此方主之。○腎非獨陰也。命門之火寄焉。腎水一虧。則命門之火無所畏而自熾矣。故龍雷之火從臍下動也。經曰。水鬱則折之。水鬱者。腎部有鬱火也。折之者。制其衝逆也。柏皮味苦而厚。爲陰中之陰。故能

制腎經衝逆之火。火去則陰生。故曰大補。王冰曰。壯水之主。以制陽光。此之謂也。氣虛下以四君子湯。恐其寒涼而壞脾也。血虛下以四物湯。助其滋陰而制火也。

滋腎丸

黃柏酒浸

知母酒浸

肉桂五錢

腎火起於湧泉之下者。此方主之。○熱自足心直衝股內而入腹者。謂之腎火起於湧泉之下。知柏苦寒。水之類也。故能滋益腎水。肉桂辛熱。火之屬也。故能假之反佐。此易所謂水流濕。火就燥也。

三補丸

黃芩

黃連

黃柏俱酒潤等分

三焦有火。嗌喉乾燥。小便赤澀。大便秘結。此方主之。○少火之火。無物不生。壯火之火。無物不耗。內經曰。壯火食氣是也。故少火宜升。壯火宜降。今以三物降其三焦之壯火。則氣得其生。血得其養。而三焦皆受益矣。故曰三補。黃芩苦而枯。故清熱於上。黃連苦而實。故瀉火於中。黃柏苦而潤。故瀉火於下。雖然。火有

虛實。是方但可以治實火。若虛者用之。則火反盛。謂降多亡陰也。丹溪曰。虛火可補人參黃耆之類。則虛實之辯。若天淵矣。明者幸求之證焉。

益元散即暑門六一散又名天水散

滑石六兩 甘草一兩

共爲末用蜜水調下三錢。

六府有實火。上有煩渴。下有便秘赤澀者。此方主之。○滑石性寒。故能清六府之熱。甘草性平。故能緩諸火之勢。

涼膈散

黃芩酒炒

梔子仁炒黑

薄荷各一兩

連翹四兩

大黃酒浸

芒硝

甘草各二兩

共爲末。每服五錢。

火鬱上焦。大熱面赤者。此方主之。○黃芩。梔子。味苦而無氣。故瀉火於中。連翹。薄荷。味薄而氣薄。故清熱於上。大黃。芒硝。鹹寒而味厚。故諸實皆瀉。用甘草者。取其性緩而戀膈也。不作湯液而作散者。取其泥膈而成功於上也。

清咽太平丸

薄荷葉十兩

川芎

甘草

防風

烏犀角

柿霜

桔梗三兩

蜜丸噙化。

膈上有火。早間咯血。兩頰常赤。咽喉不清者。此方主之。○消風清熱。莫如薄荷。故用以爲君。佐以烏犀。解心熱也。入以柿霜。生津液也。用川芎有清上之功用。防風有解散之効。恐諸藥之下流。故載以舟楫。因火勢之急速。故緩以國老。○師云。咽者膽之候。若只咽間痰熱。膈內和者。宜以平膽之方主之。

溫膽湯

竹茹

枳實

半夏製

甘草各二兩

陳皮去白

生薑各四兩

膽熱嘔痰。氣逆吐苦。夢中驚悸者。此方主之。○膽。甲木也。爲陽中之少陽。其性以溫爲常候。故曰溫膽。竹茹之清。所以去熱。半夏之辛。所以散逆。枳實所以破實。陳皮所以消滯。生薑所以平嘔。甘草所以緩逆。○傷寒解後。多有此證。是方

恆用之。

珍珠散

琥珀

珍珠粉

鐵粉

天花粉

硃砂

寒水石

牙硝

大黃酒浸

生甘草

各等分爲末。每用薄荷湯調下三錢。

男婦小兒。五藏積熱。心胸悶亂。口乾舌燥。精神恍惚。顛狂等證。此方主之。○明可以安神。琥珀、珍珠皆明物也。故用之以安神魄。重可以去怯。鐵粉、硃砂皆重物也。故用之以定驚狂。寒可以去熱。硝黃、水石皆寒物也。故用之以除積熱。熱之盛者必渴。天花粉可以生津。火之熾者必急。生甘草所以緩急。

人參黃耆白朮甘草考

實火可瀉。宜用芩、連、梔、柏。虛火可補。宜用人參、黃耆、白朮、甘草。所謂溫能除大熱也。或者誤用芩、連、梔、柏以治虛火。則火益熾。何以然哉。四件皆降下之品。降多則亡陰。陰亡則不足以濟火。故令火益熾。

天雄附子川烏硫黃考

諸證無火者。宜於四件斟酌之。○壯火固不可有。少火亦不可無。所謂天非此火。不足以生萬物。人非此火。不足以有生。故凡諸證寒涼太過。幾於無陽者。宜審擇而用之。昔人以附子一物爲太陽丹。以天雄附子川烏爲三建湯。以硫黃爲金液丹。皆所以養其真陽。壯其真火。而存此身之生氣耳。明變之士。幸教我哉。

癰疹門第九

敍曰。無熱不癰。無濕不疹。此二言者。癰疹之大觀也。其致疾之由。則有風寒暑濕之殊。辨證之法。則有表裏虛實之異。此在人之自悟。非可以紙上盡也。

防風通聖散

防風	川芎	當歸	大黃
芒硝	白芍藥	連翹	薄荷
麻黃	石膏	桔梗	黃芩

白朮 梔子 荊芥 滑石 甘草

失下發痲者。此方主之。○失下者。腸胃燥實。當下而失於下也。失下則熱無所泄。而結於胃。胃主肌肉。故肌肉之間見紅痲也。紅者。火之色。熱之熾也。方中有大黃、芒硝、甘草。乃傷寒門調胃承氣湯也。所以瀉腸胃之實熱。加連翹、梔子、黃芩、薄荷。乃火門之涼膈散也。所以散胸膈之熱邪。全方除芒硝、大黃。名曰雙解散。解表有防風、麻黃、薄荷、荊芥、川芎。解裏有石膏、滑石、黃芩、梔子、連翹。復有當歸、芍藥以和血。桔梗、白朮、甘草以調氣。營衛皆和。表裏俱暢。故曰雙解。本方名曰通聖散。極言其用之妙也。正考見中風門。

葛根橘皮湯

葛根 橘皮 杏仁 知母 麻黃 黃芩 甘草

冬月肌中痲爛。咳而心悶者。此方主之。○冬月腠理閉密。故用麻黃以發表。肌屬陽明。故用葛根以解肌。咳爲肺氣不利。故用橘皮、杏仁以利氣。悶爲心膈有

熱。故用黃芩、知母以清熱。辛甘發散為陽。故佐以甘草。且調諸藥而和中也。

陽毒升麻湯

升麻半兩

生犀角鎊

麝香

黃芩炒

人參

甘草各二錢五分

傷寒吐下後。狂言面赤。陽毒發癰者。此方主之。○吐下後中氣必虛。故用人參、甘草以補中。升麻、犀角寒而不滯。故為散癰之要藥。佐以麝香利氣竅也。佐以黃芩清陽毒也。

玄參升麻湯

玄參

升麻

甘草各等分

發癰咽痛者。此方主之。○升麻能散癰。甘草、玄參能清咽。散癰者取其辛溫。謂辛能散而溫不滯也。清咽者取其甘苦。謂甘能緩而苦能降也。

消毒犀角飲子

牛蒡子六錢

荊芥二錢

防風三錢

甘草一錢

皮膚有癰疹。無裏證者。此方主之。○辛甘發散為陽。故用防風、甘草。癰之為患。

熱藥治之則血溢而益盛。寒藥治之則血凝而不散。惟辛涼之藥為宜。故用牛蒡、荊芥。無犀角而名犀角者。謂其功用同乎犀角也。

升麻葛根湯

升麻

葛根

白芍藥

甘草

麻疹已出未出。此方皆主之。○諸疹未出。升麻、葛根能出之。諸疹已出。升麻、葛根能散之。芍藥和營。甘草和衛。

消風散

荊芥穗

炙甘草

陳皮

厚朴薑湯炒

蘗香

蟬退

人參

白殭蠶炒

茯苓

防風

芎藭

羌活

風熱丹疹。此方主之。○風熱則表實。實者宜散之。荊芥、芎藭、防風、羌活皆辛散也。表實則裏虛。虛者宜補之。人參、甘草、茯苓皆甘補也。風盛則氣壅。厚朴所以下氣。陳蘗所以泄氣。風熱生痰。治以殭蠶。表熱留連。治以蟬退。

化斑湯

石膏 人參 知母 甘草
 胃熱發瘧。脈虛者。此方主之。○胃熱者。口燥煩渴也。胃主肌肉。故胃熱則肌肉
 瘧爛。脈虛者。壯火食氣。而脈無力以充實也。惟其胃熱。故用石膏之寒。惟其脈
 虛。故用人參之補。知母養其營。甘草養其衛。此方即人參白虎湯爾。

調中湯

蒼朮半錢 陳皮 砂仁 藿香
 甘草 芍藥炒 桔梗 半夏
 白芷 枳殼炒 羌活各一錢 川芎
 麻黃 桂枝各五分

內傷外感。熱而成瘧者。此方主之。○內傷則裏熱。外感則表熱。兩熱而無泄。故
 令瘧爛。外傷者。調其中。蒼朮、陳皮、藿香、半夏、枳殼、桔梗。皆調中藥也。外感者。疎其表。麻、桂、
 羌、芎、芷、草。皆疎表藥也。表裏治而瘧自愈矣。

大建中湯

人參 黃耆炙 當歸 芍藥酒炒

桂心

甘草炙

半夏製

黑附子製

中氣不足。無根失守之火。出於肌表而成瘧者。此方主之。○此是汗吐下後之證。中氣虛乏。則餘邪無所歸附。隱隱然見於肌表。其色淡紅而不甚顯。爲辨也。人參、黃耆所以補中。半夏、甘草所以調中。此皆建脾藥也。復有當歸、芍藥之活血。則外溢之瘧流而不滯。有桂心、附子之溫中。則失位之火引而歸原。此中營之幟一端。而失伍之師各就其列也。是方也。以附、桂、參、耆而治瘧。法之變者也。醫而未至於可以權。則不足以語此。

瘧門第十

敘曰。瘧之理難言矣。知五運六氣。十四經絡。始能粗知其證。知陽陰進退消長之理。然後知夫瘧疾變遷之妙。苟非精研斯道。則所知者膚淺而已。一有問難。猶然袖手解頤。今考名方十八首。說證用藥。可爲初學之啓矇也。

麻黃羌活湯

麻黃去節

羌活

防風

甘草各三錢

瘧發時。頭疼、身熱、脊強、脈浮者。名曰寒瘧。此方主之。○寒熱一日一發。間日一發。三日一發。皆名曰瘧。此云頭疼、身熱、脊強、脈浮。皆太陽證也。太陽乃寒水所化。故機要名爲寒瘧。麻黃羌活。太陽經之汗藥也。故以爲君。防風乃諸風藥之卒徒。故以爲佐。甘草能和諸藥而兼解散。故以爲使。是方乃攻實之劑。若臨病用藥。則血虛者宜加四物。氣虛者宜加參朮。全在活法。不徒執也。

白芷湯

白芷三錢

知母

石膏各五錢

瘧發時。目痛、鼻乾、口渴、自汗、不得眠、脈長、有熱無寒、或熱多寒少者。名曰熱瘧。此方主之。○此條皆陽明證也。以其有熱而無寒。或熱多而寒少。故機要名爲熱瘧。白芷所以解陽明之經。石膏所以清陽明之府。知母所以養陽明之陰。虛者宜加人參。質實便燥者。此方不足與也。宜下之。用傷寒門大柴胡湯。後以本方調之。

小柴胡湯

柴胡去蘆

黃芩炒

人參

甘草

半夏法製 生薑 大棗

瘧發時耳聾脅痛寒熱往來口苦喜嘔脈弦者名曰風瘧此方主之○此條皆少陽證也以少陽爲甲木在天爲風故機要名爲風瘧柴胡黃芩能和解少陽經之邪半夏生薑能散少陽經之嘔人參甘草能補中氣之虛補中所以防邪之入裏也正考見傷寒門

清脾飲

青皮去穢炒 厚朴薑湯炒 白朮炒 黃芩炒

半夏製 柴胡去蘆 茯苓去皮 草果

甘草

瘧發時熱多寒少口苦咽乾大小赤澀脈來弦數者此方主之○此條皆太陰證也太陰脾主濕濕生痰痰生熱故見上件諸證脈來弦數弦爲痰飲數爲熱也方曰清脾者非清涼之謂乃攻去其邪而脾部爲之一清也故青皮厚朴清去脾部之痰半夏茯苓清去脾中之濕柴胡黃芩清去脾中之熱白朮甘草清去脾藏之虛而草果仁又所以清膏粱之痰也劉宗厚先生因草果仁之溫熱

而譏焉。蓋未達嚴用和氏之清矣。機要云。瘧在三陰經。總謂之濕瘧。當從太陰經論之。此言可謂知要。今即古方審擇而用焉。則本方為切當矣。

麻黃杏子甘草石膏湯

麻黃去節四兩

杏仁去皮尖五十枚

甘草二兩

石膏半斤

傷寒例云。若脈陰陽俱盛。重感於寒者。變為溫瘧。溫瘧先熱後寒。宜此方主之。○脈陰陽俱盛者。舊有熱也。重感於寒者。新有寒也。凡瘧寒熱相搏。邪正分爭。併於表。則陽實而陰虛。陰虛生內熱。陽實生外熱。中外皆熱。故見其煩渴而身熱。惡熱莫任也。併於裏。則陰實而陽虛。陽虛生外寒。陰實生內寒。中外皆寒。故見其鼓頷而戰慄。惡寒莫任也。若其邪正分爭。併之未盡。則寒熱交集。鼓頷戰慄。煩渴身熱並至矣。此論常瘧寒熱之理也。溫瘧先熱後寒者。以其先有舊熱。而後傷寒也。方中有麻黃杏仁。可以解重感之寒。有石膏甘草。可以解舊有之熱。仲景主白虎加桂枝湯亦良。

香薷湯

香薷二兩

白扁豆

厚朴薑汁炒

茯苓各一兩

炙甘草半兩

瘧發時。獨熱無寒者。名曰瘧瘧。當責之暑。宜此方主之。○暑。陽邪也。內經曰。脈虛身熱。得之傷暑。又曰。因於暑。汗煩則喘喝。靜則多言。體若燔炭。故獨熱無寒之瘧。責其因於暑也。香薷味薄而氣清。能解表裏之暑。扁豆味甘而性平。能解腸胃之暑。厚朴苦辛。破暑飲也。甘草性平。解暑毒也。易曰。火就燥。則暑邪中人。先就於心。扶神之用。乃所以寧心耳。或問風亦陽邪也。瘧瘧何以不責之風。余曰。風爲少陽。又爲厥陰。在六氣猶未純陽。若臨證主方處治。辛熱固不可用。如辛涼發散之劑。用之未爲不可。此在醫者潛心。初不必泥於一方也。

七棗湯

附子一枚鹽水 大棗七枚

瘧發時。獨寒無熱。脈遲者。名曰牝瘧。當責之寒。宜此方主之。○牝。陰也。王冰曰。益火之原。以消陰翳。故獨寒無熱之瘧。用附子之辛以主之。佐以大棗七枚。取其能和附熱。且引之入至陰耳。

蜀漆散

蜀漆燒去

雲母燒二日夜

龍骨煨各等分

共為末。於未發前漿水服下半錢。

此仲景治牝瘧之方也。病原於頑痰癥瘕者。此方主之。○牝陰也。無陽之名。頑痰乃至陰所化。癥瘕乃凝結之陰。故令人有寒無熱。蜀漆、雲母、龍骨既經燒煉。則味澀而辛熱。味澀可以固既脫之陽。辛熱可以消固結之陰。仲景治火劫亡陽之證。於桂枝湯去芍藥。加蜀漆、龍骨輩。名曰救逆湯。是二物之為純陽可知。雲母燒二日夜。則寒性亦去。而純陽矣。宜仲景之用之也。

補中益氣湯

人參一錢

升麻三分

甘草一錢

黃耆一錢五分

陳皮去白

當歸

白朮

柴胡各五分

瘧疾經年不愈者。名曰瘵瘧。宜此方主之。○瘵老也。經年不愈。則氣血皆虛。瘵邪深入矣。氣虛則有參、耆、朮以補氣。血虛則有當歸以養血。瘵邪深入。則有柴胡、升麻以升舉之。邪氣可漸出之表也。方內有陳皮。可以消痰泄氣。能助升柴而成功。若瘵發於夜者。丹溪所謂入陰分血分也。宜於本方倍入當歸。或兼

四物可也。正考見脾胃門。互考見虛損門。

柴胡去半夏加括蕒根湯

柴胡八兩

人參

黃芩

甘草各三兩

括蕒根四兩

生薑二兩

大棗十二枚

瘧疾微勞不任。經年不差。前後復發者。名曰勞瘧。此方主之。○任事之勞。責之筋力。筋屬肝。少陽膽則其府也。方中有柴胡、黃芩。可以清少陽之邪熱。有括蕒根。可以生液養筋。有人參、甘草。可以補虛祛勞。有大棗、生薑。可以調榮益胃。又曰。參、草、薑、棗。胃家藥也。散精於肝。淫氣於筋。惟胃能之。故用此方以調勞瘧。

柴平湯

柴胡

人參

半夏

陳皮

黃芩

甘草

厚朴

蒼朮

生薑

大棗

瘧發時。一身盡痛。手足沉重。寒多熱少。脈濡者。名曰濕瘧。此方主之。○上件皆濕證也。故用小柴胡以和解表裏。平胃散以健脾制濕。二方合而為一。故名曰

柴平。小柴胡湯正考見傷寒門。平胃散正考見濕門。
紅丸子

蓬莪朮

京三稜

醋煮二伏時各二兩胡

椒一兩

阿

魏二份醋化

青皮三兩

共爲末。作丸。礬紅爲衣。

瘧疾。口亡五味。飲食腹痛膨脹者。名曰食瘧。此方主之。○食瘧者。食積成瘧也。內經曰。留者攻之。故用蓬朮、三稜、阿魏以攻積。積之爲患。氣快則行。氣滯則止。得熱則行。得寒則結。故用青皮之辛以快氣。胡椒之溫以散結。復用礬紅爲衣者。假其土性以培脾胃云爾。

人參養胃湯

人參

茯苓

甘草

半夏

陳皮

蒼朮

厚朴

藿香

烏梅

草果

瘧因飲食飢飽傷胃而成者。名曰胃瘧。此方主之。○內經曰。陰之所生。本在五

味。陰之五官。傷在五味。故飢則胃氣弱。而陰無所生。飽則胃氣強。而五官因以損。是飢飽皆足以傷胃也。胃傷則營衛虛。而穀氣乖。乖則爭。爭則邪正分。寒熱作。而成瘧矣。方中有人參、茯苓、甘草之甘。可以補胃之不足。有陳皮、蒼朮、厚朴之辛。可以平胃之有餘。半夏之辛。可使醒脾。藿香之香。可使開胃。烏梅之酸。可使收陰。草果之溫。可使消滯。

太無神朮散

蒼朮甘浸

厚朴薑炒各一兩

陳皮二兩去白

藿香

石菖蒲

甘草炙各一兩

瘧疾因感山嵐瘴氣。發時乍寒乍熱。一身沉重者。名曰瘧瘧。此方主之。○山嵐瘴氣。谷氣也。內經曰。谷氣通於脾。故此方主於治脾。蒼朮、厚朴。平脾家之敦阜也。陳皮、甘草。調脾家之虛實也。藿香、石蒲。開脾家之障礙也。經曰。治病必求其本。此之謂也。正考見瘧疫門。

五神丸塞鼻法

東方 青黛五錢

麝香二分

西方 白礬五錢

白芷二錢

南方 官桂五錢

硃砂一錢

北方 巴豆四十九粒去殼

黑豆三十六粒

中央 硫黃五錢

雄黃一錢

上件各依方位。以磁盤盛之。於五月初一日。虔誠安於本家侍奉神前。至初五日午時。共研爲末。用五家粽角爲丸。如梧桐子大。陰乾收貯聽用。凡遇患瘧之人。於瘧發之日。侵晨用綿包裹塞於鼻中。男左女右用之。

瘧疾一歲之中。長幼相似者。名曰疫瘧。此法主之神良。○疫者。天地不正之氣也。六位勝復之氣也。禽蟲吐毒之氣也。大氣之來。無人不受。壯者逸者居者則不病。怯者勞者出者遇之。則無形之氣。由鼻而入。藏於分肉之間。與正氣分爭。則成瘧矣。是方也。位按五方。藥按五色。氣按五氣。味按五味。月按五月。日按五日。粽用五家。此醫流而兼陰陽家之識也。故瘧邪入於肝。則青黛之涼。可以清肝。麝香之燥。可使直達。瘧邪入於肺。則白芷之辛。可以瀉肺。礬石之腥。可以清燥。瘧邪干於心。則丹砂之重。可以鎮心。官桂之焦。可以益火。瘧邪干於腎。則黑

豆甘鹹。可以益腎。巴豆之腐。可以瀉邪。瘧邪干於脾。則硫黃之溫。可使建中。雄黃之悍。可使辟穢。以疫氣無形。由鼻而入。故亦就鼻而塞之。塞其一竅。露其一竅者。圍師必缺之道也。脩劑之期。必於五者。病原於陰陽不正之氣。故亦以陰陽之理勝之。蓋曰五者。中宮甲己之數。南面之政也。諸氣之變。雖有勝復亢制之殊。要皆北面而臣。守位秉命之道也。故率以五數脩劑焉。

三解湯

麻黃去節

柴胡去蘆

澤瀉各三錢

此治瘧之套劑也。時行之瘧。長幼相似者。主之神良。○病有三在。在表。在裏。在半表半裏也。人在氣交之中。鼻受無形之氣。藏於分肉之間。邪正分爭。併於表。則在表。併於裏。則在裏。未有所併。則在半表半裏。是方也。麻黃之辛。能散表邪。由汗而泄。澤瀉之鹹。能引裏邪。由溺而泄。柴胡之溫。能使半表半裏之邪。由中以解。則病之三在。此方率治之矣。雖然。此方但可以瀉實耳。虛者猶當辨其氣血而補之。所謂虛者十補。勿一瀉也。

截瘧七寶飲

常山 厚朴 青皮 陳皮
 甘草 檳榔 草果等分
 先期用水酒各一鍾煎熟。以絲綿裹之。露一宿。於當發之早溫服。
 瘧疾三四發後。寸口脈來弦滑。浮大者。此方吐之。○三四發後。可截之時也。脈
 弦為飲。滑為實。浮為表。大為陽。故在可吐。師云無痰不作瘧。瘧痰為患。常山善
 吐。檳榔善墜。草果善消。厚朴青皮亦理氣行痰之要藥。陳皮甘草乃消痰調胃
 之上材也。是方也。惟脈來浮大弦滑者可用。若脈來沉澀細微者與之則逆矣。
 慎之。

驚甲煎丸

驚甲片十三	蜂窠炙四分	蛻螂炙	柴胡各六分
烏羽	瞿麥	桃仁	乾薑各二分
牡丹皮	芍藥	蟬蟲各五分	赤消各十二分
黃芩	鼠婦炙	桂枝	石葦去毛
厚朴	紫葳	阿膠炒	大黃各三分

葶 藶 熬

半 夏

人 參 各一

右二十三味。取煨竈下灰一斗。清酒一斛五斗。浸灰。候酒盡一半。着鱉甲於中。煮令泛爛如膠漆。絞取汁。內諸藥煎。爲丸如梧子大。空心服七丸。日三。瘧疾久不愈。內結癥瘕。欲成勞瘵者。名曰瘧母。此丸主之。○凡瘧疾寒熱。皆是邪氣與正氣分爭。久之不愈。則邪正之氣結而不散。按之有形。名曰瘧母。始雖邪正二氣。及其固結之久。則頑痰死血皆有之矣。然其爲患。或在腸胃之中。或薄腸胃之外。不易攻去。仲景公先取灰酒。便是妙處。蓋灰從火化。能消萬物。今人取十灰膏以作爛藥。其性可知。漬之以酒。取其善行。若鱉甲、鼠婦、蠹蟲、蜣螂、蜂窠者。皆善攻結而有小毒。以其爲血氣之屬。用之以攻血氣之凝結。同氣相求。功成易易耳。乃柴胡、厚朴、半夏。皆所以散結氣。而桂枝、丹皮、桃仁。皆所以破滯血。水穀之氣結。則大黃、葶藶、石葦、瞿麥。可以平之。寒熱之氣交。則乾薑、黃芩。可以調之。人參者。所以固元於尅伐之場。阿膠、芍藥者。所以養陰於峻厲之隊也。烏羽、赤消、紫葳。隋唐醫哲。皆不知之。故以烏羽作烏扇。赤消更海藻。紫葳更紫葳。紫苑。今詳四物。亦皆攻頑散結之品。更之未爲不可。然依舊本。仍錄烏羽。

赤消紫盛者。不欲遽然去之。蓋曰愛禮存羊云爾。

痢門第十一

敘曰。始痢宜下。夫人之所共知也。久痢宜補。亦夫人之所共知也。至如二陽合病。皆下痢。太陽陽明合病。自下痢者。宜發汗。太陽少陽合病。自下痢者。宜和解。陽明少陽合病。自下痢者。宜攻裏。非得傷寒之玄關者。不足以語此也。今考十方於後。大都口耳之見而已。

芍藥湯加芒硝方

白芍藥二錢

當歸尾

黃連

黃芩各一錢

木香火不見

桂心

檳榔

甘草各五分

大黃七分

芒硝一錢

痢疾便濃血。裏急後重者。此方主之。○痢滯下也。患痢大都責於濕熱。熱傷氣。故下白。熱傷血。故下赤。熱傷大腸。則大腸燥澀。故裏急後重。河間云。行血則便膿自愈。故用歸芍硝黃以行血。和氣則後重自除。故用木香檳榔甘草以和氣。

苦能堅腸。寒能勝熱。故用苓、連、厚、腸、胃而去熱。有假其氣。則無禁也。故假桂心之辛熱爲反佐。

桃仁承氣湯

桃仁廿五枚

桂枝七分

大黃酒浸

芒硝五錢

甘草二錢

痢疾初起。質實者。此方主之。若初間失下。反用固澀之藥。以致邪熱內蓄。血不得行。腹痛欲死者。急以此方主之。○內經曰。通因通用。又曰。暴者奪之。故用大黃、芒硝之鹹寒。以蕩滌邪熱。用桃仁之苦。以逐敗血。甘草之甘。以調胃氣。乃桂枝則辛熱物也。用之者何。經曰。微者逆之。甚者從之。故用其引大黃、芒硝直達瘀熱之巢穴。乃向導之兵也。

清六丸

滑石六兩

甘草一兩

紅麴五錢

血痢者。此方主之。○滑石能清六府之熱。甘草能調六府之氣。紅麴能和六府之血。

溫六丸

滑石六兩

甘草五兩

乾薑五錢

薑汁爲丸。

白痢者。此方主之。○白痢爲寒。中世之謬論也。劉守真氏出。始以白痢責之熱傷氣。可謂開發羣蒙。是方也。滑石寒而淡。寒則能除六府之熱。淡則能利六府之濕。甘草得天地冲和之氣。故性平而調六府。乾薑得天地正義之氣。故入氣而辟濕邪。又曰乾薑性溫。可使從治。經曰。佐以所利。是故用之。

香連丸

黃連二十兩吳茱萸黃湯潤過炒

木香四兩入錢不見火

治噤口痢加石蓮肉八兩。

下痢赤白相雜。裏急後重者。此方主之。○黃連苦而燥。苦能勝熱。燥能勝濕。木香辛而苦。辛能開滯。苦能瀉實。石蓮肉味苦而厚。爲陰中之陰。故能破噤口痢之結熱。經曰。有餘者折之。此之謂也。

木香檳榔丸

木香

檳榔

青皮去穢

陳皮去白

枳殼去穢炒

黃柏炒

丑末

莪朮醋煮

三稜醋煮

當歸酒洗

香附

黃芩酒炒

大黃酒浸

黃連吳茱萸湯過炒

水丸梧子大每服五六十丸

痢疾初作裏急後重腸胃中有積滯者此丸主之○內經曰濕淫所勝平以苦熱故用木香熱者寒之故用黃連黃芩黃柏抑者散之故用青陳香附強者瀉之故用大黃丑末逸者行之故用檳榔枳殼留者攻之故用莪朮三稜燥者濡之故用當歸是方也惟質實者堪與之虛者非所宜也故曰虛者十補勿一瀉之

敗毒散

羌活

獨活

柴胡

前胡

川芎

人參

茯苓

枳殼

桔梗

甘草等分

痢疾表熱裏虛者。此方主之。○皮膚受外感之邪。則表實而裏虛。表實則發熱。故用羌活、獨活、柴胡、前胡、川芎以解表。裏虛則痢不禁。故用人參、甘草、茯苓以補裏。桔梗可以理氣。枳殼可以破滯。昔人立此方。非以治痢。而醫者善用。則取之左右逢其源矣。仲景以葛根湯治太陽陽明合病自痢。亦是妙處。舉此一例。餘可類推。

清暑益氣湯

人參去蘆

白朮炒

陳皮去白

神麴炒

澤瀉各五分

黃耆炙

蒼朮製

升麻各一錢

麥門冬去心

當歸酒洗

黃柏炒

甘草各二分

五味子九粒

青皮麴炒

乾葛各二分

痢疾已愈。元氣虛弱。暑令尙在者。此方主之。○痢疾已愈。則不當用行血理氣之物矣。中氣虛弱。理宜補之。參、耆、歸、朮、甘草皆補虛也。暑令尙在。法宜清之。麥冬、五味皆清藥也。黃柏、澤瀉可以養陰水。升麻、乾葛可以散暑邪。青陳、蒼麴可以消滯氣。正考見暑門。

十全大補湯

人參

白朮炒

白芍藥炒

茯苓去皮

黃耆炙

當歸

甘草炙

熟地黄

川芎錢各一

桂心二分

痢疾已愈。氣血大虛者。此方主之。○大虛者必大補。故用人參、黃耆、白朮、茯苓、甘草以補氣。用當歸、川芎、芍藥、地黄、桂心以補血。

真人養藏湯

人參

白朮炒

白芍藥炒

肉桂炒

訶子煨麩裏

粟殼

甘草炒

木香不見火

肉豆蔻煨麩裏

下痢日久。赤白已盡。虛寒脫肛者。此方主之。○甘可以補虛。故用人參、白朮、甘草。溫可以養藏。故用肉桂、豆蔻、木香。酸可以收斂。故用芍藥。澀可以固脫。故用粟殼、訶子。是方也。但可以治虛寒氣弱之脫肛耳。若大便燥結。努力脫肛者。則屬熱而非寒矣。此方不中與也。與之則病益甚。

泄瀉門第十二

敍曰。泄瀉似乎易識。一遇盤根錯節。良手猶難之。所以然者。脾爲萬物之母。泄瀉能壞人之母氣故也。今考名方十五首。用之者宜變通焉。

白朮茯苓湯

白朮土炒

白茯苓錢五分 去皮各七

脾胃虛弱。不能尅制水穀。濕盛作瀉者。此方主之。○脾胃者。土也。土虛則不能四布津液。水穀常留於胃而生濕矣。經曰。濕盛則濡瀉。故知水瀉之疾。原於濕也。白朮甘溫而燥。甘則入脾。燥則勝濕。茯苓甘溫而淡。溫則益脾。淡則滲濕。土旺濕衰。瀉斯止矣。戴氏云。水瀉腹不痛者爲濕。痛者爲食積。河間云。瀉而水穀變色者爲熱。水穀不變色。澄澈清冷者爲寒。皆妙論也。若肛門燥澀。小便黃赤。則水穀雖不變。猶爲熱也。此由火性急速。食下卽出。無容變化。仲景所謂邪熱不殺穀是也。茲在臨證精察。而加藥物之所宜者爾。

胃苓湯

蒼朮

厚朴

陳皮

甘草

白朮

茯苓

猪苓

澤瀉

桂

此方亦治濕盛泄瀉者也。○蒼朮、厚朴、陳皮、甘草、平胃散也。所以燥濕。白朮、茯苓、猪苓、澤瀉、桂、五苓散也。所以利濕。脾胃強健者宜主此方。怯弱者宜主前方。白朮茯苓湯、平胃散正考見濕門。五苓散正考見傷寒門。

益黃散

丁香 香 麵 煨

木 香

青 皮 炒

陳 皮

訶 子 麵 裹 微 煨

胃寒泄瀉脈遲者。此方主之。○腸胃熱則大便燥結。腸胃寒則洞泄不禁。大都然也。脈遲驗其為寒。是方也。二香之辛熱。所以溫中。二皮之辛利。所以快脾。訶子之固澀。所以止瀉。

升陽除濕防風湯

蒼 朮 四 錢 製

防 風 二 錢

白 朮

茯 苓

芍藥錢各一

泄瀉頭痛者。此方主之。○陽陷於下。則成飧泄。濕犯於上。則令頭痛。此清濁倒置而然也。風能勝濕。故用防風。燥能制濕。故用二朮。淡能利濕。故用茯苓。土病木乘。故用芍藥。又曰。久風入中。則為腸風飧泄。故用防風。伐肝疎脾。非酸不可。故用芍藥。

錢氏白朮散

人參

白朮

茯苓

甘草

木香

藿香

乾葛

脾虛肌熱。泄瀉者。此方主之。○脾虛者。補之以甘。故用人參、白朮、茯苓、甘草。肌熱者。療之以清。故解以葛根。脾困者。醒之以香。故佐以藿木。

戊己丸

黃連十兩

吳茱萸泡

白芍藥炒各二兩

脾胃熱瀉不止者。此方主之。○熱瀉者。糞色黃褐。肛門欬澀也。苦從火化。火能生土。故用黃連厚腸胃而益土。燥酸從木化。木能疎土。故茱萸辛燥。能疎亢盛。

之肝。芍藥味酸。能瀉土中之木。戊為胃土。己為脾土。用是方以調脾胃。故曰戊己丸。

訶梨勒散

訶子仁

肉豆蔻煨麵裹

青皮各四兩

附子一兩

肉桂五錢

腸胃虛寒。滑泄腹痛者。此方主之。○虛寒者。中氣虛而生內寒也。滑泄者。土虛不足以防水也。腹痛者。濕淫而木氣抑也。寒者溫之。故用附子。肉桂。滑者澀之。故用訶子。肉蔻。抑者疏之。故用青皮。

漿水散

半夏夏製一兩

甘草炙

附子

肉桂

乾薑各五錢

良薑二錢五分

每服三錢。

水瀉澄澈清冷者。此方主之。○漿水者。瀉利漿水而澄澈也。河間云。水液澄澈清冷。皆屬於寒。寒者溫之。故是方率用辛溫之劑。析而論之。半夏炙草可使健

脾。脾健則能防水矣。乾薑附子。可使回陽。陽回則氣上升矣。良薑肉桂。可使化氣。氣化則能泌別清濁矣。

劉草窗痛瀉要方

炒白朮三兩

炒芍藥二兩

防風一兩

炒陳皮半兩

痛瀉不止者。此方主之。○瀉責之脾。痛責之肝。肝責之實。脾責之虛。脾虛肝實。故令痛瀉。是方也。炒朮所以健脾。炒芍所以瀉肝。炒陳所以醒脾。防風所以散肝。或問痛瀉何以不責之傷食。余曰。傷食腹痛。得瀉便減。今瀉而痛不止。故責之土敗木賊也。

五味子散

五味子炒香二兩

吳茱萸炒五錢

共爲末。每服二錢。

腎虛子後泄瀉者。此方主之。○腎主二便。開竅於二陰。受時於亥子。腎藏虛衰。故令子後常作泄瀉。五味子有酸收固澀之性。炒香則益腸胃。吳茱萸有溫中煖下之能。炒焦則益命門。命門火旺。可以生土。土生則泄瀉自止。酸收固澀。可

以生津。津生則腎液不虛。

椒附丸

椒 紅炒

桑螵蛸炙

龍骨存性

山茱萸炒

附子泡

鹿茸酒蒸

腎藏虛寒。大便滑瀉者。此方主之。○虛者腎精不足也。寒者命門火衰也。腎主二便。腎藏虛寒則不能禁固。故令大便滑瀉。味厚為陰中之陰。故用山茱萸、鹿茸以益腎家之陰。辛熱為陽中之陽。故用椒紅、附子以壯命門之火。味澀可以固脫。故用螵蛸、龍骨以治滑瀉之脫。

二神丸

破故紙炒四兩

肉豆蔻二兩

棗肉為丸

脾腎二藏俱虛。泄瀉不止者。此方主之。○脾主水穀。腎主二便。脾弱則不能消磨水穀。腎虛則不能禁固二便。故令泄瀉不止。肉豆蔻辛溫而澀。溫能益脾。澀能止瀉。破故紙味辛而溫。辛則散邪。溫則煖腎。脾腎不虛不寒。則泄瀉止矣。

補中益氣湯去當歸方

人參

甘草

炙各一錢

升麻三分

黃耆炙一錢五分

白朮炒

陳皮去白

柴胡各五分

滑瀉痞悶者。此方主之。○內經曰。清氣在下。則生飧泄。濁氣在上。則生腹脹。病由中氣不足。而不能升清降濁故耳。是方也。有人參、黃耆、甘草、白朮。所以補中有陳皮。所以利氣。有柴胡、升麻。所以升舉陷下之陽。清陽升則濁陰自降。濁降則痞悶自除。清升則飧泄自止。去當歸者。惡其滑利。而非飧泄所宜也。若西北高燥之區。則不必去矣。

青州白丸子

半夏七兩

南星

白附子各三兩

川烏去皮臍五錢

共為末。水中浸數日為丸。

痰積。滑泄不止者。此方主之。○肥人滑泄。責之痰。脈滑不調。責之痰。不食不飢。責之痰。昔肥今瘦。責之痰。痰之為物。濕土所化。故用半夏、南星以燥之。白附微溫。能治風痰。川烏辛熱。能攻痰積。

木香豆蔻丸

青木香

肉豆蔻

棗肉爲丸。每下梧子大二十丸。

稽神錄云。江南司農少卿崔萬安。常苦脾泄困甚。家人爲之禱於后土祠。萬安夢一婦人簪珥珠履。授以此方。如其言服之而愈。崑謂青木香能伐肝。肉豆蔻能溫中。棗肉能健脾。久泄脾虛。中氣必寒。肝木必乘其虛而尅制之。此方之用。宜其效也。

秘結門第十三

敘曰。秘結燥證也。然有火燥。有風燥。有水竭之燥。有血虛之燥。從容養血清燥爲上手。急遽攻下通腸爲下手。今考方藥六條。古人之醫法見矣。

潤腸丸

卽脾約丸

麻

仁

十兩入百沸湯內泡浸一宿

大

黃

酒四兩蒸

杏

仁去一兩二錢皮尖炒

芍

藥

酒炒

枳

實

麸炒

厚

朴

薑汁炒各三兩

胃強脾弱。不能四布。津液濡潤大腸。後便燥結者。此方主之。○潤可以去燥。麻仁杏仁是也。苦可以勝燥。枳實厚朴大黃是也。

潤燥湯

熟地黃

當歸梢

大黃酒浸

桃仁去皮尖

生甘草

麻仁各一錢

紅花五分

生地黃

升麻各二分

大腸燥結。便出堅黑者。此方主之。○大腸得血則潤。亡血則燥。故用熟地、當歸以養血。初燥動血。久燥血瘀。故用桃仁、紅花以去瘀。麻仁所以潤腸。大黃所以通燥。血熱則涼以生地黃。氣熱則涼以生甘草。微入升麻。消風熱也。

通幽湯

生地黃

熟地黃

當歸梢

大黃酒浸

桃仁泥

紅花

升麻

結燥腹痛者。此方主之。○此即前方潤燥湯去生甘草、麻仁也。胃之下口名曰幽門。此方服之。可以通其留滯。故曰通幽。大便燥結。升降不通。故令腹痛。燥者

濡之。生地、熟地。皆濡物也。逸者行之。大黃、歸梢。皆行物也。留者攻之。桃仁、紅花。皆攻物也。抑者散之。升麻之用。散抑鬱也。

大補丸

黃

柏一味炒褐色
為末作丸

大便燥結。睡中口渴者。此方主之。○腎主五液。腎水一虧。則五液皆涸。故上見口渴。下見燥結也。黃柏味苦而厚。質潤而濡。為陰中之陰。故能滋少陰。補腎水。此經所謂燥者濡之。又謂之滋其化源也。他如六味地黃丸、虎潛丸。皆益腎之藥。均可選用。二方見虛損門。

玄明粉散

玄明粉三錢

當歸尾五錢

煎湯調服。

血熱便秘者。此方主之。○玄明粉鹹寒。取其軟堅。當歸尾辛利。取其破血。此攻下之劑也。宜量人之虛實而用之。

導法

燥在廣腸。欲其速出。氣弱不能傳送而出者。宜用蜜煎導法。或猪膽導法。二法皆見傷寒門。

霍亂門第十四

絃曰。霍亂有陰陽二證。夫人共知之。若霍亂未顯之時。及霍亂始定之際。醫者不察。而以逆劑左之。病者不識。而以膩食啖之。則死道也。今考古方八首以治霍亂。大都喜通而惡塞爾。

理中丸

人參

白朮

朮炒

乾薑

薑炒

甘草

炙各

共爲末。蜜丸如雞黃大。每服一丸。沸湯和下。

寒犯太陰。腹痛吐瀉。霍亂寒多不飲水者。此方主之。○寒犯太陰脾藏。非止外感之寒。徑中太陰。凡吞寒飲冷。皆是寒氣塞於中宮。中下二焦之陽。不得宣發。則乖隔而腹痛。而吐瀉。而霍亂也。霍亂與吐瀉有別。乃吐瀉之久。亡其津液。手足抽掣而揮霍。眼目旋視而瞭亂也。寒者溫之。故用乾薑之辛熱。邪之湊也。其

氣必虛。故用人參、白朮、甘草之溫補。

五苓散

茯苓

猪苓

白朮各十銖

澤瀉一兩六銖

桂半兩

霍亂熱多。欲飲水者。陽邪也。此方主之。○邪在上焦則吐。邪在下焦則瀉。邪在中焦則既吐且瀉。名曰霍亂。霍亂責之裏邪。裏邪責之水穀。是方也。桂能建中。朮能安穀。茯苓、猪苓、澤瀉能安水。水穀得其安。則霍亂自止矣。此五苓治霍亂之意也。正考見傷寒門。

回生散

陳皮去白

藿香各五錢

中氣不和。吐瀉霍亂者。此方主之。○中氣者。脾氣也。喜疏利而惡閉塞。喜香竄而惡腐穢。故用陳皮之辛以醒之。藿香之竄以開之。

冷香飲子

草果仁三兩

附子一兩

橘紅一兩

甘草五錢

薑煎冷服。

夏月飲食雜以水果寒冰之物食之。胸腹大痛霍亂者。此方主之。○肉食得冰寒水果而冷。冰寒水果因肉食而滯。由是填塞至陰。乖隔而成霍亂。草果辛溫。善消肉食。附子辛熱。能散沉寒。橘紅之辛。可調中氣。甘草之溫。堪以益脾。而必冷服者。假其冷以從治。內經所謂必伏其所主。而先其所因也。

華佗危病方

吳茱萸

木瓜

食鹽錢各一

夏月過用水果。填塞至陰。抑遏肝氣。霍亂轉筋者。此方主之。○水果得食鹽。則收斂而不為患。肝部得茱萸。則疏利而不為抑。轉筋得木瓜。則筋舒而不復痛。

六和湯

砂仁

半夏

杏仁

人參

甘草兩各一

厚朴

木瓜

藿香

白朮

白扁豆

赤茯苓兩各二

夏月飲食後。六府不和。霍亂轉筋者。此方主之。○六和者。和六府也。食飲為患。

和以砂仁。夾涎吐逆。和以半夏。膈氣不利。和以杏仁。胃虛不調。和以參朮。中氣不快。和以藿香。伏暑傷脾。和以扁朴。轉筋爲患。和以木瓜。三焦畜熱。和以赤苓。氣逆急吐。和以甘草。正考見暑門。

藿香正氣散

藿香三錢

白朮炒

厚朴薑湯炒

茯苓

紫蘇

半夏製

大腹皮淨洗

桔梗

陳皮去白

甘草炙

白芷各一錢

內傷外感而成霍亂者。此方主之。○內傷者調其中。藿香、白朮、茯苓、陳皮、甘草、半夏、厚朴、桔梗、大腹皮。皆調中藥也。調中則能正氣於內矣。外感者疏其表。紫蘇、白芷。疏表藥也。疏表則能正氣於外矣。若使表無風寒。二物亦能發越脾氣。故曰正氣。

三因吐法

燒鹽十兩

熱飲十五升。三飲而三吐之。

欲吐不得吐。欲瀉不得瀉。腹中大痛者。名曰乾霍亂。令人暴死。急以此方探吐之。○鹽、鹹物也。多則苦矣。經曰。鹹能軟堅。故可以開宿食頑痰。苦能湧泄。故探之則易吐矣。此法能回生起死。幸勿輕而忽之。

痰門第十五

敍曰。痰證顯於外。夫人之所易知也。痰涎隱於內。而怪證百出。夫人之所難知也。顯於外者。只依常法調理而治。隱於內者。非控涎丹、神祐丸與夫倒倉之法。不能空其巢穴也。今考古方十一首以治痰。變而通之。存乎人耳。

二陳湯

半夏製

陳皮去白

茯苓

甘草

錢五分 各一

濕痰爲患。此方主之。○濕痰者。痰之原生於濕也。水飲入胃。無非濕化。脾弱不能剋制。停於膈間。中下二焦之氣。熏蒸稠黏。稀則曰飲。稠則曰痰。痰生於濕。故曰濕痰也。是方也。半夏辛熱能燥濕。茯苓甘淡能滲濕。濕去則痰無由以生。所謂治病必求其本也。陳皮辛溫能利氣。甘草甘平能益脾。益脾則土足以制濕。

利氣則痰無能留滯。益脾治其本。利氣治其標也。又曰有痰而渴。半夏非宜。宜去半夏之燥。而易貝母。括蕁之潤。余曰。尤有訣焉。渴而喜飲水者。宜易之。渴而不能飲水者。雖渴猶宜半夏也。此濕爲本。熱爲標。故見口渴。所謂濕極而兼勝己之化。實非真像也。惟明者知之。氣弱加人參。白朮。名六君子湯。

千縉湯

半夏七枚

皂角炙一寸

甘草炙一寸

痰涎上湧。喉中有聲。不渴者。此方主之。○濕土生痰。故用半夏以燥濕。氣塞則痰滯。故用皂角以利氣。肺苦氣上逆。故用甘草以緩急。又甘草能益脾。皂角能去垢。半夏能破逆。曰千縉者。重其效也。

導痰湯

半夏四錢

陳皮去白

枳殼麸炒

膽南星

赤茯苓

炙甘草各一錢

風痰湧盛者。此方主之。○風痰者。濕土生痰。痰生熱。熱生風也。半夏、陳皮、茯苓、甘草。前之二陳湯耳。加南星以治風痰。入枳殼去痰如倒壁。

九蒸蒼朮散

蒼朮一味九蒸九曬為極細末每服漿水調下一錢

濕痰腹痛者此方主之。○濕痰腹痛是土實也。經曰。土欲實。木當平之。蒼朮九蒸九曬。則其氣輕清而薄。風木勝濕之品也。故治濕痰腹痛神良。

三子養親湯

紫蘇子者沉水

白芥子

蘿蔔子各三錢

年高痰盛氣實者。此方主之。○痰不自動也。因氣而動。故氣上則痰上。氣下則痰下。氣行則痰行。氣滯則痰滯。是方也。荀子能耗氣。蘇子能降氣。芥子能利氣。氣耗則邪不實。氣降則痰不逆。氣利則膈自寬。奚痰患之有。飛霞子此方為人子事親者設也。雖然。治痰先理氣。此治標之論耳。終不若二陳有健脾去濕治本之妙也。但氣實之證。則養親湯亦徑捷之方矣。

潤下丸

陳皮一斤去白鹽水洗

甘草二兩炙

共為末作丸。

上而痰吐。下而痰瀉。此方皆良。○陳皮有消痰泄氣之功。食鹽具鹹能潤下之性。甘草有和藥調中之妙。炙之有健脾益胃之能。丹溪翁微加星夏者。燥其生痰之源。微加芩連者。撲其動痰之焰。

順氣消食化痰丸

製半夏

膽南星各三斤

神麴炒

杏仁去皮尖

陳皮去白

蘿蔔子生用

葛根

山查肉炒

青皮去穢

蘇子沉水

香附製

麥芽各一兩

飲食生痰。胸膈膨悶者。此方主之。○星夏之辛。能燥濕痰。葛根之清。能解酒熱。山查麥芽神麴之消。能療飲食之痰。青皮陳皮蘇子杏仁。蘿蔔子。香附之利。能行氣滯之痰。痰去。則胸膈之膨悶亦去矣。

青州白丸子

半夏七兩

南星

白附子各三兩

川烏去皮臍

共為末。浸水數日為丸。

濕痰作眩者。此方主之。○痰之生也。由於濕。故用半夏。南星之燥。滯之痰也。本

於寒。故用烏頭、白附之溫。浸以數日。殺其毒也。

清氣化痰丸

陳皮去白

杏仁去尖皮

枳實麸炒

黃芩酒炒

瓜蒌仁去油

茯苓各一兩

膽南星

製半夏各一兩半

薑汁為丸。

此痰火通用之方也。○氣之不清。痰之故也。能治其痰。則氣清矣。是方也。星、夏所以燥痰濕。杏、陳所以利痰滯。枳實所以攻痰積。黃芩所以消痰熱。茯苓之用。滲痰濕也。若瓜蒌者。則下氣利痰云爾。

指迷茯苓丸

半夏二兩

茯苓一兩

風化硝石二錢五分

枳殼五錢

薑汁糊丸。

中脘停痰伏飲者。此方主之。○半夏燥濕。茯苓滲濕。濕去則飲不生。枳殼削堅。化硝軟堅。堅去則痰不固。

滾痰丸

大黃酒蒸 黃芩去朽各半斤 礞石硝煨黃金色一兩 沉香五錢
共爲丸。

實熱老痰。此方主之。○大黃能推蕩。黃芩能去熱。沉香能下氣。礞石能墜痰。是方乃攻擊之劑。必有實熱者始可用之。若與虛寒之人。則非宜矣。又礞石由焰硝煅煉。必陳久爲妙。若新煅火毒未除。則不宜服。

控涎丹

甘遂去心 紫大戟去皮 真白芥子各等分

痰涎在心膈上下。使人胸背手足頸項腰膝引痛。手足冷痺。氣脈不通者。此方主之。○甘遂直達涎結之處。大戟能攻胸脅之涎。芥子能散支痛之飲。此攻痰之厲劑也。又曰。驚痰加硃砂。痛者加全蠍。酒痰加雄黃。全蠍驚氣成塊者。加穿山甲。驚甲玄胡索。蓬莪朮。臂痛加木鱉霜。桂心。痰熱加盆硝。寒痰加丁香。胡椒。肉桂。因其病證而藥加焉。兵政之便宜也。

三花神祐丸

甘遂麵裹煨 大戟拌濕炒 羌活各半兩 花柳各半兩 輕粉一分

大黃一兩

黑

丑

二兩取頭末

前藥爲末。滴水爲丸。如小豆大。初服五丸。每服加五丸。溫水下。日三服。以利爲度。服後痞悶極甚者。此痰涎壅塞。頓攻不開。轉加痛悶。卽初服三丸。每加二丸。至快利卽止。

痰飲。變生諸病。風熱鬱燥。支體麻痺。走注疼痛。痰嗽。氣血壅滯。不得宣通。人壯氣實者。此方主之。○甘遂能達痰涎窠匿之處。大戟。芫花。能下十二經之飲。黑丑亦逐飲之物。大黃乃推蕩之劑。佐以輕粉者。取其無竅不入。且逐風痰積熱。而解諸藥之辛烈耳。此大毒類聚爲丸。善用之。則能定禍亂於昇平。不善用之。則虛人真氣慎之。

哮喘門第十六

敘曰。膈有膠固之痰。外有非時之感。內有壅塞之氣。然後令人哮喘。能溫之。汗之。吐之。皆是良法。若逡巡調理。則虛喘宜之。人而羸瘦氣弱。則宜灸其背膻。今考古方七首。而哮喘之大目可知矣。

麻黃湯

麻黃三錢

桂枝二錢

杏仁七枚

甘草一錢

肺部原有風痰。背膂復感寒邪而成哮喘者。此方主之。○背膂者。背間之膂穴。主輸藏氣者也。一受風寒。則藏氣爲寒邪所閉。不得宣越。故作哮喘。麻黃之辛。能開腠散寒。桂枝之溫。能解肌疏表。杏仁微辛。入肺利氣。甘草甘平。調中發散。瓜蒂散

甜瓜蒂七枚

大豆煎湯調下五分。

凡病胸膈氣塞不通者。此方三吐之。○苦能湧泄。故用瓜蒂以吐之。甘能調胃。故用大豆以和之。

定喘湯

白果二十一枚

杏仁一錢五分

蘇子二錢

麻黃去節

款冬花各三錢

甘草一錢

半夏法製

肺虛感寒。氣逆膈熱。作哮喘者。此方主之。○聲粗者為哮。外感有餘之疾也。宜用表藥。氣促者為喘。肺虛不足之證也。宜用裏藥。寒束於表。陽氣不得泄越。故上逆。氣併於膈。為陽中之陽。故令熱。是方也。麻黃、杏仁、甘草。辛甘發散之物也。可以疏表而定哮。白果、款花、桑皮。清金保肺之物也。可以安裏而定喘。蘇子能降氣。半夏能散逆。黃芩能去熱。

五味子湯

五味子炒半兩

人參去蘆

麥門冬去心

杏仁去皮

陳皮去白

生薑各二錢

肺虛作喘。脈大者。此方主之。○喘則氣耗。五味子所以收之。虛則喘促。人參所以補之。肺喜潤。故用麥冬、杏仁。氣喜利。故用陳皮、生薑。

附子理中湯

人參

甘草炙

附子製

乾薑炒

白朮炒各一錢

脾肺虛寒。痰涎壅塞。少有動作。喘嗽頻促。脈來遲細者。此方主之。○此證為虛。

而脈爲寒也。虛則宜補。參、朮、甘草所以補虛。寒則宜溫。乾薑、附子所以溫寒。
六君子湯

人參

白朮

茯苓

甘草

半夏

陳皮

氣虛痰喘者。此方主之。○氣壯則痰行。氣虛則痰滯。痰遮氣道。故令人喘。甘者可以補氣。參、苓、朮、草皆甘物也。辛者可以治痰。半夏、陳皮皆辛物也。用甘則氣不虛。用辛則痰不滯。氣利痰行。胡喘之有。或惡人參之補而去之。此不知虛實之妙者也。

久喘良方

用青皮一枚。展開去穰。入江子一箇。將麻線繫定。火上燒盡烟。留性爲末。生薑汁和酒一杯呷服之。

名醫錄云。李翰林天台人有莫生患喘病求醫。李云。病日久矣。我與治之。乃用前方。過口便定。實神方也。崑謂久喘者。肺分有頑痰結氣。青皮能破氣。江子能攻痰。然其性悍厲。善於走下耳。未可以療上部也。今用燒灰存性。則大毒已去。

所存者幾希耳。新燒火性炎上。可使成功於膈。佐之以薑汁。則頑痰易利。行之以酒。則無所不之。薑酒既行。二物善降。久喘之患。可使愈於一旦。非良方而何。

咳嗽門第十七

殺曰。新欬易愈。久欬難愈。所以難愈者。病邪傳變而深入也。經曰。五藏六府。皆令人欬。非獨肺也。是受邪之原亦多矣。豈可以易與乎。今考十五方。率舉其大耳。至於諸邪雜揉。則輕重標本。在人心權度而已。烏能編簡盡耶。

消風百解散

荆芥

麻

黃去節

陳皮去白

蒼

朮

酒浸七日

白芷

甘

草等分

傷風咳嗽者。此方主之。○有頭疼發熱。鼻塞聲重者。傷風咳嗽也。傷風宜解肌。咳嗽宜利氣。荆芥、白芷、麻黃。可以解肌。陳皮、蒼朮、甘草。可以利氣。經曰。辛甘發散。爲陽。夫六物皆辛甘。則皆解散矣。然能解散。便能利氣。能利氣。便能解散。其理恆相通者也。

金沸草散

前胡

旋覆花各一兩

赤芍藥炒

甘草各三錢

半夏五錢

荆芥穗一兩

赤茯苓六錢

因風咳嗽生痰者。此方主之。○風盛則氣壅。氣壅則痰上。痰上則咳嗽。前胡、旋覆治風而兼行痰。荆芥、甘草消風而兼利氣。半夏治痰兼破氣逆。赤芍調榮兼能制急。茯苓用赤入丙丁也。

五苓散

茯苓

猪苓

澤瀉

白朮

桂心

水寒射肺而成欬者。此方主之。○上焦有火。渴飲涼水。水為火格。不得潤下。停留於膈。水寒射肺。故令人欬。淡足以滲水。故用茯苓、猪苓、澤瀉、白朮。辛溫足以散寒。故用桂心。向非水寒為患。則五苓非所宜矣。有表證者。以傷寒門小青龍湯主之。

丁香半夏丸

檳榔三錢

細辛

乾薑炒

人參各五錢

丁香

半夏各一兩

脾胃虛寒。痰飲積於胸膈之間。令人咳嗽者。此方主之。○脾胃溫煖。則能運行痰飲。脾胃虛寒。則痰飲停於胸膈。肺氣因之不利。乃作咳嗽。咳是有聲。嗽是有痰。有聲有痰。名曰咳嗽。經曰。治病必求其本。證本於脾胃虛寒。則脾胃為本。咳嗽為標。故半夏之辛。所以燥脾。人參之甘。所以養胃。脾胃治則不虛。丁香薑之溫。所以行痰。細辛之辛。所以散飲。辛溫用則不寒。不虛不寒。則脾胃治而痰飲散。咳嗽止矣。用檳榔者。取其性重。可以墜痰。經所謂高者抑之是也。

人參蛤蚧散

人參二兩

真蛤蚧一對全者河水浸五

杏仁去皮

甘草各五兩

茯苓

知母炒

桑白皮蜜炙

貝母各二兩

二三年肺氣上喘。咳嗽膿血。滿面生瘡者。此方主之。○二三年肺氣上喘。則病久而肺損矣。咳嗽出膿者。氣病出血者。脈病也。面為清陽之分。六陽之氣皆會

於面。其氣常實。不易受邪。今滿面生瘡。此正氣衰而邪氣盛。乃小人道長。君子道消之象也。是方也。人參益氣。蛤蚧補真。杏仁利氣。二母清金。桑皮瀉喘。若甘草、茯苓。乃調脾而益金之母也。又曰。蛤蚧爲血氣之屬。能排血氣之毒。故此方用之。調膿理血。亦假其性而伏奇於正也。

補肺湯

人參

黃耆蜜炙

川五味炒

紫菀洗去土各一兩

桑白皮蜜炙

熟地黃雨各二

咳嗽肺虛者。此方主之。○參耆脾胃藥也。肺虛而益脾胃。乃虛則補其母也。地黃滋腎藥也。肺虛而益腎。恐其失養。而盜氣於母也。五味子酸收藥也。咳多必失氣。故用酸以收之。紫菀涼肺中之血。桑皮清肺中之氣。所謂隨其實而瀉之也。益其所利。去其所害。則肺受益。故曰補肺。

犀角地黃湯

生犀角鎊

牡丹皮各二錢五分

白芍藥二錢

生地黃一兩五錢

心移熱於肺而咳嗽出血者。此方主之。○心火也。肺金也。火者金之畏。心移熱

於肺。乃咳嗽見火證。如吐血面赤是也。名曰賊邪。甚是難治。是方也。生犀能解心熱。生地能涼心血。丹皮芍藥性寒而酸。寒則勝熱。酸則入肝。用之者。以木能生火。故使二物入肝而瀉肝。此拔本塞源之治也。

當歸龍薈丸

當歸酒洗

梔子炒黑

龍膽草酒洗

黃連炒

黃柏炒

黃芩各一兩

木香一錢

麝香五分

大黃酒浸

青黛水飛

蘆薈各半兩

煉蜜丸之。

肝移熱於肺而咳嗽者。此方主之。○咳嗽而兩肋痛。多怒脈弦者。病原於肝也。肝者將軍之官。氣常有餘。氣有餘便是火。故宜瀉之。是方也。芩連梔柏草龍青黛大黃皆能瀉火。而未必入肝。肝氣燥。諸藥得蘆薈麝香之燥。同氣相求。可以入肝而平肝矣。然肝木為生火之本。而諸藏之火不無相扇。諸藥雖因蘆薈麝香之引而入肝。然其性各有所屬。則能兼五火而治之矣。用當歸為君者。以其能和五藏之陰。以木香為佐者。以其能行諸藥之滯也。正考見火門。

左金丸

黃連六兩

吳茱萸湯一兩

肝熱左脅痛咳嗽。此方主之。○左金者。黃連瀉去心火。則肺金無畏。得以行金令於左以平肝。故曰左金。吳茱萸氣臊味辛性熱。故用之以爲反佐。此方君一臣一。制小其服者。肝邪未盛也。前方證邪盛矣。故用龍薈諸藥以平之。彼之爲患滋甚。自不得不用夫大隊之兵也。

六味地黃丸

熟地黃八兩

山藥

山茱萸各四兩

牡丹皮

澤瀉

白茯苓各三兩

腎虛移熱於肺咳嗽者。此方主之。○有足心熱。內股熱。腰痛。兩尺脈虛大者。病原於腎虛也。熟地黃山茱萸味厚者也。味厚爲陰中之陰。故能益腎。腎者水藏。虛則水邪歸之。故用山藥茯苓以利水邪。水邪歸之則生濕熱。故用澤瀉。丹皮以導坎中之熱。滋其陰血。去其熱邪。則精日生而腎不虛。病根既去。咳嗽自寧矣。正考見虛損門。

順氣消食化痰丸

製半夏

膽南星各一斤

陳皮去白

香附製

蘇子沉水

青皮去穢

神麴炒

蘿蔔子生用

棠毬肉炒

麥蘗炒

杏仁去皮

葛根各一兩

酒食生痰。五更咳嗽。胸膈膨悶者。此方主之。○痰之原。生於濕。故用半夏、南星以燥之。痰之滯。原於氣。故用香附以開之。杏仁以利之。青皮、陳皮以快之。蘇子、葡萄子以降之。食痰原於酒食。故用葛根以解酒。神麴、麥蘗、棠毬以磨食。

瓊玉膏

生地黃四斤

白茯苓耐十三兩

人參六兩

白蜜二斤

四共熬膏。

乾咳嗽者。此方主之。○乾咳嗽者。有聲無痰之名也。火乘於肺。喉嚨涇涇而癢。故令有聲。病原於脾者。有痰。病不由脾。故無痰也。易曰。燥萬物者。莫熯乎火。相火一熯。則五液皆涸。此乾咳之理也。生地黃能滋陰降火。白蜜能潤肺生津。損其肺者。益其氣。故用人參。虛則補其母。故用茯苓。又地黃、白蜜皆潤。銖兩又多。

茯苓甘而屬土。用之以佐二物。此水位之下。土氣乘之之義。乃立方之道也。他如火門阿膠散。主此證亦良。

潤肺湯

訶子

五味子

五倍子

黃芩

甘草

咳而失聲者。此方主之。○咳而失聲。危證也。有肺絕之兆。酸者能收。澀者能固。三子酸而澀。則能收其肺氣而固其脫矣。故此方用之。黃芩能清肺熱。甘草能調肺氣。此方乃劫嗽之劑也。

劫嗽丸

訶子仁

百藥煎

荊芥穗等分

共爲末。蜜丸噙化。

久咳失氣。此藥亦宜用之。新咳者不宜用也。○內經曰。薄之劫之。薄者。雷風相薄之薄。藥病摩盪之名也。劫者。曹沫劫盟之劫。取之不以正也。久咳失氣。不用補劑。而用訶子。藥煎之澀。肺有火邪。不用潤劑。而用荊芥穗之辛。故曰劫也。

粉黛散

蚌 粉新瓦炒紅 青 黛少許

用淡蘆水滴麻油數點調服。

綬帶李防禦京師人。初爲入內醫官。值嬪御閣妃苦痰嗽。終夕不寐。面浮如盤。時方有甚寵。徽宗幸其閣。見之以爲慮。馳遣呼李。先數用藥弗應。詔令往內東門供狀。若三日不効。當誅。李憂技窮。與妻對泣。忽聞門外叫云。咳嗽藥一文錢一貼。喫了今夜得睡。李使人市藥十貼。其色淺碧。用淡蘆水滴麻油數點調服。李疑草藥性厲。併三爲一自試之。旣而無他。於是取三貼合爲一。攜入禁庭授妃。請分兩服以餌。是夕嗽止。比曉面腫亦消。內侍走白。天顏絕喜。錫金帛。厥值萬緡。李雖幸其安。而念必宣索方書。何辭以對。殆亦死爾。命僕侍賣藥人過。邀入坐。飲以巨鍾。語之曰。我見鄰里服嗽藥多効。意欲得方。倘以傳我諸物。爲銀百兩。皆以相贈。不吝。曰。一文藥。安得其值如此。防禦要得方。當便奉告。只蚌粉一物。新瓦炒令通紅。拌青黛少許耳。扣其所從來。曰。壯而從軍。老而停汰。頃見主帥有此。故剽得之。以其易辦。姑藉以度餘生。無他長也。李給之終身焉。崑謂

蚌粉鹹而枯。能軟堅痰而燥濕。青黛寒而苦。能清肺膈而除熱。薑汁酸鹹。亦以軟痰。麻油之加。欲其就火而爲向導之驅爾。

醫方考

明 歙邑 吳 崑鶴皋原著

鄞縣 曹赤電炳章圈點

卷三

虛損勞瘵門第十八

敘曰。百病皆足以致虛損勞瘵。治之者必究其因。是疾也。自昔神良之醫。每難措手。所謂病已成而後藥之。譬之渴而穿井。鬪而鑄兵。不亦晚乎。以故歷朝醫哲。撰述勞瘵方論。往往狃於隅見。大都未純。求其發理精確。以爲來學之準則者。蓋無全書焉。今考四十三方。聊實諸證云爾。擴而充之。則變化百出。在人心而已。

黃耆湯

黃耆四兩

人參

白朮

桂心各二兩

附子二十

生薑

八兩

大棗十枚

五藏皆有勞。勞其肺者。短氣虛寒。皮毛苦澀。津液不通。氣力損乏。脈來遲緩者。此方主之。○肺主氣。久於悲哀。喘咳。則成肺勞。肺勞故令氣短而聲不長。氣爲陽。陽虛則寒。故令虛寒。肺主皮毛。肺勞則無津液以充膚澤毛。故令枯澀。氣有餘則物潤。津氣不足。則無以化液。故令口乾而津液不通。氣壯則強。氣餒則弱。今肺爲勞傷。故氣力損乏。脈來遲者爲寒。緩者爲虛。黃耆、人參、甘溫者也。故能補氣。經曰。損其肺者益其氣。是故用之。桂心、附子。辛熱者也。氣虛則陰湊之而爲寒。熱能壯氣。是故用之。白朮、薑棗。脾胃藥也。經曰。虛則調其母。脾是肺之母。是故用之。是方也。以上件皆是虛寒之證。故爲合宜。若肺熱脈數者。非所宜也。合主二母散。

二母散

知母去毛炒

貝母

去心略炒 各五錢

共爲末。

肺勞有熱。不能服補氣之劑者。此方主之。○治肺有二法。氣虛而陰湊之。則如

前方之溫補。金衰而火乘之。則如此方之滋陰。宜溫補者易愈。宜滋陰者難療。蓋火來乘金。謂之賊邪。將作肺痿。甚是難治。是方也。二母皆苦寒之品。苦能堅金。寒能勝熱。故昔人主之。

人參固本丸

人參二兩

天門冬去心炒

麥門冬去心炒

生地黃淨洗

熟地黃各四兩

肺勞虛熱。此方調之。○本猶根也。肺主氣。而氣根於丹田。肺畏火。而制火必本於腎水。故用人參益氣。二冬清氣。熟地補腎。生地涼腎。劑之爲丸。用之於下。所謂壯水之主。以制陽光。是也。非固本而何。或問補腎何以用人參。余曰。大氣周流。無藏不有。故人參之用。亦無處不宜。今得滋陰之品。以君之。則亦下行而補下矣。

天王補心丹

人參去蘆

白茯苓去皮

玄參炒

丹參炒

遠志炒

桔梗各五錢

生地黃淨洗

五味子炒

當歸酒洗

麥門冬炒去心

天門冬炒去心

柏子仁炒

酸棗仁炒各一兩

過勞其心。忽忽喜忘。大便難。或時溏利。口內生瘡者。此方主之。○心者。神明之藏。過於憂愁思慮。久久則成心勞。心勞則神明傷矣。故忽忽喜忘。心主血。血濡則大便潤。血燥故大便難。或時溏利者。心火不足以生脾土也。口內生瘡者。心虛而火內灼也。人參養心氣。當歸養心血。天麥門冬所以益心津。生地丹玄所以解心熱。柏仁遠志所以養心神。五味棗仁所以收心液。茯苓能補虛。桔梗能利膈。諸藥專於補心。勞心之人宜常服也。此方之傳。未考所自。偈云。昔者志公和尚。日夕講經。鄧天君憫其勞也。錫以此方。因得名焉。載在經藏。今未辨其真偽。異日廣求佛典而蒐之。

犀角地黄湯

生犀角鎔

生地黃

白芍藥

牡丹皮

勞心動火。吐血衄血者。此方主之。○心屬火而主脈。過勞其心。則火妄動而血湧溢。越竅而出。則為吐為衄者勢也。經曰。治病必求其本。故以涼心之藥主之。

生犀能解心熱。生地能涼心血。白芍、丹皮酸寒之物也。酸者入肝。寒者勝熱。所以心病而治肝者。肝是心之母。木能生火。故從肝而治之。乃迎奪之兵也。

四物梁米湯

梁米

稻米

黍米各一升

蠟如彈丸大後入以化爲度

心勞吐衄。久服寒涼之劑。因壞脾胃者。此方主之。○心是脾之母。脾是心之子。脾因寒涼而壞。則必盜母氣以自養。而心益病矣。求其不殆得乎。故宜調脾益胃。調脾者莫如穀氣。故用稻、梁、黍米。復用蠟者。取其厚腸胃云爾。此療子益母之義。昔之良醫皆用之。

半夏湯

半夏製

宿薑各二兩

茯苓去皮

白朮土炒

杏仁去皮尖炒

橘皮去白

芍藥炒各五錢

竹葉二十片

大棗五枚

脾勞。四肢不用。五藏皆乖。脹滿肩息。舌根苦直。不能嚥唾者。此方主之。○脾主消磨水穀。若勞倦之後。病瘥之餘。遇適口之味。過於饜飫。脾弱不能消磨。勞於

運化。久久則成脾勞。脾主四肢。故令四肢不用。五藏皆受氣於脾。脾勞而傷。則五藏皆無以稟氣。故乖而失其常。經曰。脾主行氣於三陰。脾勞。則三陰之氣皆滯塞不行。故令脹滿。三陰之氣至胸中而還。故令肩息。脾之經脈。上膈挾咽。連舌本。散舌下。故令舌根苦直。不能嚥唾。半夏甘辛。甘則益脾。辛則散滯。宿薑等之一。以醒脾。一以制半夏之毒。爾脾喜燥而畏濕。故用白朮燥脾。茯苓滲濕。脾喜通而惡塞。故用杏仁利氣。橘皮泄氣。竹葉氣清。能去土中之火。芍藥味酸。能瀉土中之木。大棗之用。取其甘而益脾爾。

補中益氣湯

人參

甘草

炙各錢一

升

麻五分

黃

耆分錢一

當歸

白朮

炒

陳

皮去白

柴

胡分各五

勞倦傷脾。中氣不足。懶於言語。惡食。瘧泄。日漸瘦弱者。此方主之。○脾主四肢。故四肢勤動不息。又遇饑餓。無穀氣以養。則傷脾。傷脾。故令中氣不足。懶於言語。脾氣不足以勝穀氣。故惡食。脾弱不足以尅制中宮之濕。故瘧泄。脾主肌肉。故瘦弱。五味入口。甘先入脾。是方也。參耆歸朮甘草。皆甘物也。故可以入脾而

補中氣。中氣者。脾胃之氣也。人生與天地相似。天地之氣一升。則萬物皆生。天地之氣一降。則萬物皆死。故用升麻。柴胡爲佐。以升清陽之氣。所以法象乎天地之升生也。用陳皮者。一能疏通脾胃。一能行甘溫之滯也。是證黃耆建中湯亦可主用。見傷寒門。

枸杞酒

枸杞子一斗

酒二斗

肝勞。面目青。口苦。精神不守。恐畏不能獨臥。目視不明者。此方主之。○肝者。將軍之官。謀慮出焉。故謀而不決。拂而數怒。久久則勞其肝。肝。東方之色也。病則色徵於面目。故令面目色青。口苦者。肝移熱於府。而膽汁上溢也。肝藏魂。肝勞則邪居魂室。故令精神不守。且恐畏不能獨臥也。肝氣通於目。肝和則能辨五色矣。今肝爲勞傷。故令目視不明。經曰。味爲陰。味厚爲陰中之陰。枸杞味厚。故足以養厥陰之陰。煮以純酒。取其挾洽氣血而已。他如六味地黃丸。亦可主用。古謂肝腎之病同一治。又謂虛則補其母。腎是肝之母。故地黃丸亦宜。

六味地黃丸加黃柏知母方

熟地黄八兩

山茱萸去核

山藥各四兩

澤瀉

牡丹皮去木

白茯苓各三兩

黃柏鹽炒

知母鹽炒各二兩

腎勞背難俛仰。小便不利。有餘瀝。囊濕生瘡。小腹裏急。便赤黃者。此方主之。○
腎者藏精之藏也。若人強力入房。以竭其精。久久則成腎勞。腎主精。精主封填
骨髓。腎精以入房而竭。則骨髓日枯矣。故背難俛仰。前陰者。腎之竅。腎氣足。則
能管攝小便。而洩溺惟宜。腎氣怯。則欲便而不利。既便而有餘瀝。斯之謂失其
開闔之常也。腎者水藏。傳化失宜。則水氣留之。水氣留之。則生濕熱。故令囊濕
生瘡也。小腹裏急者。此真水枯而真火無制。真水枯。則命門之相火無所畏。真
火無制。故灼膀胱少腹之筋膜而作裏急也。便赤黃者。亦皆火之所為。熟地、山
萸。味厚者也。味厚為陰中之陰。故足以補腎間之陰血。山藥、茯苓、甘淡者也。甘
能制濕。淡能滲濕。故足以去腎虛之陰濕。澤瀉、丹皮、鹹寒者也。鹹能潤下。寒能
勝熱。故足以去腎間之濕熱。黃柏、知母。苦潤者也。潤能滋陰。苦能濟火。故足以
服龍雷之相火。夫去其灼陰之火。滋其濟火之水。則腎間之精血日生矣。王冰
曰。壯水之主。以制陽光。此之謂也。

猪膏酒

猪膏

薑汁各二升再入酒

酒五合

和煎分三服。

五勞之外。又稱六極。筋極之狀。令人數轉筋。十指爪甲皆痛。苦倦不能久立。宜此方主之。○筋極者。數勞四肢。筋液耗竭。名曰筋極。極者。甚於勞之名也。筋既竭其津液。則失其潤養。而作勁急。故令人數轉筋也。爪甲筋之餘也。筋屬木。木極則金承之。故令十指爪甲皆痛。亦枝枯萌萎之象也。苦倦不能久立者。筋敗不能束骨也。是疾也。若以草木之藥治之。卒難責效。師曰。膏以養筋。故假猪膏以潤養之。等以薑汁者。非辛不足以達四末故也。復熬以酒者。以酒性善行。能浹洽氣血。無所不之。故用之以為煎也。

人參養榮湯

人參去蘆

黃耆炙

陳皮

白芍藥酒炒

當歸酒洗

甘草炙

白茯苓

五味子炒

遠志去心

白朮炒

桂心

熟地黄

脈極者。忽忽喜忘。少顏色。眉髮墮落。此方主之。○脈者。血之府。脈極者。血脈空。虛之極也。此由失血所致。心主血脈。脈極則無血以養心。故令忽忽喜忘。榮血有餘。則令人悅澤顏色。榮血不足。則令人色夭而顏色少也。眉髮者。血之所養。榮血不足。故令眉髮墮落。人參、黃耆、白朮、茯苓、甘草、陳皮。皆補氣藥也。榮血不足而補氣。此大易之教。陰生於陽之義也。陰者五藏之所主。故用當歸、澤、芍藥調肝。熟地滋腎。五味益肺。遠志寧心。五藏和而陰血自生矣。桂性辛熱。熱者入心而益火。辛者入經而利血。又心爲生脈之原。故假之引諸藥入心。而養榮血於脈耳。

十全大補湯

人參

黃耆

白朮

白芍藥

熟地黃

茯苓

當歸

川芎

甘草

各等分

桂心

少許

肉極者。肌肉消瘦。皮膚枯槁。此方主之。○肉極由於陰火。久灼者難治。宜別主六味地黃丸。若由飲食勞倦傷脾。而致肉極者。宜大補氣血以充之。經曰。氣主

响之。血主濡之。故用人參、白朮、黃耆、茯苓、甘草甘溫之品以補氣。氣盛則能充實於肌肉矣。用當歸、川芎、芍藥、地黃、肉桂味厚之品以補血。血生則能潤澤其枯矣。

生脈散

人參

麥門冬去心

五味子炒等分

氣極者。正氣少。邪氣多。多喘少言。此方主之。○肺主氣。正氣少。故少言。邪氣多。故多喘。此小人道長。君子道消之象也。人參補肺氣。麥冬清肺氣。五味斂肺氣。一補一清一斂。養氣之道畢矣。名曰生脈者。以脈得氣則充。失氣則弱。故名之。東垣云。夏月服生脈散。加黃耆、甘草。令人氣力湧出。若東垣者。可以醫氣極矣。

虎骨酒

虎

骨一具通炙取黃焦汁盡碎如雀腦

糯米

三石入虎骨倍用麴如釀酒法釀之酒熟封頭五十日開飲之

骨極者。腰脊酸削。齒痛。手足煩疼。不欲行動。此方主之。○腎主骨。骨極者。骨內空虛之極也。故令腰脊酸削。齒者。骨之餘。故齒亦痛。手足煩疼。不欲行動。皆骨內空虛之徵也。以骨治骨。求其類也。以虎骨治骨。取其壯也。釀之以酒者。取酒

性善漬。直澈於骨也。褚澄云。男子天癸未至而御女。則四肢有未滿之處。異日必有難狀之疾。其骨極之類乎。

龜鹿二仙膠

鹿角血取者十斤

龜板五斤

枸杞子三十

人參耐十五

上件用鉛罈如法熬膠。初服酒化錢半。漸加至三錢。空心下。

精極者。夢洩遺精。瘦削少氣。目視不明。此方主之。○精氣神。有身之三寶也。師曰。精生氣。氣生神。是以精極則無以生氣。故令瘦削少氣。氣少則無以生神。故令目視不明。龜鹿。稟陰氣之最完者。其角與板。又其身聚氣之最勝者。故取其膠以補陰精。用血氣之屬劑而補之。所謂補以類也。人參善於固氣。氣固則精不遺。枸杞善於滋陰。陰滋則火不洩。此藥行。則精日生。氣日壯。神日旺矣。

加味逍遙散

當歸

白芍藥

白朮

柴胡

茯苓

甘草錢各一

丹皮

山梔各七分

六極之外。又有七傷。一曰大怒逆氣傷肝。肝傷則少血目暗。宜此方主之。○經

曰。肝者。將軍之官。故主怒。怒則氣逆。氣逆則血亦逆。故少血。眼者。肝之竅。又曰。目得血而能視。今肝傷少血。故令目暗。越人云。東方常實。故肝藏有瀉而無補。即使逆氣自傷。疎之即所以補之也。此方名曰逍遙。亦是疏散之意。柴胡能升。所以達其逆也。芍藥能收。所以損其過也。丹梔能瀉。所以伐其實也。木盛則土衰。白朮甘草扶其所不勝也。肝傷則血病。當歸所以養其血也。木實則火燥。茯神所以寧其心也。

安神丸

黃連錢一兩五

硃砂水飛

當歸酒洗

生地黄酒洗

炙甘草錢各五

二曰憂愁思慮傷心。心傷則苦驚喜忘。夜不能寐。此方主之。○憂愁思慮。則火起於心。心傷則神不安。故苦驚。心主血。心傷則血不足。故喜忘。心愈傷。則憂愁思慮愈不能去。故夜不能寐。苦可以瀉火。故用黃連。重可以鎮心。故用硃砂。生地涼心。當歸養血。炙甘草者。所以益脾。脾是心之子。用之欲其不食氣於母故爾。

歸脾湯

人參

白茯苓

龍眼肉

酸棗仁

黃耆

白朮各二錢

遠志一錢

木香

炙甘草

當歸各五分

三曰飲食太飽傷脾。脾傷則面黃善臥。宜此方主之。○脾者倉廩之官。故飲食太飽則傷之。中央土色入通於脾。脾傷則其本色自見。故面黃。神者中氣之所生。脾傷則神亦倦。故善臥。內經曰五味入口甘先入脾。參耆苓朮甘草皆甘物也。故用之以補脾。虛則補其母。龍眼肉酸棗仁遠志所以養心而補母。脾氣喜快。故用木香。脾苦亡血。故用當歸。此主食去脾傷之方也。若停食之方則以消磨之劑主之。而不專於補益矣。

附子理中湯

人參

甘草炙

附子製

乾薑炒

白朮

四曰形寒飲冷傷肺。肺傷則短氣咳嗽。脈來微遲者。宜此方主之。○形寒者形

氣虛寒也。飲冷者。復飲冷物也。熱則氣壯。寒則氣怯。今肺爲寒冷所傷。故令氣短。水寒射肺。肺不能容。故令咳嗽。脈來微者爲虛。遲者爲寒。損其肺者益其氣。故用參朮甘草。寒者溫之。故用附子乾薑。

白通加人尿猪膽汁湯

葱 白四莖

乾 薑一兩

附 子一枚

人 尿五合

猪膽汁一合

五曰久坐濕地傷腎。腎傷則短氣腰痛。厥逆下冷。陰脈微者。宜此方主之。○腎者水藏。濕其類也。故感之易入而易傷。凡人呼吸之氣。呼出心與肺。吸入腎與肝。腎傷則吸微。故令短氣。腰者腎之府。腎傷而腰痛者其勢也。濕爲陰。其氣寒。陰併於下。則陽格於上。故厥逆而下冷。尺爲陰。陰脈微者。下部寒也。乾薑附子熱物也。可以回陽燥濕。師曰。太陽中天。則寒者溫。濕者燥。故薑附可以治寒濕。葱白辛溫。可使通腎氣。人尿猪膽性寒而質陰。用之者。一可以制薑附之熱。而不使其燥烈於上。焦無病之分。一可以同寒濕之性。而引薑附直達下焦受病之區。此佐以所利。和以所宜。乃兵家之向導也。

玉屏風散

黃耆

防

風

各一兩

白

朮

二兩

六曰風雨寒濕傷形。形傷則皮膚枯槁。宜此方主之。○外冒風雨。則寒濕不免矣。以外得之。故令傷形而皮膚枯槁。然皮膚之間。衛氣之所居也。靈樞經曰。衛氣者。所以溫分肉。充皮膚。肥腠理。而司開闔者也。故峻補其衛氣。而形斯復矣。黃耆甘溫。補表之聖藥也。得防風而功愈速。故以防風等之。白朮益脾。脾主肌肉。故以白朮倍之。三藥者。皆補氣之品。內經曰。形不足者。溫之以氣。此之謂也。方名曰玉屏風。亦是以其補益衛氣。足以爲吾身之倚襲爾。

升陽益胃湯

羌活

獨活

防風

柴胡

白朮

茯苓

黃耆

人參

半夏

甘草

陳皮

黃連

澤瀉

白芍藥

七曰大怒恐懼傷志。志傷則恍惚不樂。宜此方主之。○怒則氣上。恐則氣下。一

怒一恐。拂於亶中。則志意不得舒暢。故曰傷志。志者。腎之所主。而暢於亶中。亶中者。兩乳之間。心君之分也。心者。神明之所出。故令恍惚。亶中者。喜樂之所出。故令不樂。下者。舉之。鬱者。達之。故用羌活。獨活。防風。柴胡。升舉之品。氣乖於中。脾胃受病。故用參。耆。苓。朮。橘。半。甘。芍。調胃之品。方內有澤瀉。則陷下之邪可泄。方內有黃連。則亶中之逆可平。

磁石

火內煨紅入醋淬七次爲末入藥

古人於腎虛腰疼方中每用磁石。時方多不用之。然磁石性能引鐵。則用之者。亦是假其引肺金之氣入腎。使其子母相生爾。水得金而清。則相火下攻自去矣。嗚呼。醫之神妙。在於幽微。此言可與知者道也。

六味地黃丸

熟地黃

八兩

山茱萸肉

山藥

各四兩

白茯苓

去皮

牡丹皮

澤瀉

各三兩

腎虛不能制火者。此方主之。○腎非獨水也。命門之火並焉。腎不虛。則水足以制火。虛則火無所制。而熱證生矣。名之曰陰虛火動。河間氏所謂腎虛則熱是

也。今人足心熱。陰股熱。腰脊痛。率是此證。老人得之爲順。少年得之爲逆。乃咳血之漸也。熟地黃。山茱萸。味厚者也。經曰。味厚爲陰中之陰。故能滋少陰。補腎水。澤瀉。味甘鹹寒。甘從濕化。鹹從水化。寒從陰化。故能入水藏而瀉水中之火。丹皮氣寒。味苦辛。寒能勝熱。苦能入血。辛能生水。故能益少陰。平虛熱。山藥。茯苓。味甘者也。甘從土化。土能防水。故用之以制水藏之邪。且益脾胃而培萬物之母也。互考見咳嗽門。

崔氏八味丸

淮熟地黃八兩

山茱萸肉

山藥各四兩

牡丹皮

白茯苓

澤瀉各三兩

肉桂

附子各一兩

腎間水火俱虛者。此方主之。○君子觀象於坎而知腎俱水火之道焉。故曰。七節之旁。中有小心。小心。少火也。又曰。腎有兩枚。左爲腎。右爲命門。命門。相火也。相火。卽少火耳。夫一陽居於二陰爲坎。水火並而爲腎。此人生與天地相似也。今人入房盛而陽事愈舉者。陰虛火動也。陽事先萎者。命門火衰也。真水竭。則隆冬不寒。真火息。則盛夏不熱。故人樂有藥餌焉。是方也。熟地。山藥。丹皮。澤瀉。

山藥、茯苓。前之地黃丸也。所以益少陰腎水。肉桂、附子。辛熱物也。所以益命門相火。水火得其養。則二腎復其天矣。互考見小便不禁門。

補腎丸

杜仲薑汁炒

牛膝

陳皮各二兩

黃柏鹽酒炒

龜板酥炙各四兩

夏加五味子炒一兩 冬加甘薑五錢

此亦滋腎陰之方也。○黃柏、龜板、杜仲、牛膝皆濡潤味厚物也。故能降而補陰。復用陳皮。假以疏滯。夏加五味者。扶其不勝之金也。冬加乾薑者。壯其無光之火也。經曰無伐天和。此之謂爾。

補天丸

黃柏

龜板各四兩

杜仲

牛膝

陳皮各二兩

夏加五味子炒一兩 冬加乾薑五錢

人胞一具酒洗蒸爛

男女交合非時。天癸虛損者。此方主之。○此即前方補腎丸加人胞也。天癸者。男之精。女之血。先天得之以成形。後天得之以有生者也。故曰天癸。補腎丸。前考已悉。人胞者。亦精血之所融結。乃無極之極。未生之天也。已生之後。天癸虛

損。補以草木之藥。非其類也。卒難貴效。人胞名曰混沌皮。則亦天耳。以先天之天。而補後天之天。所謂補以類也。故曰補天。

虎潛丸一名補陰丸

黃柏鹽酒炒

知母炒

熟地黃各三兩

龜板酥炙

虎脰骨酥炙

鎖陽

當歸各一兩

陳皮去白

白芍藥酒炒

牛膝各二兩

羊肉為丸。

此亦治陰分精血虛損之方也。○虎、陰也。潛、藏也。是方欲封閉精血。故曰虎潛。人之一身。陽常有餘。陰常不足。黃柏、知母。所以滋陰。地黃、歸芍。所以養血。牛膝能引諸藥下行。鎖陽能使陰精不泄。龜得天地之陰氣最厚。故用以補陰。虎得天地之陰氣最強。故用以壯骨。陳皮所以行滯。而羊肉之用。取其補也。互考見疝門。

滋陰大補丸

熟地黃二兩

川牛膝

山藥各一兩

山茱萸肉

杜仲薑汁炒去絲

白茯苓

巴戟天去心

五味子炒

小茴香炒

肉苁蓉

遠志去心各一兩

石菖蒲

枸杞子各五錢

紅棗肉爲丸

此陰陽平補之劑也。○地黄、牛膝、杜仲、山萸、五味、枸杞、滋陰藥也。巴戟、苁蓉、茴香、遠志、石蒲、山藥、茯苓、紅棗、養陽藥也。滋陰者潤而不寒，養陽者溫而不熱。丹溪翁立方之穩，大都如此。中年之人服之殊當。

補火丸

生硫黃一斤

猪臟二尺

將硫黃爲細末。盡實臟中。爛煮二時取出。去臟蒸餅爲丸。如梧子大。每服十丸。日漸加之。

冷勞病瘠。血氣枯竭。齒落不已。四肢倦怠。語言不足者。此方主之。○凡人之身。有真火焉。寄於右腎。行於三焦。出入於甲膽。聽命於天君。所以溫百骸。養藏府。充七竅者。皆此火也。是火也。萬物之父。故曰天非此火。不足以生萬物。人非此

火。不能以有生。若此火一熄。則萬物無父。故肉衰而瘠。血衰而枯。骨衰而齒落。筋衰而肢倦。氣衰而言微矣。硫黃。火之精也。故用之以補火。然其性過熱有毒。故用猪臟爛煮以解之。或曰。世方以寒涼之品治勞。而硫黃又世人罕用。今治勞而用之。誰不驚異。余曰。寒因熱用。熱因寒用。有熊氏之經也。湯液云。硫黃亦號將軍。能破邪歸正。返滯還清。挺出陽精。消陰化魄。而生魂。則先醫亦嘗頌之矣。戴元禮氏。丹溪之高弟也。有言曰。諸寒涼皆滯。惟有黃連寒而不滯。諸熱藥皆燥。惟有硫黃熱而不燥。則戴氏亦嘗頌之矣。奈何拂吾心之理而求同俗乎。昔仁和吏早衰。服之年踰九十。此往昔之驗也。表之類編。他如范文正公之金液丹。得效之玉真丸。和劑之來復丹。半硫丸。靈砂丹。百選之二氣丹。活人之返陰丹。楊氏之紫霞丹。往往皆用之。但其所主者各有攸當。茲不贅爾。○凡服硫黃者。忌猪血。羊血。牛血。及諸禽獸之血。慎之。

石膏散

石

膏服一味細末如麵每夕新吸水
方寸匕取身無熱爲度

熱勞附骨蒸熱。四肢微瘦。有汗脈長者。此方主之。○熱勞之證。豈曰盡屬陰虛。

亦有陽邪外襲。傳入於骨。不能泚越。內作骨蒸。令人先寒後熱。久久漸成羸瘦。有汗者。胃家實也。脈長者。陽邪證也。石膏寒而清肅者也。可以療裏熱。以故外臺集之。處州吳醫用之。睦州鄭迪功之妻驗之。名醫錄載之。所以開矇後學也。至矣。或問東垣言血虛身熱。證象白虎。誤服白虎者必死。非石膏之謂乎。余曰。若新產失血。飢困勞倦之病。合禁用之。若內熱有汗脈長者。則不在禁也。

甘梨漿

勞瘵脈數。燥渴日瘦者宜服之。蓋天一生水。所以養萬物者也。若火盛而水滅。令人五液乾涸。則甘梨漿可以急救之。此物匪惟可以救急。曾有回生起死者。師云。生用之可以涼五火。熟用之可以滋五藏。

童便

咳血者。以童便一物主之。○咳血是肺中有竅。肺是清虛之藏。纖芥不容。一有其竅。則血滲入肺矣。愈滲愈咳。愈咳愈滲。此爲難治。諸澄云。以寒涼治之。百不一生。以洩溺治之。百不一死。故特表而出之。又曰。血雖陰類。運之者其和陽乎。所以示人者深矣。

股肉

割股之事。古昔有之。蓋賢婦急於舅姑夫子之疾。而祈一念以格天爾。至唐開元間。陳藏器撰本草拾遺云。人肉治療疾。自是閭閻益多割股。至有假名干譽而為之者。嗚呼。同類固不可食。虧體豈曰事親。且俞、扁、淳、華。上世神良之醫也。未聞用人肉以治疾。而閔損曾參之孝。亦未嘗割股。所以來要名之行者。藏器其作之矣。

柴前梅連散

柴胡

前胡

烏梅

胡黃連各三錢

猪膽一枚

猪髓一條

韭白五分

童便二盞

風勞骨蒸。久而不痊。咳嗽吐血。盜汗遺精。脈來弦數者。此方主之。○此治因風成勞者也。蓋風者百病之長。乃天之陽氣也。主疏泄萬物。故在表則令人出汗。在肺則令人咳嗽。在肝則令人吐血。在腎則令人遺精。附骨則令人蒸熱盜汗。是論也。靈樞函其妙。自漢唐以至宋元諸醫。皆未竟其說。無惑乎治勞瘵者之難其人也。柴胡解不表不裏之風。胡連清入肌附骨之熱。前胡主脾肺表裏之

邪。褚澄氏曰。酸能入骨。則烏梅之用。亦可以收斂骨蒸。猪膽所以養陰。猪髓所以養骨。童便所以濟火。韭白辛熱。少用之以使向導。經曰。甚者從之。此之謂也。

秦艽驚甲散

秦艽

知母

當歸各半

驚甲一兩

烏梅一枚

青蒿五葉

柴胡

地骨皮各一兩

風勞骨蒸壯熱。肌肉消瘦。此方主之。○風陽氣也。故在表則表熱。在裏則裏熱。附骨則骨蒸壯熱。久蒸則肌肉消瘦。無風不作骨蒸。此崐之立言也。羅謙甫氏之主此方。蓋有神契者矣。柴胡、秦艽、風藥也。能驅肌骨之風。骨皮、知母、寒品也。能療肌骨之熱。驚、陰類也。甲、骨屬也。骨以及骨。則能為諸藥之向導。陰以養陰。則能退陰分之骨蒸。烏梅味酸。能引諸藥入骨而收其熱。青蒿苦辛。能從諸藥入肌而解其蒸。復有當歸。一以養血。一以導諸藥入血而除熱於陰爾。

柴胡

衍義云。柴胡。本經並無一字治勞。今人治勞方中鮮有不用者。凡此誤世甚多。斯言也。謂病原不同。不可一概而施之爾。故又繼之曰。如經驗方中治勞熱。青

蒿煎丸用柴胡正合宜耳。又尾之曰服之無有不效。世人因前言而概不用柴胡。雖當用者亦必不用。嗚呼。藏器一言。舉世割股。丹溪一出。衆口滋陰。衍義片詞。柴胡未棄。更不求其證脈而可否之。此之謂侏儒觀場。隨衆喧喝爾。求其真知則未也。

三黃丸

黃

芩酒炒春四夏
秋六冬三兩

黃

連酒炒春四夏五
秋三冬一兩

大

黃酒浸九蒸晒春三
秋二夏一冬五兩

消渴羸瘦。不生肌肉。其人善穀者。此方主之。○上件皆火證也。火炎則水乾。故令消渴。燥萬物者。莫熯乎火。故令羸瘦。不生肌肉。火甚則速於傳化。故善穀。芩、連、大黃。苦寒物也。寒能勝熱。苦能瀉火。火去而陰自生。陰生而肌肉自長矣。

麥煎散

鱉

甲醋炙

柴胡

生地黃

大黃煨

常山

當歸

赤茯苓

乾漆炒焦

石膏各一兩

白朮

甘草各半兩

小麥五十粒

有汗加麻黃根一兩。共爲末。每服三錢。

少男室女孀婦鬱勞。骨蒸內熱。風血攻注四肢者。此方主之。○此攻鬱勞之方也。少男思其女而不得。則有留精。室女思其男而不得。則有留血。孀婦有所思。則氣結而有留瘀。其理一而已。謂之留者。精血已離其位。但留於經脈關要之區。阻塞氣血流行之道也。氣陽也。阻而塞之。則積陽爲熱。故令蒸蒸骨熱。血陰也。阻而塞之。則積陰爲疰。故令四肢攻注。曰風血攻注四肢者。風血內搏。四肢無力而倦怠浮腫也。驚甲乾漆。攻堅削積之品也。所以治精血之留結。柴胡石膏。解肌清熱之藥也。所以去骨蒸之內熱。思則火結於心包。故用常山以開其結。鬱則氣留於六府。故用大黃以推其陳。當歸生地。生新血也。白朮甘草。致新氣也。赤茯苓所以導丙丁之邪。浮小麥所以止骨蒸之汗。而麻黃根之加。乃以其形中閉。爲止汗之最捷爾。東坡云。此黃州吳判官之方也。療骨蒸肌熱盜汗極效。吳君寶之。不肯妄傳也。雖然。此攻擊之劑。惟少男室女孀婦。真氣完固。始可用之。若男婦交接氣弱者。猶禁與也。

桃仁丸

桃仁一百二十枚去

只此一味杵丸。平旦井花水下。隔日一服。百日不得食肉。

骨蒸日久者。此方主之。○骨蒸日久。則絡有留血。不去其瘀。諸藥不效。外臺此方。以桃仁獨味為丸。所以消留瘀也。亦是超人之見。

大黃蠱蟲丸

大黃十兩

黃芩二兩

乾地黄半兩

杏仁去皮

蟬炒

蟲去翅足炒

甘草三兩

乾漆炒

桃仁去皮尖

芍藥四兩

水蛭百枚炙黃

蠱蟲去頭足炒半升

右十二味為末。蜜丸。如小豆大。日三服。每服酒下五丸。

仲景云。五勞虛極。羸瘦。腹滿不能飲食。食傷。憂傷。飲傷。房室傷。飢傷。勞傷。經絡營衛氣傷。內有乾血。肌膚甲錯。兩目暗黑。緩中補虛。大黃蠱蟲丸主之。○夫濁陰不降。則清陽不升者。天地之道也。小人不退。則君子不進者。家國之道也。故蒸熱之久。內有乾血。乾血不去。則新血不生者。人身之道也。是方也。乾漆。桃仁。蠱蟲。水蛭。蟬。蠱蟲。去乾血之品也。君以大黃。是聽令於將軍矣。佐以芍藥。地

黃。生新血也。佐以杏仁、甘草。致新氣也。佐以黃芩。驅遊熱而堅腸胃也。仲景爲百代醫宗。良有識矣。今世人一遇五勞羸瘦。用滋陰而不愈。則坐以待斃。嗚呼。術豈止於此耶。

百勞丸

當歸炒

乳香

沒藥

人參各一錢

大黃蒸四錢

水蛭炙黃

蟲去翅足炒各十四枚

右爲末。煉蜜作丸。如梧子大。都作一服。可百丸。五更百勞水下。取下惡物爲度。服白粥十日。百勞水者。用杓揚之百遍。卽甘瀾水也。一切勞瘵積滯。不經藥而成壞證者。此方主之。○此齊大夫傳張仲景之方也。疾不經藥而成壞證。則中氣尙未壞也。有積滯者。蒸熱之久。內有乾血也。故乳香、沒藥、大黃、蟲、水蛭。皆消瘀逐敗之品。用當歸所以生新血。用人參所以固元氣耳。此與廬蟲丸若合一轍。皆推陳致新之義也。

五尸傳注門第十九

敘曰。五疰之說。惟古昔神良之醫言之。未登神良之堂者。鮮不起而笑之矣。嗚呼。知鬼神之原者。自昔難之。彼笑者。未必其無見也。蓋曰。拘於鬼神者。不足以言至德云爾。今著六考。益滋斯世之笑。不笑者。尙謂我哉。

死人枕

即死人腦後骨也得半朽者良用畢置之原處

病人顏色聲音形證與脈不合於病者。名曰鬼疰。宜此方主之。○鬼疰。是病人爲邪鬼所憑而致疾也。顏色不合於病者。面生五色而含愧赧也。聲音不合於病者。語言不倫於理。而涉幽微也。形不合於病者。動搖跳躍而無內熱也。證不合於病者。爲患詭異。不合於病情也。脈不合於病者。乍大乍小。乍長乍短也。凡此五者。不必悉備。但有一焉。便爲鬼疰。卽邪祟之謂也。然人鬼異途。不相爲類。鬼亦何樂於附人哉。能引之以類。則脫然舍人而就鬼矣。故死人枕。鬼物也。以此物煎湯飲之。則鬼邪觸類而出。大瀉數行而愈者。勢也。此之謂病氣衰去。歸其所宗。用畢。卽以其枕送還原處者。一則使邪疰之氣有所依歸。一則勿以療人而傷鬼也。古有徐嗣伯。劉大用者。常驗之矣。志之於後。以便觀者。

徐嗣伯者。劉宋時人。徐文伯之弟也。有人患滯冷。積年不瘥。嗣伯診之曰。尸疰

也。當得死人枕。煮服之。於是往古塚取枕。枕已一邊腐缺。煮服之。卽瘥。後秣陵人張景。年十五。腹脹面黃。衆醫不能療。以問嗣伯。嗣伯曰。此石虵耳。極難療。當得死人枕。煮服之。依語煮枕。以湯投之。下虵蟲頭。堅如石者五升。病卽瘥。後沈僧翼患眼痛。又多見鬼物。以問嗣伯。嗣伯曰。邪氣入肝。可覓死人枕。煮服之。服竟可埋枕於故處。如其言。又愈。王晏問之曰。三病不同。而皆用死人枕。而俱瘥者何也。答曰。尸疰者。鬼氣伏而未起。故令人沉滯。得死人枕。促之。魂氣飛越。不得復附體。故尸疰可瘥。石虵者。久虵也。醫療旣癖。虵蟲轉堅。世間藥不能遣。所以須鬼物驅之。然後可散。故令煮死人枕也。夫邪氣入肝。故使眼痛。而見魍魎。應須鬼物以勾之。故用死人枕也。氣因枕去。故復埋於塚間。

宋季韶州南七十里。鄉曰古田。有富家婦人抱異疾。常日無他苦。每遇微風吹拂。則股間有一點奇痒。搔不停手。已而舉體皆然。逮於發厥。三日醒。及坐有聲如欬。其身乍前乍後。若搖拽之狀。率以百數始定。又經日困臥。不知人。累夕方愈。至不敢出戶。更十醫弗效。劉大用視之曰。吾行其證矣。先與藥一服。取數珠一串來。病家莫知何用也。當婦人搖動時。記而數之。覺微減。然後云是名鬼疰。

因入神廟。爲邪鬼所憑。致精采蕩越。法當用死人枕煎湯飲之。既飲。大瀉數行。宿痢脫然。大用云。枕用畢。卽送還原處。遲留則令人顛狂。但借其氣耳。崑謂二醫者。古昔神良之流也。知鬼神之原。故能察識異疾。諸醫以口耳之識。執方以治之。其不效也固宜。

癩肝

葛洪云。鬼疰是五尸之一疰。其病變動有若干種。大略使人寒熱淋瀝。沉沉默默。不得知所苦。無處不惡。積年累月。漸就沉滯。以至於死。傳於傍人。乃至滅門。覺如是候者。急治癩肝一具。陰乾杵末。服方寸匕。日三。未止再作。肘後亦云。此方神良。夫癩一獸也。其肝能治鬼疰。此何以故哉。凡物惡人而辟處。夜出而晝伏者。皆陰類也。以陰類而治幽隱之疾。大易所謂同氣相求。內經所謂衰之以屬是也。癩有五藏六府。而獨用其肝者。肝爲厥陰。其主藏魂。用之猶精良也。諺稱鴟梟能療心頭氣痛。亦是假陰類以療幽隱爾。

癩爪屑

許學士本事方云。宣和間。天慶觀一法師。行考石極精嚴。時一婦人投狀。率患

人所附。須臾召至。附語云。非我爲患。別是一鬼。亦因病人命衰爲祟耳。渠今已成形。在患人肺中。爲蟲食其肺系。故令吐血聲嘶。師掠之。此蟲還有畏忌否。久而無語。再掠之。良久云。容某說。惟畏獺爪屑爲末。酒調服之。則去矣。患家如其言而得愈。此予所目見者也。夫獺肝。獺爪。一體也。肝極獺之陰。爪極獺之陽。肝蘊獺之精。爪利獺之用。故皆爲盡妙。

鰻煎

稽神錄云。有人多得勞疾。相因傳死者數人。後一女子病。生置之櫃中。釘之沉於江。冀絕傳染之患。流之金山。有漁人異之。引至岸。見一女子猶然活。因取置漁舍。多得鰻鱧魚食之。病愈。遂爲漁人之妻。又越州鏡湖邵長者女十八。染瘵疾累年。刺灸無不求治。醫亦不效。有漁人趙十。煮鰻羹與食。食竟。內熱之病皆無矣。世人得此二說。凡遇瘵疾。卽以鰻魚食之。率多不效。崑謂鰻魚之性。天和則伏。風洶則動。是逐風之鱗也。若用之以療風尸。無不愈者。若概以之治療。則恐不能。風尸者。五疰之一。其證淫濯四肢。不知痛之所在。每發昏沉。得風雪便作。漸就危篤。以至於死也。

傳勞百一選方

天蓋靈二錢炙黃為末年深沉泥漬朽者良

虎糞內骨一錢酥炙殺虎於大腸內取者亦可

青蛇腦為小豆許酥炙色變度無此亦可

鱉甲酥炙黃色一兩九肋者尤良

安息香半斤

桃仁一枚去皮尖上皆為細末

檳榔一枚別為細末

麝香別研一分

青蒿六兩取近葉三四寸者

豉三百粒

葱根二寸一箇拍

東引桃柳李桑枝長各七莖如筋大各七寸細剉

楓葉二十片

童子小便半升

上件先將青蒿、桃柳、李桑枝、楓葉、葱、豉以官升量水三升煎至半升許去渣。入天靈蓋、虎糞內骨、青蛇腦、鱉甲、安息香、桃仁、童子小便同煎取汁去渣。有四五合。將檳榔、麝香同研勻調作一服。早晨溫服。被覆取汗。恐汗內有細蟲。以帛拭之。即焚。相次須瀉。必有蟲下。如未死。以大火焚。并棄長流水內。所用藥切不得令病人知。日後亦然。十來日後。氣體復原。再進一服。皆如前法。至無蟲而止。

百一選方云。袁州寄居武節郎李應。本湘州法司。有男女三人。長子因議買宅。

入無人所居之室。忽覺心動。背寒凜凜。遂成瘵疾。既死。次女尋病。又傳於第三子。證候一同。應大恐。每日祈神設飯。以齋雲水。冀遇異人。且許謝錢三十萬。後遇一道人。傳以此方。不受一錢而去。且教以祈於城隍。以爲陰助。遂如其言。下蟲七枚。其色如紅燠肉。而腹白。長約一寸。闊七八分。前銳後方。腹下近前有口。身之四周有足。若魚骨。細如鍼尖而曲。已死。試取火焚之。以鐵火筋割刺不能入。病勢頓減。後又服一劑。得小蟲四枚。自此遂安。覬謂天靈蓋人蟲之尸物也。虎糞內骨。毛蟲之尸物也。青蛇腦。鱗蟲之尸物也。驚甲。介蟲之尸物也。二五之精。各從其類。故假尸物以療五尸疰疾。此大易所謂同氣相求。內經所謂衰之以屬是也。東引桃柳李桑枝。出乎震者也。得天地升生之氣。故能匡正而辟不祥。楓葉。青蒿。相見乎離者也。得天地長養之氣。故能止陽而驅邪熱。葱根。豆豉。表藥也。能疏腠而開鬼門。麝香。安息。竄藥也。能利竅而消疰惡。檳榔能殺三蟲。桃仁能除惡敗。童子小便者。以其得少陽之完氣。一能去邪火。一能致新氣也。

蘇合香丸

白朮炒

青木香

烏犀角

香附子炒去毛

丁香

硃

砂研水

訶梨勒皮煨去

白檀香

安息香

另爲末無灰酒一升熬膏

麝香研

葶撥

龍腦研

沉

香各二兩

薰陸香另研蘇合香油入膏內

蜜丸蠟固聽用。

古稱尸疰有五。飛尸、遯尸、風尸、沉尸、注尸也。宜此方主之。○本事云。飛尸者。遊走皮膚。穿藏府。每發刺痛。變作無常。遯尸者。附骨入肉。攻鑿血脈。每發不可得近。見尸喪。聞哀哭便發。風尸者。淫瀝四肢。不知痛之所在。每發昏沉。得風雪便作。沉尸者。纏骨結藏。衝心脅。每發絞切。遇寒冷便發。注尸者。舉身沉重。精神錯雜。常覺昏廢。每節氣至。輒變大惡。是方也。香能辟邪惡。故用沉檀。安息。薰陸。蘇油。青木。香附。溫能壯胃氣。故用葶撥。丁香。硃能辟鬼魅。故用硃。白能守中氣。故用白朮。酸能致新液。故用訶梨。犀能主蠱疰。故用生犀。互考見中風門。死人枕天靈蓋。敗龜板紅鉛說。

昔徐嗣伯用死人枕。取半朽者。用畢曰。復埋故處。師云天靈蓋。非出神農本經。不得已而用。則取年深漬朽者。均之仁人之言也。蓋醫仁術也。使其明而利人。

幽而禍鬼。如陰責何。故昔人推此心以及物。凡於藥內宜用禽蟲之類。皆取自死者。如用龜板而曰敗龜板是也。孫真人曰。殺生以求生。去生益遠。皆所以全此心之仁也。近世術家有導取紅鉛者。使童女內服壯陽泄陰之藥。外用異術以取之。往往致瘵。是殺人而療人也。豈同仁之德耶。

氣門第二十一

絃曰。氣、血、人身之二儀也。氣爲主而血爲配。故曰。氣化卽物生。氣變卽物易。氣盛卽物壯。氣弱卽物衰。氣正卽物和。氣亂卽物病。氣絕卽物死。是氣之當養也明矣。一或失治。則衰且亂。病且死。故考五方以治氣。

獨參湯

人參二兩

煩燥脈微者。加童便一卮。身寒脈微者。加附子三錢。

諸虛氣弱危急者。此方主之。○氣者。萬物之所資始也。天非此氣。不足以長養萬物。人非此氣。不足以有生。故曰。一息不運。則機絨窮。一毫不續。則霄壤判。是

以病而至於危急。良醫以氣爲首務也。人參味甘性溫。得天地冲和之氣以成形。故用之以補冲和之氣。使其一息尙存。則可以次第而療諸疾矣。煩燥加童便者。虛而有火也。身寒加附子者。同其孤陽也。雖然。虛實之辯。不可不察。獨參但可以療虛耳。若實證危急。猶然攻之。故越人有實實之戒。

四君子湯

人參

白朮

白茯苓

炙甘草各二錢

面色痿白。言語輕微。四肢無力。脈來虛弱者。此方主之。○夫面色痿白。則望之而知其氣虛矣。言語輕微。則聞之而知其氣虛矣。四肢無力。則問之而知其氣虛矣。脈來虛弱。則切之而知其氣虛矣。如是則宜補氣。是方也。人參甘溫質潤。能補五藏之元氣。白朮甘溫健脾。能補五藏之母氣。茯苓甘溫而潔。能致五藏之清氣。甘草甘溫而平。能調五藏愆和之氣。四藥皆甘溫。甘得中之味。溫得中之氣。猶之不偏不倚之君子也。故曰四君子。

六君子湯

人參

白朮

茯苓

甘草

半夏

陳皮

氣虛痰氣不利者。此方主之。○內經曰。壯者氣行則愈。怯者着而成病。東南之土卑濕。人人有痰。然而不病者。氣壯足以行其痰也。若中氣一虛。則不足以運痰而痰證見矣。是方也。人參、白朮、茯苓、甘草。前之四君子也。所以補氣。乃半夏則燥濕以制痰。陳皮則利氣以行痰耳。名之曰六君子者。表半夏之無毒。陳皮之弗悍。可以與參、苓、朮、草比德云爾。

補中益氣湯

人參去蘆

炙甘草錢各一

黃耆一分錢五

升麻三分

白朮炒

當歸

陳皮

柴胡各五分

困乏勞倦。傷其中氣者。此方主之。○中。脾也。坤也。萬物之母。氣。陽也。乾也。萬物之父。過於困乏勞倦。則百骸皆虛。百骸既虛。必盜父母以自養。而中氣大傷矣。不有以補之。則形氣不幾於絕乎。故用白朮、甘草之平補者以補中。用人參、黃耆之峻補者以益氣。土欲燥。則當歸隨以潤之。氣欲滯。則陳皮隨以利之。而升麻、柴胡者。所以升乎甲膽乙肝之氣也。蓋甲乙者。東方生物之始。甲乙之氣升。

則木、火、土、金、水次第而生矣。

二十四味流氣飲和劑

陳皮

青皮

甘草炙

厚朴薑製

紫蘇

香附各四兩

大腹皮

丁香皮

檳榔

木香

草果

莪朮炮

肉桂

藿香各半兩

人參

麥門冬

白朮

赤茯苓

枳殼炒

石菖蒲

木瓜

白芷

半夏各一兩

木通

上件每服五錢。

腹中氣滯。痞悶不快。胸膈走痛者。此方方主之。氣陽也。升降出入。法乾之行健不息。使氣無留滯。斯無痛苦。若人也。以寒熱怒。患喜憂愁。七氣干之。則痞悶痛楚之疾生爾。今夫寒則氣收。收則氣不流矣。故用丁皮、肉桂、草果之屬。溫而行之。熱則氣亢。亢則氣不流矣。故用麥門冬、赤茯苓、木通之屬。清而導之。怒則氣逆。逆則氣不流矣。故用檳榔、枳殼、厚朴、木瓜之屬。抑而下之。患則氣積。積則氣

不流矣。故用青皮、陳皮、腹皮、木香、莪朮之屬。快而利之。喜則氣緩。緩則氣不流矣。故用人參、白朮、甘草之屬。補而益之。憂則氣沉。沉則氣不流矣。故用白芷、紫蘇之屬。升而浮之。愁則氣鬱。鬱則氣不流矣。故用香附、菖蒲、半夏、藿香之屬。利而開之。或問七氣之來。豈能並至。方以二十四味。何示人以弗精專也。余曰。氣證與諸證不同。諸證者。痰血積食。屬於有形。故着於一處。偏於一隅。可以單方治也。若夫七情之氣。屬於無形。上下左右。散聚無常。故集辛香之品而流動之。雖二十四味。不厭其繁。譬之韓侯之兵。多多益善云爾。

血證門第二十一

敘曰。血營氣衛。胥有義焉。陰在內。陽之守也。故曰營。陽在外。陰之衛也。故曰衛。二者宜調而不宜病。血一不調。則營守乎中者。反出於外而敗之。微者迫於熱。盛者真陽不足以運血。而衛亦敗也。今考名方二十八首。酌而用之。則調元之手矣。

四物湯

當歸酒洗

熟地黃錢各三

川芎錢酒洗五分

白芍藥二錢酒炒

血不足者。此方調之。○氣血。人身之二儀也。天地之道。陽常有餘。陰常不足。人與天地相似。故陰血難成而易虧。是方也。當歸、芍藥、地黃。味厚者也。味厚為陰中之陰。故能生血。川芎味薄而氣清。為陰中之陽。故能行血中之氣。然草木無情。何以便能生血。所以謂其生血者。以當歸、芍藥、地黃能養五藏之陰。川芎能調營中之氣。五藏和而血自生耳。若曰四物便能生血。則未也。師云。血不足者。以此方調之。則可。若上下失血太多。氣息幾微之際。則四物禁勿與之。所以然者。四物皆陰。陰者天地閉塞之令。非所以生萬物者也。故曰禁勿與之。

當歸補血湯

當歸二錢

黃耆一兩

男婦肌熱。目赤面紅。煩渴引飲。脈來洪大而虛。重按全無者。此方主之。○血實則身涼。血虛則身熱。或以飢困勞役。虛其陰血。則陽獨治。故令肌熱。目赤面紅。煩渴引飲。此證純象傷寒家白虎湯之證。但脈大而虛。非大而長。為可辯爾。內經所謂脈虛血虛是也。當歸味厚。為陰中之陰。故能養血。而黃耆則味甘補氣。

者也。今黃耆多於當歸數倍。而曰補血湯者。有形之血不能自生。生於無形之氣故也。內經曰。陽生陰長。是之謂爾。東垣云。此證誤服白虎者必死。當須識此。勿令誤之。

獨參湯

人

參去蘆
二兩

凡上下失血過多。脈微欲絕者。急以此方主之。○血者氣之守。氣者血之衛。相偶而不相離者也。一或失血過多。則氣爲孤陽。亦幾於飛越矣。故令脈微欲絕。斯時也。有形之血不能速生。幾微之氣所宜急固。故用甘溫之參以固元氣。所以權輕重於緩急之際也。故曰。血脫益氣。古聖人之法。或者不達此理。見其失血而主四物湯。則川芎之香竄。能散幾微之氣。而當歸芍藥地黃皆溢陰降下之品。不能生血於一時。反以失救死之權。而遺人夭殃矣。醫云乎哉。

八珍湯

人

參去蘆

白

朮炒

茯苓

苓去皮

炙甘草

當

歸酒洗

川

芎酒洗

芍

藥酒炒

地黃

血氣俱虛者。此方主之。○人之身。氣血而已。氣者百骸之父。血者百骸之母。不可使其失養者也。是方也。人參、白朮、茯苓、甘草、甘溫之品也。所以補氣。當歸、川芎、芍藥、地黃。質潤之品也。所以補血。氣旺則百骸資之以生。血旺則百骸資之以養。形體既充。則百邪不入。故人樂有藥餌焉。

犀角地黃湯

生犀角鎔

生地黃

白芍藥

牡丹皮

吐衄不止者。此方主之。○口出血曰吐。鼻出血曰衄。火逆於中。血隨火上。有此二證。然吐血責之府。衄血責之經。求其實。則皆炎上之火也。火者心之所司。故用生犀。生地以涼心而去其熱。心者肝之所生。故用丹皮。芍藥以平肝而瀉其母。此窮源之治也。今人治吐血者。以涼水濯其兩足。此釜底抽薪之意也。治衄血者。以涼水拊其後頸。此責其火於太陽經也。皆是良法。互考見咳嗽門、痘門。

四生丸

生荷葉

生艾葉

生地黃

生柏葉

四件爛搗。丸如雞子大。每服一丸。

陽乘於陰。血熱妄行。或吐或衄。此方亦良。○統而論之。生之則寒。則四生皆能去火。析而論之。則荷艾輕香。去火於氣。芩柏質實。瀉火於陰。火去則血歸經。而吐衄愈矣。

黃連解毒湯

黃連

黃芩

黃柏

梔子

各三錢炒

陽毒上竅出血者。此方主之。○治病必求其本。陽毒上竅出血。則熱爲本。血爲標。能去其熱。則血不必治而自歸經矣。故用連、芩、梔、柏苦寒解熱之物以主之。然惟陽毒實火用之爲宜。若陰虛之火。則降多亡陰。苦從火化。而出血益甚。是方在所禁矣。

人中白

新瓦上逼乾。溫湯調下三錢。

衄血不止者。此方主之。○人中白。即本草溺白堊也。其味鹹寒。鹹則能入血。寒則能勝熱。其味厚於人便。故其奏功尤捷。

生地黃自然汁

取生芩十餘斤。只用新布拭淨搗絞取汁。勿用生水洗之。

吐衄不止者。此方亦良。○東垣曰。生地黄。涼心火之血熱。瀉脾土之濕熱。止鼻中之衄熱。除五心之煩熱。故吐衄之疾。取自然汁呷之。血涼而止。

茜根散

茜根

阿膠

黃芩

側柏葉

生地黄

各一兩

炙甘草

五錢

陰虛衄血者。此方主之。○陰陽之在人。平則治。偏則病。若腎陰一虛。則陽勝矣。故載血上行而令衄。是方也。阿膠能補虛。黃芩能養陰。甘草能緩急。茜根、側柏、生地黄。則皆去血中之熱。能生陰於火亢之時者也。

黃芩芍藥

黃芩

白芍藥

甘草

各三錢

陰火載血上行。衄而不止者。此方亦主。○黃芩之苦能降火。芍藥之酸能收陰。甘草之甘能緩急。

止衄散

黃耆六錢

赤茯苓

白芍藥

當歸

生地黃

阿膠各三錢

飢困勞役。動其虛火。致衄不止者。此方主之。○飢困勞役而動其火。其人本虛可知矣。虛火可補。故用黃耆、當歸、阿膠、甘溫之品以補之。然赤茯苓能導丙丁。白芍藥能收陰氣。生地黃能涼血熱。三物者。去血中之熱。自是冲和。與芩、連、苦寒之劑殊別。實火宜用連、芩。虛火則惟此類為宜也。或問虛火實火。何以辨之。余曰。聲高氣壯為實火。言而微。終日復言為虛火。

人參飲子

人參

黃耆各一錢五分

麥門冬

當歸

甘草

白芍藥各一錢

五味子九粒

暑月衄血。此方主之。○內經曰。必先歲氣。無伐天和。故時當暑月。則肺金受剋。令人乏氣之時也。理宜清金益氣。清金故用麥門、五味。益氣故用甘草、人參。耆、芍藥之酸。所以收其陰。當歸之辛。所以歸其血。此亦虛火可補之例也。

榴花散

百葉榴花晒乾為末

衄不止者。以此末吹入鼻中。立止。○榴花之紅。可使入血。榴花之澀。可使止血。一夫當關。此藥近之。

丹溪咳血方

青黛飛

瓜蒌仁去油

訶子肉

海粉去砂

山梔炒黑等分

咳嗽痰血者。此方蜜丸嚙化。○肺者。至清之藏。纖芥不容。有氣有火則咳。有痰有血則嗽。咳者有聲之名。嗽者有物之義也。青黛山梔所以降火。瓜蒌海粉所以行痰。訶子所以斂肺。然而無治血之藥者。火去而血自止也。

人溺

咳血者。宜此一物飲之。○褚澄。齊之聖醫也。其遺書曰。咳血不易醫。喉不容物。毫髮必咳。血滲入喉。愈滲愈咳。愈咳愈滲。飲洩溺則百不一死。服寒涼則百不一生。吾於是乎師其言矣。

聖餅子

青黛一錢

杏

仁四枚
去皮尖

以黃耆煎湯炒黃色。二味研作餅子。入柿餅內。濕紙包煨。連柿餅研細。米飲調服。

咯血者。此方主之。○咯血者。咯而出血。責之脾胃也。青黛去土中之火。杏仁利中宮之氣。氣利火去則不咯。不咯則不血矣。

荷葉散

荷

葉不拘多少
焙乾爲末

咯血此方亦良。○氣分有火。則令人咯。久久咯之。則動其血。褚氏曰。血雖陰類。運之者其和陽乎。荷葉有仰盂之形。得震卦之象。有輕香之氣。得清和之體。故能和陽定咯而運血。

大補丸

黃

柏色一作妙褐
作丸

嘔血者。此方主之。○嘔與咯不同。聲出於上焦爲咯。重而短也。聲出於下焦爲嘔。濁而長也。黃柏苦而潤。苦故能瀉火。潤故能就下也。

側柏散

側柏葉爲一味

米飲調下三錢。

此亦治嘔血之方也。○側、陰象也。柏、遇寒而不凋。得陰氣之最厚也。故能入陰而瀉嘔逆之火。然其性微香。則其妙又能和陽。而不偏於陰矣。此其所以爲良也。

晚漱治牙宣

牙宣者。齒根出血也。此以肥甘之熱致病。每於晚膳後。以茶漱而潔之。則病愈矣。

小薊飲子

小薊

生地黄

滑石

通草

蒲黃炒

藕節

淡竹葉

當歸

梔子炒

甘草兩各半

下焦結熱血淋者。此方主之。○下焦之病。責於濕熱。法曰。病在下者。引而竭之。

故用生地、梔子涼而導之。以竭其熱。用滑石、通草、竹葉淡而滲之。以竭其濕。用小薊、藕節、蒲黃消而逐之。以去其瘀血。當歸養血於陰。甘草調氣於陽。古人治下焦瘀熱之病。必用滲藥開其溺竅者。圍師必缺之義也。

小薊琥珀散

小薊

琥珀等分
爲末

此亦治血淋之方也。○薊根能治下焦瘀血。琥珀能治膀胱結熱。

牛膝膏

牛

膝三斤煎膏一斤空
心鹽水化下四錢

此亦血淋之方也。○牛膝質潤而苦鹹。形實而脩長。質潤故能活血。苦鹹故能勝熱。形實故能就下。脩長故能導小腸而利膀胱。

玄胡索散

玄胡索一兩

朴硝三分

分二次服。

此治陽邪陷入下焦。令人尿血之方也。○陽邪者。熱病傷寒之毒也。下焦者。陰

血所居。陽邪入之。故令尿血。玄胡索味苦而辛。苦故能勝熱。辛故能理血。佐以朴硝。取其鹹寒。利於就下而已。

胃風湯

人參去蘆

白朮炒

茯苓去皮

川芎洗淨

當歸酒洗

白芍藥炒

肉桂炒等

風邪入於腸胃。泄下鮮血。或腸實濕毒。下如豆汁。瘀血者。此方主之。○風陽邪也。血得之則善行。故下鮮血。濕陰邪也。血得之則敗壞。故如豆汁。氣血虛而後邪湊之。故用人參。白朮。茯苓以補氣。用川芎。當歸。芍藥以養血。肉桂之辛。可以散風邪。肉桂之熱。可以燠濕毒。血藥得之。可以調營。氣藥得之。可以益衛。又曰。白朮。茯苓。能壯脾而療濕。川芎。肉桂。能入血而驅風。

槐花散

槐花炒

側柏葉

荆芥穗

枳殼

麸炒等分

共為末。每服三錢。空心下。腸風。藏毒下血。此方主之。○槐花。側柏。能涼大腸之血。荆芥。枳殼。能療大腸之

風。風熱相搏者治之良。

酒煮黃連丸

黃連耐二

好酒五升

煮乾爲末作丸。每服三錢。

濕熱酒毒。令人便血者。此方主之。○黃連。苦寒枯燥之物也。苦寒故能勝熱。枯燥故能勝濕。而必煮以酒者。非酒不能引之入血也。

柏灰散

側柏葉一味春東夏南
秋西冬北取來

燒灰調下三錢。

臟毒下血不止者。此方主之。○藏毒之初宜涼血。涼血皆苦寒之藥。久久則氣寒而血益不固矣。法曰。瀦可以固脫。故用柏灰之瀦以止之。四時采之。必辨其方者。取其得氣之厚也。他如乾柿餅燒灰亦良。

人參櫟皮散

人參去蘆

櫟根白皮等分

每末三錢。

臟毒挾熱下血。日久不止者。此方主之。○臟毒。腸毒也。挾熱者。謂挾客熱與飲酒之類也。日久不止。則氣亦虛而不足以固血矣。故用人參之甘以補氣。樗根之瀝以固血。補以舉之。瀝以劫之。雜霸之治也。

脫肛門第二十二

敘曰。脫肛。一也。有寒熱之判焉。又能進之而辨氣血中之寒熱。則精藝者也。今考古方三首。表其要者爾。

丹溪脫肛方

人參

黃耆

川芎

當歸

升麻

久瀉脫肛者。此方主之。○瀉久則傷氣。下多則亡陰。是氣血皆虧矣。故令廣腸虛脫。氣不足者。補之以甘溫。故用參耆。陰不足者。養之以厚味。故用芎歸。下者舉之。故用升麻。

舉肛丸

半夏

天南星

枯白礬各五錢

枯紅礬

雞冠花炒

白附子各五兩

訶子肉煨

黑附子生

枳殼各一兩

蝟皮炙二枚

瓜蒌存性一枚燒

胡桃仁燒存性十五枚

共為末。醋糊作丸。空心溫酒下三十丸。

泄瀉虛寒脫肛者。此方主之。○濕盛則濡瀉。久瀉則胃虛。胃虛則藏寒。藏寒則無陽以升舉。故令肛腸脫而不上。燥能去濕。故用半夏、南星。枯能制濕。故用紅白枯礬。溫能煖藏。故用黑白附子。乃若雞冠花、蝟刺皮、枳殼所以驅風而訶子、瓜蒌、胡桃仁之灰取其潛以固脫也。

收肛散

熊膽五分

孩兒茶三分

冰片一分

共為細末。乳調塗肛上。熱汁下而肛收矣。

熱瀉脫肛者。用此方塗之良。○熱則肛門濇。濇則便不易出。不易出。則令人努責。努責之久。則令脫肛。此與寒脫不同者。此則肛門濇。寒脫則洞泄而不濇也。

苦可以勝熱。故用熊膽。瀉可以固脫。故用兒茶。辛可以拔邪。故用冰片。

嘔吐門第一一十二

敘曰。嘔有聲長聲短之辨。吐有見痰見食之分。參之以脈證。合之以顏色。問之以從來。始爲無失。毋但曰嘔吐小疾而忽之。常見肝實之證。令人嘔吐不已而死者。茲考六方。誌其略爾。

二陳加山梔黃連生薑湯

半夏

陳皮去白

茯苓

甘草炙

山梔子炒黑

黃連炒

生薑等分

胃中有熱。膈上有痰。令人嘔吐者。此方主之。○有聲之謂嘔。有物之謂吐。聲者。氣與火也。物者。痰與涎也。半夏燥痰濕。茯苓滲痰濕。陳皮利痰氣。甘草益脾氣。此二陳治痰之旨也。苦可以瀉火。故用梔子。辛可以行滯。故用生薑。

六君子湯

人參

白朮

茯苓

甘草各二錢

半夏

陳皮錢各一

久病胃虛聞穀氣而嘔者。此方主之。○胃者。水穀之海。倉廩之官也。故胃強則善穀。胃弱則聞穀而嘔。經曰。安穀者昌。失穀者亡。奈之何而不急治乎。故人參、白朮、茯苓、甘草。氣味甘溫。可以益胃。陳皮、半夏。氣味辛利。可以破嘔。理中加丁香湯。

人參

白朮炒

甘草炙

丁香

乾薑炒

嘔吐腹痛者。此方主之。○嘔吐而痛即止者為火。嘔吐而痛不止者為寒。然寒則收引。胡然能吐。師曰。寒勝格陽。故令吐也。治寒以熱。故用丁香、乾薑之溫。吐多損氣。故用人參、白朮、甘草之補。

竹茹湯

葛根三錢

半夏製

竹茹錢各二

甘草一錢

傷寒正汗後。餘熱留於陽明少陽。必令作嘔。此方主之。○陽明胃也。少陽膽也。有辨焉。口渴者熱在胃。口苦者熱在膽也。兼而有之。則二經均有留熱矣。是方

也。乾葛清胃。竹茹清膽。半夏破逆。甘草調陽。

雄礬瓜蒂散

雄黃

明礬

苦瓜蒂五炒各分

共爲末酒服。

嘔而流涎脈平者。蟲家證也。主此方吐之。○蟲動則流涎。胃癢則令嘔。脈平者。得平人無病之脈。不遲不數。無寒無熱也。雄黃氣悍。明礬苦瀉。殺蟲之品也。佐以瓜蒂之善湧。則蟲立吐而出矣。又曰。實而能吐者。主以此方。虛而不能吐者。宜主傷寒門烏梅丸。

六味地黃丸

熟地黃八兩

山茱萸

山藥各四兩

牡丹皮

白茯苓

澤瀉各三兩

蜜丸

陰虛於下。令人多嘔者。主此方鹽湯吞之。○脈解篇曰。諸陽氣浮。無所依從。故嘔咳上氣喘。此陰虛於下。而令孤陽上浮爾。是方也。熟地。山黃。質潤味厚。可使滋陰。丹皮。澤瀉。氣味鹹寒。可制陽光。山藥。茯苓。味甘而淡。可使調中土。是六物

者。皆有益於陰也。故主之。

呃逆門第二十四

敘曰。呃逆一也。中下判焉。中焦呃逆其聲短。水穀之病也。下焦呃逆其聲長。虛邪相薄也。今考古方三首。辨其上下。察其虛實。則十全之工矣。若呃逆日久而且吞酸。則翻胃之前驅也。從火治之。

橘皮竹茹湯

橘皮

竹茹各一升

人參

生薑各半兩

甘草炙二兩

大棗三十枚

大病後。呃逆不已。脈來虛大者。此方主之。○呃逆者。由下達上。氣逆作聲之名也。大病後。則中氣皆虛。餘邪乘虛入裏。邪正相薄。氣必上騰。故令呃逆。脈來虛大。虛者正氣弱。大者邪熱在也。是方也。橘皮平其氣。竹茹清其熱。甘草和其逆。人參補其虛。生薑正其胃。大棗益其脾。

丁香柿蒂竹茹湯

丁香 香三粒

柿蒂

竹茹 各三錢

陳皮 一錢

大病後。中焦氣塞。下焦呃逆。此方主之。○大病後五藏皆傷。升降失常。故令中焦否塞。五藏之陰既傷。則少陽之火奮於下。故令下焦呃逆。直冲清道而上也。是方也。丁香、陳皮。辛溫者也。理中氣之否塞。竹茹、柿蒂。苦寒者也。療下焦之呃逆。或問降逆何以不用梔、柏。余曰。此少陽虛邪。非實邪也。故用竹茹、柿蒂之味薄者以主之。若梔、柏味厚。則益戕其中氣。否塞不益盛乎。古人蓋亦深權之矣。

木香調氣散

木香

檀香

白蔻仁

丁香 各三兩

砂仁 四兩

甘草 炙

藿香 各半兩

共爲末。每服二錢。鹽湯下。

中焦呃逆者。此方主之。○中焦者。水穀之海。倉廩之區也。其呃逆責之穀氣。故用砂仁、蔻仁以化食。木香、丁香、檀香、藿香以調氣。甘草以和中。鹽湯以潤下。或問中焦呃逆。與下焦呃逆何以辨。余曰。彼則由於大病後。此則得之飲食後也。又中焦之呃逆輕而短。下焦之呃逆惡而長。其辨判然矣。

翻胃門第二十五

敍曰。翻胃一證。古今難之。若胃脘未枯。皆爲可治。借曰枯之。則從容用藥。猶可久延。若造次不察病理。非惟無益。而又害之矣。今著六考。宜於言外而變通之。

韭汁牛乳飲

韭汁

牛乳等分

時呷之。

胃脘有死血。乾燥枯槁。食下作痛。翻胃便秘者。此方主之。○翻胃者。胃不能安穀。食下卽出之名也。嗜酒燥暴之人。多有此疾。胃脘有死血者。醇酒漬胃。久積瘀熱之所致也。乾燥枯槁者。燥急心熱之所致也。有枯燥。故令食下作痛。有積熱。故令翻胃便秘。韭汁味辛。能消瘀行血。牛乳甘溫。能養血潤燥。

驢尿一物飲

驢尿

尿

每服呷二合

鬱火翻胃者。此方主之。○火鬱於中。治以辛香開胃之藥。益滋其燥。非所宜也。

驢尿辛膈。可使開鬱。然爲濁陰之所降。則可以濟火矣。唐貞觀中。許奉御及柴蔣等。時稱名醫。奉勅治翻胃。竭其術。竟不能療。漸至羸憊。死在旦夕。忽有術士云。服驢子小便極驗。旦服二合。午食惟吐一半。晡時又服二合。人定時食粥吐卽定。後奏知大內中。五六人患翻胃。同服。一時俱瘥。盧和著丹溪纂要。謂入驢尿以防生蟲。此未究理者也。

螺泥丸

取田中大螺。不拘多少。用新水養之。取其吐出之泥。陰乾爲丸。每服三十丸。藿香湯下。

積熱翻胃。此方亦良。○螺性至涼。泥性至冷。故可用之清胃。吞以藿香湯。假其辛芳開胃而已。

九蒸大黃

諸逆衝上。皆屬於火。故用大黃酒潤九蒸曬之。取其無傷胃氣而能去火。此久練之將軍也。

附子散

附子一枚

乾薑煎湯潤七次爲末。每服三錢。

寒痰翻胃者。此方主之。○膈上有寒痰。壅塞中下二焦之氣。陰遏其陽。畜極而通。則令翻胃。附子辛熱。能解寒痰。寒痰既解。則氣道疏通。而無畜極之陽矣。故翻胃頓除。

三花神祐丸

甘遂

芫花

大戟拌溫炒各半兩

黑丑二兩取頭末

大黃一兩

輕粉一錢

共爲末。水丸。每服五丸。漸加五丸。以快利爲度。

積痰滿胃。食下卽吐。宜主此方。○胃中純是痰。則遏下焦少陽之火。畜極而通。必作翻胃者勢也。以平劑治之。則經年不效。故聚甘遂、芫花、大戟、黑丑、大黃峻厲之品以下之。方內有輕粉。一可以逐風涎。一可以解遂、芫、戟、丑之辛烈。此大毒類聚爲丸。瞑眩之劑也。惟聲重脈來有力者能行之。若言微脈來無力者。勿輕與也。

噎膈門第二十六

敘曰。近代醫籍。翻胃噎膈。混作一證。今考於漢唐之上。有翻胃。有噎。有膈。要之。翻胃自是不同。而噎而膈。則可混一而治也。考方八首。明者辨之。

深師七氣湯

乾薑

黃芩

桂心

半夏

甘草

橘皮

乾地黄

芍藥各二兩

桔梗三兩

枳實五枚

人參一兩

吳茱萸五合

氣噎膈者。此方主之。○噎膈者。有物噎塞。防礙飲食之名。今人與翻胃。渾然無辨。非古也。深師孫真人之傳也。七氣者。寒氣、熱氣、怒氣、恚氣、喜氣、憂氣、愁氣也。氣者。運行不息之物。故氣行則治。氣鬱則病。冲和則治。乖戾則病。是方也。辛可以行氣。故用乾薑、肉桂、吳茱萸、半夏、陳皮之辛。苦可以降氣。故用黃芩、枳實、桔梗之苦。脾虛則不能運氣。故用人參、甘草以益脾。肝腎弱則不能吸氣。故用地黃以滋腎。芍藥以和肝。

韭汁飲

生韭汁

醇酒等分

每服二合，日二。

血噎膈者。此方主之。○漢醫但稱噎稱膈而已。後之方書稱五噎五膈。五噎者。氣噎、憂噎、勞噎、食噎、思噎者。五膈者。憂膈、恚膈、氣膈、寒膈、熱膈也。立言雖曰有五。說證其實未周。今不拘其說。只據世人所有之證而訂其方焉。血噎膈者。或因跌撲。或因大怒。血積胸膈。久久凝結。令人防礙飲食。得熱則寬。得寒則痛。是也。生韭汁能解畜血之瘀結。佐以醇酒行其勢也。

瓜蒌實丸

瓜蒌仁

枳殼

製半夏

桔梗

薑汁米糊爲丸。

痰噎膈者。此方主之。○痰隨氣上。亦隨氣下。故瓜蒌、枳殼、桔梗皆下氣藥也。痰以濕生。必以燥去。故半夏者。燥濕之品也。或問桔梗爲諸藥之舟楫。浮而不沉者也。何以下氣。余曰。甘者戀膈。苦者下氣。輕者上浮。苦者下降。此藥之性也。桔

梗甘而苦。為陽中之少陰。故初則戀膈。久則下氣矣。痰盛者。宜於痰門諸方消息之。

回令丸

黃連六兩

吳茱萸一兩 水漬少時晒乾

共末為丸。

火噎膈者。此方主之。○此即左金丸也。曰回令者。黃連之苦能勝熱。可以回其火令也。以吳茱萸之辛熱佐之。取其反佐以從治爾。

食鬱越鞠丸

山查

神麴

砂仁

香附童便製

蒼朮米泔浸七日

撫芎

梔子

食噎膈者。此方主之。○食不自膈也。或由氣塞。或由火鬱。然後停食而作食膈。故用香附、蒼朮、撫芎以順氣。梔子以瀉火。山查、神麴、砂仁以消食。昔齊王中子諸嬰兒。病煩憊食不下。時嘔沫。倉公視之。曰。食膈病也。作下氣湯以飲之。其方今不可考矣。若芩連枳朮丸、木香檳榔丸。義亦近之。

蒜齏酢

太平御覽云。華陀行道。見一人病噎。嗜食而不得下。家人車載欲往就醫。陀聞其呻吟。駐車往視。語之曰。向來道傍買餅者。有蒜齏大酢。從取三升飲之。病卽當瘥。卽如佗言。立吐蛇一條。懸之車邊。欲造陀。陀尙未還。陀家小兒戲門前。迎見。自相謂曰。客車邊有物。必是遇我公也。疾者前入。見陀壁懸此蛇。輩以十數。崐謂蒜味辛熱。爲陽中之陽。能令人氣實。悶亂而自吐。若蛇蟲蟲瘕。猶爲宜之。褚氏傳曰。褚澄以蒜一升吐。李道念之雞雛。齊諧記云。郭坦之兒。食蒜一畦。吐消食。籠於頃刻。蒜之妙用如此。今之醫者。罕能知之。或問何以不用瓜蒂散。余曰。傷寒內熱者。宜吐以瓜蒂散之。苦寒。蟲瘕痼冷者。宜吐以蒜酢之。辛熱。人知苦能吐熱。而不知熱能吐寒。故特表而出之。

染錠

廣五行記。永徽中。絳州有僧病噎。防食數年。臨死遺言。令破喉視之。得一物似魚而有兩頭。徧體悉是肉鱗。致鉢中。跳躍不止。以諸味投鉢中。皆化爲水。時寺中方刈藍作錠。試取少錠致鉢中。此蟲遶鉢畏走。須臾化爲水。崐謂此蟲濕熱

所生。濕從土化。熱從火化。酸之爲物。色青而性寒。是東方之木色。與北方之水味最厚者也。水足以制火。木足以尅土。此五行之理也。故足以化濕熱之蟲。自有五行以來。上而萬象。下而萬類。一爲尅制。無不化之。况於此蟲乎。

楮實湯

南唐烈祖。因食飴喉中噎。國醫皆莫能愈。時吳廷紹尙未知名。進楮實湯一服。疾失去。羣醫默識之。他日取用。皆不驗。或叩之。答曰。噎因甘起。故以楮實湯治之。其方今不可考。但發此二句。便知其爲良醫。內經曰。甘者令人中滿。故其氣上溢。奈何不作噎乎。又曰。酸勝甘。則治法思過半矣。

情志門第二十七

紱曰。情志過極。非藥可愈。須以情勝。故曰。怒傷肝。悲勝怒。喜傷心。恐勝喜。思傷脾。怒勝思。憂傷肺。喜勝憂。恐勝思。內經一言。百代宗之。是無形之藥也。今考神良之醫十一事。明者觸類而通之。則術在我矣。文摯。齊人也。齊威王病。發使召文摯。摯至。謂太子曰。王病。怒則愈。王若卽殺臣。奈

何。太子曰。無慮。我當救之。文摯於是不時來見王。及來。不脫履而登床。王大怒。使左右持下將烹之。后及太子叩頭請救。王怒遂解。赦摯。因此病愈。所以然者。王之病得於思。故以怒勝之。

魏志云。有一郡守病。華陀以其人甚怒。則瘥。乃受其貨而不加功。無何棄去。留書罵之。守果大怒。令人追殺守。子知之。囑吏勿逐。瞋恚不已。吐黑血數升而愈。所以然者。守之病亦本於思也。經曰。思則氣結。氣結者。陰翳之根也。故用暴怒以傷其陰。使之歸於平調而已。

邵氏聞見錄云。州監軍病悲思。其子迎赫允治之。允告其子曰。法當甚悸。即愈。時通守李宋卿御史嚴甚。監軍內所畏也。允與其子請於宋卿。一造問責其過失。監軍惶怖汗出。疾乃愈。蓋悲思則氣結。驚怖則氣浮。浮則氣不結矣。此亦以情相勝也。

趙知則。太原人。因喜成疾。巢氏醫脈之。爲之驚異。出取藥。竟不與之。數日。趙悲哭。辭家人曰。處世不久矣。巢知其將愈。使人慰之。詰其故。引素問恐勝喜以對。可謂得玄關者也。

一婦正產之時。收生婦以溫水進之。誤進鹿角脂。鹿角脂。女子塗鬢物也。因哇而舌出。產後數日不能收。醫藥屢不應。甄立言最後至。以硃砂塗其舌。仍命作產子狀。以兩婦人掖之。乃使人潛於壁外。多捧缶器。向危處擲地作聲。聲聞而舌收矣。所以然者。恐則氣下故也。先用硃砂塗其舌者。恐其驚氣入心。故爲未然之防爾。

韓丞相疾。天方不雨。更十醫罔效。左友信最後至。脈已。則以指計甲子曰。某日當雨。竟出。韓疑曰。豈謂吾疾不可爲耶。何言雨而不及藥我也。旣而其夕果雨。韓喜起而行乎庭。達旦疾若脫去。乃召左至而問之。對曰。公相之疾。以憂得之。私計公相忠且仁。方今久旱。必爲民憂。以旱爲憂。必以雨而瘳。理固宜然。何待藥而愈耶。此亦素問喜勝憂也。

一女許昏後。夫經商二年不歸。因不食。困臥如癡。無他病。竟日向壁而臥。其父迎丹溪翁治之。告以故。翁脈畢。謂其父曰。此思則氣結也。藥難獨治。得喜可解。不然。令其怒。於是掌其面。誣以外情。果大怒而號泣者三時。令解之。卽求食矣。所以然者。悲則氣消。怒則勝思故也。翁謂其父曰。病雖瘥。得喜方已。乃諭以夫回。

既而果然。疾亦不舉。

一縣差拿犯人。以鐵索項所犯至縣。行至中途。其犯投河而死。犯家告差人索騙。威逼至死。及能脫罪。未免破財。憂憤成病。如醉如癡。謬言妄語。無復知識。其主延戴念仁視之。戴云。此以費財而病。必以得財而愈。乃命作三錫錠。如銀狀。預置於泥溝之中。候其至時。詐以鎖鑰誤墮其中。命探之。乃出三錫錠。主曰。銀也。吾不用此弗義之財。悉以與汝。其差握視不置。病遂日愈。此亦喜勝憂也。

一女子母甚是相愛。既嫁而母死。遂思念不已。精神短少。慊慊嗜臥。諸藥不應。其夫延韓世良治之。韓曰。此病得之於思。藥不易愈。當以術治之。乃賄一巫婦。授以祕語。一日夫謂妻曰。汝之念母如此。不識彼在地下。亦念汝否。吾當他往。汝盍求巫婦卜之。妻欣諾。遂召巫至。焚香禮拜。而母靈降矣。一言一默。宛然其母之生前也。女遂大泣。母叱之曰。勿泣。汝之生命尅我。我遂早死。我之死。皆汝之故。今在陰司欲報汝讎。汝病慊慊。實我所爲。我生則與爾母子。死則與爾寇讎矣。言訖。女改容大怒。詬之曰。我因母病。母反我害。我何樂而思之。自是而病愈矣。此亦以情療之也。

譚植素謹言。爲韶州佐。一日會堂屬官。筵中有蘿蔔頗大。衆羨之。譚曰。尙有大如人者。衆皆笑以爲無。譚悔恨自咎曰。人不見如是。大者而吾以是語之。宜其以吾言爲妄且笑也。因而憂憤。連日不能食。其子煌讀書達事。思父素不輕言。因愧赧成疾。必實所言。始可療病。遂遣人至家。取蘿蔔如人大者至官所。復會堂屬。強父扶疾而陪。酒至數巡。以車載至席前。衆皆驚訝。其父大喜。厥旦疾愈。此亦素問喜勝憂也。

何解。陳留人也。一日與河南尹樂廣會飲於趙脩武宅。酒至數杯。忽見杯底有似一小蛇。嚥之入口。亦不覺有物。但每每思而疑之。日久覺心疼。自思小蛇長大。食其五藏。醫藥不愈。久之。又會酒趙宅。纔執杯。又見小蛇。乃置杯細視之。見趙宅梁上有角弓。却是弓梢影於酒底。因此解疑。其疾遂無。此以情疑而病。必以疑解而瘥。向來以藥治之。皆無驗也。

醫方考

明 欽邑 吳 崐鶴皋原著
鄞縣 曹赤電炳章圈點

卷四

脾胃門第二十八

敘曰。脾胃。人身之坤元也。至哉坤元。萬物資生。故脾胃爲百骸之母。東垣所以擅名當世者。無他長焉。知脾胃之爲要爾。庸師治病。壞人脾胃者多矣。此欲養其子者。先戕其母也。豈豫養之道哉。今考六方於左。庶幾乎調元之補也。

參苓白朮散

人參

茯苓去皮

白朮炒

砂仁

甘草炒

山藥

桔梗炒

薏苡仁炒

扁豆

蓮肉

脾胃虛弱。不思飲食者。此方主之。○脾胃者土也。土為萬物之母。諸藏府百骸受氣於脾胃而後能強。若脾胃一虧。則衆體皆無以受氣。日見羸弱矣。故治雜證者。宜以脾胃為主。然脾胃喜甘而惡苦。喜香而惡穢。喜燥而惡濕。喜利而惡滯。是方也。人參、扁豆、甘草、味之甘者也。白朮、茯苓、山藥、蓮肉、薏苡仁、甘而微燥者也。砂仁、辛香而燥。可以開胃醒脾。桔梗、甘而微苦。甘則性緩。故為諸藥之舟楫。苦則喜降。則能通天氣於地道矣。

錢氏益黃散

陳皮十兩

丁香一兩

青皮

訶子肉

甘草各五兩

每服末二錢。

小兒脾虛不實。米穀不化。滑腸滯頤者。此方主之。○胃主受納。脾主消磨。故能納而不能化者。責之脾虛。滑腸者。腸滑而飧泄也。滯頤者。頤頤之下多涎滯也。皆土弱不能制水之象。火能生土。故用丁香。甘能補土。故用甘草。香能快脾。故用陳皮。澀能去滑。故用訶子。用青皮者。謂其快膈平肝。能抑其所不勝爾。

補中益氣湯

人參

炙甘草各一錢

黃耆各一錢五分

陳皮

白朮

當歸

柴胡各五分

升麻三分

肌困勞倦。中氣虛弱者。此方主之。○中氣者。脾胃之氣也。五藏六府。百骸九竅。皆受氣於脾胃而後治。故曰。土者萬物之母。若飢困勞倦。傷其脾胃。則衆體無以受氣而皆病。故東垣諄諄以脾胃爲言也。是方也。人參、黃耆、甘草。甘溫之品也。甘者中之味。溫者中之氣。氣味皆中。故足以補中氣。白朮甘而微燥。故能健脾。當歸質潤辛溫。故能澤土。朮以燥之。歸以潤之。則不剛不柔。而土氣和矣。復用升麻、柴胡者。升清陽之氣於地道也。蓋天地之氣一升。則萬物皆生。天地之氣一降。則萬物皆死。觀乎天地之升降。而用升麻、柴胡之意。從可知矣。或曰。東垣謂脾胃一虛。肺氣先絕。故用黃耆以益皮毛。不令自汗而泄肺氣。其辭切矣。予考古人之方。而更其論。何也。余曰。東垣以脾胃爲肺之母。故耳。余以脾胃爲衆體之母。凡五藏六府。百骸九竅。莫不受其氣而母之。是發東垣之未發。而廣其意耳。豈曰更論。

調中益氣湯

黃耆一錢

升麻三分

陳皮六分

木香二分

人參

甘草炙

蒼朮

柴胡各五分

脾胃不調而氣弱者。此方主之。○脾胃不調者。腸鳴飧泄膨脹之類也。氣弱者。語言輕微。手足倦怠也。補可以去弱。故用人參黃耆甘草甘溫之性行。則中氣不弱。手足不倦矣。蒼朮辛燥。能平胃中敦阜之氣。升麻柴胡輕清。能升胃家陷下之氣。木香陳皮辛香。能去胃中陳腐之氣。夫敦阜之氣平。陷下之氣升。陳腐之氣去。寧有不調之中乎。

升陽順氣湯

升麻

陳皮去白

柴胡

草豆蔻

當歸錢各一

黃耆四分

甘草

柏皮各五分

半夏薑製

人參各三分

神麴一錢五分

清氣在下。濁氣在上。令人胸膈飽脹。大便澹泄者。此方主之。○上件病由於飲食傷其脾氣。不能升清降濁故耳。是方也。升柴辛溫升其清。清升則陽氣順矣。

柏皮苦寒降其濁。濁降則陰氣順矣。人參、黃耆、當歸、甘草補其虛。補虛則正氣順矣。半夏、陳皮利其膈。膈利則痰氣順矣。豆蔻、神麴消其食。食消則穀氣順矣。故曰升陽順氣。

升陽益胃湯

羌活

獨活

防風

柴胡

白朮

茯苓

澤瀉

黃耆

人參

半夏

陳皮

黃連

甘草

白芍藥

濕淫於內。體重節痛。口乾無味。大便不調。小便頻數。飲食不消。灑淅惡寒。面色不樂者。此方主之。○濕淫於內者。脾土虛弱不能制濕。而濕內生也。濕流百節。故令體重節痛。脾胃虛衰不能運化精微。故令口乾亡味。中氣既弱則傳化失宜。故令大便不調。小便頻數。而飲食不消也。灑淅惡寒者。濕邪勝也。濕為陰邪。故令惡寒。面色不樂者。陽氣不伸也。是方也。半夏、白朮能燥濕。茯苓、澤瀉能滲濕。羌活、獨活、防風、柴胡能升舉清陽之氣。而搜百節之濕。黃連苦而燥。可用之。

以療濕熱。陳皮辛而溫。可用之以平胃氣。乃人參、黃耆、甘草。用之以益胃。而白芍藥之酸收。用之以和榮氣。而協羌防、柴、獨、辛散之性耳。仲景於桂枝湯中用芍藥。亦是和榮之意。古人用辛散。必用酸收。所以防其峻厲。猶兵家之節制也。

伏龍肝

伏龍肝者。竈中之土也。土性可以益脾。久於薪火。可以溫中。脾胃虛弱者。藥內宜加入之。

傷食門第二十九

敘曰。食以養生。夫人之所急也。食以傷生。夫人之所失也。炎帝教民耒耜。為養生也。既而品嘗百藥。懼傷生也。養生之中。而有傷生之患。此君子所以慎口體之奉也。今考方藥十九首。衛生者其小補哉。

升陽順氣湯

升麻

柴胡

當歸

草豆蔻

陳皮各一錢

黃耆四錢

半夏

人參各三錢

保和丸

甘草炙 柏皮炒各五分 神麴錢炒各一分
食飲胸膈飽脹。大便溏泄者。此方主之。○內經曰。清氣在下。則生飧泄。濁氣在上。則生腹脹。此由飲食傷脾。不能運化。失其升降。濁之令故耳。是方也。用升麻、柴胡以升其清陽之氣。用柏皮以降其濁陰之膜。用半夏、陳皮以利其膈。用豆蔻、神麴以消其食。用人參、黃耆、當歸、甘草以益其脾。如此則清氣升。濁氣降。滯氣利。食氣磨。而脾胃之氣復其常矣。

山查肉二兩

神麴

半夏

茯苓各一兩

蘿蔔子

陳皮

連翹錢各五

飲食內傷。令人惡食者。此丸主之。○傷於飲食。故令惡食。諸方以厲藥攻之。是傷而復傷也。是方藥味平良。補劑之例也。故曰保和。山查甘而酸。酸勝甘。故能去肥甘之積。神麴甘而腐。腐勝焦。故能化炮炙之膩。蘿蔔子辛而苦。苦下氣。故能化麵物之滯。陳皮辛而香。香勝腐。故能消陳腐之氣。連翹辛而苦。苦瀉火。故能去積滯之熱。半夏辛而燥。燥勝濕。故能消水穀之氣。茯苓甘而淡。淡能滲。故能

利濕傷之滯。

枳朮丸

白朮二兩

枳實一兩

荷葉包陳米飯。煨乾爲末糊丸。

健脾消痞。此方主之。○一消一補調養之方也。故用白朮以補脾。枳實以消痞。燒飯取其香以益胃。荷葉取其仰以象震。象震者欲其升生甲膽之少陽也。此易老一時之方。來東垣末年之悟。孰謂立方之旨易聞耶。

枳實導滯丸

白朮土炒

茯苓去皮

黃芩酒炒

黃連三錢

澤瀉二錢

大黃一兩

枳實一兩

神麴錢各五

傷濕熱之物。不得消化。而作痞滿者。此方主之。○濕熱之物。酒麴之類也。燥以制濕。淡以滲濕。故用白朮。茯苓。澤瀉。苦以下熱。寒以勝熱。故用芩。連。枳實。大黃。盒造變化者。可以推陳而致新。故用神麴。

紅丸子

三稜醋煮

黃

陳皮去白

青皮各五兩

乾薑炮

胡椒各二兩

共為末。醋糊為丸。如梧桐子大。礬紅為衣。每服三十丸。

傷寒冷之物。腹痛成積者。此方主之。○三稜。莪朮。攻堅藥也。故可以去積。乾薑。胡椒。辛熱物也。故可以去寒。青皮。陳皮。快氣藥也。故可以去痛。而必以醋糊為丸者。經曰。酸勝甘。故用之以療肥甘之滯。必以礬紅為衣者。取其鹹能軟堅。枯能着癖也。

附子理中湯

附子去皮

乾薑炮

人參去蘆

白朮炒

甘草炙

口食冷物。客寒犯胃。中焦痛甚。脈沉遲者。急以此方主之。○凡吞冰飲泉。及一切冷物。食之過其分量。則寒氣凝於中焦。故令肚腹大痛。脈來沉者為裏。遲者為寒。是方也。乾薑。附子之辛熱。所以溫中散寒。人參。白朮。甘草之甘溫。所以益胃於被傷之後也。

葛花解醒湯

葛花

砂仁

白豆蔻

木香

陳皮去白

人參

茯苓各五分

神麴炒

白朮炒

乾生薑

青皮去穢

澤瀉各一分

酒食內傷者。此方主之。○葛花之寒。能解中酒之毒。茯苓澤瀉之淡。能利中酒之濕。砂仁豆蔻木香青皮陳皮之辛。能行酒食之滯。生薑所以開胃止嘔。神麴所以消磨炙膩。而人參白朮之甘。所以益被傷之胃爾。

備急丸

大黃

巴豆去膜油

乾薑各等分

共為末作丸。每服六分。以利為度。

飲食自倍。冷熱不調。腹中急痛欲死者。急以此方主之。○脾胃以飲食而養。亦以飲食而傷。故飲食自倍。填塞至陰。上焦不行。下脘不通。則令人腹痛欲死。經曰。升降息。則氣立孤危是也。以平藥與之。性緩無益於治。故用大黃巴豆奪門之將軍以主之。佐以乾薑。則其性益速而效益捷矣。

鹽湯吐法

燒鹽四合

溫湯二升

和勻飲之。以指探吐。

飲食自倍。胸膈飽脹。宜以此法吐之。○經曰。陰之所生。本在五味。陰之五宮。傷在五味。故飲食過之。則胸膈飽脹者。勢也。與其脹而傷生。孰若吐而去疾。故用鹽湯之鹹。以裏堅。復使探喉。以令吐。

杏仁

廚家造索粉。杏仁近之即爛。今後凡遇粉傷者。宜加焉。此惟醫餘誌之。諸書皆未道也。

糯米

客有貨瓜果者。一遇糯米。無不化爛。今後凡遇傷於瓜果者。宜入之。

醇酒

內則誌。八珍以養老。取牛肉必新殺者。絕其理而薄切之。湛諸美酒。期朝而食之。則酒之善於爛牛味也。可知矣。今後凡遇傷於牛味者。宜使飲之。

橄欖

舟人以橄欖木爲檣。凡魚觸之。無有不死。又嘗以橄欖木爲卓。以魚骨置之。少時柔軟。今後凡遇食魚而傷者。及噎魚骨者。皆宜用之。

白麴

糯米一石。得白麴一斤。皆釀爲酒。今後凡遇傷於粽糰者。宜用之。

芽茶

凡造飯成團。以芽茶沃之。粒粒散解。今後凡遇傷於百穀者。宜入之。

山查

卽棠子

客有烹猪首者。或告之曰。是草猪母彘之首也。皮厚而不易烹。能多入山查。則易烹矣。試之果然。今後但遇傷於肉味者。只此足矣。

淡豆豉

凡食煎炙麵食。肥甘椒辣等物。令人焦煩消渴者。宜以淡豆豉一物煎湯主之。蓋萬物歸於腐。又曰腐_其焦。淡豉原經盒造。而質已腐。則能腐化諸味矣。故稱其_其。

麝香

凡花果草木。一觸麝香。無不萎落。今後凡遇傷於果實蔬菜者宜主之。

枳椇子

俗呼雞距子

門外植枳椇木者。門內造酒。必不熟。屋內有此木作柱亦然。故曰。枳椇解酒。過於葛花。今後凡遇傷酒中酒者宜用之。

吞酸門第二十二

敘曰。吞酸。小疾也。可暫而不可久。或以疾小而忽之。此不知其為翻胃之漸也。語曰。毫末不斷。將尋斧柯。是故慎之。今考古方四首。蓋曰防微杜漸云爾。

茱連丸

黃

連酒一兩炒

黃

芩酒炒

吳茱萸

黃少時

陳

皮各五錢

蒼

朮七錢五分

胃中濕熱。抑遏肝火。令人吞酸者。此方主之。○濕鬱則熱。熱鬱則酸。故夏月飲食之類。以物覆冒之。其味必酸。曰肝火者。洪範曰。木曰曲直。曲直作酸。故貴之。

肝。是方也。連、芩治熱。熱去則不吐酸。蒼朮燥濕。濕除則不生熱。陳皮理氣。氣行則濕不鬱。吳茱萸辛熱而氣燥。辛熱可使就燥。氣燥可使就肝。故能引連、芩入肝而瀉肝火。此從治之義也。他如火門左金丸亦良。

加味平胃散

蒼朮七晝夜

陳皮去白

厚朴薑汁炒

甘草炙

神麴炒

麥芽

宿食不化。吞酸呃臭。右關脈滑。此方主之。○食經宿而不化。有熱則令人吞酸。無熱則但呃臭而已。右關主脾胃。脈滑主停食。治此者。宜寬中下氣。健脾消食。辛者可寬中。故用蒼朮、陳皮。苦者可下氣。故用厚朴。甘者可健脾。故用甘草。益造變化者能消食。故用神麴、麥芽。

火鬱越鞠丸

山梔炒黑

青黛飛

香附童便浸

撫芎

神麴炒

蒼朮米泔浸

七情拂鬱。吞酸。小便赤脈來沉數者。此方主之。○一念動處便是火。故七情拂

鬱。皆能令人內熱吞酸。小便赤爲火。脈沉爲鬱。數爲熱。是方也。山梔、青黛之苦寒。可以導熱。香附、蒼朮、撫芎之辛芳。可使解鬱。神麴之陳腐。可使推陳而致新。茱萸六一散

滑石六兩

甘草一兩

吳茱萸一兩炮過

此亦治濕熱吞酸之方也。○滑石寒而淡。寒能勝熱。淡能導利。故足以治濕熱。吳茱萸味辛性熱。能反佐以從治。甘草性溫氣平。能和中而瀉火。

痞門第三十一

敘曰。痞。虛中之實也。許學士云。邪之所湊。其氣必虛。留而不去。其病則實。故治痞者。一補一消。考方二首。表昔人之法爾。

枳實消痞丸

枳實麸炒

黃連五錢各

厚朴四錢薑炒

半夏麴

人參

白朮各三錢

乾生薑

甘草

茯苓

麥芽各二錢

心下虛痞。惡食懶倦。右關脈弦者。此方主之。○痞與否同。不通泰也。易曰。天地不交而成否。故肺氣不降。脾氣不運。升降不通。而名痞也。脾為邪氣乘之。不足以勝穀。故令惡食。脾者卑藏。役氣於四肢。而後肢體強健。脾病則不能致氣於肢體。故令懶倦。弦。肝脈也。木來乘土。故令右關脈弦。是方也。枳實。黃連。厚朴之苦。可以下氣。半夏。麴乾。生薑之辛。可以行滯。人參。甘草。白朮。茯苓之甘。可使健脾。麥蘖善消。則可以推陳而致新矣。是疾也。功在慎口。經曰。陰之五官。傷在五味。奈何不慎乎。

木香化滯湯

木香

生薑

陳皮各六分

柴胡七分

當歸梢

枳實各四分

半夏一錢五分

紅花二分

草豆蔻

炙甘草各二錢

憂氣鬱結。腹皮裏微痛。心下痞滿。不思飲食。此方主之。○上件病證。即六朝之醫所謂氣膈也。今人謂之氣痞耳。經曰。脾主行氣於三陰。三陰之脈皆行腹裏。今憂氣鬱結。營衛之行滯。故令腹皮裏微痛。心下痞滿者。升降之道乖也。不思

飲食者。憂氣傷脾也。辛香可以化氣。故用木香、豆蔻、生薑、陳皮、半夏之輩以主之。升降者。交泰之道也。故用柴胡之辛以升之。枳實之苦以降之。營衛滯而後腹皮痛。故用歸尾、紅花以和營。炙甘草以和衛。

治男婦痞塊方

白 鴿毛一對不落水去

急性子炒

藜花子水炒

大 黃晒

朴 硝各五錢

只爲細末。入鴿腹札緊。砂鍋陳酒煮熟。待冷取出藥。將鴿肉風晒半日。打碎炙炒。不宜焦枯。同前藥磨細末篩淨。將糯米粉掬爲丸。桐子大。空心服五錢。其塊化爲膿血。爲魚凍。爲粘膠。從大便出。潛消默化。妙難盡述。

饋雜門第三十二

敘曰。饋雜。火證也。而痰次之。終歲饋雜者。必夭。天年。此胡云哉。燠萬物者莫若火也。故考三方以療饋雜。

痰火越鞠丸

海石研水飛

南星牛膽者

瓜蒌仁去油

山梔炒黑

青黛水飛過

香附童便浸

蒼朮酒浸七日

撫芎

痰因火動。令人鱗雜。此方主之。○鱗雜者。痰火內動。如粗食在膈。令人不自安也。是方也。海石之鹹。可以軟頑痰。南星之燥。可以枯濕痰。瓜蒌之苦。可以下逆痰。山梔、青黛、苦寒之品也。所以瀉火。香附、撫芎、蒼朮、辛香之品也。所以發越鞠鬱。

加味三補丸

黃芩

黃連

黃柏

香附醋浸五日

蒼朮酒浸七日

鬱火鱗雜。此方亦良。○辛香能開鬱。故用香附、蒼朮。苦寒能瀉火。故用黃芩、黃連、黃柏。然三黃之寒。得蒼附而不滯。蒼附之香。得三黃而不燥。其互以成功。又如此。

二陳加黃連梔子湯

半夏

陳皮

茯苓去皮

甘草炙

黃連

梔子

此治饋雜之湯液也。○痰之生也。本於濕。故用半夏燥濕。茯苓滲濕。濕去則痰不生。甘草能健脾。脾健則能制濕。陳皮能利氣。氣行則痰亦行。黃連梔子之加。取其寒能勝熱。苦能降火爾。

鬱門第二十二

敘曰。天地以升生。而萬物發陳。故氣血以四布。而百體敷榮。一有拂鬱。則象天地之閉藏矣。是豈升生之道乎。此諸病之所以生也。今考名方六首。而鬱之情狀見矣。

越鞠丸

香

附醋炒

蒼

朮米泔

撫芎

梔

子炒黑

神

麴分等

水丸小豆大。每服百丸。

諸鬱者。此方主之。○越鞠者。發越鞠鬱之謂也。香附理氣鬱。蒼朮開濕鬱。撫芎

調血鬱。梔子治火鬱。神麴療食鬱。此以理氣爲主。乃不易之品也。若主濕鬱。加白芷、茯苓。主熱鬱。加青黛。主痰鬱。加南星、海石、瓜蒌。主血鬱。加桃仁、紅花。主食鬱。加山查、砂仁。此因病而變通也。如春加防風。夏加苦參。秋冬加吳茱萸。乃經所謂升降浮沉則順之。寒熱溫涼則逆之耳。

貝母

詩曰。陟彼阿丘。言采其虻。朱子曰。盲。貝母也。採之以療鬱結之疾。故療鬱結者每加之。

鹽湯探吐法

燒鹽三兩

溫湯二升

和服探吐。

木鬱。兩脅大痛。脈代者。此方主之。○木。肝木也。有垂枝布葉之象。喜條達而惡抑鬱。若膈間有停痰宿食。抑其肝氣。不得上達。則肝木自實。兩脅大痛。脈來代者。痛盛而脈止也。得吐則生。不吐則死。故主鹽湯探吐。鹽取潤下。吐取肝木之宣暢而已。經曰。木鬱則達之。此之謂也。

火鬱湯

羌活

葛根

升麻

芍藥

人參各七分

柴胡

生甘草各三分

防風五分

葱白五莖

火鬱者。內熱外寒。脈沉而數。此方主之。○火、心火也。稟炎上之體。喜暢而惡鬱。鬱之則火無焰。故令身寒。脈沉為在裏。沉而數為裏熱。是方也。羌活、防風、升麻、柴胡、乾葛、葱白皆辛溫升舉之藥。故足以揚無焰之火。而令炎炎。若芍藥、人參、甘草者。乃所以和營衛於升發之餘爾。經曰。火鬱則發之。此之謂也。

大承氣湯

大黃

芒硝

厚朴

枳實

土鬱者。痞滿燥實堅全俱。脈來有力而實。此方主之。○土、脾胃土也。為倉廩之官。無物不受。喜傳化而惡停滯。若裏邪作實。則令人痞滿燥實堅全俱。脈來實者為裏實。是方也。厚朴苦溫以去痞。枳實苦寒以瀉滿。芒硝鹹寒以潤燥。軟堅。大黃苦寒以瀉實去熱。經曰。土鬱則奪之。此之謂也。

麻黃葛根湯

麻黃 去節

赤芍藥 各三錢

葛根 五錢

淡豆豉 半合

金鬱者喘滿脈浮。此方主之。○金、肺金也。爲清虛之藏。皮毛之合。喜清虛而惡壅塞。塞之則氣自實。令人喘滿。肺主皮毛。故令脈浮。是方也。麻黃、乾葛之輕。可以去實。淡豆豉之腐。可以推陳。赤芍藥之酸。可以瀉壅。經曰。金鬱則泄之。此之謂也。

大補丸

黃柏一味。炒褐色作丸。

水鬱者。腰股痛。足下熱。此方主之。○水、腎也。水鬱者。腎部有鬱火也。腰者。腎之府。故令腰痛。腎脈斜走足心。上股內後廉。故股內亦痛。而足心熱。黃柏苦而潤。潤能益水。苦能降下。經曰。水鬱則折之。此之謂也。

五疸門第三十四

敍曰。疸、黃疾也。初學易談之。此未遇盤根錯節耳。以故芒利不若干將。鮮有不

斷其鋒者。今卽名人之方十三首而考之。疸證之難易。概可見矣。

丹溪治黃疸方

黃 芩 炒

黃 連 炒

梔 子 炒 黑

茵 陳

猪 苓

澤 瀉

蒼 朮 製

青 皮 炒去穢

草龍膽各五分

穀疸加三稜、莪朮、縮砂、陳皮、神麴。

丹溪云。疸證不必分五。同是濕熱。故以此方主之。○疸病黃之名也。五疸者。黃汗、黃疸、酒疸、穀疸、女勞疸也。疸分五證。始於仲景之金匱要略。此先聖示人以博也。不必分五。同是濕熱。此後賢示人以略也。是方也。芩連梔子龍膽之苦。所以去熱。猪苓澤瀉之淡。所以去濕。茵陳蒿氣微寒而味苦平。爲陰中之陽。則兼濕熱而治者也。故爲黃家君主之藥。蒼朮所以燥濕。青皮所以破滯。而穀疸諸品之加。乃推陳致新之意也。雖然。丹溪翁之言。不能無弊。使後之學者宗其言。至於舉一而廢百。宜乎視仲景之堂。若登天也。故古方治疸有吐者。有汗者。有下者。有寒者。有溫者。有潤者。有燥者。有寒堅者。有消導者。有逐血者。今日不必

分五。則仲景之門猶不入。奈何而窺百家之奧乎。

瓜蒂散

瓜蒂

赤小豆

淡豆豉各五

疸證腹滿欲吐。鼻燥脈浮者。宜以此方吐之。酒疸欲吐者同。○腹滿欲吐。邪在上也。鼻燥者。邪在氣分也。脈浮者。邪未盡入於裏也。吐中有發散之義。故吐於浮脈正宜。瓜蒂苦而善湧。赤小豆平而解熱。淡豆豉腐而勝燥。此古人之宣劑也。如頭額兩太陽痛者。令病人嚙水一口。以瓜蒂散一字吹入鼻中。泄出黃水而愈。

桂枝加黃耆湯

桂枝

芍藥

生薑各三

甘草

黃耆各二

大棗十一

黃汗。身體疼重。發熱。兩脛自冷。此方主之。○黃汗者。汗出皆黃。沾衣有色也。得之汗出時。入水取浴。水從汗孔入。濕鬱於表。故病黃。邪傷其衛。故自汗。濕熱相搏。故身體疼重而發熱。病原寒水所傷。寒氣屬陰。水性就下。故兩脛自冷。客者

除之。故用桂枝之辛甘以解肌表之邪。泄者收之。故用芍藥之酸寒以斂榮中之液。虛以受邪。故用黃耆之甘溫以實在表之氣。辛甘發散為陽。故生薑甘草可以為桂枝之佐。乃大棗者和脾益胃之物也。

茵陳五苓散

茵陳

猪苓

茯苓

澤瀉

白朮等分

桂少許

發黃小便不利者。此方主之。○熱病小便不利。濕熱內蓄。勢必發黃。茵陳黃家神良之品也。故諸方多用之。猪苓澤瀉茯苓白朮味平而淡。故可以導利小水。官桂之加。取有辛熱能引諸藥直達熱邪蓄結之處。經曰。甚者從治。此之謂也。

茵陳茯苓湯

茵陳二錢

茯苓

猪苓

桂枝各一錢

滑石五錢

發黃小便澀。煩燥而渴者。此方主之。○實熱在內。其熱不得泄越。故發黃。小便澀者。熱之所注也。煩燥者。熱犯上焦清陽之分也。渴者。邪熱蒸灼。不能生液潤。

喉也是方也。茵陳主黃疸。佐以茯苓、猪苓則利水。佐以滑石則利熱。佐以桂枝則同氣相求。直達熱邪之巢穴。內熱既去。則津液自生。氣自化。小便自利。煩渴自除。身黃自愈矣。

茵陳梔子大黃湯

茵陳一兩

梔子三枚

大黃三錢五分

發黃。小便赤澀。大便秘結。此方主之。○茵陳苦寒。能利黃疸。梔子瀉火。屈曲而下。能療小便之赤澀。大黃能攻大便秘結。此衆人之所共知。大小既利。則濕熱兩泄。而黃自除矣。

梔子柏皮湯

梔子十五枚

黃柏二兩

甘草一兩

發黃。身熱不止。大小便利者。此方主之。○發黃身熱不止者。陽邪未去也。大便利。故不用大黃。小便利。故不用五苓。但以梔子、柏皮之苦勝其熱。甘草之甘緩其勢。則治法畢矣。

枳實梔子豆豉大黃湯

枳實五枚

梔子十四

大黃一兩

豆豉一升

發黃身熱腹痛。有關脈滑者。名曰穀疸。此方主之。酒疸同。○發黃身熱。少火鬱也。腹痛。右關脈滑。水穀積也。故用枳實、大黃攻其水穀之積。梔子、豆豉解其少火之鬱。又曰。梔子、豆豉。仲景嘗用之以吐懊憹。枳實、大黃。仲景嘗用之以下胃實。故酒疸欲吐。穀疸腹痛。此方皆主之。

茵陳四逆湯

茵陳二兩

附子一枚

乾薑半兩

炙甘草一兩

發黃。脈沉而遲。肢體冷逆。腰以上自汗者。此方冷服。○此陰證發黃也。陰寒盛於下。則戴陽於上。故上體見陽證。下體見陰證。陰盛於下。故見陰脈之沉遲。兼陰證之四逆。陽戴於上。故見陽證之發黃。上體之自汗也。茵陳。治黃之要藥。故無分於寒熱而用之。附子、乾薑、炙甘草。回陽之要品也。故有陰寒即用之。然必冷服者。恐薑附發於上焦陽盛之區。而下部陰寒之分反不及也。是方也。韓祇和李思訓、朱奉議咸用之矣。使據丹溪翁不必分五。同是濕熱之言。而執其方以療之。則藥與證不相反耶。韓李事見湯液本草。朱奉議見活人書。

消石礬石散

消石

礬石

石

麋等分

二共爲末。大麥粥湯和服方寸匕。日三。

仲景金匱要略云。黃家曰。晡所發熱。而反惡寒。此爲女勞疸。得之膀胱急。小腹滿。額上黑。足下熱。因作黑疸。其腹脹如水狀。大便必黑。時溏。此女勞之病。非水也。腹滿者難治。此方主之。○陽邪傳至於胃。熱無以越。土色自見而發黃。則日晡所必發熱。所以然者。土位旺於日晡故也。今反惡寒。則知其以女勞虛之矣。女勞虛者。責之腎。膀胱者。腎之府。前陰者。腎之竅。腎虛而陽邪襲之。故令膀胱急。小腹滿。黑者。北方腎水之色。額上黑者。腎病而色自見也。足下熱者。腎脈起於湧泉。腎水一虛。則相火湊之。故足下熱也。因作黑疸者。陽邪盡陷於腎。而腎色盡顯於外也。腹脹者。腎脈行於腹裏。邪氣居之。故令脹如水狀。實非水也。若是水病。則大便澄澈而濡瀉。今是腎病。故大便必黑。而時溏。蓋腎主二便。病故黑溏而失其常也。此可以辨其爲女勞之病。而非水矣。腹滿難治者。腹滿與腹脹不同。腹脹是腎脈行於腹。故令脹於外。腹滿是脾胃受邪。不能健運而滿於

中也。脾胃屬土。能尅腎水。故曰難治。消石、礬石。鹹寒者也。鹹能入腎。寒能勝熱。故以二物主之。和以大麥粥湯者。恐二物之損胃也。嗚呼。仲景公說證立方。精良曲當。大都如此。譬之選將練兵。知人善任。則萬舉萬當。罔不奏功。彼用方不合證者。譬則出師無名。用藥不知性者。譬則將不知兵。其不喪師辱國者鮮矣。惡乎建功。

抵當丸

水蛭三十枚 蟅蟲三十枚 桃仁二十枚 大黃三兩
畜血發黃者。此方主之。○陽邪瘀熱在裏。少腹鞭滿。小便自利而發黃者。爲畜血發黃。苦走血。鹹寒堅。故用水蛭、蟅蟲以逐敗血。滑利腸。寒下熱。故用桃仁、大黃以下血熱。他如傷寒門桃仁承氣湯亦可酌用。

大溫中丸

陳皮 <small>去白</small>	厚朴 <small>薑汁炒</small>	三稜 <small>醋炒</small>	蒼朮 <small>酒浸</small>
莢 <small>醋炒</small>	青皮 <small>各五</small>	甘草 <small>炙一兩</small>	香附 <small>醋炒</small>
鍼砂 <small>二兩</small>	紅七 <small>次</small>		

忌犬肉、果菜。

此調理穀疸、酒疸之方也。○方名溫中者，主療濕鬱於中之義也。水穀酒食，無非濕化，傳化得宜，則治。一或積於中宮，則遏少火，熱而病黃矣。故用蒼朮、香附、陳皮、青皮、厚朴，以平胃中之敦阜而利其氣。氣利則水穀不滯，用三稜、莪朮以削堅。削堅則積滯漸除，用鍼砂者，一借其兌金之令，以伐土中之木邪。一用其清肅之氣，以除少火之蒸熱也。甘草之用，和中而協諸藥爾。

棗礬丸

綠礬半斤火通紅 棗

肉皮二斤煮去平胃散 爲衣

每服三十丸，薑湯下。

穀疸身目俱黃，此方亦良。○水穀癖積於中，抑遏肝腎之火，久久鬱熱，故身目俱黃。是方也。綠礬鹹寒，能爽痰癖而勝濕熱。棗肉甘溫，能益脾胃而補中宮。平胃散者，蒼朮、厚朴、陳皮、甘草也。蒼朮、厚朴，所以平胃家敦阜之氣而除積飲。陳皮、甘草，一以利氣，一以和中，乃調胃之意也。

消渴門第二十五

絃曰。消渴。無水也。易義曰。火炎則水乾。故消渴。責之無水。然證有三焦之判。病有虛實之分。常變不同。治療亦異。方藥十二考。示人以一得耳。

丹溪消渴方

黃連末

括蕁根末

人乳汁

藕汁

生芩汁

古稱三消。上消者。令人消渴。此方主之。○氣厥論曰。心移熱於肺。傳為膈消。夫心火也。肺金也。金得火而燥。故令膈消。燥者潤之。故用括蕁人汁藕汁生芩火原於心。故瀉以黃連。此言可治者爾。又曰。飲一溲二者死不治。得非以火來賊金之故乎。若時熱者。主暑門人參白虎湯。

調胃承氣湯

大黃四錢

芒硝五錢

甘草二錢

中消者。善食而溲。此方主之。○經曰。瘴成為消中。瘴者。熱也。消中者。善食而溲也。大黃苦寒。可以攻熱。芒硝鹹寒。可以潤燥。甘草甘平。可以調中。

大黃甘草飲子

大黃一兩

甘草四兩

大豆五升先煮二三沸去苦水再煮

三物用井花水一桶煮熟冷服無時。

此治中上二焦消渴之方也。○大黃能去胃中實熱。甘草能緩燥急之勢。大豆能解諸家熱毒而必冷服者。寒因熱用也。

六味地黃丸

熟地黃八兩

山茱萸

山藥各四兩

白茯苓

牡丹皮

澤瀉各三兩

下消者煩渴引飲小便如膏此方主之。○先有消渴善飲而後小便如膏者名曰下消。懼其燥熱漸深將無水矣。故用此方以救腎水。熟地山茱萸質潤味厚為陰中之陰。故可以滋少陰之腎水。丹皮澤瀉取其鹹寒能制陽光。山藥茯苓取其甘淡能療膏濁。

八味丸

熟地黃八兩

山茱萸肉

山藥各四兩

白茯苓

牡丹皮

澤瀉各三兩

肉桂炮

附子炮去皮臍各一兩

渴而未消者。此方主之。○此即前方六味地黄丸加附子、肉桂也。渴而未消。謂其人多渴。喜得茶飲。不若消渴之求飲無厭也。此爲心腎不交。水不足以濟火。故令亡液口乾。乃是陰無陽而不升。陽無陰而不降。水下火上。不相既濟耳。故用肉桂、附子之辛熱壯其少火。用六味、地黄丸益其真陰。真陰益則陽可降。少火壯則陰自升。故竈底加薪。枯籠蒸溽。槁禾得雨。生意維新。惟明者知之。昧者鮮不以爲迂也。昔漢武帝病渴。張仲景爲處此方。至聖玄關。今猶可想。

朽木湯

取朽木方寸者三十枚。煎湯飲之。得水土中者良。

此消渴之良方也。○經曰。熱中消中。富貴人。蓋以消渴之病。貴之肥甘。炮炙嗜酒。耽辛之所致也。非富貴人何以得之。朽木年深而質腐。腐者水之氣。水足以制火。故腐足以勝焦。熱中消中。皆焦證也。故此物主之。

葛花葛根

傷酒消渴。宜主葛花。以其善解酒毒故耳。或用葛根。其功不相上下也。

淡豆豉

喜食肥甘焦炙。令人消渴者。此物宜用。蓋以豆豉由於盒造。味苦而氣腐。苦能勝熱。腐能勝焦。故耳。

烏梅

前有梅林。聞者生液。故胃乾暴渴者宜用之。所謂酸能致液也。

香薷

夏月消渴者。多是暑邪入於心包絡。宜以香薷君之。

北梨甘蔗

富貴之人。飲酒必多。置酢醬海味。酒能灼人真陰。鹹能喪人真液。故每每病致消渴。然酒以釀而濃。以水而淡。鹹以燥而堅。以濕而化。故食北梨、甘蔗可以解酒。亦可以解鹹。冬月宜煮而啖之。

人參

凡汗吐下後渴者。皆胃液不足。宜以人參補之。蓋氣能蒸溽故耳。

水腫門第三十六

敘曰。水由地中行。順道也。懷山襄陵。逆道也。治之者行其所無事。則智大矣。故治水腫者。亦因其勢而利導之。宜汗。宜下。宜滲。宜清。宜燥。而藥惟宜焉。則醫之大智也。考方八首。而治水之大可知矣。

九味羌活湯

羌活

防風

蒼朮

細辛

川芎

白芷

生苧

黃芩

甘草

水病。腰以上腫者。此方微汗之。即愈。○腰以上皆腫。謂頭面俱病也。內經曰。上盛爲風。下盛爲濕。故腰以上皆腫。必兼風治。蓋無風則濕不能自上。於高巔清陽之分也。是方也。羌活。防風。蒼朮。細辛。川芎。白芷。皆辛甘之品。可以疏風。亦可以除熱。所謂辛藥能疏風。風藥能勝濕也。風濕相搏。必有內熱。故用生苧。黃芩之涼。而甘草者。所以調和營衛。使其相協而無相爭也。

加味五皮飲

五加皮

地骨皮

生薑皮

大腹皮

茯苓皮

薑黃

木瓜

水病。腰以下腫者。此方主之。○腰以下腫者。水性就下之象也。藥之爲道。辛者輕者可使走表。枯者淡者可使滲利。苦者寒者可使去熱。味質厚重者可使走下。是方七味。或各一其性。或兼而有之。故可以滲利皮膚中之水。而調其氣血也。

疏鑿飲子

羌活

秦艽

商陸

檳榔

澤瀉

木通

大腹皮

茯苓皮

赤小豆

椒目等分

遍身水腫。喘呼氣急。煩渴。大小便不利者。此方主之。○遍身水腫。則外而肌膚。無一而不病矣。喘呼氣急。煩渴。大小不利。則內而三焦。無一而不病矣。是方也。羌活、秦艽。疏表之藥也。水邪之在表者。得之由汗而泄。澤瀉、木通、腹皮、苓皮。滲利之藥也。水邪之在裏者。得之由溺而泄。商陸、檳榔。攻水之藥也。水邪之壅塞者。得之由後而泄。赤小豆、椒目。燥濕之品也。水氣之蒸溽者。得之以煖而竭。隨

在而分其勢。病其不衰去乎。

大橘皮湯

陳皮半錢

木香二分

滑石六錢

檳榔三分

猪苓去皮

白朮炒

澤瀉

肉桂炒各

茯苓去皮

甘草二分

濕熱內攻。腹脹。小便不利。大便滑泄。此方主之。○濕熱內攻。故令腹脹。小便不利。故令大便滑泄。陳皮、木香、檳榔、行氣藥也。氣行則濕行。滑石、甘草、暑門之六一散也。用之。所以治濕熱。茯苓、猪苓、澤瀉、白朮、肉桂、傷寒門之五苓散也。用之。所以利水道。二方各有正考。

嚴氏實脾散

厚朴薑汁炒

白朮

附子

大腹子

白茯苓

草果仁

木香

木瓜

乾薑炮各一兩

炙甘草半兩

水氣。肢體浮腫。口不渴。大便不秘。小便不澀者。陰水也。此方主之。○脾胃虛寒。

不能制水。則水妄行。故肢體浮腫。以無鬱熱。故口不渴而大小皆利。是方也。用白朮、茯苓、甘草之甘溫者補其虛。用乾薑、附子之辛熱者溫其寒。用木香、草果之辛溫者行其滯。用厚朴、腹子之下氣者攻其邪。用木瓜之酸溫者抑其所不勝。名曰實脾散者。實土以防水也。雖其藥味不皆實土。然能去其邪。乃所以使脾氣之自實也。

舟車丸

牽牛炒四兩

大黃酒浸二兩

甘遂麵裹煨

大戟麵煨

芫花炒

青皮炒

陳皮去白各一兩

木香五錢

水腫證。病氣形氣皆實者。此方主之。○通可以去塞。牽牛、大黃、甘遂、芫花、大戟。皆通劑之厲者也。辛可以行滯。陳皮、青皮、木香。皆行滯之要藥也。此方能下十二經之水。下咽之後。上下左右無所不至。故曰舟車。

千金苦瓠圓

取苦瓠白穰。實捻如大豆。以麵裹煮一沸。空腹吞七枚。至午當出水一升。如此三四日。水自出不止。大瘦乃瘥。三年內慎口味。苦瓠須好。無厭翳細理者。

不爾。有毒。不堪用。

大水。頭面偏身腫脹者。此方主之。石水者。亦主之。○經曰。苦能湧泄。故用之在上。則令人湧。用之在下。則令人泄。今以熟麵裹之。空腹而吞。蓋用之於下也。宜乎水自泄矣。石水者。四肢皆瘦。惟有少腹堅韌如石。腫脹而便不利也。

麥門冬飲

麥門冬

五十枚去心薑炒

糧

米

五十粒

水出高源者。此方主之。○肺非無爲也。主降下之令焉。凡人飲入於胃之時。脾氣散精。上歸於肺。肺熱失其降下之令。不能通調水道。下輸膀胱。漬於高源。淫於皮膚。則作水腫。諸醫罕明乎此。實土導水。皆不能愈。故用麥門冬清肺。以開其降下之源。糧米益脾。而培乎金之母氣。此治病必求其本也。或問此證何以辨之。余曰。肢體皆腫。少腹不急。初病便有喘滿。此其候也。

鼓脹門第三十七

敘曰。鼓脹是虛中之實。宜分氣血蟲食而治之。以朝寬暮急能食不能食而辨

之。實者可攻。虛者漸磨可也。例之相道焉。國內空虛。則宜惠養元元。惡能黷武。今考名方七首。示大法耳。或較形氣病氣。而攻補兼施。此在人之妙用。初不必泥也。

大安丸

山查肉二兩炒

白朮炒

神麴炒

半夏製

茯苓各一兩

陳皮去白

連翹

蘿蔔子生用各五錢

飲食傷脾。成鼓脹者。此方主之。○鼓脹者。腹皮虛大。鼓之堅急而有聲也。經曰。陰之五臟。傷在五味。故飲食過其分量。則傷脾。脾傷則不能運化。積其穀氣。虛大而鼓脹矣。然五味之變。酸勝甘。腐勝焦。苦勝熱。香勝腐。燥勝濕。淡勝飲。利勝滯。氣勝味。故用山查之酸。以消肥甘。用神麴之腐。以化焦炙。用連翹之苦。以磨積熱。用陳皮之香。以開腐穢。用半夏之燥。以勝土濕。用茯苓之淡。以利水飲。用蘿蔔子之利。以行食滯。用白朮之氣。以勝五味。五味能勝。則脾不傷。脾不傷。則中氣運行而無鼓脹矣。此大安之旨也。

導氣丸

青皮水蛭炒 莪朮蛇蟲炒 三稜乾漆炒 檳榔斑貓炒
 吳茱萸牽牛炒 乾薑礞砂炒 胡椒茴香炒 附子鹽炒
 赤芍藥川椒炒 石菖蒲桃仁炒
 上件同炒藥熟。去水蛭等不用。研末。酒糊爲丸。如梧桐子大。每服五丸至七丸。空心紫蘇湯下。
 諸腹脹大。痞塞不通。大便虛秘。此方主之。○青皮、莪朮、三稜、菖蒲。氣積藥也。炒以水蛭、蟲蟲、乾漆、桃仁。則逐敗血矣。乾薑、附子、胡椒、茱萸。溫中藥也。炒以礞砂、食鹽、茴香、牽牛。則軟堅而疏利矣。檳榔炒以斑貓。下氣者得破氣者而益悍。赤芍藥炒以川椒。瀉肝者得疏肝者而益利。製度之工如此。以之而治氣實有餘之證。斯其選矣。

大黃蠱蟲丸

大黃 <small>十兩</small>	黃芩 <small>二兩</small>	甘草 <small>三兩</small>	乾漆 <small>炒</small>
桃仁 <small>各一兩</small>	芍藥 <small>四兩</small>	杏仁 <small>去皮</small>	蟲蟲 <small>去翅</small>
蟬 <small>炒各一升</small>	蠱蟲 <small>半升</small>	水蛭 <small>炙百枚</small>	乾地黃 <small>半兩</small>

共爲末。蜜丸小豆大。日三服。每五丸。

腹脹有形塊。按之而痛不移。口不惡食。小便自利。大便黃色。面黃肌錯者。血證諦也。此丸與之。○腹脹有形塊。按之而痛移者。氣與火也。今痛不移。則屬有形矣。然食與血皆有形。食而腹脹則惡食。今不惡食。則知其爲血矣。小便自利者。血病而氣不病也。大便黑色者。病屬於陰也。面黃肌錯者。血病則不能榮養其容。濡澤其膚。故令萎黃甲錯耳。大黃攻下之品也。引以乾漆、蟲蟲、蟻蟻、水蛭、蠱蟲、桃仁之輩。則入血而攻血。芍藥、地黃生新血於去瘀之際。杏仁、甘草致新氣於逐敗之餘。而黃芩之苦。又所以厚腸堅胃而不爲攻下所傷耳。

雞矢醴散

大黃酒潤

桃仁去皮尖

雞屎白者酒炒等分

共爲末。每服三錢。薑湯下。

此方治血蠱良。○大黃苦寒。利於攻下。佐以桃仁。逐敗血也。佐以雞屎。殺蠱蟲也。腹中論曰。有病心腹滿。旦食則不能暮食。此爲何病。岐伯對曰。名爲鼓脹。黃帝曰。治之奈何。岐伯曰。治之以雞矢醴。一劑知。二劑已。王冰註曰。雞屎利小

便微寒。此註還未妥。

香棗丸

苦丁香一物爲末。熟棗肉作丸。梧子大。每三十丸。空心棗湯下。諸鼓脹內熱者。此方主之。○苦丁香。卽苦瓜蒂也。散用之則吐。丸用之則瀉。凡有形之邪無不出之。亦良方也。

大戟棗子

大戟連根葉

大棗一斗

二物同煮一時。去大戟不用。旋旋喫棗無時。服盡決效。

此攻水證鼓脹之方也。○大戟氣大寒而味苦甘。有小毒。能下十二經之水。大棗味甘。取其大補脾胃而不爲攻下所傷耳。服此方大忌甘草。以其與大戟相反故也。

六君子湯

人參

白朮

茯苓

半夏薑煮

陳皮

甘草

脾虛鼓脹。手足倦怠。短氣漉泄者。此方主之。○經曰。脾主行氣於三陰。三陰者。太陰脾。厥陰肝。少陰腎也。其脈皆行於腹裏。脾病則三陰之氣不行。故令鼓脹。手足倦怠者。四肢受氣於脾。脾病則無以受氣。故倦怠。短氣者。脾病而中氣弱也。漉泄者。土弱不能制濕也。是方也。人參、白朮、茯苓、甘草、甘溫益脾之物也。半夏、陳皮、快脾利氣之物也。然溫者益氣。甘者守中。下咽之後。必增脹滿。此勿疑之。經曰。塞因塞用。故用補劑以治脹滿。初服則脹。久服則通。此惟精達經旨者知之。庸醫未足道也。

小便不通門第三十八

絞曰。溲溺不通。匪細故也。期朝不通。便令人嘔。名曰關格。又曰不通而死矣。一見嘔證。便不可救。經曰。出入廢則神機化滅。升降息則氣立孤危。此之謂也。故考五方以通溲溺。

倒換散

大黃一兩

荊芥二兩

每服末二錢。

內熱小便不通者。此方主之。○內熱而小便不通者。鬱其少火。而氣不化也。內經曰。膀胱者。州都之官。津液藏焉。氣化則能出矣。然化氣之道。莫妙於升降。天地以升而降。化萬物。奈何而昧於人乎。故用荊芥之輕清者。以升其陽。用大黃之重濁者。以降其陰。清陽既出上竅。則濁陰自歸下竅。而小便隨泄矣。方名倒換者。小便不通。倍用荊芥。大便不通。倍用大黃。顛倒而用。故曰倒換。

八正散加木香湯

車前子

蘆麥

扁蓄

滑石

山梔子炒黑

甘草梢

木通

大黃

木香

濕熱下注。少腹急。小便不通者。此方主之。○濕熱下注。令人少腹急。則小便有可行之勢矣。而卒不通者。熱秘之也。陶隱君曰。通可以去滯。瀉可以去秘。滑可以去着。故用木通。蘆麥。扁蓄。通其滯。用大黃。山梔瀉其秘。用車前。滑石滑其着。用甘草梢者。取其堅實。能瀉熱于下。加木香者。取其辛香。能化氣于中。

鐵服丸

大皂角一物。炒焦爲末。煉蜜爲丸。梧子大。每服七丸。白湯下。少腹急。小便不通。氣不化者。此方亦良。○皂角之氣。能通關開竅。皂角之味。能去垢滌污。故能化下焦之氣。通膀胱之滯。

熨臍法

用炒鹽熱熨臍腹。冷復易之。

鹹可以軟堅。熱可以行滯。此炒鹽之意也。然必熨其臍者。臍爲吾身之樞。有生之系也。故能進氣以化滯。

探吐法

燒鹽二兩。溫水二升。服之探吐。

經云。升降出入。無器不有。故不升則不降。而道器滅矣。是以觀於注水之瓶。上竅通。則下竅自利。此用吐之意也。

大螺着少腹法

宋季。饒醫熊彥誠。年五十五歲。病前後便溺不通五日。腹脹如鼓。同輩環視。皆

不能措力。與西湖妙果僧慧月相善。遣信邀至訣別。月驚馳而往。於釣橋逢一異客。揖之曰。方外高人。何子予走趨若是。月曰。一善友久患祕結病危。急欲往問。客曰。易事耳。待奉施一藥。即脫靴入水。探一大螺而出。曰。事濟矣。抵家以鹽半匙和殼生搗。置病者臍下一寸三分。用寬帛緊繫之。仍辦溺器以須其通。月未以爲然。姑巽謝之。至熊家。彥誠昏不知人。妻子聚泣。諸醫知無他策。慢使試之。曾未安席而暴下。諸醫愧嘆而散。月歸訪異人。無所見矣。熊後十六年乃終。岷謂便溺不通者。熱祕之也。大螺性寒而善分清。故濁水之中。一着大螺。便能澄澈。劑之以鹽。取其善潤而已。

小便不禁門第三十九

敘曰。洩溺惟宜。形氣治也。洩溺不禁。形氣病也。輕者脬中有痺氣。重者大氣虛而且絕爾。辨此者以他證合之。姑考四方以誌大法。

縮泉丸

烏藥

益智仁等分

共爲末。山藥糊爲丸。梧子大。每服七十丸。空心鹽湯下。

脬氣虛寒。小便頻數。遺尿不止者。此方主之。○脬氣者。太陽膀胱之氣也。膀胱之氣。貴於沖和。邪氣熱之。則便澀。邪氣實之。則不出。正氣寒之。則遺尿。正氣虛之。則不禁。是方也。烏藥辛溫而質重。重者墜下。故能療腎間之冷氣。益智仁辛熱而色白。白者入氣。故能壯下焦之脬氣。脬氣復其天。則禁固復其常矣。

八味丸

熟地黄 八兩

山藥 去核

山藥 各四

牡丹皮

白茯苓 去皮

澤瀉 各三

肉桂 炒

附子 炮去皮臍

腎間水火俱虛。小便不調者。此方主之。○腎具水火。主二便。而司開闔。腎間之水竭。則火獨治。能闔而不能開。令人病小便不出。腎間之火熄。則水獨治。能開而不能闔。令人小便不禁。是方也。以附子、肉桂之溫熱益其火。以熟地、山藥之濡潤壯其水。火欲實。則丹皮、澤瀉之酸鹹者可以收而瀉之。水欲實。則茯苓、山藥之甘淡者可以制而滲之。水火既濟。則開闔治矣。正考見虛損勞瘵門渴門。

四君子湯

人參

白朮

茯苓

甘草各三錢

諸急病。遺尿不禁者。此方主之。○諸急病。謂卒然暴仆諸疾也。遺尿不禁者。形氣將脫。無形之氣。不足以固有形之溺也。甘溫爲陽。可使益氣。故人參、白朮、茯苓、甘草。皆甘溫也。可以用之。或問茯苓淡滲。當遺尿不禁之時。可以去否。余曰。苓有二品。枯而不澤者宜去。若堅潔而潤者。則亦不嫌其爲苓也。用之引人參以就下。直補膀胱。誰曰不可。正考見氣門。

韭子一物丸

大人遺濁。小兒遺尿。以韭子一物作丸服之神良。○經曰。淫氣遺溺。痺聚在腎。痺聚者。濕氣聚而爲痺也。韭子潤而辛熱。辛熱則能散濕。潤則能就下。故孫真人每用之。令其就下而療痺氣爾。

淋瀝門第四十

敘曰。淋一也。五疾判焉。必剖析其病情。治療如法。始可奏功。若冒厥禁忌。縱若情慾。則日藥之不足矣。考方八首。而治法之大者。庶幾哉。

三生益元散

生柏葉

生藕節

生車前各一升

益元散三錢調服

此主血淋之方也。○丹溪云。淋雖有五。皆主於熱。此知要之言也。是方也。三物之生。皆能療熱。析而論之。則柏葉涼心。藕節消血。車前導利。益元散者。滑石甘草也。滑石能清六府之熱。而甘草者和中瀉火。能協木石之性者也。

木香湯

木香

木通

檳榔

茴香小者略炒

赤芍藥炒

當歸

青皮炒

澤瀉

橘皮去白

甘草各五分

裏氣凝滯。小便淋瀝。身冷者。名曰氣淋。此方主之。○氣行則利。氣滯則澀。故裏氣凝滯。則小便淋瀝。身冷者。陽氣不舒也。乃天地閉塞而成冬。陽氣潛藏之象也。藥味辛香而輕枯者。陽勝。故能理氣於陽。木香、茴香、橘皮、木通是也。辛苦而潤實者。陰勝。故能理氣於陰。青皮、檳榔、當歸、赤芍是也。澤瀉之鹹。能引諸藥直走膀胱。甘草之甘。能調諸藥以和六府。脬氣不滯。則淋瀝愈矣。

草解分清飲

川草薺

石菖蒲

益智仁

烏

藥錢各三

膏濁頻數。漩白如油。光彩不足者。名曰膏淋。此方主之。○膀胱者。水瀆之區也。胃中濕熱乘之。則小便渾濁。譬之濕土之令行。而山澤昏暝也。陶隱君曰。燥可以去濕。故草薺、菖蒲、烏藥、益智。皆燥物也。可以平濕土之敦阜。濕土既治。則天清地明。萬類皆潔矣。而況於膀胱乎。

石葦散

石葦去毛

冬葵子各二兩

蘆麥一兩

滑石五兩

車前子二兩

每服三錢。日二。

砂淋痛盛者。此方主之。○砂淋者。溺出砂石也。此以火灼膀胱。濁陰凝結。乃煮海為鹽之象也。通可以去滯。故用石葦、蘆麥。滑可以去着。故用滑石、車前、冬葵。雖然。治此證者。必使斷鹽。方能取效。斷鹽有二妙。一則淡能滲利。一則無鹹不作石也。

清心蓮子飲

黃耆炙

石蓮肉

白茯苓

人參各半

炙甘草

地骨皮

黃芩炒

車前子

麥門冬各五分

勞淋者。此方主之。○遇勞即發者。名曰勞淋。此以體弱。故不任勞。然五藏各有勞。勞者動也。動而生陽。故令內熱。內熱移於膀胱。故令淋閉。是方也。石蓮肉瀉火於心。麥門冬清熱於肺。黃芩瀉火於肝。地骨皮退熱於腎。黃耆、人參、茯苓、甘草瀉火於脾。皆所以療五藏之勞熱也。惟車前子之滑。乃以治淋去着云爾。

琥珀散

滑石二錢

木通

當歸

木香

鬱金炒

扁蓄

琥珀各一錢

氣淋、血淋、膏淋、砂淋。此方皆主。○滑可以去着。故用滑石。琥珀通可以去滯。故用木通。扁蓄用當歸者。取其活血。用木香、鬱金者。取其利氣也。

大補丸

黃柏一味。炒褐色爲丸。

淋證遇房勞即發者。此方主之。○房勞虛其腎水。則火獨治。故灼而爲淋。黃柏苦而潤。苦能瀉火。潤能補水。

參苓琥珀湯

人參五分

茯苓四分

玄胡索七分

川棟子炒

生甘草錢各一

柴胡

澤瀉

當歸梢

琥珀各三分

長流水煎

脾氣不足。小便淋瀝。常有餘滴不盡者。此方主之。○經曰。壯者氣行則愈。怯者着而成病。是以房勞老弱之人。多有此疾。補可以去弱。故用人參。茯苓。滑可以去着。故用琥珀。歸梢。瀉可以去閉。故用澤瀉。生甘草。用柴胡者。使之升其陷下之清陽。用玄胡。川棟者。使之平其敦阜之濁氣。煎以長流水者。取其就下之意也。

精濁門第四十一

岐曰。精濁。腎之液也。所以精濁者。心爲之也。一動其心。而天君搖搖。則精濁走失矣。所謂主不明。則十二官危。以此養生。則殆是也。故欲養其身者。先正其心。今考名方六首。外來之藥耳。若能正其心。則吾身之大丹也。

九龍丹

枸杞子

金櫻子

山查肉

石蓮肉

蓮花鬚

熟地黃

芡實粉

白茯苓

川當歸等分

精濁者。此方主之。○精濁與便濁不同。便濁是便溺渾濁。卽前之膏淋也。乃是胃中濕熱。滲入膀胱。與腎經絕無相干。精濁則牽絲粘膩。雖不便溺。亦是有之。此是腎水不足。淫火易動。精離其位。故令漸瀆而出耳。治此者。宜滋腎清心。健脾固脫。是方也。枸杞。熟地。當歸。味厚者也。可以滋陰。滋陰則足以制陽光。金櫻。蓮鬚。芡實。味澀者也。可以固脫。固脫則無遺失。石蓮肉。苦寒。可以清心。心清則淫火不熾。白茯苓。甘平。可以益土。益土則制腎邪。而山查肉者。又所以消陰分之障礙也。

珍珠粉丸

牡蠣粉取血色者炙

黃柏各一斤

珍珠三錢

濕熱在中下二焦。令人便濁者。此方主之。○燥可以去濕。故用牡蠣粉。苦可以勝熱。故用黃柏。滑可以去着。故用珍珠。

水陸二仙丹

金櫻膏二斤

芡實粉熟一斤

共為丸。豆大。空心服七十丸。

此主精濁之方也。○金櫻膏濡潤而味澀。故能滋少陰而固其滑泄。芡實粉枯澀而味甘。故能固精濁而防其滑泄。金櫻生於陸。芡實生於水。故曰水陸二仙妙香散。

人參五分

山藥二兩薑汁炒

麝香另研錢

木香二錢半煨

黃耆

遠志去心炒

茯苓

茯苓神各一

桔梗

甘草各二錢

辰砂另研錢

共為細末。每服二錢。酒下。

此安神正氣而精自固之方也。夢中遺失者宜主之。○精、氣、神。人身之三寶也。神役氣。氣役精。三寶之用也。是以神昏則氣蕩。氣蕩則精離。神明則氣正。氣正則精固。是方也。不用固澀之劑以固精。但用人參、茯苓、遠志、辰砂以安神。用麝香、木香、黃耆、桔梗、甘草、山藥以正氣。神清氣正。則淫夢不作。邪火不起。精不必澀而自固矣。內經曰。主明則下安。以此養生則壽。沒世不殆。此之謂也。

治濁固本丸

蓮花鬚

黃連二兩

猪苓二錢

白茯苓

砂仁

益智

半夏薑製

黃柏炒各一兩

炙甘草三兩

胃中濕熱。滲入膀胱。濁下不禁者。此方主之。○凡濁下不禁。牽絲者。責之精濁。腎家之病也。不牽絲者。責之便濁。胃中濕熱也。是方也。半夏所以燥胃中之濕。茯苓、猪苓所以滲胃中之濕。甘草、砂仁、益智、香甘益脾之品也。益脾亦所以制濕。而黃連、黃柏之苦。所以治濕熱。蓮花鬚之澀。所以止其滑泄耳。名之曰固本者。胃氣為本之謂也。

韭子

千金方。精極類用韭子。以治遺精。夢失。小便白濁者。蓋九方焉。而單用韭子者。居其半。夫韭子辛熱物耳。何孫思邈取之深也。崑謂用之以治便濁者。用其辛熱之氣。燔其濕土。使蒸溽上行而不下。乃釜底加薪之法。益火之原。以消陰翳也。用之以治遺精者。用其辛熱之氣。以壯真陽。使之涵乎陰精而不漏。乃益土防水之法。衛外而爲固也。凡此方外不傳之秘。惟可與知者道耳。

自汗門第四十二

敍曰。有因而自汗。非病也。所謂陽之汗。以天地之雨名之。乃陰陽和而雨澤降也。惟無因而自汗。則爲病矣。宜以甘劑補之。今考古人四方。率甘劑耳。

玉屏風散

黃耆

防風

白朮

共爲末。每服三錢。

氣虛自汗者。此方主之。○自汗者。無因而自汗也。常人不汗者。由衛氣固衛。

於外。津液不得走泄。所謂陽在外。陰之衛也。衛氣一虧。則不足以固津液。而自滲泄矣。此自汗之由也。白朮、黃耆。所以益氣。然甘者性緩。不能速達於表。故佐之以防風。東垣有言。黃耆得防風而功愈大。乃相畏而相使者也。是自汗也。與傷風自汗不同。傷風自汗。責之邪氣實。雜證自汗。責之正氣虛。虛實不同。攻補亦異。臨證者宜詳別之。

大補黃耆湯

黃耆	炙	人參	肉從容	山茱萸	去核	
白朮	炒	當歸	肉桂	略炒	五味子	炒
甘草	炙	川芎	防風	錢各一	茯苓	錢五分
熟地黃	二錢					

氣血俱虛自汗者。此方主之。○人參、黃耆、白朮、茯苓、甘草、防風、肉桂。實表氣而止自汗。當歸、川芎、熟地、肉從容、山茱萸、五味子。生津液而收陰氣。此氣血兩補之劑也。

調衛湯

麻黃根

黃耆各一錢

麥門冬

生地黄各三錢

生甘草

當歸梢

生黃芩

半夏各五分

羌活七分

猪苓

蘇木

紅花各二分

五味子七粒

濕熱自汗。一身盡痛。脈濡者。此方主之。○濕無熱不作汗。濕得熱而蒸之。則能令人自汗。濕流百節。故一身盡痛。濕為陰氣。故脈濡。風能勝濕。故用羌活。辛能燥濕。故用半夏。淡能滲濕。故用猪苓。濕傷氣。黃耆、甘草、麥冬。所以益氣。濕傷血。蘇木、紅花、歸梢。所以消瘀。五味子、麻黃根。收汗液而固表虛。生芩、黃芩。涼陰血而除濕熱。

艾煎茯苓散

以艾煎湯調茯苓末一錢服。

別處無汗。獨心孔一片有汗者。此方主之。○此是心火自旺。膈有停飲。火熱蒸其濕飲。故令此處有汗。茯苓甘而淡。甘能養心。淡能滲濕。艾葉香而澀。香能利氣。澀能固津。

盜汗門第四十三

紱曰。汗孔謂之鬼門。故盜汗不止。久久令人喪魄。今考名方五首。而治盜汗之法。大可知矣。臨證而權度其宜焉可也。

當歸六黃湯

當歸

生地黃

熟地黃

黃芩

黃連

黃柏各等分

黃耆倍用

陰虛有火。令人盜汗者。此方主之。○醒而出汗曰自汗。睡去出汗曰盜汗。自汗陽虛。盜汗陰虛也。曰有火者。謂其證有面赤口乾唇燥便赤聲音重脈來數也。然陰虛所以盜汗者。陰虛之人睡去。則衛外之陽乘虛陷入於陰中。表液失其固衛。故令澌然而汗出。人覺則陽用事。衛氣復出於表。表實而汗即止矣。當歸熟芩。養陰之品也。黃芩黃連。去火之品也。生芩黃柏。可以養陰。亦可以去火。而黃耆者。所以補表氣於盜汗之餘也。是盜汗也。與傷寒盜汗不同。傷寒盜汗。是半表半裏之邪未盡。雜證盜汗。則陰虛而已。彼以和表為主。此以補陰為主。明

者辨之。

黃耆六一湯

黃耆炙六兩

甘草炙一兩

虛脫已後盜汗者。此方主之。○虛脫者。陰虛而形氣將脫。如大病之餘。新產失血之後也。斯時也。更有盜汗。寧不復傷其氣血乎。故用黃耆七之六。甘草七之一。大補其氣而汗自止。或問何以不用養血之藥。余曰。太極之妙。陰生於陽。故無形能化有形。無形者氣。有形者血耳。若虛脫之際。而責養陰之藥以固脫。是以陰及陰。二女同居。烏能衛外。

正氣湯

黃柏炒

知母炒各二分

甘草炙五分

此治陰虛有火。令人盜汗之方也。○陰虛則陽獨治。故令有火。火益亢。則陰益虧。陰虧則睡去之時。衛外之陽乘虛而入。衛虛無以固表。故令盜汗。經曰。壯水之主。以制陽光。故用黃柏。知母苦寒質潤之品以主之。苦能瀉火。寒能勝熱。質潤能滋陰。佐以甘草者。和其陰陽耳。

麥煎散

知母

石膏

人參

白茯苓

赤芍藥

滑石

葶藶

杏仁

地骨皮

麻黃根

甘草

共爲末。浮小麥煎湯調下二錢。

濕熱內淫。肺病喘急。以致皮毛之氣不充。令人盜汗。四肢煩疼。肌肉消瘦者。此方主之。○內經曰。肺主皮毛。靈樞經曰。衛氣者。所以溫分肉。充皮膚。肥腠理。司開闔者也。今肺以喘而虛。故皮毛之氣不充。則腠理失肥。開闔失宜。而令盜汗。是方也。滑石。茯苓。可以瀉濕。石膏。知母。可以清熱。杏仁。葶藶。可以瀉喘。人參。甘草。可以益肺。地骨皮。赤芍藥。可以去熱於裏。麻黃根。浮小麥。可以止汗於表。

柴葉

此物能主五藏之風熱。故焙乾研末。空心米飲調服。能止盜汗。人所罕知。

積聚癥瘕門第四十四

敘曰。積聚癥瘕。夫人心腹之疾也。凡有此疾者。宜與明醫攻療之。失而不治。復協他邪。不可爲矣。譬之奸人蠱國。乘人之危而利之。雖有智者。不能善其後爾。

倒倉法

以肥嫩黃牯牛肉三十斤。切成小片。去筋膜。取長流水煮糜爛。以布濾去渣滓。取淨汁。再入鍋內慢火熬至琥珀色。則成劑矣。令病者預先斷肉食淡。前一日不食晚飯。設密屋一間。明亮不通風處行之。置穢桶瓦盆貯吐下之物。一磁瓶盛所出之溺。令病者入室。以汁飲一杯。少時又飲一杯。積數十杯。寒月則重湯盪而飲之。任其吐利。病在上者。欲其吐多。病在下者。欲其利多。病在中及在上復在下者。欲其吐利俱多。全在活法而爲之。緩急多寡也。視所出之物。必盡病根乃止。吐利後必渴甚。不得與湯。以所出之溺飲之。非惟可以止渴。抑且可以蕩滌餘垢。行後倦怠覺飢。先與稠米飲。次與淡稀粥。三日後。方可與菜羹。調養半月或一月。自覺精神渙發。形體輕健。沉痾悉能去矣。自後須忌牛肉數年。○丹溪云。牛。坤土也。黃。土之色也。此以順爲性。而效法乎乾以爲功。牡之用也。肉者。胃之樂也。熟而液。無形之物也。橫散入肉絡。由腸胃而滲透肌膚毛竅爪甲。

無不入也。積聚久。則形質成。依附腸胃迴薄曲折處。以爲棲泊之窠臼。阻礙氣血津液。熏蒸燔灼成病。自非刮腸剖骨之神妙。可以銖兩丸散。窺犯其藩牆戶牖乎。肉液之泛溢。腸胃受之。其厚皆倍於前。有似乎腫。迴薄曲折處。肉液充滿流行。有如洪水泛漲。其浮槎陳朽。皆推逐蕩漾。不可停留在表者。因吐而汗。其清道者自吐而湧。濁道者自泄而去。凡屬滯礙。一洗而盡。牛肉全重厚和順之性。盎然渙然。潤澤枯槁。補益虛損。寧無精神渙發之樂乎。正似武王克商。散財發粟。以賑殷人之仰望也。其方得於西域之至人。凡人於中年後。行一二次。亦卻疾養壽之一助也。○又嘗與人書曰。全在自飲輪迴酒十數杯。以卻逐餘垢。迎接調勻。新宿營衛。使藏氣育膜生意敷暢。有脫胎換骨之功也。多嫌其穢。因致中輟。而功虧一簣。若非明物理通造化者。其肯視爲美醞良味乎。

肥氣丸 息賁丸 伏梁丸 痞氣丸 奔豚丸 五方總考

東垣百世之師也。其制肥氣丸以治肝積。制息賁丸以治肺積。制伏梁丸以治心積。制痞氣丸以治脾積。制奔豚丸以治腎積。率以攻下溫熱之品。類聚爲丸。夫五藏積氣。辟在腸胃之外。而用巴霜厚朴輩峻劑以攻腸胃之內。非其治也。

人皆曰東垣方。余直以為非東垣之劑也。借曰東垣為之。則無脾胃論矣。明者辨之。

三因散聚湯

半夏

檳榔

川歸各四分

大黃酒浸

陳皮

杏仁

桂心

茯苓各一錢

甘草

附子

川芎各五分

枳殼

厚朴

吳茱萸各一錢五分

聚氣在六府。隨其上下。發作有時。令人心腹疴痛。攻刺腰脅。少腹脹。大小便不利者。此方主之。○上件皆六府之病也。氣之所積名曰積。氣之所聚名曰聚。積者五藏之邪。聚者六府之病也。是方名曰散聚者。所以散六府之聚氣耳。蓋中氣之道。熱則施張。施張弗聚也。寒則收引。收引則氣斯聚矣。故桂心、附子、吳茱萸辛熱之品也。半夏、陳皮辛溫之品也。川芎、當歸、杏仁辛潤之品也。辛則能散聚。熱則能壯氣。溫則能和中。潤則能澤六府。乃茯苓、甘草之甘平。可以使之益胃。而檳榔、枳殼、厚朴、大黃。則皆推陳之品也。

伏翼尿

此卽天鼠之糞也。又名夜明沙。古人治血積。每用水蛭、蝨蟲輩。以其善吮血耳。然其性毒。人多患之。而伏翼尿者。食蚊而化之者也。蚊之吮血。不減蛭蝨。故亦可以攻血積。本草稱其能下死胎。則其能攻血塊也何疑。書此以待同志者用之。

古方治積聚藥總考

古方有用麴、蘖者。化水穀也。用礪砂、阿魏者。去肉食也。用陳皮、紫蘇、生薑者。化魚蟹也。用丁香、桂心者。腐果菜也。用牽牛、芫花者。攻水飲也。用三稜、鱉甲者。去癥瘕也。用附子、硫黃者。除痼冷也。用水蛭、蝨蟲者。攻血塊也。用木香、檳榔者。攻滯氣也。用雄黃、膩粉者。攻涎積也。用礪石、巴豆者。攻痰食也。甘遂、甘草並用者。假其相戰以去積也。但立方之人。未入神妙。鮮有不類聚羣毒以爲丸者。此之謂獵不知兔。廣絡原野。冀一人獲之。術亦疎矣。今考古人神異數事於左。以廣見聞。

癥瘕

史記曰。臨菑女子薄吾病甚。衆醫以爲寒熱篤。當死。臣意診其脈曰。蟯癪。爲病腹大。上膚黃粗。循之戚戚然。臣意欲以芫花一撮。卽出蟯可數升。病已三十日如故。病蟯得之於寒濕。寒濕氣鬱篤不發。化爲蟲。所以知薄吾病者。切其脈。循其尺。索刺粗而毛美奉髮。是蟲氣也。其色澤者。中藏無邪氣及重病。崐謂倉公以病蟯得之寒濕者。謂寒水濕土之氣也。寒水濕土之氣。鬱極而不能宣發。則化爲蟲。所謂濕熱生蟲是也。芫花氣微寒而味苦辛。有毒。能下十二經之水。而攻積聚。故能下水土生化之蟯。

雞子致積

北齊褚澄善醫術。建元中。爲吳郡太守。民有李道念者。以公事至郡。澄遙見謂曰。汝有奇疾。道念曰。果得冷疾五年矣。澄診其脈曰。非冷也。由多食雞子所致。令取蒜一升服之。卽吐物如升許。涎裏之動。挾涎出視。乃一雞雛。翅距已具而能走。澄曰。未也。盍服其餘。從之。又吐十三枚。疾乃瘳。崐謂蒜性辛熱。可以壯氣。正氣壯。則病邪不能容。故上湧而出。乃君子道長。小人道消之象。經曰。壯者氣行則愈。怯者着而成病。此之謂也。

髮癥

劉宋時徐文伯者。徐嗣伯之兄也。篤好醫術。宮人有患腰痛牽心者。發則氣絕。衆醫以爲肉癥。文伯視之曰。此髮癥也。以油灌之。卽吐物如髮。引之長三尺。頭已成蛇。又能搖動。懸之柱上。水盡瀝。惟餘一髮而已。崑謂髮者血氣之餘也。入腹成蛇者。乃無情而化有情。離形而自成形也。無情而化有情。一腐草可以爲螢。離形而自成形。一折枝可以植林。文伯治之以油者。投其先天之宜也。油性善泛。故哇之而出矣。或問文伯何以便知其爲髮癥。余曰。人患藝弗精耳。精藝自然入神。

蛇癥

隋有患者。嘗病吐食。醫作噎氣。膈疾。翻胃三疾治之。無驗。任度視之曰。非此三疾。蓋因食蛇肉不消而致斯病。但揣心腹上有蛇形是也。病者曰。素有大風。常求蛇肉食。風稍退。復患此疾矣。遂以芒硝。雄黃治之。愈。芒硝取其軟堅。雄黃解其蛇毒。此本草之論。世人之所共識也。

鼈癥

宋有溫革郎中者。自少壯健無疾。執不信醫。見方書有云食鼈不可食。竟者。故併啖之。自此苦腹痛。每作時。幾不知人。始疑鼈竟所致。而未審也。復以二物令小蒼頭併食之。遂得病與革類。而委頓尤劇。未幾遽死。舁其尸置馬廐。未歛也。忽小鼈無數。自上下竅湧出。散走廐中。惟遇馬溺輒化爲水。革聞。自視之。掇聚衆鼈以馬溺灌之。皆化爲水。革乃自飲馬溺。其疾亦愈。巢元方亦謂有患鼈瘕者死。其主破其腹。得一白鼈。鼈乃活。有乘白馬來看者。白馬遂尿隨落鼈上。卽縮頭。乃以馬尿灌之。隨化爲水。崑謂鼈竟併啖而成瘕者。竟能回鼈之生氣。故也。瘕成遇馬溺而化者。象數尅之故也。昔尼父繫易。繫鼈於離。以其外剛內柔。肖其象也。故鼈瘕者離象。馬溺者坎象也。離爲火。坎爲水。天地變化。坎離交媾。則火涵乎水。水涵乎火。而鼈生於水。各正性命。象數相制。則火仇於水。水制其火。而鼈瘕化於馬溺。然馬溺能化鼈瘕。而不能化鼈者。氣生者可化。形生者可死而已。他溺不可化。而惟馬溺能化者。馬得乾之剛。其氣悍味厚。非凡溺可例故耳。

京三稜

本草云。昔有人患癥瘕死。遺言開腹取之。如其言。得塊乾韌如石。文理有五色。人謂異物。竊取削成刀柄。後因以刀刈三稜。柄消成水。乃知此可療癥瘕也。

醫方考

清 歙邑 吳 崑鶴皋原著

鄞縣 曹赤電炳章圈點

卷五

痿痺門第四十五

紱曰。痿痺。二病也。今詳內經。亦有稱痺爲痿者。故合而爲一。考方八首。舉其略耳。盡其變化。則在醫之方寸焉。

肺熱湯

羚羊角

玄參

射干

薄荷

芍藥

升麻

柏皮各三錢

生地黄一合

梔子仁四錢

竹茹二錢

肺鳴葉焦。令人色白毛敗。發爲痿躄。脈來短數者。宜此方主之。○痿猶萎也。痿

臂者。手足不用之義。肺鳴者。火來乘金。不得其平而自鳴。今之喘急是也。葉焦者。火盛金衰。故葉焦也。色白者。肺病而色自見也。毛敗者。肺主皮毛。病故折敗也。發爲痿臂者。肺主氣。氣者萬物之父。肺者五藏之天。所以出納天地冲和之氣。而百骸資始者也。肺病則百骸失其天。而無以資始矣。故令人手足痿臂。脈來短者。肺之真藏脈也。脈來數者。火來乘金也。斯證也。持於冬。死於夏。十有九危。然而主是方者。冀其爲十中之一爾。羚羊、玄參、射干、涼膈之品也。肺居膈上。故能清肺熱。薄荷、升麻者。辛涼之品也。金鬱則泄之。故用其辛涼以解肺中鬱熱。柏皮能益腎水。腎水益則子可以救母。生地能涼心血。心君涼則火不之乘。金。梔子、竹茹能泄肝腎中相火。相火熄則肺金可清。芍藥味酸。和肝之品也。肝和則不至於侮肺。侮肺者。謂金本以制木。今肺金自病。肝木乘其虛而輕侮之。臣強之象。勢使然也。

人尿

肺痿者。取人尿無時呷之。良於諸藥。蓋天一生水。地二生火。人尿潤下鹹寒。人身之天地一也。故可以交吾身之坎離。濟吾身之水火。或者因其穢而拒之。悲

夫。未聞道者也。

三補丸

黃連

黃芩

黃柏等分

心氣熱。下脈厥而上。色赤。絡脈滿溢。樞紐折挐。脛縱而不任地者。名曰脈痿。宜此方主之。○心者。君主之官也。內經曰。君火以明。相火以位。言君火正其名而無爲。相火守其位以聽命。故心氣熱。下脈厥而上者。此相火聽命於君也。色赤者。心病而色自見也。絡脈滿溢者。孫絡充滿而溢於表。炎上作火之象也。樞紐折挐者。言肢節折挐而不便。乃陽光用事。邪居百節故耳。脛縱不任地者。脈溢於上。則下脈空虛而痿弱。故脛縱而不任地也。脈空而痿。故曰脈痿。是方也。黃連瀉心火。黃柏瀉相火。黃芩瀉五藏之遊火。火去則脈不厥逆。各循其經。而手足用矣。正考見火門。

龍膽瀉肝湯

柴胡一錢

人參

知母

麥門冬

天門冬

草龍膽

山梔子

生甘草

黃連各五分

黃芩七分

五味子七粒

肝氣熱。色青。爪枯。口苦。筋膜乾而攣急者。名曰筋痿。宜此方主之。○肝者。東方木也。色青者。肝病而色自見也。肝主筋。爪者。筋之餘。肝熱。故令爪枯也。口苦者。膽為肝之府。咽為之使。膽熱。則汁上溢於咽。故令口苦也。肝主筋膜。筋膜乾。則燥而攣急。攣急。則手足不用。故曰筋痿。是方也。黃芩。黃連。山梔。膽草。皆足以瀉肝火。君之以柴胡。則能條達乎肝膽矣。木盛而兼燥。金之化。故令攣急。天麥門冬。知母。五味。味厚而潤者也。故足以養筋而潤燥。若生甘草。人參者。所以養乎陽氣也。經曰。陽氣者。精則養神。柔則養筋。是故用之。互考見火門。

蠲痺湯

羌活

赤芍藥酒炒

薑黃酒炒

甘草各五分

黃耆

當歸酒炒

防風各二錢

有漸於濕。以水為事。痺而不仁。發為肉痺者。此方主之。○濕氣着於肌肉。則營衛之氣不榮。令人痺而不仁。即為肉痿。肉痿即肉痺耳。是方也。防風。羌活。風藥也。用之所以勝濕。經曰。營血虛則不仁。故用當歸以養營。又曰。衛氣虛則不用。

故用黃耆以益衛。用夫赤芍、薑黃者。活其濕傷之血也。用夫甘草者。益其濕傷之氣也。

六味地黃丸加黃柏知母方

熟地黃八兩

山茱萸去核

山藥各四兩

牡丹皮

白茯苓

澤瀉各三兩

黃柏

知母各二兩

腎氣熱。則腰脊不舉。骨枯而髓減。發為骨痿。宜此方主之。○腎者水藏。無水則火獨治。故令腎熱。腎主督脈。督脈者行於脊裏。腎壞則督脈虛。故令腰脊不舉。骨枯髓減者。枯涸之極也。腎主骨。故曰骨痿。是方也。熟地黃、山茱萸。味厚而能生陰。黃柏、知母。苦寒而能瀉火。澤瀉、丹皮。能去坎中之熱。茯苓、山藥。能制腎間之邪。王冰曰。壯水之主。以制陽光。此方有之矣。正考見虛損勞瘵門。

四君子湯

人參

白朮

茯苓

甘草

陽明虛。宗筋失養。不能束骨而利機關。令人手足痿弱者。此方主之。○陽明者。胃也。胃為土。土者萬物之母。易曰。至哉坤元。萬物資生。若胃土一虛。則百骸失

養而絕其生氣矣。故宗筋縱弛。不能束骨而利機關。令人手足痿弱。是方也。人參、甘草、甘溫之品也。甘者土之味。溫者土之氣。故足以益陽明。白朮、茯苓、燥滲之品也。燥之則土不濡。滲之則土不濕。故足以益脾胃。凡人大病之後。手足痿弱者。率是陽明虛也。能於胃而調養之。則繼東垣之武矣。

八味丸

熟地黄 八兩

山茱萸 去核

山藥 各四兩

牡丹皮 去木

白茯苓

澤瀉 各三兩

附子 鹽煮

肉桂 各一兩

入房太甚。宗筋縱弛。發為陰痿者。此方主之。○腎坎象也。一陽居於二陰為坎。故腎中有命門之火焉。凡人入房甚而陰事作強不已者。水衰而火獨治也。陰事柔痿不舉者。水衰而火亦敗也。丹溪曰。天非此火。不足以生萬物。人非此火。不能以有生。奈之何而可以無火乎。是方也。附子、肉桂。味厚而辛熱。味厚則能入陰。辛熱則能益火。故能入少陰而益命門之火。熟地黄、山茱萸。味厚而質潤。味厚則能養陰。質潤則能壯水。故能滋少陰而壯坎中之水。火欲實。則澤瀉、丹皮之鹹酸。可以引而瀉之。水欲實。則山藥、茯苓之甘淡。可以滲而制之。水火得

其養則腎官不弱。命門不敗。而作強之官得其職矣。

天雄附子川烏硫黃蜀椒蛇床子韭子小茴香八物考

痿證大都主熱。痺證大都主寒。然痿證亦有寒者。痺證亦有熱者。此不可泥也。內經曰。淫氣喘息。痺聚在肺。淫氣憂思。痺聚在心。淫氣遺溺。痺聚在腎。淫氣之竭。痺聚在肝。淫氣肌絕。痺聚在脾。此五證者。非溫藥不足以療之也。宜於天雄附子川烏硫黃蜀椒蛇床子韭子小茴香輩消息之。

厥證門第四十六

敘曰。六經皆有厥證。率是火爾。今表雜證之厥數條以示大者。若傷寒陰厥陽厥。宜於傷寒方考求之。

六物附子湯

附子

肉桂

防

己各四錢

炙甘草二錢

白朮

茯苓各三錢

陽氣衰於下。令人寒厥。從五指至膝上寒者。此方主之。○進退消長者。陰陽之

理也。故陽氣衰乏者。陰必湊之。令人五指至膝上皆寒。名曰寒厥。寒厥者。寒氣逆於下也。附子、肉桂、辛熱之品也。故用之以壯元陽而防己。甘草、白朮、茯苓、甘溫燥滲之品也。可佐之以平陰翳。

大補丸

黃柏一物。炒褐色。爲末作丸。

陰氣衰於下。令人足下熱。熱氣循陰股而上者。名曰熱厥。此方主之。○陽消則陰長。陰退則陽進。故陰氣衰於下。則陽往湊之。令人足下熱也。熱盛則循三陰經而上逆。因謂之熱厥。黃柏味苦而厚。爲陰中之陰。故能補陰氣之不足。瀉熱氣之有餘。王冰曰。壯水之主。以制陽光。此方之謂也。

八味順氣散

白朮

人參

白芷

白茯苓

台烏藥

青皮

陳皮各一錢

甘草五分

七氣拂鬱。令人手足厥冷者。此方主之。○氣者。人身之陽也。一有拂鬱。則陽氣不能四達。故令手足厥冷。是方也。白芷、台烏、青皮、陳皮。開鬱順氣之品也。可以

宜發諸陽。人參、白朮、茯苓、甘草。補中益氣之品也。可以調其不足。經曰。邪之所湊。其氣必虛。是故用夫補爾。

人參固本丸

人參 二兩

天門冬

麥門冬

生地黃

熟地黃 各四兩

內經曰。陽氣者。煩勞則張。精絕。辟積於夏。使人煎厥。宜此方主之。○諸動屬陽。故煩勞則擾乎陽。而陽氣張大。陽氣張大。則勞火亢矣。火炎則水乾。故令精絕。是以遷延辟積。至於夏月。內外皆熱。水益虧而火益亢。孤陽厥逆。如煎如熬。故曰煎厥。是方也。生熟地黃。能救腎水而益陰精。天麥門冬。能扶肺金而清夏氣。人參能固真元。而療煩勞。以之而治煎厥。誠曲當之方也。

蒲黃湯

蒲黃 一兩 炒

清酒 十爵 沃服

內經曰。大怒則形氣絕。而血菀於上。使人薄厥。宜此方主之。○肝藏血而主怒。怒則火起於肝。載血上行。故令血菀於上。菀亂也。薄。雷風相薄之薄。血氣亂於

胸中相薄而厥逆也。蒲黃能消瘀安血。清酒能暢氣和榮。故用之以主是證。

二十四味流氣飲和蘇合香丸

尸厥者。破陰絕陽。形靜如死。醫者不知鍼石。宜此二方主之。○尸厥者。五尸之氣。暴注於人。亂人陰陽氣血。上有絕陽之絡。下有破陰之紐。形氣相離。不相順接。故令暴蹶如死。所謂一息不運。則機絨窮。一毫不續。則霄壤判也。昔號太子病此。扁鵲以鍼石熨烙治之而愈。今之醫者。多不識鍼石。苟臨是證。將視其死而不救歟。故用二十四味流氣飲。和蘇合香丸主之。使其氣血流動。陽無絕絡。陰無破紐。則亦五會之鍼。五分之熨。八減之劑爾。流氣飲見氣門。蘇合香丸見風門五疰門。

痙門第四十七

敘曰。痙、風勝之病也。而寒濕每兼之。然疏風之物不可獨用。獨用則筋益燥而痙益堅。此養血之品所必加也。方藥三考。惟同志者廣之。

小續命湯

麻黃去節 人參 黃芩酒炒 芍藥酒炒
 川芎酒洗 防己 杏仁去尖炒 桂枝淨洗
 甘草錢各一 防風 附子各五分
 病強瘥者。此方主之。○瘥、瘥字之誤也。強瘥者。堅強而勁直。頸項牽急而背反張也。此以風寒濕三者客於太陽。傷其大筋。筋牽而急。故令瘥也。然得之風濕者。令人有汗。不惡寒。名曰柔瘥。昔人以桂枝加葛根湯主之。是也。得之寒者。令人無汗。惡寒。名曰剛瘥。昔人以葛根湯主之。是也。是方也。有麻黃。杏仁。則可以發表散寒。有桂枝。芍藥。則可以解肌驅風。有防風。防己。則可以驅邪勝濕。有人參。甘草。則可以益氣柔筋。有川芎。黃芩。則可以和陰去熱。乃附子之熱。可以溫經。而亦可以去濕者也。正考見中風門。

十全大補湯

人參 黃耆蜜炙 茯苓 白芍藥酒炒
 白朮炒 當歸酒洗 甘草炙 熟地黃
 川芎等分 桂枝少許

發汗過多。因而致瘥者。此方主之。瘡家雖身疼。不可發汗。發汗則瘥者。亦此方主之。○上件皆是過亡津液。無以養筋。筋牽而急。故令百節強瘥耳。經曰。陽氣者。精則養神。柔則養筋。故用人參、白朮、茯苓、黃耆、甘草之甘溫者。以益陽氣。又曰。手得血而能握。足得血而能步。故用當歸、川芎、芍藥、地黃、桂枝之味厚者。以養陰血。

桂枝

勾玄云。以桂熬成濃汁。着於諸木嫩苗之上。必致萎謝。故瘥者。筋病也。肝木主筋。藥內用桂。可以伐肝緩筋。所謂木得桂而柔也。以故瘥病宜之。

癰門第四十八

敘曰。癰。沉痾也。一月數發者。易治。週年一發者。難治。此虛實之判也。實者。即攻之。虛者。先補可也。考方三首。識其大耳。臨證變化。豈曰拘之。
續命湯加紫蘇陳皮方

竹瀝二合

生薑汁五合

生芩汁一升

龍齒末

防風

麻黃各四兩

防己

附子炮

石膏

桂枝各二兩

陳皮去白

紫蘇各半兩

痲疾者。發則仆地。悶亂無知。嚼舌吐沫。背反張。目上視。手足搐搦。或作六畜聲者。是也。宜此方主之。○痲疾者。風痰之故也。風陽氣也。內經曰。陽之氣。以天地之疾風名之。故其發也暴。然所以令人仆地者。厥氣併於上。上實下虛。清濁倒置。故令人仆。悶亂無知者。濁邪干乎天君。而神明壅閉也。舌者心之苗。而脾之經絡連於舌本。陽明之經絡入上下齒縫中。故風邪實於心脾。則舌自挺。風邪實於陽明。則口自噤。一挺一噤。故令嚼舌吐沫者。風熱盛於內也。此風來潮洶之象。背反張。目上視者。風在太陽經也。足太陽之經。起於睛明。挾脊而下。風邪干之。則實而勁急。故目上視而背反張也。手足搐搦者。風屬肝木。肝木主筋。風熱盛於肝。則一身之筋牽掣。故令手足搐搦也。搐者。四肢屈曲之名。搦者。十指閉握之義也。或作六畜聲者。風痰鼓其氣竅。而聲自變也。譬之弄笛焉。六孔閉塞不同。而宮商別異是也。是方也。有麻黃、桂枝、防風、紫蘇。則可以泄在經之邪。有竹瀝、薑汁、陳皮。則可以行痰涎之滯。有芫汁、石膏。則可以清心肺之熱。有龍

齒可以安魂。有防己可以通塞。若夫沉痼之痰。非附子不足以行其滯。而其大熱之性。又足以益火之原而消陰翳。譬之太陽中天。幽谷之翳障無不消滅。此古人用附子之意也。

利驚丸

青黛

輕粉各一

牽牛末五錢

天竺黃二錢

上件爲末。蜜丸黍米大。每服一錢。得利止後服。

驚癇氣實者。此丸與之。○癇疾之原。得之於驚。或在母腹之時。或在有生之後。必以驚恐而致疾。故曰驚癇。蓋恐則氣下。驚則氣亂。恐氣歸腎。驚氣歸心。併於心腎。則肝脾獨虛。肝虛則生風。脾虛則生痰。畜極而通。其法也暴。故令風痰上湧。而癇作矣。經曰。實者瀉之。故用竺黃。青黛以瀉肝。牽牛。輕粉以瀉脾。瀉肝所以驅風。瀉脾所以驅涎。

茶子吐法

癇證宜下宜吐。茶子苦而善湧。能吐頑痰。用者宜取一升。搗爛煎湯五倍之。令患者先一夕勿食夜膳。次早以帛束其少腹。於無風處飲而行之。得大吐便止。

不必盡劑。

癲狂門第四十九

敘曰。癲狂。皆失心也。經曰。主不明。則十二官危。故視聽言動。皆失其職。初病者。宜瀉其實。久病者。宜安其神。茲考名方八首。而古人之治法見矣。

大黃一物湯

大黃四兩。酒浸一宿。水三升煎之。分三服。不已再作。

癲狂病者。此方主之。○多怒爲癲。多喜爲狂。癲者。精神不守。言語錯亂。妄見妄言。登高罵詈是也。狂之始發。少臥少飢。自賢自貴。妄笑妄動。登高而歌。棄衣而走是也。癲病者。責邪之併於肝。狂病者。責邪之併於心也。此皆實證。宜瀉而不宜補。故用大黃以瀉之。取其苦寒。無物不降。可以瀉實。又必數日後。方可與食。但得寧靜。便爲吉兆。不可見其瘦弱減食。便以溫藥補之。及以飲食飽之。病必再作。戒之戒之。緩與之食。方爲得體。故曰。損其穀氣。則病易愈。所以然者。食入於陰。長氣於陽故也。

麻仁煎

麻仁四升。水六升。煎七合。空心服。

癲風者。此方與之。三劑効。○麻仁潤藥也。多與之。令人通利。故足以瀉癲風。然可以濟火。可以澤肝。可以潤脾。可以濡腎。有攻邪去病之能。無虛中壞氣之患。足稱良也。

苦參丸

苦參一物爲末。蜜丸梧子大。每服十五丸。薄荷湯下。

發狂無時。披頭大叫。欲殺人。不避水火者。此方主之。○上件諸證。皆神明內亂也。故古人病狂謂之失心。苦參主心腹結氣。故足以治時熱狂言。

生鐵洛

黃帝問曰。有病怒狂者。此病安生。岐伯對曰。生於陽也。帝曰。陽何以使人狂。岐伯曰。陽氣者。暴折而難決。故善怒也。病名曰陽厥。帝曰。何以知之。岐伯曰。陽明者常動。巨陽少陽不動。不動而動大疾。此其候也。治之奈何。岐伯曰。奪其食即已。夫食入於陰。長氣於陽。故奪其食即已。使之服以生鐵洛爲飲。夫生鐵洛者。

下氣疾也。崐謂怒者。肝木之志也。鐵洛。金之體也。木欲實。金當平之。此其所以用鐵洛也。

靈苑方硃砂酸棗仁乳香散

辰

砂光明有膽者一兩酸棗仁半兩

乳

香光瑩者半兩

癩疾失心者。將此三物爲末。都作一服。溫酒調下。善飲者以醉爲度。勿令吐。服藥訖。便安置牀枕令臥。病淺者。半日至一日覺。病深者。三二日覺。令人潛伺之。不可驚觸。使覺待其自醒。則神魂定矣。萬一驚寤。不可復治。唐相國寺僧允惠。患癩疾失心。經半年。徧服名醫藥不効。僧俗兄潘氏家富。召孫思邈療之。孫曰。今夜睡着。明後日便愈也。潘曰。但告投藥。報恩不忘。孫曰。有鹹物。但與師喫。待渴却來道。夜分。僧果渴。孫至。遂求溫酒一角。調藥一服與之。有頃。再索酒。與之半角。其僧遂睡。兩晝夜。乃覺。人事如故。潘謝孫。問其治法。孫曰。衆人能安神矣。而不能使神昏得睡。此乃靈苑方中硃砂酸棗仁乳香散也。人不能用耳。正肅吳公少時心病。服此一劑。五日方寤。遂瘥。本事方以此方加人參一兩。名寧志膏。煉蜜作丸。如彈子大。每服一丸。薄荷湯化下。樓師云。族人因兵火失心。

制此方與之。服二十粒愈。親舊多傳去。服之皆驗。崐謂重可以去怯。故硃砂能鎮心安神。酸可使收引。故棗仁能斂神歸心。香可使利竅。故乳香能豁達心志。必酒調盡醉者。欲其行藥力而成莫大之功也。許學士加人參者。亦謂人參能寧心爾。

白金丸

白礬三兩

鬱金七兩須四川
蟬腹者為真

二共為末。糊丸梧桐子大。每服五六十丸。溫湯下。

本事方云。昔有一婦人癲狂失心。數年不愈。後遇至人授此方。初服覺心胸有物脫去。神氣灑然。再服頓愈。至人云。此病因憂鬱得之。痰涎包絡心竅。此藥能去鬱痰。崐按白礬鹹寒。可以軟頑痰。鬱金苦辛。可以開結氣。

驚氣丸

附子

木香

白僵蠶

白花蛇

橘紅

天麻

麻黃各半

乾葛二兩

麝香五分

腦子二分

硃砂許一錢留少天南星薑汁浸

紫蘇葉各一兩

上件爲末。煉蜜丸如龍眼大。每服一丸。金銀薄荷湯下。

本事方云。戊寅年。軍中一人犯法。褫衣將受刑而得釋。精神頓失如癡。予與一丸。服訖而寐。及覺。病已失矣。提轄張載揚。其妻因避寇失心。已數年。予授此方。不終劑而愈。又黃彥奇妻。狂厥者逾十年。諸醫不驗。予授此方。去附子加鐵粉。亦不終劑而愈。崑謂殭蠶、花蛇、天麻、南星。可以豁風痰。麝香、腦子、木香、陳皮。可以通藏竅。附子所以正元陽。硃砂所以安神志。麻黃、乾葛、紫蘇。所以疏表而泄其驚氣也。以鐵粉而易附子者。亦以金能平木。而責厥爲肝逆故耳。

雲母

此物性寒質重而明。寒可以勝熱。重可以鎮心。明可以安神。故紀朋用之湯液。以療開元宮人。

驚悸怔忡門第五十

敘曰。驚悸怔忡。心疾也。心爲一身之主。萬化之原。失而不治。則十二官次第而

失職。所謂主不明。則十二官危也。故考古人之方五首。以表大法。欲養其心者。尙酌而劑之。

養心湯

黃耆

白茯苓

茯神

半夏麴

當歸

川芎

各半

柏子仁

酸棗仁炒

人參

遠志

去心薑汁炒

五味子

辣

桂各二錢半

甘草炙四錢

每服五錢。

心血虛少。神氣不寧。令人驚悸怔忡者。此方主之。○心主血而藏神。故方寸靈臺。名曰神室。神室血少而空虛。則邪氣襲之。令人如有驚悸。而怔忡忡不自寧也。內經曰。陽氣者。精則養神。故用人參、黃耆、茯神、茯苓、甘草以益氣。又曰。靜則神藏。燥則消亡。故用當歸、遠志、柏仁、酸棗仁、五味子以潤燥。養氣所以養神。潤燥所以潤血。若川芎者。所以調肝而益心之母。半夏麴。所以醒脾而益心之子。辣桂辛熱。從火化也。易曰。火就燥。故能引諸藥直達心君而補之。經謂之從

治是也。亦有加檳榔、赤茯苓者。因其停水為悸。加之以導利水氣耳。非停水者不之用也。

寧志丸

人參

白茯苓

白茯苓

酸棗仁酒浸半日

當歸

遠志

柏子仁

琥珀各半

乳香

石菖蒲

硃砂各二錢

蜜丸梧子大。每服三十丸。

氣血虛。夢中多驚者。此方主之。○重可以去怯。故用硃砂。明可以安神。故用琥珀。香可以利竅。故用乳香、菖蒲。氣可以生神。故用參、苓、茯神。仁可使歸心。故用柏仁、棗仁。酸可使養津。故用遠志。潤可以益血。故用當歸。

硃砂安神丸

硃砂五錢水飛另研

黃連酒洗六錢

生地黄一錢五分

炙甘草

當歸各二錢五分

夢中驚悸。心神不安者。此方主之。○夢中驚悸者。心血虛而火襲之也。是方也。

硃砂之重。可使安神。黃連之苦。可使瀉火。生芩之涼。可使清熱。當歸之辛。可使養血。乃甘草者。一可以緩其炎炎之焰。一可以養氣而生神也。○治異夢多驚。外有二法。一於髻中戴粗大靈砂一紗囊。一於枕中置真麝香一囊。皆杜絕異夢而療夜魘。

朱雀丸

白茯神二兩

沉香五錢

驚氣怔忡者。此方主之。○因驚而得者。名曰驚氣怔忡。內經曰。驚則氣亂。宜其怔忡忡忡。如物之撲也。是方也。茯神之甘平。可以寧心。沉香之堅實。可使下氣。氣下則怔忡瘥矣。

密陀僧一物散

每服匕許。

驚氣入心。暗不能語者。此方主之。○有人伐薪山間。爲狼所逐。暗不能言。一醫授以此方。茶調服。尋愈。又一軍人採藤於谷。爲惡蛇所逢。趨歸。證狀亦同。以此方與之亦愈。蓋此物鎮重而燥。重故可以鎮心。燥故可以劫其驚痰。

健忘門第五十一

敘曰。以虛無寂滅爲宗。則弗忘而學忘。以家國天下爲念。則健忘而懼其忘。君子有天下國家之責。奈何而可忘耶。此健忘之方所必考也。

歸脾湯

人參

黃耆

龍眼肉

酸棗仁

茯苓

白朮

遠志各一錢

炙甘草

木香

當歸各五分

思慮過多。勞傷心脾。令人健忘者。此方主之。○心藏神。脾藏意。思慮過度而傷心脾。則神意有虧。而令健忘也。是方也。人參、黃耆、白朮、茯苓、甘草、甘溫物也。可以益脾。龍眼肉、酸棗仁、遠志、當歸、濡潤物也。可以養心。燥可以入心。香可以醒脾。則夫木香之香燥。又可以調氣於心脾之分矣。心脾治。寧復有健忘者乎。九劑宜主虛損勞瘵門天王補心丹。

孔子大聖枕中方

敗龜甲酥炙

遠

志去心

九節菖蒲去毛

龍

骨研末入雞腹中煮一宿

上四件等分爲末每服一錢酒調下日三

學問易忘此方與之令人聰明○凡人多識不忘者心血足而無所蔽也若心血不足邪氣蔽之則傷其虛靈之體而學問易忘矣龜介蟲之靈物也龍鱗蟲之靈物也用龜甲龍骨者假二物之靈以養此心之靈欲其同氣相求云爾遠志辛溫味厚辛溫可使入心味厚可使養陰菖蒲味辛氣清味辛則利竅氣清則通神以之而治易忘斯近理矣是方也出於孫真人之千金方其來必有所自但曰孔子大聖之方則未敢是非也

痛風門第五十一

敘曰風者百病之長以其善行而數變也痛風有寒有濕有痰有血而惟以風名者得非以其善行數變長於諸邪之故乎今考名方五首而痛風之情狀見矣

丹溪主上中下通用痛風方

南	星	薑製	黃	柏	酒炒	蒼	朮	酒浸七日	神	麴炒
川	芎	各一兩	桃	仁	去皮尖	白	芷		草	龍膽
防	己	各五錢	羌	活		威靈仙	酒拌	桂	各三錢	
紅	花	酒洗五分								

此治痛風之套劑也。○有濕痰死血而風寒襲之。風則善走。寒則善痛。所以痛者。濕痰死血留結而不通也。所以走痛者。風氣行天之象也。是方也。南星燥一身之痰。蒼朮燥上下之濕。羌活去百節之風。而白芷則驅風之在面。威靈仙驅風之在手。桂枝驅風之在臂。防己驅濕之在股。川芎利血中之氣。桃仁紅花活血中之瘀。龍膽黃柏去濕中之熱。乃神麴者。隨諸藥而消陳腐之氣也。然羌活白芷威靈桂枝親上藥也。防己杏仁龍膽黃柏親下藥也。二者並用。則上行者亦可以引之而下。下行者亦可以引之而上。顧人用之何如耳。

二妙散

黃柏乳潤 蒼朮米泔浸七

共為末。每用酒調下三錢。

濕熱作痛。不拘上下。此方用之每良。○蒼朮妙於燥濕。黃柏妙於去熱。二物皆有雄壯之性。亦簡易之方也。

趕痛湯

乳香

沒藥

地龍酒炒

香附童便

桃仁

紅花

甘草節

牛膝酒浸

當歸

羌活

五靈脂酒淘去土

瘀血濕痰。畜於肢節之間而作痛者。此方主之。○肢節之間。筋骨之會。空竅之所也。故邪易居之。是方也。桃仁、紅花、牛膝、當歸。養血而活血也。乳香、沒藥、五靈脂。散結而定痛也。羌活所以驅風。香附所以理鬱。乃地龍者。濕土所化之物。同類相從。故能達濕邪結滯之區。甘草節者。取其性平。能和營衛而緩急痛之勢也。或問濕痰瘀血。何以辨之。余曰。肢節沉重者是濕痰。晚間病重者是瘀血。

稀荳丸事考

唐江陵節度使成訥。進稀荳丸方云。臣有弟訢。年三十一。中風就枕五年。百醫不瘥。有道人鍾鍼者。因覩此患。曰。可餌稀荳丸。必愈。其藥多生沃壤。高三尺許。

節葉相對。五月間收洗去土。摘其葉及枝頭。九蒸九暴。不必太燥。但取蒸爲度。杵爲末。煉蜜丸。梧子大。空心溫酒米飲下二三十丸。所患忽加。不得憂慮。至四千丸。必復如故。五千丸。當復丁壯。臣依法修合與訢服。果如其言。鍾鍼又言。此藥與本草所述功效相異。蓋出處盛在江東。彼土民呼猪爲豨。呼臭爲豨。必緣此藥如臭。豨氣。故以爲名。久經蒸暴。豨氣自泯。每當服多。須喫飯三五匙壓之。奉宣付醫院詳錄。又知益州張詠進豨豨丸表云。臣因在龍興觀。掘得一碑。內說脩養氣術。併藥二件。依方差人訪問採覓。其草頗有異。金稜銀線。素根紫莖。對節而生。蜀號火杖。莖葉頗類蒼耳。誰知至賤之中。乃有殊常之效。臣自喫至百服。眼目輕明。即至千服。鬚髮具黑。筋力較健。效驗多端。臣本州有都押衙羅守一。曾中風墮馬。失音不語。臣與十服。其病立痊。又和尚智嚴年七十。忽患偏風。口眼喎斜。時時吐涎。臣與十服。亦便得瘥。今合一百劑。差職員史元奏進。義考見中風門。

桑枝煎

桑枝一小升。細切炒香。以水三大升。煎取二升。一日服盡無時。

諸痛風者。服此方良。○圖經云。桑枝性平。不冷不熱。可以常服。療中風體癢。乾涇脚氣。及風氣四肢拘攣。上氣眼昏。肺氣嗽。消食利小便。久服輕身。聰明耳目。令人光澤。兼療口乾。抱樸子仙經云。一切仙藥。不得桑枝煎不服。許學士云。政和間。予嘗病兩臂痛。服諸藥不效。依此作數劑。臂痛尋愈。

厲風門第五十三

敘曰。癘風一證。古今難之。是以斯世之妄治者多也。深達癘風之奧者。潔古、東垣二人而已。餘皆未有言也。今考古人之方六首。庶幾乎精練之奇哉。
愈風丹

苦參四兩

土蝮蛇

白花蛇

烏梢蛇

頭尾全者各一條酒浸三日去骨陰乾爲末

皂角

五斤去皮弦以無灰酒浸一宿取出用水熬膏

右以苦參、蝮蛇、白花、烏梢四味爲末。將皂角膏和丸。如梧桐子大。每服七十丸。以玉屏風散煎湯吞下。輕者三蛇得一卽效。不必全也。
厲風。手足麻木。毛落眉脫。遍身癩疹。搔癢成瘡者。此方主之。○厲風者。天地殺

物之風。燥金之氣也。故令瘡而不膿。燥而不濕。燥金之體澀。故一客於人。則營衛之行滯。令人不仁而麻木也。毛落眉脫者。燥風伐其營衛。而表氣不固也。遍身癩疹者。上氣下血俱病也。諸痛屬實。諸癢屬虛。癘風之癢。固多有蟲。而衛氣之虛。不可誣也。是證也。主燥劑以疏風。則反以助邪。往往血枯而死。故求古方之潤劑以主之。白花烏梢。土蝮三蛇者。血氣之屬也。用血氣之屬以驅風。豈不油然而潤乎。然其性中有毒。同氣相求。直達癘風毒舍之處。豈不居然而效乎。皂角之性。善於潔身。則亦可以潔病。苦參之性。善於去熱。則亦可以去風。昔人吞以防風通聖散。此方乃汗下之劑也。非營衛虛者所宜。今以玉屏風散更之。則黃耆可以排膿補表。防風可以利氣疏邪。白朮可以實脾而補肌矣。

換肌散

白花蛇	烏梢蛇	地龍	當歸
<small>酒浸各</small>	<small>酒浸各</small>	<small>去土各</small>	<small>酒製</small>
蒼朮	木鱉子	細辛	蔓荊子
<small>米泔浸七日</small>	<small>去殼</small>		
白芷	赤芍藥	威靈仙	天麻
天門冬	川芎	甘菊花	何首烏

紫參

荊芥穗

沙參

石菖蒲

胡麻炒

苦參

不灰木

草烏

炙甘草

白蒺藜

定風草即天麻苗

木賊各一兩

上件共爲末。每服五錢。食後酒調下。多飲爲妙。

大風年深不愈。眉毛墮落。鼻梁崩壞。額顱腫破者。此方主之。○身半以上。天之陽也。病則氣受之。氣受之則上病。故眉落鼻壞而顱破也。高巔之上。惟風可到。故用細辛、白芷、天麻、蔓荊、威靈、荊芥、甘菊、木賊、川芎、蒺藜、木鱉子、定風草諸物。者。氣味輕清。可以親上。可以驅風。可以勝濕。乃不灰木、石菖蒲、草烏、蒼朮。則直可以療濕矣。若苦參、紫參、沙參、何首烏。皆用之以解毒。當歸、甘草、門冬、赤芍、胡麻。皆養血清氣於驅風燥濕之隊者也。地龍者。泥蟠之物。濕土所化也。故能引諸藥以就濕。白花烏梢者。奔騰之類。風動之象也。故能君諸藥以驅風。此易所謂雲從龍。風從虎也。

凌霄散

蟬殼

地龍炒

白僵蠶炒

全蠍炒各七箇

凌霄花半兩

右爲末。每服二錢。熟酒調下。無時。嘗坐於浴室湯中。一時許。服藥神良。癘風。此方常獲奇效。○癘風攻擊氣血。木石不能獲效者。非其類也。故用血氣之屬。能主風者以治之。蟬退主風熱。地龍主風濕。僵蠶全蠍主風毒。凌霄花主風壞之血。斯五物者。皆有微毒。用之以治癘風。所謂衰之以屬也。然必坐於浴室湯中服藥者。所以開泄腠理。使邪氣有所出爾。

補氣瀉榮湯

升麻

連翹

各六分

生地黄

黃芩

各四分

當歸

蘇木

全蠍

地龍

黃耆

黃連

各三分

桔梗五分

甘草

半錢

人參二分

胡桐淚

一分

桃仁三枚

麝香

少許

虻蟲

一枚去翅足微炒

水蛭

二枚炒烟盡

此東垣治癘風之方也。○補氣瀉榮。治癘風之妙旨也。衛氣虛而邪襲。故用人參、黃耆、甘草以補氣。營血壞而爲癘。故用虻蟲、水蛭、桃仁、蘇木以消瘀。全蠍、地

龍引諸藥至風濕結聚之處。乃麝香者。利關竅而無所不之。升麻、連翹、桔梗入氣而解其熱。黃連、黃芩入藏而清其氣。當歸、地黃入血而調其新。若胡桐淚者。用之以除大毒之熱。又足以殺癘風之蟲而除頑腫也。

蝮蛇

泉州有客盧元欽患大風。惟鼻根未倒。屬五月五日。官取蝮蛇膽欲進。或言肉可以治風。遂取一截蛇肉食之。三五日漸可。百日平復。蓋蛇之奔騰疾走。皆風象也。故爲逐風之鱗。或嫌其毒而唾之。不知醫之所取者。妙在其毒也。易曰。同氣相求。有此蛇毒。方能就彼癘毒。如水流濕。火就燥。各從其類耳。內經曰。衰之以屬。正是此意。

皂角刺

癘風眉髮墮落者。取皂角刺九蒸九曬爲末。每服酒下二錢。久服。眉髮再生。肌膚悅潤。眼目倍明。

喉閉門第五十四

絃曰。喉者。氣之關隘也。通則利。塞則害。無問其標本而當急治焉者也。今考八方於後。皆古人已試之程規。觸類而通之。則活人之機。疊疊矣。

雄黃解毒丸

雄黃一兩

鬱金一錢

巴豆十粒
去油皮

共末爲丸。每服五分。津液下。

纏喉急閉者。此方主之。○纏喉急閉。軀命之所關也。急治則生。緩治則死。是方也。雄黃能破結氣。巴豆能下稠涎。鬱金能散惡血。能此三者。閉其通矣。丹溪翁生平不用厲藥。而此方者。其不得已而用之乎。

稀涎散

猪牙皂角

四條去黑皮

白礬

一兩

共爲末。每服三字。

喉閉數日不能食者。以此方吐之。涎盡病愈。○皂角之辛利。能破結氣。白礬之鹹苦。能湧稠涎。數數湧之。涎去而病失矣。

甘桔防風湯

甘草五錢

桔梗

防風各三錢

咽痛者。此方主之。○甘草之甘。能緩喉中之急。桔梗之苦。能下喉中之氣。防風之辛。能散喉中之壅。

火刺纏喉風法

用巴豆油塗紙上。撚成條子。以火點着。纔烟起。即吹滅之。令患者張口。帶火刺於喉間。俄頃吐出紫血半合。即時氣寬能言。及啖粥飲。蓋火氣熱處。巴油皆到。火以散之。巴以瀉之。烟以吐之。乃一舉而三善之方也。

鍼急喉閉方

於患者手大指外邊指甲後一韭葉許。鍼之出血。男左女右取之。血出即效。如大段危急。兩手大指俱鍼之。其效甚捷。蓋喉嚨者肺之系。所鍼之處。乃少商也。為肺之井穴。故出血而愈。

喉中紅赤用鍼出血法

凡患者喉中紅赤。宜用鍼從旁鍼之。出血即愈。所以必欲旁鍼者。避夫痃門穴。犯之令人失音故耳。

筆鍼

名醫錄云。李王公主患喉癰。數日痛腫。飲食不下。召到醫官。盡言須用刀鍼潰破。公主聞用刀鍼。哭不肯治。痛迫。水穀不入。忽有一草澤醫曰。某不用刀鍼。只用筆頭蘸藥。癰上。霎時便潰。公主喜。令召之。方兩次上藥。遂潰出膿血一盞餘。便寬。兩日瘡無事。令供其方。醫云。乃以鍼繫筆心中。輕輕劃破而潰之爾。他無方也。

巧匠取喉鈎

宋咸平中。職方魏公在潭州。有數子弟皆幼。因相戲。以一釣竿垂鈎。用棗作餌。登陸釣雞雛。一子學之。而誤吞其鈎。至喉中。急引之。而鈎鬚已逆。不能出。命諸醫不敢措手。魏公大怖。徧問老婦。必能經歷。時有一老婦人。年餘九十歲。言亦未嘗見此。切料有識者可出之。時郡中莫都料性甚巧。令聞魏公。魏公呼老婦責之曰。吾子誤吞鈎。莫都料何能出之。老婦曰。聞醫者意也。莫都料曾在水中打碑塔。添仰瓦。魏公悅。親屬勉之曰。試詢之。遂召莫都料至。沉思良久曰。要得一蠶繭。及念珠一串。公與之。都料遂將繭剪如錢。用物柔其四面。以油潤之。中

通一小竅。貫之鈎線。次貫念珠三五枚。令兒正坐開口。漸加念珠。引之至喉。覺至繫鈎處。用力向下一推。其鈎已下而脫。即向上急出之。見蘭錢向下裏定鈎。鬚須臾而出。並無所損。魏公大喜。遂厚賂之。公曰。心明者意必大巧。意明者心必善醫。

頭病門第五十五

紱曰。頭者。身之元首。一有疾苦。無問標本。宜先治之。失而不治。雖有股肱。弗能用矣。今考十方以治頭。所以尊元首而用股肱也。有醫貴者。尙知務哉。
加味二陳湯

半夏

陳皮

茯苓

黃芩酒炒

甘草

川芎

細辛

黃連酒炒

薄荷

蒼耳

膽南星

頭痛常發者。名曰頭風。偏於一邊而痛者。名曰偏頭風。宜此方主之。○丹溪云。濕土生痰。痰生熱。熱生風。是以頭風爲病。多見於嗜酒之人也。偏於一邊而痛。

者。其說有二焉。一則曰氣血有虛實。左屬血分。右屬氣分也。一則曰身半以上。天氣居之。天不足西北。故俱感於邪而右甚也。是方也。半夏、陳皮、茯苓、甘草治痰之二陳湯也。加南星之燥。皆所以治痰耳。而黃芩、黃連者。用其苦寒以治熱也。若川芎、細辛、薄荷、蒼耳。皆治風之品也。高巔之上。惟風可到。是故用之。

辛夷散

辛夷

南星

蒼耳

酒芩

川芎

頭風鼻塞者。此方主之。○鼻氣通乎天。清陽往來之竅也。風盛則氣壅。故令鼻塞。內經曰。清陽出上竅。又曰。氣薄則發泄。辛夷、川芎、蒼耳。皆清陽氣薄之品也。故可透氣竅。佐以南星者。醒其風痰。佐以酒芩者。清其風熱也。

三五七散

細辛半兩

防風四兩

乾薑炮二兩

附子三枚

山茱萸去核

茯苓各三兩

共爲細末。每服二錢。溫酒食前調下。

大寒中於風府。令人頭痛。項筋緊急者。此方主之。○風府。腦後之穴。督脈之所主也。寒者。天地嚴凝之氣。故令項筋緊急。乾薑。附子。辛熱之物也。可以散真寒。細辛。防風。氣薄之品也。可使至高巔。山萸。養督脈之陰。茯苓。和督脈之陽。河圖之義。奇者為陽。偶者為陰。此方名曰三五七者。以補陽為義也。

半夏白朮天麻湯

半夏 薑炒

陳皮 去白

麥芽 各七分半

人參

白朮 炒

黃耆 炙

蒼朮 米泔浸七日

天麻

白茯苓

神麴 炒

澤瀉 各五分

黃柏 一分半

乾薑 二分

痰厥頭痛目眩者。此方主之。○痰厥者。濕痰厥逆而上也。痰氣逆則上實。故令頭痛目眩者。目前如見黑色也。東垣曰。頭痛苦甚。謂之足太陰痰厥。非半夏不能除。眼黑頭旋。風虛內作。非天麻不能療。人參黃耆之甘溫。可以瀉火。亦可以補中。蒼朮白朮之苦甘。可以去濕。亦可以健脾。澤瀉茯苓。能利濕淫之邪。神麴麥芽。能消水穀之滯。橘皮。乾薑。所以開胃調中。而黃柏者。取其苦辛。能療少火。

在泉發燥也。

丹溪治頭眩方

南星

半夏

枳殼

桔梗

陳皮

甘草

茯苓

黃芩

痰火頭眩者。此方主之。○痰之生也。原於濕。故用半夏、南星以燥濕。茯苓以滲濕。甘草健脾以制濕。痰之滯也。原於氣。故用陳皮以利氣。桔梗以下氣。枳殼以破氣。氣滯則積而有餘。氣有餘便是火。故用黃芩以瀉火。

香橘飲

木香

白朮

橘皮

半夏麴

茯苓

砂仁

丁香

炙甘草

氣滯不能運痰。而作頭眩者。此方主之。○木香、丁香、砂仁、橘皮。所以行氣。白朮、半夏、甘草、茯苓。所以健脾。脾運則痰運。氣行則痰行。

清空膏

羌活

防風

黃連

黃芩

川芎五錢

柴胡七錢

炙甘草一兩五錢

上件共爲末。每服二錢。茶湯調如膏。捺在口內。少用白湯送下。

風熱頭痛者。此方主之。○風者。天之陽氣也。人身六陽之氣。皆聚於頭。復感於風。是重陽而實矣。故令熱痛。辛甘發散爲陽。故用羌活、防風、川芎、柴胡、甘草。乃黃芩、黃連者。苦寒之品也。以羌活之屬君之。則能去熱於高巔之上矣。

八珍湯

人參

白朮

茯苓

甘草

當歸

川芎

芍藥

地黃

血虛頭痛眩暈。此方主之。○氣血。人身之陰陽也。兩相得則治。一有失則病。故陰血虛損。則陽氣獨治。陽氣親上。故令頭痛眩暈。是方也。當歸、川芎、芍藥、地黃。味厚養血之品也。復用人參、白朮、茯苓、甘草甘溫之品。以養氣者。何哉。太極之妙。陰生於陽。故兼用此輩。以益氣耳。或問頭痛而用人參。陽邪不益亢乎。余曰。虛火可補。人參、黃耆之類。此之謂也。

瓜蒂散搐鼻法

苦瓜蒂

赤小豆等分

濕熱淫於顛頂之上。頭目偏痛者。令病人嚙水一口。以此藥一字。吹入痛邊鼻中。泄出黃水即減。○苦能湧泄。故用瓜蒂。燥能勝濕。故用赤豆。實者瀉之。故行搐法。乃直搗巢穴之兵也。凡云一字者。二分半也。取一文四字之義。

出血法

唐高宗苦風眩頭重。目不能視。疾甚。召秦鳴鶴。張文中診之。鳴鶴曰。風毒上攻。若刺頭出少血。即愈矣。天后自簾中怒曰。此可斬也。天子頭上。豈是試出血處耶。上曰。醫之議病。理不加罪。且吾頭重悶。殆不能忍。出血未必不佳。命刺之。鳴鶴刺百會及腦戶出血。上曰。吾目明矣。言未畢。后自簾中頂禮拜謝之曰。此天賜我師也。躬負繒寶。以遺鳴鶴。崑謂諸痛爲實。理宜瀉之。內經言出血者屢矣。必以血變而止。今南人惡於鍼石。每畏出血。北人猶然行之。經曰。惡於鍼石者。不足與言至巧。故醫之巧者。必兼鍼石。嗚呼。丹溪之賢。不知鍼石。今世人羣然以醫之大成稱之。此子禽之賢子貢也。使翁作於九原。則一言以爲不知。必於斯人而示之矣。

腹痛門第五十六

敘曰。腹中者。中氣之所居也。一有疾痛。則壞中氣。百骸十二官。胡然受氣而榮養乎。故考名方十一首。以治腹痛。

二薑丸

乾薑炮

良薑等分

腹痛脈遲者。此方主之。○腹痛之由有數種。今日脈遲。則知寒矣。故用乾薑良薑之辛熱者以主之。辛可以破滯。熱可以散寒。不滯不寒。痛斯失矣。

丁香止痛散

丁香

小茴香

良薑

炒甘草

此亦治寒氣腹痛之方也。○寒氣入經。澀而稽遲。故令腹痛。經曰。得炁則痛立止。炁熱也。故用丁香茴香良薑之辛熱者以主之。而復佐以甘草者。和中氣於痛損之餘也。

鹽湯探吐法

燒鹽半升

溫湯升五大

和服探吐。

諸腹痛連於脅膈。手足冷。脈來伏匿者。此方主之。○凡腹痛連於脅膈。多是飲食痰飲填塞至陰。抑遏肝膽之氣。肝者將軍之官。膽者少陽上升之令。抑之不得敷暢。兩實相搏。令人腹痛。所以痛連脅膈者。少陽之經行於兩脅。厥陰肝脈貫於膈也。手足冷者。少陽之氣不敷也。脈來伏者。為痛甚。陽氣閉藏之象也。經曰。木鬱則達之。故用吐法。鹹能軟堅。故用燒鹽。

扶陽助胃湯

附子二錢

人參

草豆蔻

乾薑

白芍藥

炙甘草

官桂各一錢五分

吳茱萸

陳皮

白朮

益智各五分

客寒犯胃。胃脘當心而痛。脈來沉遲者。此方主之。○客寒犯胃。多是飲食寒冷。或因食後呼吸冷氣所致。脈來沉者。為裏。遲者。為寒。是方也。附子、乾薑、官桂、吳茱萸、草豆蔻、益智仁。辛熱之品也。用之所以扶陽邪之所湊。其氣必虛。故用人

參、白朮、甘草甘溫之品以助胃。用芍藥者取其味酸能瀉土中之木。用陳皮者取其辛香能利腹中之氣。

三因七氣湯

半夏薑汁製五錢

茯苓四錢

厚朴三錢薑汁炒

紫蘇二錢

七氣相干。陰陽不得升降。攻衝作痛者。此方主之。○三因者。內因、外因、不內外因也。七氣者。寒氣、熱氣、怒氣、恚氣、喜氣、憂氣、愁氣也。以三因而鬱。七氣升降有妨。則攻衝而痛。是方也。紫蘇之辛芳。可使散七氣。厚朴之苦溫。可使下七氣。半夏之辛溫。茯苓之淡滲。可使平水穀相干之七氣。

桂枝加大黃湯

桂枝洗淨

甘草

生薑各三兩

芍藥六兩

大棗十二枚

大黃一兩

腹中寒熱不調而大痛者。此方主之。○寒熱不調而大痛者。先食熱物。後食寒物。二者不調。而令大痛之類也。是方也。桂枝能散真寒。大黃能瀉實熱。芍藥能健脾而和肝。甘草能調中而益氣。生薑可使益胃。大棗可使和脾。

玄胡酒

玄胡索末一兩為清酒入一溫升

婦人氣血攻刺疼痛。連於脅膈者。此方主之。○玄胡索。味苦辛。苦能降氣。辛能散血。淬之以酒。則能達乎經脈矣。

韭汁酒

韭菜汁清酒等分

脅膈常時疼痛。得熱則減。得寒則增者。此方主之。○上件證。死血也。故用韭汁消瘀。清酒行滯。

小胃丹

芫花好醋拌勻炒大戟長流水煮一甘遂洗淨晒

大黃酒潤蒸熟晒黃柏三兩

上件為末。粥丸麻子大。每服二三十丸。臨臥津液吞下。或白湯一口送下。取

其膈上之濕痰。以意消息之。欲利則空心服。

痰涎畜積胃脘。胸腹作痛者。此方主之。○小消也。小胃者。消去胃中之痰物也。

甘遂、芫花、大戟。能下十二經之濕痰。大黃佐之下行。黃柏制其辛烈。是方也。大毒之劑。攻殺擊刺之兵也。善用則治。弗善用之則亂。故醫者人之司命。實實虛虛。弗可弗察也。

雄檳丸

雄黃

白礬

檳榔等分

共爲末。飯丸黍米大。每服五分。食遠下。腹中乾痛有時者。蟲痛也。此方主之。○乾痛者。不吐不瀉而但痛也。有時者。淡食而飢則病。厚味而飽則否也。浮粟經曰。腹疾乾痛有時。當爲蟲。此之謂也。是方也。雄黃、白礬、檳榔。皆殺蟲之良劑也。故主之。蟲盛者。以吐下驅蟲之劑加之。視人虛實可也。

冰煎理中丸

宋徽廟常食冰。因致腹痛。國醫進藥俱不效。乃召泗州楊吉老服之。吉老曰。宜主理中丸。上曰。服之屢矣。不驗。吉老曰。所進湯使不同。陛下之疾。得之食冰。今臣以冰煎藥。此欲已其受病之原也。果一服而瘳。崑謂是義也。大易所謂同氣

相求。內經所謂衰之以屬也。自非吉老之良。烏能知此。

脅痛門第五十七

紘曰。脅者。肝膽之區也。肝爲盡陰。膽無別竅。怒之則氣無所泄。鬱之則火無所越。故病證恆多。今考名方三首。示大觀爾。

抑青丸

黃

連一味。葉黃湯潤一宿。暴乾爲末。作丸。

左脅作痛者。此方主之。○肝。東方木也。南面而立。則左爲東矣。故左脅爲肝之部位。所以痛者。木氣實也。木欲實。金當平之。以黃連瀉去心火。使金無所畏。自足以平肝。故曰抑青。此古人實則瀉其子。治之以其所不勝也。

小柴胡湯

柴胡

黃芩

人參

甘草

半夏

生薑

大棗

兩脅作痛者。此方主之。○少陽膽經行於兩脅。故兩脅作痛。責之少陽。是方也。

柴胡味辛而氣溫。辛者金之味。故足以平木。溫者春之氣。故足以入少陽。佐以黃芩。瀉其實也。佐以半夏。破其滯也。而必用夫人參。甘草者。恐木病傳脾。而先實其土也。用夫生薑。大棗者。調其營衛。不令經氣壅滯也。
嚴氏推氣散

枳殼

桂心

片子薑黃各半兩

炙甘草五錢

肝氣脅痛。此方主之。○肝藏血而主怒。故病則氣血俱病。越人云。東方常實。實則可以瀉矣。故用枳殼破其氣。薑黃利其鬱。桂心能引二物至於痛處。又曰。木得桂而柔。以故用之。乃甘草者。取其和緩之氣。以調肝木之急爾。

腰痛門第五十八

岐曰。腰者。腎之府。水火之司。有生之根也。善調之。則根固而葉榮。不善調之。則根枯而葉萎。考方四首。而治腰之大者見矣。
青娥丸加黃柏知母方

破故紙酒浸少時略炒

川草薢童便浸一宿

杜仲薑汁炒斷絲

黃柏鹽水炒

知母酒炒 牛膝去蘆各四兩 胡桃肉去皮炮八兩 蜜丸
 腎虛腰痛者。此方主之。○腎坎象也。水火並焉。水衰則陽光獨治而令腎熱。火衰則陰翳襲之而令腎寒。水火俱衰則土氣乘之而邪實於腎。均之令人腰痛。也是方也。破故紙、杜仲、胡桃、味厚而溫。黃柏、知母、牛膝、味厚而寒。溫者可使養陽。寒者可使養陰。均之味厚則均之能走下部矣。若草薢者。苦燥之品。足以利水土之邪而平其氣也。曰青娥者。涵陽之坎也。假之以名方。明其全夫水火之真爾。

獨活寄生湯

獨活	細辛	牛膝	桑寄生 <small>如無用續斷</small>
秦艽	茯苓	桂心	白芍藥 <small>酒炒</small>
人參	防風	熟地黃	杜仲 <small>薑汁炒斷絲</small>
川芎 <small>酒洗</small>	當歸 <small>酒洗</small>	甘草 <small>各三兩</small>	

每服五錢。

腎氣虛弱。肝脾之氣襲之。令人腰膝作痛。屈伸不便。冷痺無力者。此方主之。○

腎水藏也。虛則肝脾之氣湊之。故令腰膝實而作痛。屈伸不便者。筋骨俱病也。靈樞經曰。能屈而不能伸者。病在筋。能伸而不能屈者。病在骨。故知屈伸不便。為筋骨俱病也。冷痺者。陰邪實也。無力者。氣血虛也。是方也。獨活寄生。細辛。秦艽。防風。桂心。辛溫之品也。可以升舉肝脾之氣。肝脾之氣升。則腰膝弗痛矣。當歸。熟地。白芍。川芎。杜仲。牛膝者。養陰之品也。可以滋補肝腎之陰。肝腎之陰補。則足得血而能步矣。人參。茯苓。甘草者。益氣之品也。可以長養諸藏之陽。諸藏之陽生。則冷痺去而有力矣。

腎着湯

乾薑

茯苓各四錢

炙甘草

白朮炒各二錢

腎着於濕。腰冷如冰。若有物者。此方主之。○腎主水。脾主濕。濕勝則流。必歸於坎者。勢也。故曰腎着。腰為腎之府。濕為陰之氣。故令腰冷如冰。若有物者。實邪着之也。乾薑辛熱之物。辛得金之燥。熱得陽之令。燥能勝濕。陽能曝濕。故象而用之。白朮。甘草。甘溫之品也。甘得土之味。溫得土之氣。土勝可以制濕。故用以佐之。白茯苓。甘淡之品也。甘則益土以防水土。淡則開其竅而利之。此圍師必缺。

之義也。

猪腰青鹽杜仲方

猪腰一具

青鹽三錢

杜仲錢末五

先將猪腰剖開。後入青鹽杜仲於內。濕紙包裹煨熟。空心服之。小小腰痛。此方主之。○易曰。方以類聚。物以羣分。故猪腰可以補腰。經曰。五味入口。鹹先入腎。故青鹽可以就下。杜仲辛甘。益腎之物也。君以猪腰。佐以青鹽。則直走腎而補之矣。

七疝門第五十九

敘曰。疝。隱疾也。證有七。七者皆有虛實。今考七方。誌七疝耳。若虛實之辨。則在夫人之變通也。

吳茱萸加附子湯

吳茱萸

生

薑各三錢

人

參一錢

大

棗二枚

附子二錢

水煎涼服。

寒疝腰痛。牽引睪丸。屈而不伸。尺內脈來沉遲者。此方主之。○古稱七疝。寒、水、筋、血、氣、狐、癰也。寒疝之由。必是寒客下體。如坐於卑冷。涉於寒淵之所致也。寒氣自外入內。束其少火。鬱其肝氣。故令腰痛。痛而牽引睪丸者。肝之經絡環陰器故也。寒主收引。故令屈而不伸。尺內主腰。脈來沉遲。皆陰脈也。寒亦明矣。故用吳茱萸、附子之辛熱者以溫其寒。用生薑、大棗之辛溫者以和其氣。邪傷之後。其正必虛。人參之補。可以去其虛矣。

升陽除濕湯

柴胡

羌活

蒼朮

黃耆各一錢

防風

升麻

藁本

炙甘草各一錢

蔓荊子七分

當歸

獨活各五分

水疝者。腎囊腫大。陰汗不絕。宜此方主之。○子和云。水疝者。得之飲水醉酒。勞於使內。其言當矣。蓋飲水醉酒。則濕氣勝。勞於使內。則腎氣虛。腎氣虛。則濕勝而流坎者勢也。故令腎囊腫大如水晶。陰汗不絕如罅漏也。內經曰。下者舉之。

又曰。風能勝濕。是方也。柴胡、羌活、蒼朮、防風、升麻、藁本、蔓荊、獨活。皆味辛而氣清。風藥也。亦升藥也。故可以勝濕。可以升陽。而黃耆之甘。可使托其陷下之氣。甘草之溫。可使培其防水之土。當歸之潤。可使調榮血於風藥之隊也。泄瀉門胃苓湯亦可酌用。

伏龍肝摻法

此即竈心土也。土足以防水。燥足以勝濕。水疝者。以此物細末摻之腎囊。亦良法也。

甘草梢黑豆湯

生甘草梢二兩 黑豆半升

水五倍。煎去半。空心服。

筋疝者。此方主之。○筋疝者。莖筋挈痛。挺脹不堪也。子和云。此以邪術得之。邪術者。房術春方之故也。治宜解毒緩急。故用甘草梢、黑豆以主之。

按摩法

外腎因撲損而傷。睪丸偏大。有時疼痛者。中有瘀血。名曰血疝。宜於夜分之時。

自以一手托其下。一手按其上。由輕至重。玩弄百迴。彌月之間。瘀血盡散。陳氣皆行。誠妙術也。雖年深日久。無不愈之。

虎潛丸

黃柏鹽酒炒

知母鹽酒炒

熟地黃各三兩

白芍藥酒炒

陳皮鹽水潤

牛膝各二兩

龜板酥炙

鎖陽酒潤

當歸各一兩

虎脛骨一兩

羊肉為丸

氣疝者。拂鬱則舉丸腫大。悲哀則不藥而消。宜此方主之。○邪之所湊。常乘其虛。拂鬱而舉丸腫大者。肝氣乘腎之虛也。悲哀不藥而消者。氣有所泄也。先醫云。肝腎之病同一治。故黃柏、知母、熟地、芍藥、牛膝、當歸、鎖陽。味厚之品也。可以補腎。亦可以補肝。龜得天地之陰氣最厚。虎得天地之陰氣最雄。以血氣中之陰類以補陰。欲其同氣相求耳。陳皮者。取其能推陳腐之氣。羊肉者。取其能補五藏之陽也。或問何以不用橘核仁、細辛、枳實、川練子、青皮之輩。余曰。此皆破氣藥也。昔醫固多用之。然而治標云爾。况蹈重虛之戒乎。氣實者用之可也。

補中益氣湯加黃柏知母方

人參

黃耆

白朮

當歸

升麻

柴胡

陳皮

甘草

黃柏

知母

狐疝者。晝則氣出而腎囊腫大。令人不堪。夜則氣入而腫脹皆消。少無疾苦。宜此方主之。病愈而止。○狐之爲物也。晝則出穴而溺。夜則入穴而不溺。以斯證肖之。故曰狐疝。夫晝陽也。夜陰也。晝病而夜否者。氣病而血不病也。故用人參、黃耆、白朮、甘草以益氣。方內有升麻、柴胡。則能舉其陷下之陽。方內有黃柏、知母。則能益夫不足之坎。當歸味辛。可以活其壅滯之血。陳皮氣芳。可以利其陳腐之氣。或問何以不主辛香流氣之劑。余曰。本以氣不足而致疾。復以流氣之劑主之。非惟無益。而又害之矣。或又曰。然則子和流氣之劑非歟。余曰。吾惟酌之於理而已。胡泥乎子和。

癰疽無治法

癰疽者。頑疽也。舉丸雖大而無疾苦也。此以父子相傳。得於有生之初已然。非

若有生之後三因所致之疾也。故不必主治。或有先是癰疽。後來疼痛疾苦者。此兼前件六證也。宜於前方消息之。

脚氣門第六十

敘曰。脚氣類傷寒。則察之難。脚氣能令人死。則治之難。一病而有二難。是非可以淺淺論脚氣矣。考方八首。同志者尙教我哉。

防己飲

木通

防己

蒼朮鹽炒

生地黄酒炒

白朮

檳榔

黃柏酒炒

甘草梢

川芎

犀角

脚氣憎寒壯熱者。此方主之。○脚氣者。濕熱在足。而作氣痛也。濕熱分爭。濕勝則令人憎寒。熱勝則令人壯熱。此其爲證。亦有兼頭疼者。頗類傷寒。惟其得病之始。本於脚氣爲異耳。又不可以脚腫爲拘。亦有痛而不腫者。名曰乾脚氣。亦有緩縱不隨者。名曰緩風。亦有疼痛不仁者。名曰濕痺。亦有轉筋攣急者。名曰

風毒。此在醫者體會而辨證爾。各有治法不同。大抵脚氣之疾。壅疾也。喜通而惡塞。故孫真人曰。脚氣之疾。皆由氣實而死。終無一人以服藥致虛而殂。故脚氣之人。皆不得大補。亦不得大瀉。是方也。木通。防己。檳榔。通劑也。可以去塞。犀角。黃柏。生地黃。甘草梢。寒劑也。可以去熱。蒼白二朮。燥劑也。可以去濕。然川芎能散血中之氣。犀角能利氣中之血。先痛而後腫者。氣傷血也。重用川芎。先腫而後痛者。血傷氣也。重用犀角。若大便實者。加桃仁。小便澀者。加牛膝。內熱加芩連。時熱加石膏。有痰加竹瀝。全在活法。初勿拘也。凡脚氣臨心。喘息不止。嘔吐不休者。皆死。水犯火故也。

越婢湯

石膏 一兩

白朮 半兩

麻黃 七錢

附子 半箇

甘草 二錢

脚氣痛腫。寒熱相搏。脈來沉細者。此方主之。○氣不得通則痛。血不得行則腫。此脚氣之所以爲壅疾也。寒熱相搏者。邪氣與正氣相激搏也。脈來沉者爲裏。細者爲陰。名曰越婢者。越以發越爲義。婢卑也。是方能發越至卑之氣。故以越

婢名之。石膏性寒而重。寒能勝熱。重能就下。附子味辛而熱。辛能行壅。熱能壯氣。佐之以麻黃。則寒熱之壅滯。皆從汗孔而泄矣。用白朮、甘草。取其氣味溫平。能致沖和之氣於發越之餘耳。而甘草獨少者。恐其性緩。多之不能速達於卑下之區也。

六物附子湯

附子

桂心

防己各四錢

甘草炙二錢

白朮

茯苓各三錢

水煎冷服。

寒濕脚氣。疼痛不仁。兩尺脈來沉細者。此方主之。○此痺證也。內經曰。寒氣勝者為痛痺。濕氣勝者為着痺。今疼痛不仁。是寒而且着也。兩尺主兩足。脈來沉者為裏。遲者為寒。是方也。用桂心、附子溫其寒。防己、白朮制其濕。甘草、茯苓。脾家藥也。扶土氣之不足。制濕氣之有餘。然必冷服者。欲附、桂之性行於下。而不欲其橫於上也。

椒湯洗法

川椒一兩 葱一握

薑如掌大一塊碎

水一盆煎湯洗之。

凡人患寒濕脚氣疼痛不仁者。內服煎劑。外宜以此湯熏洗之。○川椒辛熱。能療寒濕之痺。薑葱辛溫。能利肌膚之氣。又曰。諸脚氣者皆壅疾也。洗之無有不良。

當歸拈痛湯

當歸 知母酒炒

猪苓

澤瀉

白朮 防風錢各一

炙甘草

黃芩酒炒

羌活 茵陳雨各一

升麻

苦參酒炒

人參 葛根 蒼朮錢各二

脚氣疼腫。濕熱發黃者。此方主之。○脚氣內壅。故令疼腫。濕熱不得泄越。故令發黃。是方也。羌活、防風、升麻、葛根、蒼朮皆辛散之劑也。可以泄越壅塞之脚氣。苦參、黃芩、茵陳、知母皆苦寒之品也。可以解除內壅之濕熱。乃澤瀉、猪苓、白朮。淡滲物耳。能導利下焦之濕。當歸、人參、甘草者。所以養血於敗壞之餘。益氣於

泄越之後也。

升陽順氣湯

升麻

柴胡

草豆蔻

陳皮去白

當歸錢各一

黃耆四分

半夏

人參各三分

甘草

柏皮各五分

神麴一錢五分

脾氣虛弱。胃氣下注。令人足跗氣腫者。此方主之。○脾雖具坤靜之德。而有乾健之運。故脾氣冲和。則升清降濁。無跗腫也。脾氣一虛。土不制水。則胃中水穀之氣下注。隨經而下。令人跗腫。是方也。半夏、甘草。所以益脾。人參、黃耆。所以益氣。神麴、豆蔻。所以消磨水穀。升麻、柴胡。所以升舉胃氣。當歸能使諸藥歸脾。陳皮能利中宮之氣。而柏皮者。取其味厚。能引升麻、柴胡下走足跗。而升舉其陷下之陽爾。

杉木湯

杉木節升一大

橘葉一升無皮

檳榔

榔七枚火碎

童便升三大

共煮一升半。分二服。得快利。停後服。

唐柳子厚救死方云。元和十二年二月。得乾脚氣。夜成瘡絕。左脅有塊。大如石。且死。因大寒。不知人三日。家人號哭。滎陽鄭洵美傳杉木湯服半。食頃。大下三次。氣通塊散。病蓋死矣。會有救者。因得不死。恐他人不幸有類予病。故以方傳焉。崐謂此云乾脚氣者。謂脚氣入腹。不得通泄也。脚氣干於肝。則左脅有塊。脚氣干於脾。則令人痞。脚氣干於心。則令人絕。病絕於夜者。夜氣助其陰邪也。因大寒不知人者。陰進而陽不舒也。是方也。杉木節。質重而氣芳。質重則能達下。氣芳則能疏壅。橘葉味苦而厚。過於青皮。檳榔質實而重。等於鐵石。味厚則泄。質重則降。故能令邪氣大下。童便鹹寒物也。鹹則能引邪氣以走濁陰。寒則能平熱氣。使不上逆。經曰。道之遠者。制大其服。故其量數五升云。

傅螺法

醫說云。白石董守約。苦脚氣攻注。或告之槌數螺。傅兩股上。便覺冷氣趨下。至足而安。蓋螺性能泌別清濁。故能療脚氣之濕熱也。

宣州木瓜

顧安中。廣德人。久患脚氣。筋急腿腫。行履不得。因至湖州附船。船中先有一袋

物。為腿疼痛。遂將腿閣之袋上。微覺不痛。及筋寬而不急。乃問梢人。袋中何物。應曰。宣瓜。自此脚氣頓愈。噫。藥氣相感。且能愈疾。則用藥當病者。從可知矣。

眼疾門第六十一

敘曰。眼。五官之一也。匪明則無以作哲。故眼重焉。醫眼有專科。亦以其重耳。今考名方十五首。夫人酌其宜而用之。則復明之一助也。

消風養血湯

荆芥

蔓荊子

菊花

白芷

麻黃去節

桃仁去皮

紅花酒炒

防風

川芎各五分

當歸酒洗

草決明

石決明

白芍藥酒炒

甘草各一錢

眼痛赤腫者。此方主之。○痛者。邪氣實也。赤者。風熱傷血也。腫者。風熱注之也。是方也。荆芥、菊花、蔓荊、白芷、麻黃、防風、川芎。可以消風。亦可以去熱。風熱去。則赤腫去矣。桃仁、紅花、當歸、芍藥、草石決明。可以消瘀。可以養血。亦可以和肝。瘀

消則不痛。養血和肝則復明。乃甘草者。和諸藥而調目氣也。

益陰腎氣丸

熟地黃二兩

生地黃

山藥

山茱萸

當歸梢

五味子

牡丹皮

柴胡各五錢

澤瀉

茯苓各二錢五分

腎虛目暗不明者。此方主之。○精生氣。氣生神。故腎精一虛。則陽光獨治。陽光獨治。則壯火食氣。無以生神。令人目暗不明。王冰曰。壯水之主。以制陽光。故用生熟地黃。山萸。五味。歸梢。澤瀉。丹皮。味厚之屬。以滋陰養腎。滋陰則火自降。養腎則精自生。乃山藥者。所以益脾而培萬物之母。茯苓者。所以養神而生明照之精。柴胡者。所以升陽而致神明之氣於睛明之窠也。孫思邈云。中年之後有目疾者。宜補而不宜瀉。可謂開斯世之矇矣。東垣此方其近之。

療本滋腎丸

黃柏酒炒

知母酒炒等分

共末為丸。空心鹽湯下百丸。

此亦治腎虛目暗之方也。○眼者肝之竅。肝木藏也。得水則榮。失水則枯。故用黃柏。知母之味厚者以滋腎水。所謂虛則補其母也。是方也。雖曰補腎。亦瀉之之類也。脾強目暗者宜主之。脾胃壞者非所宜也。

乾熟地黃丸

人參一錢

當歸身

酒黃芩錢各五

乾熟地黃一兩

柴胡八錢

生地黃酒洗一錢半

炙甘草

天門冬去心

地骨皮

枳殼麸炒

黃連酒炒

五味子錢各三

血弱不能養心。心火旺盛。肝木自實。瞳子散大。視物不清者。此方主之。○肝者。心之母。心火旺盛。故令肝木自實。肝主風。心主火。瞳子散大。風火動搖之象也。瞳子者主照物。今而散大。宜其視物不清矣。越人云。實則瀉其子。虛則補其母。火是肝之子。故用芩連。骨皮。生地以瀉火。水是肝之母。故用熟地。門冬。五味以滋水。內經曰。陽氣者。精則養神。故又以人參。甘草益其陽氣。而枳殼者。所以破其滯泥。柴胡者。所以升其清陽也。清升而目自明矣。經曰。目得血而能視。故又以當歸佐之。

補陽湯

肉桂去一錢皮

知母炒

當歸酒洗

生地黄酒洗

白茯苓

澤瀉

陳皮各三錢

白芍藥酒炒

白朮炒

人參

黃耆炙

防風

羌活

獨活

熟地黄

甘草各一兩

柴胡二兩

青白目翳者。此方主之。○陽不勝其陰。則生目翳。所謂陰盛陽虛。則九竅不通。乃陰埃障日之象也。是方也。人參、黃耆、白朮、茯苓、甘草、陳皮、甘溫益氣之品也。固所以補陽。柴胡、羌活、獨活、防風、辛溫散翳之品也。亦所以補陽。知母、當歸、生熟地黄、芍藥、澤瀉。雖曰養陰。亦所以濟夫羌、防、柴、獨。使不散其真陽耳。是亦所以補陽也。用肉桂者。取其辛熱。熱者火之象。可以散陰翳。辛者金之味。可以平肝木。蓋眼者。肝木之竅。以故用之。

百點膏

麝仁去皮尖三錢

防風八錢

黃連淨二兩

當歸身

甘草各六錢

前藥剉細。以水五碗同煎。半乾去渣。再煎至滴水不散。以淨蜜等分加入。又熬少時爲度。日可五七次用之。名曰百點膏。蓋欲使藥力相繼耳。東垣云。張濟氏病翳六年。以至遮蔽瞳人。視物有雲風之象。因用此藥而效。按此五藥。蕤仁能散結氣。當歸能活滯血。防風能散風邪。黃連能攻久熱。甘草能和氣血。乃蜜則潤之而已。

光明洗眼方

古青錢十文

黃連一錢

杏仁七枚

艾葉三片

上藥用水一鍾。煎去其半。澄清一宿。次日頻頻洗之良。

凡患風熱眼眶紅爛者。此方洗之。○銅性清肅。可以勝熱明目。黃連苦燥。可以瀉熱堅膚。艾葉辛溫。可使驅風勝濕。杏仁辛潤。可使利氣澤皮。
本事羊肝丸

黃連一兩

白羊肝一具

二共爲丸。梧子大。每服三十丸。忌猪肉冷水。

本事方云。諸目疾翳障青盲。此方皆治。○唐崔承元者。居官時。治一死囚。出而活之。囚後數年以病死。崔後爲內障所苦。喪明逾年後。半夜嘆息獨坐。忽聞階除窸窣之聲。崔問爲誰。徐曰。是昔蒙出死之囚。生不能報公。今來獻目疾方耳。遂以前方言訖而沒。崔依此合服。不數月復明。崑謂眼者。肝之竅。肝木自實則病眼。邪害空竅也。越人云。實則瀉其子。故用黃連以瀉心。能瀉其心。則子食氣於母。而肝弗實矣。目也。豈不瑩然而明乎。然必劑以羊肝者。取其爲血氣之屬。同類相從。用之補肝。非若草木之性。偏一而失冲和也。

類說羊肝丸

夜明沙淨洗

蟬退

木賊去節

當歸各一兩

羊肝四兩

上藥以前四物研爲細末。以羊肝水煮爛。搗如泥。入前四物拌和。丸如梧子大。食後溫湯下五十丸。

明州定海人徐道亨者。事母至孝。因患赤眼而食蟹。遂成內障。凡歷五年。雖抱眼疾。篤孝弗衰。忽夢一僧人授以此方。制而服之。百日復明。崑謂夜明沙能攻

目中惡血。當歸身能生目中新血。蟬退能去目中翳障。木賊能散目中翳熱。乃羊肝者。同類相從。能引四物入肝而利其竅也。孝道感格。故致神方。所謂誠能動天也。

蟬蟪明目

晉盛彥之母失明。食必自哺。母既病久。婢僕數見捶撻。心懷忿焉。伺彥他出。取蟬蟪炙而飼之。母食以爲美。藏以示彥。彥見之抱母痛哭。母目豁然而開。若有神者。覬謂蟬蟪能攻惡血。若目中血障者。用之必然神良。若用之概治目疾。則弗驗也。

真人明目丸

生地黃

熟地黃

川

椒去目及閉口者微炒等分

共爲末。蜜丸梧子大。每服五十丸。空心鹽米飲下。

江陵傅氏。目昏多淚。家貧。鬻紙爲業。性喜雲水。見必邀迎。一日有客。方巾布袍。過之。授以此方治目。如方修服。不一月目明。夜能視物。覬謂腎主目之瞳子。腎水虛竭。故令目昏。肝之液爲淚。肝有風熱。故令淚出。是方也。生地所以涼肝。熟

地所以補腎。乃川椒者。味辛而熱。可以療肝腎之痺氣。痺氣者。濕熱着而不散之氣也。又於空心之時。以鹽飲吞之。宜其直達肝腎之區矣。病在標而治其本。可謂神於病情者。此其所以爲真人之方歟。

鼈龍點眼方

猪

膽一枚銀銚中微火熬成膏再入

冰

腦米許點入眼中

郭太尉者。真州人。久患目盲。有白翳膜遮睛。遍服眼藥。無能效者。有親仲監稅在常州守官。聞張鼈龍之名。因薦於太尉。太尉請張視之。曰。予眼緣熱藥過多。乃生外障。視物昏黑。更無所覩。醫者以肝腎虛損治之。愈盲。張曰。請太尉將藥點眼。併服之。一月取翳微消。後果一月翳退。雙目如舊。因求點藥方。乃只用前件修製。點入眼中。微覺翳輕。後又將猪膽。白膜皮暴乾。撚作繩子。燒灰。待冷點翳。云盛者亦能治之。此方甚好。勿妄傳。崐謂猪膽汁者。甲水之精也。可以瑩潤乙竅。冰腦者。辛溫之品也。可以旋開目翳。膜灰者。化爛之品也。可以消去翳膜。

二百味花草膏

羯羊膽

出其中再填入

好

蜜

伴勻蒸之候乾入鉢細研爲膏

福州人病目。兩臉赤濕流淚。或痛或癢。晝不能視物。夜不可近燈。兀兀癡坐。其友趙謙子春語之曰。是爲爛緣血風眼也。我有一藥。正治此疾。名曰二百味花。草膏。病者驚曰。用藥品如是。世上方書所未有。豈易遽辦。君直相戲耳。趙曰。我適間有藥。當以與君。攜一錢匕。堅凝成膏。使以匙抄少許入口。一日淚止。二日腫消。三日痛定。豁然而愈。乃往謁趙致謝。且叩其名物。趙笑以前方授之曰。以蜜採百花。羊食百草。故隱其名以眩人耳。崑謂內熱則臉赤。肝熱則出泣。微熱則癢。熱盛則痛。或痛或癢。皆火之故也。氣熱則神濁昏冒。故令晝不能視物。陽勝者善惡火。故令不可以近燈光。此經所謂天明則日月不明。邪害空竅也。羯羊膽。苦物也。足以勝熱。蜜。潤物也。足以濟火。然曰入口。不曰入眼。則固服食之。劑耳。用之者。使頻頻嚙之。藥力相繼爲良。

明目六事方。

損讀書。

減思慮。

專內觀。

簡外事。

旦起晚。

夜早眠。

晉范寧常苦目痛。就張湛求方。湛書此六事。仍尾之曰。右方宋陽子少得其術。

以授魯東門伯。次授左丘明。遂世世相傳。以及卜子夏。晉左太冲。凡此諸賢。並有目疾。得此方之用。熬以神火。下以氣篩。蘊於胸中七日。然後納諸方寸。脩之一時。近可數其目睫。遠可察夫簾垂。長服不已。洞見牆壁之外。非但明目。乃亦延年。許學士評之曰。審如是而行之。非可謂之嘲謔。真明目之奇方也。

目疾者。戒沐頭。宜濯足。

崑謂此二句者。先醫之格言也。太極之道。動而生陽。靜而生陰。沐頭則上動矣。必生陽而損目。况夫濕氣難乾。乘風而梳拂不已。則風濕襲於首而併於目。甚者。至於喪明。此沐頭之宜戒也。然何以宜濯足也。足太陽之經。根於足之小指端。上貫於睛明。足少陽之經。根於足大指歧骨間。上貫於瞳子。足陽明之經。根於足中指內間。上貫於承泣。易曰。水流濕。火就燥。若能以溫水濯其兩足。則頭目間之熱邪。亦能引之而下。况夫溫濯之餘。腠理疏泄。又足以瀉經中之邪。是亦去病之一助也。故曰宜濯足。

耳疾門第六十二

敘曰。耳以司聽。匪聽弗聰也。君子有思聰之責者。胡然而使衰如乎。故考四方以治耳。

千金腎熱湯

磁石煨紅碎

白朮

牡蠣各五兩

甘草一兩

生地黄汁

葱白各一升

麥門冬

芍藥各四兩

大棗十五枚

水九升。煎三升。分三服。

腎熱。耳中膿血。不聞人聲者。此方主之。○耳者。腎之竅。故腎熱則令人病耳。生膿出血。不聞人聲也。是方也。磁石能引肺金之氣下降於腎。腎得母氣。自然清肅。而病日愈。生地汁。麥門冬。白芍藥。所以滋腎陰而瀉腎熱。乃葱白者。所以引腎氣上通於耳也。牡蠣鹹寒。能軟堅而破結氣。得葱白引之入耳。則能開聽戶而消膿血。乃白朮。甘草。大棗者。健脾之品也。所以培萬物之母。益土氣而制腎邪爾。

千金補腎丸

人參	黃耆	當歸	山茱萸
牡丹皮	芍藥	桂心	遠志
巴戟天	兔絲子	細辛	菴蓉
附子	熟地黃	蛇床子	茯苓
甘草	乾薑	澤瀉	石斛 <small>各二兩</small>
石菖蒲 <small>一兩</small>	防風 <small>半兩</small>	羊腎 <small>二枚</small>	

千金云。勞聾。氣聾。風聾。虛聾。毒聾。久聾。耳鳴者。此方主之。○勞聾者。勞火鼓其聽戶也。氣聾者。經氣滯塞於聽戶也。風聾者。風熱閉其聽戶也。虛聾者。氣血虛耗而神不用也。毒聾者。膿血障礙。妨於聽戶也。久聾者。病非一日。邪氣痺聚也。凡是聾者。勢必耳鳴。故總繫其耳鳴也。味之甘者。可以補虛。亦可以卻勞。人參、黃耆、羊腎、山萸、乾地、兔絲、巴戟、菴蓉、澤瀉、芍藥、當歸、茯苓、甘草。均味甘之品也。能療虛聾。勞聾。味之辛者。可以驅風。亦可以順氣。防風、細辛、菖蒲、遠志、丹皮、石斛。均味辛之品也。能療氣聾。風聾。性之毒者。可以開結毒。亦可以療久痺。蛇床、桂心、附子、乾薑。均辛溫微毒之品也。能療毒聾。久聾。

治三十年久聾方

故鐵三十觔。以水七斗。浸三日。取汁。入麴釀米七斗。如常造酒法。候熟。取磁石一斤。研末。浸酒中三日。乃可飲。取醉。以綿裹磁石內耳中。覆頭一臥。酒醒。去磁石。卽瘥。崑謂磁石引鐵。物類之相感也。金石之性寒。可使主內熱。金石之性重。可使鎮怯氣。共釀於酒。欲其無所不之。旣飲其酒。復以磁石內耳。欲其內外交感。而聽戶隨開爾。

耳膿方

人髮燒灰存性。每用分許。吹入耳中。卽瘥。此濕者燥之之意。而必以人髮者。近取諸身而自足也。他如白礬、赤石脂、鴿糞。皆可枯灰用之。

鼻疾門第六十三

敍曰。鼻居五官之中。疾非美觀也。記曰。盡飾之道。斯其行者遠矣。故考五方以治鼻。

蒼耳散

白芷一兩

辛夷仁

蒼耳子錢炒各二分

薄荷五錢

共爲末。食後葱湯下二錢。

鼻淵者。此方主之。○鼻流濁涕不止者。名曰鼻淵。乃風熱在腦。傷其腦氣。腦氣不固。而液自滲泄也。此方四件皆辛涼之品。辛可以驅風。涼可以散熱。其氣輕清。可使透於顛頂。顛頂氣清。則腦液自固。鼻淵可得而治矣。

辛夷散

辛夷

川芎

防風

木通去節

細辛洗去土

藁本

升麻

白芷

甘草等分

共爲末。每服三錢。茶清調下。

鼻生瘰肉。氣息不通。香臭莫辨者。此方主之。○鼻者。氣之竅。氣清則鼻清。氣熱則鼻塞。熱盛則塞盛。此瘰肉之所以生也。故治之宜清其氣。是方也。辛夷、細辛、川芎、防風、藁本、升麻、白芷。皆輕清辛香之品也。可以清氣。可以去熱。可以疏邪。可以利竅。乃木通之性。可使通中。甘草之緩。可使瀉熱。

瓜蒂散搐瘰肉法

先將鼻中瘰肉用鍼微刺。令患人含水一口。後以瓜蒂散和麝香少許。用水數滴吹鼻內。出涎水則愈。此苦能湧泄也。能瀉其實。則瘰肉愈矣。

補腦散

天雄炮

辛夷仁

蒼耳茸等分

共爲末。飯後酒下二錢。

陽虛腦寒。鼻淵者。此方主之。○人身之上。天之陽也。故六陽之氣皆會於首。若陽氣自虛。則陰氣湊之。令人腦寒而流清涕。是方也。天雄辛熱而上浮。辛熱者太陽之象。故可以溫腦而補陽虛。辛夷仁。蒼耳茸。皆輕清澈腦之劑。可以佐天雄而透腦。

大朴散

大黃

朴

硝等分
爲末

鼻赤如榴者。將此二物爲末。酒調傅之。○鼻赤者熱也。所以赤者血也。大黃之寒能瀉熱。朴硝之鹹能敗血。是證也。酖於酒者而後有之。若不絕其酒。而徒用

其藥。抱薪救火。何益於事。

口齒舌疾門第六十四

敍曰。君子無尺寸之膚。不愛焉。則無尺寸之膚。不養也。口也。齒也。舌也。何莫而非吾身之膚。則亦何莫而非吾之所當養矣。故考十五方以治口齒舌。

口糜散

黃柏

黃連各一兩

雄黃

沒藥各二錢

片腦五分

五件共爲細末。每用分許着於瘡上良。

口瘡糜爛者。此方主之。○口糜本於濕熱。濕熱不去。必至疳蝕。寒可以勝熱。苦可以堅膚。故用黃連。黃柏。乃雄黃之悍。殺蟲而利氣。冰腦之竄。殺蟲而入腠。沒藥之苦。散血而愈瘡。

薔薇煎

取薔薇濃煎汁含之。又稍稍咽之。日三夜一。冬用根。夏用葉。

孫真人千金方云。薔薇根。口瘡之神藥。人不知之。故其口齒一門。用薔薇根者。蓋六方焉。今嘗其藥氣平而味苦。內經曰。氣薄爲陽中之陰。又曰。味厚則泄。如此言之。固清氣泄熱之藥也。

柴胡地骨皮湯

柴胡

地骨皮各三錢

實者加大黃、朴硝。

氣厥論曰。膀胱移熱於小腸。膈腸不便。上爲口糜。此方主之。○膀胱者。水道之所出。小腸者。清濁泌別之區也。膀胱移熱於小腸。則清濁不能泌別。濕熱不去。勢必上蒸。故令口中糜爛而瘡。乃竈底燃薪。籠中肉糜之象也。是方也。柴胡辛溫。所以升其清陽。地骨皮苦寒。所以降其濁陰。清濁既判。則乾清坤寧。膈腸利而口糜愈矣。實者加大黃、朴硝。謂大便秘澀。邪氣自實。二陰皆秘。地道不通。故用大黃苦寒以瀉實。朴硝鹹寒以軟堅。乃竈底抽薪之法也。

益膽湯

人參

炙甘草

黃芩各一錢

官桂半錢

苦參 茯神各一兩 遠志肉七分
謀慮不決。肝膽氣虛。口苦舌瘡者。此方主之。○肝主謀慮。膽主決斷。故令氣虛。咽門爲膽之使。膽汁上溢於咽。故令口苦。木能生火。故令舌瘡。是方也。人參、甘草所以補其氣虛。苦參、黃芩所以清其氣熱。經曰。主明則十二官各得其職。故用茯神、遠志以養心。又曰。微者正治。甚者從治。故用官桂之辛熱。

滋陰大補丸加鹿茸方

熟地黄二兩

川牛膝去蘆

杜仲薑炒去絲

巴戟天去心

山茱萸去核

小茴香略炒

五味子炒

遠志去心

肉蓯蓉

白茯苓

山藥各一兩

紅棗肉蒸熟十兩

石菖蒲

枸杞子各五錢

鹿茸炙酥

腎虛齒長而動者。此方主之。○腎主骨。腎虛則髓弱。髓弱則骨枯。骨枯則不能固齒。故令齒長而動。譬之敗几焉。几敗木枯。則緊竇之寸木。搖搖而出。以水澤之。則敗几潤而寸木固。故治此者。宜滋陰補腎。腎不虛。則齦骨潤。齦骨潤。則齒

固矣。是方也。熟地、牛膝、杜仲、山萸、五味、枸杞。皆味厚之品也。可以滋陰益腎。巴戟、菴蓉、茴香、遠志、石蒲、山藥、茯苓。皆甘溫之品也。可以溫腎生精。乃鹿茸者。取其爲血氣之屬。得陰氣之最完。故用之以爲補腎填精益髓之品耳。紅棗肉者。味甘益脾。故用之以劑丸也。

苦參湯

齊大夫病齩齒。倉公爲之作苦參湯。日漱三升。五六日病已。蓋取其苦能安齒。蠱寒能去風熱也。後人無風蠱。有用苦參潔齒。久而病腰重者。降多故也。此不知三軍之事。而從三軍之政。未有不敗者也。

煮牙散

附子尖

天雄尖錢各二

全蠍七箇

皆生搗和勻。點少許於痛處。

牙痛惡寒喜熱者。此方主之。○凡人臥去之時。開口引其風寒。因致牙痛。故得寒飲。則助其邪而痛甚。得熱飲。則散其寒而少寬。是方也。附子尖、天雄尖。辛熱之品也。用之所以溫寒。乃全蠍者。微毒之品也。假之就寒毒之區。兼療風邪云。

爾。或用乾薑、藁撥、細辛作湯以漱之。亦是治寒之意。

定風湯

牙皂角炙一寸
去皮

白石膏五錢

朴硝一錢

荊芥一錢

葱白三寸

風熱牙疼。喜寒惡熱者。此方漱之。○內生風熱。併於一頰。邪火自實。因致牙疼。故得寒飲。則陰陽微和。而痛少可。得熱飲。則以火濟火。而痛益深。是方也。用牙皂、荊芥、葱白之辛溫以散其風。用朴硝、石膏之鹹寒以驅其熱。

梧桐淚、蟬酥、葶苈子、韭子、石灰總考

凡牙間有孔而痛者。以上五件得一治之。皆獲奇効。○梧桐淚。主火毒風疳。蠱齒。王海藏常奇之矣。蟬酥。主牙蝕。到處痛定。林元禮常奇之矣。葶苈子。炮氣蒸齒去蠱。孫真人常奇之矣。韭子。入艾燒烟熏蠱。朱丹溪常奇之矣。此皆古人之方也。新得一方。只是新燒石灰一物。蜜丸。着於齒蝕之處。應手而愈。此則古人之所未道也。

燒鹽竈突煤擦牙方

凡人齒縫中出血。只以燒鹽、竈突煤二物研勻。臨臥擦牙漱口。良。○鹽勝血。故用燒鹽。血得黑則止。故用竈突墨。

取牙不犯手方

草烏

葶

撥

各半

川椒

細

辛

各二兩

本事方云。四件共爲細末。每用少許。以鍼揩在患牙內外。如此數次。其牙自傷。則易落矣。蓋四物皆辛熱之品。入齒齦而數傷之。則齒肉日離。此近理之方也。

蒲黃一物散

本事方云。一士人夜歸。其妻熟寢。士人撼之。妻問何事。不答。又撼之。其妻驚視之。舌腫已滿口。不能出聲。急訪醫。得一叟。負囊而至。用藥搽之。比曉復舊。問之。乃蒲黃一物。崐謂內經曰。熱勝則腫。此必心脾之火併於舌。故令腫而滿口。蒲黃性寒。能清氣涼血。故愈。

槐花一物散

良方云。一士人無故舌出血。仍有小竅。醫者不曉何疾。炒槐花爲末。搽之而愈。崐謂諸見血皆是火證。槐花能療血中之熱。故愈。

冰片

熱證多舌出。有病愈而舌不能入者。以冰片分許。末其舌上則入。所以舌出者。熱實於內。而欲吐舌泄氣也。所以不能入者。邪氣久居。舌強而不柔和也。冰片味辛熱而氣清香。可以利竅。可以柔筋。可以泄氣。故得之而舌入矣。

蓖麻油撚紙熏舌法

有人舌腫舒出口外。無敢醫者。一村人云。偶有此藥。歸而取至。乃二紙撚以燈燒之。取烟熏舌。隨即消縮。衆問其方。村人曰。吾家舊有一牛。亦舌腫脹出口。人教以蓖麻油蘸紙作撚。燒烟熏之而愈。因以治人亦驗。崑謂舌腫舒出口外。經所謂熱勝則腫也。然舌者心之苗。又脾之經絡連舌本散舌下。其熱當責於心脾二經。本草云。蓖麻主浮腫惡氣。取油塗之。葉主風腫不仁。擣蒸傅之。則其能解風腫內熱也可知矣。然用其烟。猶有妙義。烟乃輕清之物。一入其口。呼吸傳變。可使徑達心脾。匪微治標。亦可療本。村人用之而不達其理。斯其所以爲村人。醫者聞之而不察其理。則亦村人而已矣。

醫方考卷五 口齒舌疾門第六十四

醫方考

明 歙邑 吳 崐鶴皋原著

鄞縣 曹赤電炳章圈點

卷六

蟲門第六十五

敘曰。爲國者。必欲去夫蠹國之小人。故爲醫者。必欲去夫蠹身之蟲蝕。身國不同。理相須也。因著六考以療蟲。君子用之。庶幾乎保安之一策也。

化蟲丸

鶴 虱去土

胡 粉炒

苦棟根東引不
出士者

檳 榔各一
兩

蕪 荑

使君子各五
分

白 礬枯二錢
五分

量人大小服。一歲兒可五分。

腸胃中諸蟲爲患。此方主之。○經曰。腸胃爲市。故無物不包。無物不容。而所以

生化諸蟲者。猶腐草爲螢之意。乃濕熱之所生也。是方也。鶴虱、檳榔、苦楝根、胡粉、白礬、蕪荑。使君子。皆殺蟲之品。古方率單劑行之。近代類聚而爲丸爾。

靈砂丹

水銀一斤 硫黃四兩

二物於新銚內炒成砂。更入水火鼎內。煅煉爲末。糯米糊丸如麻子大。每服三丸。加至五七丸。忌猪羊血、菜豆粉、冷滑之物。

腸胃諸蟲。此方主之良。○嘗謂濕熱生蟲。故知濕熱者。蟲之天也。是方用硫黃以燥濕。用水銀以驅熱。是奪蟲之天矣。蟲失其天。未有不殺。

蟲藥總考

崐按古方殺蟲。如雷丸、貫衆、乾漆、蠟塵、百部、鉛灰。皆其所常用也。有加附子、乾薑者。壯正氣也。加苦參、黃連者。蟲得苦而安也。加烏梅、訶子者。蟲得酸而軟也。加藜蘆、瓜蒂者。欲其帶蟲而吐也。加芫花、黑丑者。欲其帶蟲而下也。用雄黃、川椒、蛇床、樟腦、水銀、檳榔者。治疥瘡之蟲也。用胡桐淚、葇荑子、韭子、蟬酥者。治鱗齒之蟲也。用川槿皮、海桐皮者。治風癬之蟲者。用青箱子、覆盆葉者。治九竅蟲

蝕之蟲也。用敗鼓心、桃符板、虎糞骨、死人枕、獺爪、鶴骨者。驅療蟲也。或用桃柳東南枝者。以其得天地春生夏長之氣。而假之以爲吾身之助也。或用吳茱萸東引根。或用酸石榴東引根。煎湯吞藥者。一以此物亦能殺蟲。一以東方者生物之始。諸蟲受氣之所也。東引根能引諸藥東行。奪其生生之氣。乃伐根之斧也。

藍

泊宅編云。永州通宅聽軍員毛景。得奇疾。每語喉中必有物作聲相應。有道人教之讀本草藥名。至藍而默然。遂取藍振汁而飲之。少頃吐出肉塊。長二寸餘。人形悉具。劉思在永州親見其事。千金翼云。藍主疳蝕。則固殺蟲物爾。

雷丸

陳正敏遜齋閒覽云。楊勔。中年得異疾。每發言應答。腹中有小蟲效之。數年間。其聲寢大。有道士見而驚曰。此應聲蟲也。久不治。延及妻子。宜讀本草。遇蟲不應者。當取服之。勔如言。讀至雷丸。蟲忽無聲。乃頓服數粒。遂愈。

檳榔散石榴根煎

蔡定夫戡之子康積。苦寸白蟲。醫者教之以月初三日前。先炙猪肉一臠。置口中。咀嚙其津而勿食。諸蟲聞香爭啞。如箭攻攢。却以檳榔細末一兩。取石榴東引根煎湯調服之。蔡如其言。不兩時。腹中雷鳴急瀉。蟲下如傾。以杖挑之。皆連綿成串。其長幾丈。尙蠕蠕能動。乃悉置之於火。宿患頓愈。

古稱九蟲。一曰伏蟲。長四寸。爲羣蟲之長。二曰白蟲。相生至多。形長一寸。其母長至四五尺。三曰肉蟲。狀如爛杏。令人煩悶。四曰肺蟲。其狀如蠶。令人欬而聲嘶。五曰胃蟲。狀如蝦蟆。令人吐逆嘔噦。六曰弱蟲。狀如瓜瓣。令人多唾。七曰赤蟲。狀如生肉。令人腸鳴。八曰蟻蟲。至微細。狀如菜蟲。居洞腸間。居則爲痔漏癰疽。諸瘡。九曰虬蟲。長一尺。貫心則殺人。又有三尸蟲。狀如大馬尾。薄筋依脾而居。乃有頭尾。皆長三寸。又有勞蟲。膈噎蟲。癩蟲。蠱蟲。狐惑蟲。未易悉舉。醫者推類而治之可也。

痔漏門第六十六

敘曰。察痔漏者。瘍醫之事也。君子鄙談之。然擇疾而療。非醫之任者也。故考二

方。以大其規。詳論藥物。以要其變。

四物湯加黃芩黃柏槐花方

當歸

芍藥

川芎

生地黄

酒黃芩

酒黃柏

炒槐花

內熱痔漏下血者。此方主之。○痔漏。廣腸之毒也。內經曰。因而飽食。經脈橫解。腸癖爲痔。是以痔漏之疾。多見於膏粱富貴之人。而藜藿之腹。未見其多也。一有病根。則勞思便作。飲酒便作。所以然者。內熱而血妄行也。是方也。生地黄、黃芩、黃柏。清其熱也。當歸、芍藥、川芎。調其血也。

四君子湯

人參

白朮炒

茯苓

甘草炙

年高氣弱。痔血不止者。此方主之。誤服攻痔之藥。致血大下不止而虛脫者。亦此方主之。○血有形之陰也。必賴無形之氣以固之。故年高而氣弱。則血下。久藥損氣。則血下。是方也。人參、白朮、茯苓、甘草。皆甘溫益氣之品也。大氣充盈。自足以固有形之血。譬之乾元充溢於兩間。自能舉乎大地。而無傾陷之危者也。

痔漏諸藥總考

崑按古方醫痔漏下血。有用槐角灰者。有用柏葉灰者。有用蝟皮灰者。有用露蜂房灰者。有用牛角腮灰者。有用胡桃灰者。俱以方寸匕酒調下。此皆枯痔之法也。湯液之中。有用防風者。有用秦艽者。有用皂角仁者。有用荆芥。白芷者。此皆責之風熱入藏也。有用芒硝。大黃者。有用檳榔。枳實者。此皆責之實熱可下也。有用胡黃連者。有用酒苦參者。有用石蓮肉者。有用番木鱉者。此皆責之實熱可清也。有用桃仁。紅花者。有用蒲黃。蘇木者。此皆責之瘀血未消也。有用杏仁。麻仁者。有用地黃。黃柏者。此皆責其燥金無液也。有用地榆。蘄艾者。有用枯龍骨。鹿角霜者。此欲強止其血也。有用象牙。螳螂者。有用人爪。蟹爪者。此欲放出其肛而外施藥以愈之也。有用熏法者。有用洗法者。有用藥坐者。無非枯痔止血之品也。有用插藥者。有用掛線者。無非爛肌去腐之輩也。嗚呼。任醫猶任將。用藥猶用兵。神於兵者。疊石可以爲營。驅牛可以破敵。神於藥者。心解而機自靈。見超而術自神。有不拘拘於紙上之陳言矣。

疥瘡門第六十七

敘曰。人以弗病爲安。疥瘡雖曰小疾。然流連其癢。弗息其搔。則亦非可觀之度矣。因著六考以主之。庶幾乎無瘡痍也。

防風通聖散

防風

川芎

川歸

黃芩炒

麻黃去節

連翹

薄荷

石膏

白朮炒

梔子炒黑

大黃

芒硝

桔梗

荊芥

白芍藥

滑石

甘草

表有疥瘡。內有實熱。此方主之。○諸痛瘍瘡癢。皆屬心火。故表有疥瘡。必裏有實熱。是方也。用防風、麻黃泄熱於皮毛。用石膏、黃芩、連翹、桔梗泄熱於肺胃。用荊芥、薄荷、川芎泄熱於七竅。用大黃、芒硝、滑石、梔子泄熱於二陰。所以各道分消其勢也。乃當歸、白芍者。用之以和血。而白朮、甘草者。用之以調中爾。互考見中風門火門。

玉燭散

川芎

當歸

生地黄

赤芍藥

大黃

甘草

朴硝各等分

疥瘡作痛者。此方主之。○諸痛屬實。實者可瀉。故用朴硝、大黃瀉其實。生地、赤芍涼其血。川芎、當歸和其營。甘草調其衛。是方為攻下之劑。必形氣病氣兩實者。始可用之。若病氣有餘。形氣不足者。以前方防風通聖散去大黃、芒硝可也。當歸養血湯加防風連翹方

當歸

防風各一錢

黃耆五錢

連翹二錢

疥瘡有血無膿。搔癢不止者。此方主之。○有血無膿。此表氣不足也。諸瘡屬虛。虛者可補。故用當歸、黃耆大補其氣血。乃防風者。引歸耆直達於表。二物得之而效愈速也。若連翹者。解諸經之客熱而已。此藥服之數劑。諸瘡化毒生膿。又更服之。得膿滿毒盡。則去病根而無溫癰之患。若膿日久不乾者。去黃耆加白朮、茯苓以燥之。如治爛豆之法則善矣。

十全大補湯

人參

黃耆

白朮

茯苓

熟地黃

當歸

川芎

芍藥

甘草等分

桂心少許

瘡久血氣虛弱。頸面腹背皆瘡者。此方主之。○瘡疥生於手足者為輕。生於頸面腹背者。氣血虛羸之盛。乃小人道長之象。故用人參黃耆白朮茯苓甘草大補其氣。用當歸川芎白芍熟地。桂心大補其血。氣血得其補。則腹背之瘡先愈。而君子道長。小人道消矣。脾胃門參苓白朮散亦可酌用。

加品

古方有用苦參沙參忍冬花皂角刺者。此皆治瘡善藥。若依前法。則此輩不用亦愈。必欲用之。苦參宜用酒炒。

疥瘡塗藥總考

古方塗藥有用蛇床子川椒雄黃樟腦水銀檳榔者。有少入人言者。皆殺蟲也。有用木鱉子大風子者。皆去風也。有用枯礬硫黃者。為燥濕也。有用大黃黃柏輕粉鉛粉黃丹者。為解熱也。或以柏油塗者。或以麻油塗者。或以猪脂塗者。予少時常自用之。率驗於此而違於彼。今月少愈。再月即發。竟以服藥而瘳。終無

益於塗也。然病淺者。間有塗之而愈。故塗藥亦所不廢。

暴死門第六十八

敘曰。幻化之軀。不能無死。但曰暴死。則非正命矣。君子順受其正。胡然以非命歸耶。故考方法八條以拯暴死。

六君子湯加天麻方

人參

白朮

茯苓

甘草

半夏

陳皮

天麻

暴死。口噤吐沫。身體溫煖。脈來虛大者。中風暴死也。此方主之。○暴死者。卒然而倒。不省人事也。風燥則筋急。故令口噤吐沫者。風盛氣湧使然。乃風來潮洶之象。風爲陽邪。故令身體溫煖。脈來虛大者。正氣虛而邪氣盛也。斯時也。主辛散之劑以驅風。則慳慳之氣必絕。非其治也。故用人參、白朮、茯苓、甘草之甘溫者。急固其氣。復用半夏、陳皮之辛利者。以平其沫。天麻之加。定風邪爾。

附子理中湯

附子

乾薑

人參

甘草

白朮

腹痛。額頭黎黑。手足收引。脈來沉下無氣以息者。中寒暴死也。此方主之。○腹痛病因固有數種。但額頭黎黑。手足收引。脈來沉下。則中寒之驗也。所以無氣以息者。呼出主陽。吸入主陰。三陰受其真寒。則病不能吸。吸亡則呼不能獨存矣。故令人暴死。寒者溫之。故用附子、乾薑、乃人參、白朮、甘草。所以生其呼吸之氣也。進藥後更着艾灸其關元。此內外交治之法。是證也。有死一日夜而治之復甦者。幸勿因其危而忽之。

生脈散加香薷方

人參

麥門冬

五味子

香薷

人本陰虛。復遇暑途。飢困勞倦。暴仆昏絕者。此方主之。○人本陰虛。則陽獨治。復遇暑途。則陽易亢。加之飢困勞倦。則陰益虧。所以暴仆昏絕者。一則陰虛而孤陽欲脫。一則暑邪乘虛而犯神明之府也。故用人參益元而固脫。香薷辟邪而卻暑。麥冬之清。所以扶其不勝之肺。五味之酸。所以斂其欲脫之真。

四君子湯加竹瀝薑汁方

人參

白朮

茯苓

甘草

竹瀝

薑汁

暴死有痰聲者。名曰痰厥。此方主之。○痰厥者。虛陽載痰上逆之名。所以令人暴死者。頑痰塞其清陽呼吸之道也。痰既塞之。氣欲通之。故令喉中有聲。經曰。壯者氣行則愈。怯者着而成病。故用人參、白朮、茯苓、甘草之溫補者以壯氣。佐之竹瀝、薑汁以行痰。

獨參湯

人

參二兩去蘆煎

行立之間。暴眩仆絕。喉無痰聲。身無邪熱者。陰虛陽暴絕也。此方主之。○陰陽之在人身。互為其根而不可離者也。若陰道虧乏。則孤陽無所依附。亦自飛越。故令人暴眩仆絕。過不在痰。故無痰聲。病不因感。故無體熱。斯時也。有形之陰血不能急生。無形之呼吸所宜急固。况夫陰生於陽。又太極之妙乎。故以獨參主之。取其為固元益氣之聖品爾。

五磨飲子

木香

沉香

檳榔

枳實

台烏藥

五件等分。白酒磨服。

暴怒暴死者。名曰氣厥。此方主之。○怒則氣上。氣上則上焦氣實而不行。下焦氣逆而不吸。故令暴死。氣上宜降之。故用沉香、檳榔。氣逆宜順之。故用木香、烏藥。佐以枳實。破其滯也。磨以白酒。和其陰也。

火醋熏鼻法

凡感臭穢瘴毒暴絕者。名曰中惡。不治即死。宜燒炭火一杓。以醋沃之。令患者鼻受醋氣。則可復甦。既甦。以感冒門蘊香正氣散主之。

禮拜法

凡遇屍喪。翫古廟。入無人所居之室。及造天地鬼神壇場。歸來暴絕。面赤無語者。名曰尸疰。亦曰鬼疰。即中祟之謂也。進藥便死。宜移患者東首。使主人焚香北面禮拜之。更行火醋熏鼻法。則可復甦。否者七竅迸血而死。

凡男婦交感而死。在男子名曰脫陽。在女子名曰脫陰。男子雖死。陽事猶然不萎。女子雖死。陰器猶然不閉。亦有夢中脫死者。其陽必舉。陰必泄。尸容有喜色。爲可辯也。皆在不救。

痘門第六十九

敘曰。小兒壯熱呵欠煩悶。時發驚悸。或吐或瀉。手足時冷。面頰頤赤。嗽嚏者。爲痘證也。蓋痘出於五藏。由內達外。是以各顯其證。呵欠煩悶。肝之證也。時發驚悸。心之證也。或吐或瀉。手足時冷者。脾之證也。頰赤嗽嚏。肺之證也。錢氏謂獨有腎藏無證。此大不然。若腰痛喜寐。則腎之證矣。五藏之證盡顯者。其痘必多。但顯一二證者。其痘必少。魏氏以痘本於淫火。其言高出前古。雖其主方近於執一。然錄古人一十四方。則示人以變通也可知矣。今世之醫。率以是短之。使諸子者並作於九原。崑遇魏氏。則北面而師之。遇錢陳。則肩隨而已。所以然者。二子之資不及魏也。茲考羣方。則以百家而出入之。初不拘拘於三子矣。

痘證三四日前諸方考

升麻葛根湯

升麻

葛

根各二錢

白芍藥半錢

甘草一錢

小兒初間發熱壯盛。為風寒。為痘疹。莫能的辨。此方穩當。宜主用之。○表熱壯盛。此邪實於表也。經曰。輕可以去實。故用升麻。葛根以疏表。甘草佐之。可以和在表之氣。芍藥佐之。可以和在表之榮。去其實邪。和其營衛。風寒則解。痘疹則出。誠初間之良劑也。如至四五日。痘中夾疹者。亦此方主之。疹散。只依常法治痘。

參蘇飲

紫蘇

陳皮

半夏

茯苓

乾葛

前胡

桔梗各一錢

甘草五分

人參七分

風寒壯熱。體重頭痛。痰嗽壅盛者。此方主之。○風寒客於外。故用紫蘇。乾葛以發表。痰嗽壅於內。故用半夏。前胡。桔梗。陳皮。茯苓以安裏。邪去之後。中外必虛。人參。甘草。急固其虛。此則表和而痘易出。裏和而氣不虛。表裏無失。斯良劑矣。

麻黃湯

麻黃

杏仁

甘草

桂枝

天寒腠密。表熱壯盛者。此方主之。○解表之藥有三品。辛涼、辛溫、辛熱也。夏月表氣易泄。宜用辛涼。春秋表氣平調。宜用辛溫。若天寒之時。表氣閉密。辛涼、辛溫不能解散。故以麻黃、桂枝之辛熱者以主之。亦各當其可而已。佐以杏仁。利其氣也。佐以甘草。和其氣也。

惺惺散

人參

白朮

甘草

細辛

白茯苓

天花粉

白芍藥

桔梗各七分

發熱之初。未明是痘。形體怯弱者。此方主之。○人參、白朮、茯苓、甘草防其虛也。乃細辛、桔梗。所以疏其陽。天花粉、白芍藥。所以和其陰。

加味紅綿散

天麻

麻黃

荆芥穗

全蝎

薄荷

紫草

蟬退等分

風熱驚搐者。以此藥調抱龍丸。○痘之出也。自內達外。心熱則驚。肝熱則搐。所以搐者風也。所以驚者熱也。是方也。麻黃、荊芥、薄荷、天麻、全蝎、蟬退。所以消風解熱。乃紫草者。所以解毒發痘而活血也。

抱龍丸

天竺黃 一兩

膽南星 二兩

辰砂 五錢飛七錢水

雄黃

琥珀

珍珠 各三錢

麝香 二錢五分

檀香

人參 各二錢

木香

沉香 各一錢

金箔 二十葉

甘草汁為丸。如大豆大。每服一丸。嬰兒半丸。

痘前發驚者。此方主之。○明者可以安神。故用琥珀、珍珠。重者可以去怯。故用辰砂、金箔。氣竄可以利竅。故用雄黃、沉香、檀木、麝。甘溫可以固元。故用人參。辛燥可使開痰。故用南星。寒涼可使清熱。故用竺黃。

羌活透肌湯

羌活

陳皮

柴胡

前胡

半夏

茯苓

甘草

桔梗

川芎

當歸

山查

痘出見點未盡者。此方主之。○表氣未疏。則出有不盡。故用羌活、柴胡、前胡、川芎以疏表。裏氣未利。則出有不速。故用半夏、茯苓、陳皮、甘草、桔梗以調裏。當歸活表裏之血。山查消表裏之滯。血活滯消。則痘之出也易易矣。

透肌散

紫草二錢

木通半錢

白芍藥酒炒

人參

蟬退

升麻

甘草各五分

氣弱痘出不盡者。此方主之。○人參、甘草能益氣而補中。紫草、木通能透肌而起痘。升麻、蟬退能退熱而消風。乃芍藥者。所以調陰氣而和營衛也。

甘桔湯

甘草二錢

桔梗三錢

咽喉腫痛者。此方主之。○甘草之甘。瀉實火而補虛火。桔梗之苦。清喉熱而瀉氣熱。消毒飲。

牛蒡子二錢 荊芥穗一錢 生甘草 防風各五
咽喉腫痛。膈上熱盛者。此方主之。○牛蒡子疏喉中風壅之痰。荊芥穗清膈間
風壅之熱。生甘草緩喉中風壅之氣。乃防風者。散諸風不去之邪也。
加味如聖散

桔梗二錢 牛蒡子 麥門冬各一錢 甘草
玄參 荊芥各一錢 防風七分 生犀角
黃芩各五分

痰嗽風熱。聲啞喉痛者。此方主之。○牛蒡子、麥門冬。療風痰而清肺熱。荊芥、防
風。散風邪而升鬱熱。甘草、桔梗、黃芩。利咽喉而清氣熱。犀角、玄參。涼心膈而療
結熱。熱去則金清。金清則聲啞瘥矣。

紫草化毒湯

紫草二錢 陳皮一錢 升麻 甘草各五分

小便赤加木通。

痘已出未出。熱壅不快。並宜服之。○紫草活竅。利血化毒。陳皮快膈。消痰利氣。

升麻消風。發散瘡癩。甘草補虛。和中解熱。木通之加。為導熱邪由溺而泄爾。
前胡化斑散

酒紅花

當歸各一錢

前胡八分

荆芥四分

白芷

甘草節

赤芍藥

陳皮各五分

鬱金七分

胡荽子三十粒

痘中夾斑之輕者。此方主之。○斑之淡紅色者。斑之輕也。治痘中之斑。與傷寒雜證不同。傷寒之斑宜主寒涼。痘中之斑。寒之則血凝而痘不起。雜證之斑。間用溫補。痘中之斑。補之則血溢而斑愈盛。此方用酒紅花、當歸、赤芍藥。所以活斑中之血。前胡、白芷、陳皮、荆芥。所以利表裏之氣。乃胡荽子、甘草節、酒鬱金。皆所以散滯氣爾。此其為藥。利營調衛。不寒不熱。誠得治痘斑之理也。師云。斑證之原。由初間不能清熱解毒。若能於初間清熱解毒。胡然有斑。

再造丸

生玳瑁半兩

片腦三錢

水蛭炒黃一錢

蜈蚣炒錢三

麻黃去節一兩

猪尾血爲丸。龍眼大。每服一丸。日二。得微汗吉。

痘中有赤黑斑。狂言煩燥者。此丸主之。○原是實熱之證。失於清熱化毒。則令痘中夾斑。治之失道。則熱益盛。而斑赤黑矣。若以手按之。血散者可治。是方也。生玳瑁能解毒而化斑。蜈蚣能從毒而化毒。水蛭能散瘀而破血。片腦能化氣而利竅。麻黃能透肌而達表。和之以猪尾血。取其動而不滯爾。

黃連解毒湯

黃連炒

黃柏炒

黃芩炒

梔子炒黑等分

裏熱壅盛者。此方主之。○無熱固不化毒。熱壅則毒亦不化。故用黃連瀉心火。黃芩瀉肺肝之火。黃柏瀉腎火。梔子瀉上下之火。無他證而惟熱壅。故用藥亦精專焉。

人參白虎湯

石膏三錢

人參

甘草

桔梗各一錢

知母二錢

裏熱渴甚者。此方主之。○石膏清胃熱。胃清則不渴。人參、知母、甘草、桔梗化氣

而生津液。液生則渴自除。

辰砂益元散

滑石飛過六錢

甘草淨末一錢

辰砂飛

裏熱小便黃赤。神氣不清者。此方主之。○滑石清利六府。甘草解熱調中。辰砂安神去怯。

加味導赤散

生地黃

人參

麥門冬

木通

甘草等分

竹葉十片

燈芯七根

小便黃赤。口乾煩渴者。此方主之。○內熱。故用生地黃。小便黃赤。故導以木通。竹葉燈芯。口乾煩渴。故潤以人參。麥冬。甘草。乃氣化而津液自生也。

七正散

車前子

赤茯苓

山梔仁

生甘草梢

木通

扁蓄

龍膽草

小便祕澀者。此方主之。○治痘而必欲利小便者。水循其道。而後地平天成。故

也是方也。車前能滑竅。赤苓能滲熱。木通能通滯。山梔能瀉火。草梢能通莖。扁蓄能利水。膽草能利熱。七物者導其熱邪正其中氣故曰七正。

四順清涼飲

大黃

當歸

芍藥

甘草

實熱內壅。腹脹秘結。痘不能出者。此方主之。○痘以熱而出。固不能以無熱。若實熱內壅。腹脹便秘。則三焦之氣不化。而痘不能以出矣。故用大黃通其滯。當歸活其血。芍藥養其陰。甘草調其胃。通利之後。表裏氣血皆承順矣。故曰四順。蜜棗導法。

形質虛弱。而大便秘結。不堪下者。用蜜熬滴水成珠。撚作棗子狀。用雞翎爲心。少粘皂角末。納入穀道中。病人以手急抱即出之。便隨通矣。此以正氣怯弱。不堪攻下故爾。

痘證五六日間方藥考

活血散

木香二錢

當歸尾酒浸焙乾

赤芍藥酒浸炒

川芎

紫草

酒紅花錢各五

血竭一錢

每服三錢。

痘中氣血凝滯者。此方主之。○氣貴利而不貴滯。血貴活而不貴凝。木香、川芎。調其氣滯。芍藥、歸尾、紫草、紅花、血竭。理其血凝。退火回生散。

滑石水飛

辰砂

水飛各一錢

冰片三釐

每用冷水調服一錢。

痘證血熱枯澀者。此方主之。○火炎則水乾。是故枯澀。用滑石、辰砂導去其熱。此竈底抽薪之意。入冰片者。欲其速達而無壅滯也。

犀角地黄湯

犀角生者

牡丹皮

白芍藥

生地黄等分

諸見血失血血熱者。此方主之。○心主血。生地黄所以涼心血。肝納血。白芍藥所以和肝血。火能載血。牡丹皮所以去血中之火。熱能行血。生犀角所以解諸經之熱。

白朮茯苓澤瀉湯

白朮

茯苓

澤瀉各一錢

痘而水泡者。此方主之。○中有實熱。膈有停水。濕熱外行。初則痘色晶亮。頃則痘皆水泡矣。此乃水不能潤下。竈底燃薪。釜中發泡之義。是方也。白朮甘而燥。能益土以防水土。茯苓甘而淡。能益土以決防。澤瀉鹹而潤。能潤下而利水。水利濕消。泡自瘥矣。

補中益氣湯

人參

黃耆

白朮

當歸

柴胡

升麻

陳皮

甘草

中氣虛弱。痘不起脹者。此方主之。○難經曰。氣主煦之。故氣者。噓長萬物者也。痘不起脹。氣之弱也可知矣。故用人參、黃耆、白朮、甘草以補氣。用柴胡、升麻以升陽。有當歸可以活其血。陳皮可以利其氣。

保元湯

人參二錢

黃耆三錢

甘草一錢

肉桂每用五分

氣虛陷頂者。此方主之。○氣者。長養萬物者也。氣盛即物壯。氣弱即物衰。故痘瘡陷頂者。貴之氣虛也。魏桂崑自論云。人參益內。甘草和中。實表宜用黃耆。助陽須憑官桂。前三味得三才之道體。後一味扶一命之顛危。

四物湯

當歸

川芎

白芍藥

熟地黄

痘根淡。血弱者。此方主之。○痘至五六日。氣尊血附之時。痘根淡者。為血弱。故用當歸活血。川芎行血。熟地補血。芍藥飲血。

當歸活血湯

當歸

川芎

赤芍藥

紅花

紫草錢各一

生地黄取一錢五分

血熱壅滯者。用此方活血涼血。○色紫為血熱。色枯為血滯。熱者涼之。枯者澤之。調血之道也。是方也。生地黄涼血之品也。當歸、川芎、赤芍藥、紅花、紫草滑血之品也。涼者性寒。滑者質潤。氣利而已。

內托散

人參 黃耆 甘草 當歸
 川芎 白芍藥 厚朴 防風
 白芷 肉桂 木香 桔梗

表虛裏實。氣血皆弱者。此方主之。○在表者。痘頂灰陷。為氣虛。痘根色淡。為血虛。若息重氣粗。則為裏實。氣虛故用人參、黃耆、甘草。血虛故用當歸、芍藥、川芎。然防風、白芷、肉桂。能引諸藥自內而托之於外。木香、桔梗、厚朴。能調壅實以歸於和。加減法。紅紫黑陷屬熱毒者。去桂加紫草、紅花、黃芩、淡白灰陷屬虛寒者。加丁香、溫裏、肉桂、溫表。當貫膿而不貫膿者。倍參、耆、當歸、糯米。煎熟入人乳好酒。

八珍湯

人參 白朮 茯苓 甘草
 當歸 川芎 芍藥 地黃

氣體虛弱。痘證雖順。此方主之。○醫貴未然之防。痘證雖順。若氣體虛弱。不補恐有後失。故用人參、白朮、茯苓、甘草以補氣。當歸、川芎、芍藥、地黃以養血。

獨聖散

川山甲兩炒一

麝香一錢

紫草湯調下一錢。

五六日間黑陷者。此方主之。○黑陷危證也。黑者穢惡觸之而變其色也。陷者正氣下陷不能起脹也。川山甲麝香。腫腥穢惡之屬也。何以用之。蓋痘之爲物。外觸穢惡則向裏而陷。內觸穢惡則向外而凸。原其血氣虛怯。故令如此。人牙散亦是此意。

挑疔散

紫草

雄黃

巴豆各等分

共爲細末。油臙脂調用。

有痘疔痘母者。用鍼挑破。以此藥少許着之。○痘疔之色有二。紫疔、白疔也。痘疔之見有三。先疔見在面。次疔見在腹。後疔見在足也。是方也。紫草解毒利竅。雄黃解毒利氣。巴豆化毒拔疔。乃挑疔之捷劑也。所謂痘母者。初出之時。遍身光潤。稀少綻凸。其間有一二顆起發脹大。如八九日痘者。名曰痘母。急以此藥

挑破着之。否則諸痘日漸隱沒。以至於無。皮膚之外。僅存渣滓。身冷自汗。吐瀉煩燥而死矣。

痘證七日八日九日間所用方藥考

內解散

人參

黃耆

甘草

白芍藥

川山甲

當歸

川芎

木香

金銀花

皂角刺

山查

乾薑

七八日間。痘色枯淡。不起無漿者。此方主之。○痘至七八日。灌膿起脹之時也。若根窩色淡者。責其血弱。不起無漿者。責其氣虛。故用人參、黃耆、甘草大補其氣。又用當歸、川芎、白芍大補其血。川山甲、皂角刺、金銀花、長於化毒。乾薑、木香、山查、長於化滯。

托裏散

人參

黃耆

甘草

肉桂

白芍藥

當歸

川芎

連翹

貝母

山查

陳皮

桔梗

木香

補虛托裏。此方通用。○人參、黃耆、甘草。補氣藥也。佐之以山查、木香。則氣不滯。當歸、川芎、芍藥。補血藥也。佐之以肉桂。則血不滯。桔梗、連翹。流氣清熱。陳皮、貝母。利氣開痰。

肉豆蔻丸

肉豆蔻

赤石脂錢各三

木香

枯礬錢各一

訶子

砂仁

龍骨錢各二

七八日間大瀉者。此方主之。○痘至七八日。灌膿起脹之時也。若大瀉而虛其中。則痘必陷下而不可為矣。然有濕而瀉。有滑而瀉。有積而瀉。濕而瀉者宜燥之。枯礬、石脂是也。滑而瀉者宜澀之。龍骨、訶子是也。積而瀉者宜消之。豆蔻、砂仁是也。乃木香者。調其滯氣。和其腹中而已。

黃芩芍藥湯

條芩

芍藥

升麻等分

甘草減半

腸胃熱瀉者。此方主之。○糞色黃褐爲熱瀉。條芩可以清之。芍藥可以寒之。升麻可以舉之。甘草可以調之。

附子理中湯

附子

人參

甘草

白朮

乾薑

胃中虛寒。或又誤服涼藥。瀉而手足厥冷者。此方主之。○人參、甘草、白朮之甘溫。所以補虛。乾薑、附子之辛熱。所以回陽。

砂仁益黃散

陳皮

青皮各二錢

訶子一錢

丁香

木香

砂仁各五分

食傷胃寒。嘔吐而瀉者。此方主之。○仲景云。邪在中焦。則既吐且瀉。故用陳皮、青皮理其脾。丁香、木香溫其胃。訶子所以止瀉。炒仁所以消食。

十二味異功散

人參

豆蔻白

白朮

當歸

丁香	肉桂	厚朴	陳皮
半夏	茯苓	附子	木香

痘出不光澤。不起脹。根窠不紅。表虛痒塌者。此方主之。○中氣有餘。氣血充滿。則痘光澤起發。根窠紅活。表無痒塌之患。中氣不足。則表亦虛。而諸證作矣。是方也。人參、白朮、茯苓、當歸。所以補胃。附子、肉桂、丁香、豆蔻。所以溫胃。半夏、木香、陳皮、厚朴。所以調胃。胃陽明也。陳氏云。陽明主肌肉。胃氣充足。則肌肉溫煖。自然光澤起脹。而無痒塌之患。亦見道之論也。

十一味木香散

木香	丁香	肉桂	人參
青皮	大腹皮	半夏	甘草
前胡	訶子	赤茯苓	

裏虛泄瀉而渴者。此方主之。○胃虛而寒。則生泄瀉。瀉失津液。則令人渴。是方也。人參、甘草。所以補胃。木香、丁香、肉桂。所以溫胃。腹皮、青皮、半夏、前胡、赤苓。所以調胃。乃訶子者。所以止瀉而生津也。此亦以胃氣為主。蓋胃不虛寒。則瀉自

止。津液自生。而渴自除矣。陳文仲云。腹脹渴者。瀉渴者。足指冷渴者。驚悸渴者。身溫渴者。身熱面皛白色渴者。寒戰渴不止者。氣急咬牙渴者。飲水轉水瀉不已者。已上九證。即非熱也。乃津液少。脾胃肌肉虛故耳。宜木香散治之。如不愈。更加丁香肉桂。崐謂痘色皛白。手足寒。大便秘。小便利。如是渴者虛也。本方主之。若痘色紅赤。大便秘。小便赤。如是渴者熱也。非此方所宜。慎勿與之。

二神散

丁香九粒

乾薑一錢

痘色灰白不起者。此方主之。○氣血原實。或以飲食涼劑。寒其中氣。致痘不起。故只用丁香。乾薑以溫中。而不必參耆等也。

救生散即無此散

獾猪尾血臘月取以新瓦瓶藏於當風陰乾為末

牛黃

冰片

麝香

膩粉各一分

硃砂研

馬牙硝錢各一

右為細末。一歲者服一字。大者五分。溫水和乳少許調服。

痘陷色黑。危困惡候。此方主之。○痘之為物。外感穢氣。則陷而入。內食穢物。則

凸而出。故猪血、牛黃、麝香原皆穢物。可以起痘。乃馬牙硝者。所以攻結毒。硃砂、膩粉者。所以攻結熱。冰片則神於行滯而已。是方也。為熱毒倒入藏府。不得已而用之。以少臥時許。取下惡物如魚腦為吉。然非平劑也。

南金散

紫背荷葉

取霜後搭水者

白殭蠶

取直者炒去絲各等分

共為末。每服五分。胡荽汁和酒調下。

痘已出而復隱。其勢甚危者。此方主之。○小兒氣體怯弱。外感不正之氣。則痘已出而復隱。荷葉芬香。可以卻穢。得震卦仰盂之象。可以升其生生之氣。而長養痘瘡。佐以白殭蠶。一以取其就毒化毒。一以取其疏利風痰爾。

水楊柳洗法

春夏用葉秋冬用根

痘出陷頂。漿滯不行。或為風寒久剋者。用水楊柳枝葉五升。水一大釜煎湯。先將三分之一置於盆內。以手試之。勿使甚熱。亦勿使過冷。先服宜用湯藥。然後入湯浴洗。漸漸添易。不可太冷。浴洗久許。乃以油紙捻燃燈照之。累累然有起勢。陷處暈暈有絲。此漿影也。漿必滿足。如不滿。又浴如前。若體弱者。只浴洗頭。

面手足可也。桂器云。此猶黃鍾一動。而凍蟄啓戶。東風一吹。而堅冰解腹。始雖二物。竟則同一春也。

痘證十日以後宜用諸方考

十全大補湯

人參

黃耆

白朮

茯苓

白芍藥

當歸

川芎

肉桂

甘草

熟地黃

痘證十日以上。血氣虛弱者。此方主之。○參、耆、朮、甘草。大補氣也。芎、歸、芍、地、肉桂。大補血也。氣血平補。故曰十全。止痛活血散

白芍藥酒炒一錢

爲細末。酒調下。

痘漿已滿。血滯疼痛不可忍者。此方主之。○諸病痒者爲虛。痛者爲實。痒者宜補。痛者宜瀉。此痛爲血實而滯。故用芍藥以平血。酒調以行滯。

如神散

當歸

官桂

玄胡索等分

爲末。酒調下一錢。

血滯脹痛者。此方主之。○當歸活血。官桂散血。玄胡理血。血行而利。腰痛自除。
四聖挑疔散

珍珠

豌豆灰

血餘灰各五

冰片三釐

油。臘脂調用。

痘中有疔者。此方主之。○凡痘中有獨黑、獨白、獨陷下、獨疼痛者。名曰痘疔。雖以鍼挑破。令人吸盡惡血。以此藥付之。失治則餘痘皆陷矣。珍珠能出毒止痛。二灰能爛毒化血。臘脂能利血拔毒。冰片能利竅行滯。

人牙散

人牙一枚燒存性

麝香少許

共爲末。酒調下。

痘證黑陷者。此方主之。○痘之爲物。外感穢氣則陷入。內食穢物則凸出。牙灰、

麝香。亦穢物耳。故用之以起陷下之痘。錢氏云。變黑歸腎。而用骨餘以治之。非通論也。

蟬退散

蟬退

地骨皮

白芷等分

每服三五分。酒調下。

裏。表有風熱而痘色滯者。此方主之。○蟬退、白芷消風熱於表。地骨皮退風熱於

大連翹飲

連翹

白芍藥炒

當歸酒洗各一錢

防風

滑石

柴胡

黃芩

木通各八分

荊芥

車前子

梔子炒黑

牛蒡子略炒各五分

蟬退

甘草各三分

痘後蘊熱者。此方主之。○痘焦之後。蘊熱不去。則生痘毒。是方也。防風、柴胡、蟬退。解熱於表。表有熱者。自皮毛汗孔而泄。荊芥、牛蒡。解熱於上。頭目咽喉有熱

者。從口鼻而泄。滑石、木通、梔子、車前。解熱於裏。裏有熱者。導之從小便而泄。連翹去諸經之客熱。黃芩去諸經之遊火。乃甘草者。所以解熱於氣。而芍藥、當歸。所以調熱於血也。

十三味敗毒散

當歸

陳皮

白芷

赤芍藥

川山甲

乳香

沒藥

貝母

金銀花

皂角刺

防風

甘草

天花粉

痘後腫毒。此方主之。○實證補之。則生癰毒。是方也。防風、白芷。解表而泄其熱。乳香、沒藥。散血而消其毒。川山甲、皂角刺。能引諸藥至有毒之處。金銀花、赤芍藥。能解熱毒於癰壅之中。痰中諸熱。貝母、天花粉可除。氣血不調。甘草、陳皮、當歸可療。

瀉肝散

當歸

川芎

防風

荆芥

白芍藥

甘草

黃連

木賊

蔓荊子

白蒺藜

甘菊花

復明散

痘後肝經蘊熱。目痛者。此方主之。○目者。肝之竅。肝。木藏也。喜散而惡鬱。故散之。則條達。鬱之。則熱痛。此方用防風、蒺藜、荊芥、木賊、蔓荊、菊花。雖所以清肝經之風熱。而實所以散之。使其條達也。和肝部之血。有當歸、芍藥。和肝部之氣。有甘草、川芎。復有黃連。瀉心火也。實則瀉其子。以故用之。

當歸

川芎

白芍藥

防風

生地黃

荊芥

柴胡

蔓荊子

白芷

痘後目痛。紅絲翳膜者。此方主之。○日月中天。光明者也。一為雲物蔽之。明者晦矣。風行天上。則蔽障去。而日月復明。此方用防風、荊芥、柴胡、白芷、蔓荊子。諸風藥以治目翳。亦是道也。復用當歸、川芎、芍藥、地黃。養血之品者。經曰。目得血而能視。是故用之。

清胃湯

升麻二錢

當歸二錢

黃連

牡丹皮

生地黄錢各一

牙疳腫痛者。此方主之。○牙疳責胃熱。腫責血熱。痛責心熱。升麻能清胃。黃連能瀉心。丹皮生地能涼血。乃當歸者。所以益陰。使陽不得獨亢爾。

犀角黃連湯

生犀角水磨臨飲加入一錢

梅一枚

木香二分

黃連一錢

痘後牙疳。此方互用。○諸痛瘍瘡痒。皆屬心火。故用黃連瀉心。生犀涼心。乃烏梅者。取其味酸。可以收斂虛邪。而木香者。取其辛香。可以輯和榮氣。

走馬牙疳付藥方

黃連一兩

雄黃一錢

膽礬三分

冰片五厘

患牙疳蠹蝕。此方為末。搽之。○黃連之苦。能堅厚肌肉。雄礬之悍。能殺蠹蟲。冰片之辛。能利肌腠。

治痘瘡濕爛方

或以敗草灰付之。或以蠶繭灰入枯礬少許付之。或以牆上白螺螄殼燒灰付之。或以蛤粉付之。四法者皆是濕者燥之之意。

妊娠患痘宜用方考

單胎散

當歸

川芎

人參

白朮

茯苓

甘草

黃芩

砂仁

柴胡

乾葛

桔梗

紫草

阿膠

防風

荊芥

白芷

白芍藥

孕婦出痘。此方主之。○以孕婦而痘。則血氣大虛矣。故用當歸、川芎、芍藥、阿膠以養血。又用人參、白朮、茯苓、甘草以補氣。乃黃芩、砂仁、紫草、桔梗。所以安胎解毒。柴胡、乾葛、防風、荊芥、白芷。所以利表疏邪。養血補氣。則安其內。解毒疏邪。則利其外。安內利外。治道畢矣。

安胎獨聖散

用砂仁炒爲末。酒調下五分。

妊娠出痘胎痛者。此方主之。○胎痛者。熱而氣滯之故也。縮砂辛溫。利而不滯。故可以利氣。可以安胎。

安胎飲

人參

白朮炒

茯苓

甘草

芍藥酒炒

當歸

川芎

砂仁

紫蘇

黃芩酒炒

陳皮

香附醋炒

大腹皮淨洗

妊娠出痘。此方互用。○氣血虛。則胎不安。氣血熱。則胎不安。氣血滯。則胎不安。是方也。人參、白朮、茯苓、甘草所以補氣。當歸、川芎、芍藥所以養血。黃芩所以清熱。砂仁、香附、紫蘇、陳皮、大腹皮所以行滯。

婦人門第七十

敘曰。婦人雜病與男子等。惟月事胎產異焉。今所考者。亦考其月事胎產之方。

爾。他證則向全方求其證治。

四物湯

當歸酒洗

川芎

白芍藥酒炒

熟地黃

婦人月事不調。以此方為主而變通之。○無極之真。二五之精。妙合而凝。乾道成男。坤道成女。女以坤道用事。故治婦人者以陰為主。方其二七而天癸至。月事以時下者。女子得坤之陰。陰中必有陽。故以七為紀。一七而齒更。二七而天癸至也。人受天地之氣以生。故能克肖天地。月天之陰也。以月而盈。以月而虧。故女子之血亦以三十日而一下也。血之下也同於月。故各之曰月事。經曰。月事以時下。故能有子。是以月事不調者。宜以此方為主。隨其寒熱虛實而斟酌加減之。使月事調勻。則陰陽和而萬物生。有子之道也。是方也。當歸芍藥地黃。皆味厚之品也。味厚為陰中之陰。故能益血。析而論之。當歸辛溫能活血。芍藥酸寒能斂血。熟地甘濡能補血。又曰。當歸入心脾。芍藥入肝。熟地入腎。乃川芎者。徹上徹下而行血中之氣者也。此四物湯所以為婦人之要藥。而調月者必以之為主也。脈數。血色紫黑為內熱。本方加黃芩黃連。脈遲。血凝結者為寒。

本方加官桂、附子。人肥有痰。加半夏、陳皮、南星。人瘦有火。加山梔、黃柏、知母。有抑鬱者。加香附、蒼朮、砂仁、神麴。有留滯者。加桃仁、紅花、玄胡索、肉桂。先期者為熱。後期者為寒。為鬱。為氣。為痰。氣虛者加參、耆。氣實者加枳、朴。或問四物亦有不宜者乎。余曰有之。氣息幾微者不宜川芎。恐其辛香。益散真氣也。大便溏泄。不宜當歸。恐其濡滑。益增下注也。脈遲腹痛。不宜芍藥。恐其酸寒。益增中冷也。胸膈痞塞。不宜地黃。恐其粘膩。益增泥滯也。明者解之。昧者誤矣。

八珍湯

人參

白朮炒

茯苓

甘草炙

當歸

川芎

熟地黃

白芍藥酒炒

月來血少者。此方主之。○血盛則月來而多。血衰則月來而少。故用當歸、川芎、芍藥、熟地四物以養血。而又用人參、白朮、茯苓、甘草以養氣也。所以必兼養氣者。太極之妙。陰生於陽故也。

固經丸

酒黃芩

龜板

白芍藥各一兩

黃柏炒褐色

樗根白皮半七錢

香

附童便浸一宿
焙乾三錢

月來過多不止者。此方主之。○月來過多不止。是陰血不足以鎮守胞絡之火。故血走失而越常度也。是方也。黃芩、黃柏、芍藥、龜板皆滋陰制火之品。所謂壯水之主以鎮陽光也。樗皮之澀所以固脫。香附之辛所以開其鬱熱爾。

白芷黃荊實瓦壘子治白帶考

白帶者。胃中濕熱下注而成。猶之溺注於器而生溺底涎耳。前古各醫有單用焦白芷而主者。有單用焦荊實而主者。有單用瓦壘粉而主者。蓋以白芷之性。香而升舉。荊實之性。辛而利氣。瓦壘之性。燥而勝濕。炒而焦之。則火可以生土。土可以防水。煉而粉之。則燥可以勝濕。勝濕則無以下注。而白帶止矣。此用三物之意也。

白葵花紅葵花治赤白帶下考

凡人腰臍之間有帶脈。奇經八脈之一也。迴身一週。如束帶焉。下焦虛損。督任有虧。則中焦氣血乘虛而襲之。陷於帶脈之下。氣病爲白。血病爲赤。名曰赤白帶下也。東垣曰。白葵花治白帶。紅葵花治赤帶。赤治血燥。白治氣燥。此何言哉。

崑謂葵花乃朝陽之萼也。稟草木之陰。涵天地之陽。故能潤燥而升陽。使營衛上行。不復陷於帶脈之下而為帶下也。或問帶下一疾耳。此言氣血陷於帶脈之下為帶下。前言胃中濕熱下注為帶下。何相悖也。余曰。婦人無病容。單下白者。責之濕熱下注。婦人久病。赤白帶下。責之氣血下陷。多成瘵也。又曰。有言白者屬寒。赤者屬熱。其說何如。余曰。曾見寒者固有赤帶。熱者益多白帶。此白寒赤熱之言不足徵矣。必若所言。則赤白並下者。是寒熱並耶。見道之言不如此。千金白馬毛散

白馬毛

二兩椒和伏火一宿白馬毛治赤帶

龜

甲四兩醋炙

鼈

甲十八銖醋炙

牡蠣

一兩十八銖火炙

共為末。每服酒下方寸匕。日三。

治赤白帶下。此方良。○氣陷於下焦。則白帶。血陷於下焦。則赤帶。以澀藥止之。則未盡之帶。留而不出。以利藥下之。則既損其中。又傷其下。皆非治也。白馬得乾之剛。毛得血之餘。血餘可以固血。乾剛可以利氣。固血則赤止。利氣則白愈。此用馬毛之意也。龜鼈牡蠣。外剛而內柔。離之象也。去其柔而用其剛。故可以

化癥。可以固氣。化癥。則赤白之成帶者。無復中留。固氣。則營衛之行不復陷下。營不陷則無赤。衛不陷則無白矣。

半夏茯苓湯

半夏

生薑

各三銖

乾地黄

茯苓

各十銖

旋覆花

白芍藥

人參

芎藭

細辛

橘皮

甘草

桔梗

各十銖

妊娠惡阻者。此方主之。○惡阻者。惡心而防阻飲食也。此是下部氣血不足。復盜脾胃之氣。以固養胎元。故令脾胃自弱。不勝穀氣。一聞穀氣。便惡心而防阻也。是方也。半夏生薑。能開胃而醒脾。地黃芍藥芎藭。能養陰而益血。人參茯苓。甘草能和中而益氣。乃橘皮桔梗旋覆細辛。皆辛甘調氣之品。可以平惡逆之氣而進飲食者也。或問半夏為妊娠所忌。奈何用之。余曰。昔人恐久用而燥陰液。故云忌爾。若有惡阻之證。則在所必用也。故孫真人方之聖者也。其養胎之劑。用半夏者。蓋五方焉。

橘皮湯

橘皮

竹茹

人參

白

朮各十銖

生薑一兩

厚朴十二銖

妊娠嘔吐不下食者。此方主之。○惡阻以聞食而惡。責之脾虛。嘔吐以食入復吐。責之有火。所謂諸逆衝上皆屬於火也。此是厥陰之血。既養其胎。少陽之火。虛而上逆。竹茹能平少火。厚朴能下逆氣。橘皮、生薑所以開胃。人參、白朮所以益脾。開胃益脾。欲其安穀云爾。

白朮條芩考

先醫云。白朮、條芩。安胎之聖藥。此何云也。蓋以白朮益脾。能培萬物之母。條芩瀉火。能滋子戶之陰。興其利而去其害。故曰。安胎聖藥。

膠艾湯

熟地黃

艾葉

當歸

川芎

炙甘草

真阿膠炒成珠各半錢 黃耆二分

孕婦漏胎不安者。此方主之。○漏胎者。懷胎而點滴下血也。此是陰虛不足以濟火。氣虛不足以固血。故有此證。是方也。阿膠、熟地、當歸、川芎。益血藥也。黃耆、

甘草、艾葉。固氣藥也。血以養之。氣以固之。止漏安胎之道畢矣。

砂仁、白湯

砂仁一錢 白湯十枚煎

妊娠腹痛者。此方主之。○痛者。氣血滯澀不通使然。故用砂仁順氣於下。白順氣於中。氣行血利而痛自止。有故而痛者。各隨證以治之。

犀角散

生犀角 地骨皮 麥門冬 赤茯苓

條芩 生甘草

子煩者。此方主之。○子煩者。懷子而煩悶也。煩悶。貴心肺有熱。故用犀角涼心。骨皮退熱。條芩瀉火。麥冬清金。赤苓導赤。甘草和中。

四物湯加芩連薑夏方

當歸 川芎 芍藥 熟地黃
黃芩 黃連 半夏 生薑

子癇者。此方主之。○子癇者。懷子而癇仆也。此由血養其胎。陰虛火亢。痰氣厥

逆。故令痢仆。是方也。四物可以養血。芩連可以降火。薑夏可以破逆。

紫蘇飲

紫蘇葉

人參

陳皮去白

大腹皮黑豆汁洗過

當歸尾

川芎

粉草

白芍藥酒炒

子懸者。此方主之。○胎氣不和。湊上心腹。腹滿閉悶。謂之子懸。乃下焦氣實。大氣舉胎而上也。故用紫蘇、腹皮、陳皮、川芎流其氣。當歸、芍藥利其血。氣流血利。而胎自下矣。然必用夫人參、甘草者。邪之所湊。其氣必虛也。流氣之藥推其陳。補氣之藥致其新爾。

地膚草湯

地膚草四兩。水四升。煎取二升。分三服。取自然汁服亦可。

子淋者。此方主之。○懷子而小便淋澀。謂之子淋。子淋之原。本於濕熱。地膚草能利膀胱。能疏風熱。以之而治子淋。亦單劑之良也。

冬葵子湯

冬葵子略炒

柴胡

桑白皮

赤茯苓

赤芍藥

當

歸

各等分

此亦子淋之方也。○滑可以去着。故用冬葵子。清升則濁自降。故用柴胡。氣化則能出。故用桑皮。辛利則能潤竅。故用當歸。而赤苓、赤芍者。取其入血而利丙丁也。

木通散

木通

紫蘇葉

香葉

桑白皮錢各一

枳殼

檳榔

條芩各五分

訶子皮

木

香各三分

妊娠身體浮腫。四肢脹急。小便不利者。此方主之。○娠妊氣血朝胎。營衛之行澀。故令身體浮腫。四肢脹急。而小便不利也。是方也。紫蘇流氣於表。桑皮、枳殼、木通、木香、檳榔流氣於裏。香葉流氣中之濕。條芩流氣中之熱。訶子流氣中之液。服藥之後。營衛流行。氣血健運。則浮腫諸疾可得而皆愈矣。或問何以不利小便。余曰。內經有言。氣化則能出矣。故知本之醫。只調其氣。無用淡滲為也。

三合湯探吐法

人參

白朮

茯苓

甘草

當歸

川芎

芍藥

地黃

半夏

陳皮

東胎丸

妊娠轉胞。不得小便者。此湯服之。探吐數日愈。○胞非轉也。由孕婦中氣怯弱。不能舉胎。胎壓其胞。胞繫了戾。而小便不通耳。故用二陳四物。四君子三合煎湯而探吐之。所以升提其氣。上竅通而下竅自利也。

白朮二兩

茯苓七錢

陳皮三兩不

黃芩夏一兩春秋

妊娠七八月間服此。胎氣斂束。令人易產。○凡患產難者。多由內熱灼其胞液。以致臨產之際。乾澀而難。或脾氣怯弱。不能運化精微。而令胞液不足。亦產難之道也。故用白朮。茯苓。益其脾土而培萬物之母。用黃芩清其胎熱。瀉火而存胞液。乃陳皮者。取其辛利。能流動中氣。化其肥甘。使胎氣不滯。兒身勿肥耳。此東胎之義也。

達生散

大腹皮三錢黑豆汁洗晒乾入劑

人參

陳皮

紫蘇當歸

白芍藥

白朮各一錢

炙甘草二錢

妊娠臨月。此方服之。令人易產。○詩云。誕彌厥月。先生如達。朱子曰。先生。首生也。達。小羊也。羊子易生而無留難。故昔醫以此方名之。然產難之故。多是氣血虛弱。營衛澀滯使然。是方也。人參。白朮。甘草。益其氣。當歸。芍藥。益其血。紫蘇。腹皮。陳皮。流其滯。氣血不虛不滯。則其產也猶之達矣。

車前子

詩曰。采采芣苢。薄言采之。芣苢。車前也。朱子曰。采之。未詳何用。其子治產難。崑得其說。凡遇妊娠臨月。於宜用湯液內加之。每良。

催生諸藥考

生不必催也。催之。則宋人之握苗耳。非惟無益。而又害之矣。古方有用兔腦者。有用猪脂者。有用油蜜葱白者。有用葵子者。有用牛乳。榆皮。滑石者。有用金鳳子者。有用柞枝者。取其滑澤之義耳。猶近理也。又有用弩牙灰者。有用蛇退灰。

者。有用筆頭灰者。有用百草霜者。有用伏龍肝者。有用鑿頭灰者。有用蓖麻子貼於足心者。有握石燕者。雖曰各有深意。但燒灰而服者。徒劫燥其津液。手握足貼者。用之弗驗耳。噫。平時失於將理。至於臨產艱難。頻以雜藥催之。皆惑也。十全大補湯

人參

黃耆

白朮

白芍藥

茯苓

當歸

川芎

甘草

熟地黄等分

肉桂少許

正產之後。氣血虛耗者。此方主之。小產者亦此方主之。○氣虛宜補氣。故用人參、黃耆、白朮、茯苓、甘草。血虛宜補血。故用當歸、川芎、芍藥、地黄、肉桂。丹溪曰。產後宜大補氣血。此之謂也。

桃仁紅花蘇木玄胡索肉桂山查蒲黃考

產後有瘀血留於子戶作痛者。宜四物湯加上件。

黑神散

熟地黄

炒蒲黃

炒黑乾薑

當歸

白芍藥

桂

心

各二兩

炙甘草三錢

黑

豆

炒去皮
合半

上件共爲末。每服二錢。童便和酒調下。

胎死腹中。此方主之。○胎死者。產難經日而胎死也。法以妊娠舌頭青黑爲用之方也。蒲黃能逐敗血。熟地、芍藥、當歸能養新血。乾薑、肉桂能引新血而逐敗血。甘草、黑豆能調正氣而逐敗氣。師云。此方更治胞衣不下。產難血暈。餘血奔心。兒枕疼痛。乍見鬼神等證。蓋諸證皆是瘀血爲患。故並治之。

千金神造湯

蟹爪一升

阿膠三兩

甘草二兩

婦人脈陰陽俱盛。名曰雙軀。若少陰微緊者。血卽凝濁。經養不周。胎卽偏夭。其一獨死。其一獨生。不去其死。害母失胎。宜此方主之。○蟹爪能破胞而墮胎。以其稟鋒利之質故耳。非妊娠所宜也。是方也。蓋用蟹爪攻其死。阿膠安其生。甘草平其毒也。或問蟹爪之毒手。保其不傷彼生者乎。余曰。無死者。則傷生有死者。則毒以類從。惟攻其死。不犯其生。此大易方以類聚。物以羣分。水流濕。火就燥之義也。

獨參湯

人參二兩

水一升煎半升溫服。

產後血暈不省人事者。此方主之。○血暈者。下血過多而眩暈也。不省人事者。氣血大脫而神不用也。故用人參甘溫益元之品以主之。此藥可以固氣。可以生血。可以益元。身熱氣急者。加童便一爵。身寒氣弱者。加附子三錢。

醋炭熏鼻法

凡血暈不省人事者。急治炭火以醋醋沃之。使醋氣熏蒸入鼻。則能收斂神氣。自然精爽。

紅花酒

紅花炒一兩

清酒五爵沃之溫服。

胞衣不下。此方主之。○胞衣不下者。氣弱而瘀血盈於胞也。故用清酒壯其氣。紅花敗其瘀。

猪腎湯

猪腎一具

白糯米三合

淡豉五合

葱白一升

人參

當歸各二兩

產後蓐勞者。此方主之。○蓐產中之名也。產中虛羸喘乏。乍寒乍熱。病如瘧狀。名曰蓐勞。此是虛乏氣血不相順接。虛故乍寒。壅故乍熱。寒熱無時休息。證狀似瘧。實非瘧也。治宜大補氣血。使其氣血順接。則病愈矣。故用人參補氣。當歸補血。糯米益胃。葱豉醒脾。而猪腎者。取其以類相從。能補系胞之區也。

升陽舉經湯

羌活

藁本去土

防風各二錢

肉桂去皮夏用

白朮

當歸

黃耆

柴胡各三錢

人參

熟地黃

川芎各一錢

細辛六分

獨活

炙甘草

附子炮去皮臍各一錢五分

桃仁十枚去尖

白芍藥

紅花各五分

婦人經血崩下者。此方主之。○血氣。人身之陰陽也。陽主升。陰主降。陽根乎陰。

陰根乎陽。一動一靜。互爲其根。則一升一降。循經而行。無崩陷也。若陽有餘。則升者勝。血從上竅而出。陽不足。則降者勝。血從下竅而出。是方也。附子、肉桂、人參、黃耆、白朮、甘草。壯陽益氣之品也。羌活、獨活、柴胡、藁本、防風、細辛、川芎。升陽舉經之品也。芍藥、地黃、紅花、當歸、桃仁。滋陰入血之品也。壯陽則氣不虛。舉經則血不陷。滋陰則血不燥。誠如是。則血爲氣之守。氣爲血之衛。血營於中。氣衛於外。升降上下。一循其經矣。胡然而崩也。

獨活湯

獨活	生薑	防風	秦艽
桂心	白朮	甘草	當歸
附子	葛根	防己	

時人分作十服。

產後中風口噤背反者。此方主之。○產後血氣俱虛。易受風寒。風傷乎筋則瘓。寒傷乎筋則疼。故令口噤背反。是方也。獨活、防風、秦艽、葛根、防己、疏風藥也。桂心、附子。驅寒藥也。風去則筋不瘓。寒去則筋不疼。乃當歸者。所以養血於驅風。

之後。生薑、白朮、甘草者。所以調氣於散寒之餘。必欲養血調氣者。產後不忘其虛也。

葇蓉酒硝石飲

史記菑川王美人。懷子而不乳。召淳于意往視。與葇蓉藥一撮。以酒飲之。旋乳。意復診其脈而脈燥。燥者有餘病。即飲以硝石一劑。出血。血如豆比五六枚。○乳。產也。懷子而不乳者。氣血凝澀。宜產而不產也。葇蓉能行痺氣。酒性能行滯血。故主之而旋乳。復診其脈燥。燥屬有力。故爲有餘。有餘之疾宜攻矣。故用硝石以下其積血。

當歸補血湯加葱白方

當歸 二錢

黃耆 一兩

葱白 十枚

產後無乳者。宜此方主之。○乳者。氣血之所成也。故氣血充盛之婦。未嘗無乳。凡見無乳者。皆氣體怯弱之婦也。是方也。用當歸、黃耆大補其氣血。此養乳汁之源也。葱白辛溫。直走陽明。陽明達於乳房。故用之爲使。此通乳汁之渠也。如依古方用猪懸蹄、漏蘆輩亦可。

免懷湯

當歸尾

赤芍藥

酒紅花

酒牛膝各五錢

欲摘乳者。此方主之。○婦人之血。下則爲月。上則爲乳。欲摘乳者。通其月事。則乳汁下行。免乳脹之苦矣。是方也。歸尾、赤芍、紅花、牛膝。皆下行導血之品也。以故用之。名曰免懷者。子生三年。然後免於父母之懷故也。

廣嗣門第七十一

敘曰。嗣以衍宗。微嗣。匪孝也。君子恆重之。故郊禩之祀。尼丘之禱。古人胥急焉。然有祈之藥之。終身不一嗣者。此何以故哉。嗟夫。天地有不毛之處。故亦有無子之人。靈樞所以泄其微也。絃考方藥五條。道其能嗣者爾。

長春廣嗣丹

人參去蘆

天門冬去心

當歸酒洗

澤瀉去毛

山茱萸去核

石菖蒲炒

赤石脂

五味子去梗

覆盆子去萼

白茯苓

車前子

廣木香

柏子仁兩各一

山藥薑汁炒

川巴戟去心

川牛膝酒洗去蘆

川椒去目與梗及閉者炒出汗

生地黄

熟地黄

地骨皮去土木

杜仲各二兩

遠志去蘆甘草湯泡去心肉苁蓉酒洗去心膜晒乾

杞枸子各三兩

兔絲子酒洗去土仍用酒蒸搗餅晒乾四兩

上藥廿五味。煉蜜作丸。梧子大。每服三十丸。日三。

男婦艱嗣者。此方主之。○二五之精。妙合而凝。然後成形孕育。故求嗣者。宜實其精。世人益精。專於補腎。此求其末也。經曰。腎者主水。受五藏六府之精而藏之。故五藏盛。乃能寫。如斯言之。則腎主藏精耳。而生精之原。固本於五藏六府也。是方也。人參、天門冬、五味子。用之補肺。石菖蒲、柏子仁、當歸、遠志。用之養心。白茯苓、懷山藥。用之養脾。山茱萸、熟地黃、覆盆、杜仲、牛膝、巴戟、菟蓉、枸杞、兔絲。用之補肝腎。所以然者。肝腎同一治也。乃車前、澤瀉。利其灼陰之邪。生地、骨皮。平其五藏之火。石脂之澀。所以固精。木香之竄。所以利六府。川椒之辛。所以散濕痺也。此則兼五藏六府而調之。五藏之精實。六府之氣和。夫然後可以媾精而宜子矣。非得內經之旨者。不能識此。

延齡育子方

天門冬去心

麥門冬去心

川巴戟去心

人參

白朮

白茯苓

川牛膝

生地黃

熟地黃

肉苁蓉去心

枸杞子

兔絲子去心

蓮鬚

白茯苓

山藥薑汁

山茱萸去核

沙苑蒺藜炒

柏子仁

鹿角膠

鹿角霜各五兩

酸棗仁

遠志

五味子

石斛各二兩

上藥共爲末。蜜丸梧子大。早晨鹽湯吞下百丸。

此亦廣嗣之方也。○男女媾精。乃能有孕。然精者五藏之所生。而藏之腎者也。故欲藏精於腎者。必調五藏。五藏盛而精生矣。是方也。人參、五味、天門冬、補肺藥也。茯苓、遠志、柏仁、棗仁、生地、補心藥也。白朮、茯苓、山藥、石斛、補脾胃也。熟地、枸杞、兔絲、巴戟、牛膝、茱萸、苁蓉、沙苑蒺藜、補肝腎也。鹿角膠、血氣之屬。用之所以生精。角霜、蓮鬚、收澀之品。用之所以固脫。如是則五藏皆有養而精日生。乃能交媾而宜子矣。

韭子小茴香蛇床子川椒天雄附子總考

此六物者。溫熱之品也。取之者何。凡人艱嗣者。多有下虛而胃中之濕襲之內。生胞痺腎痺白帶之疾。故令精寒而不嗣也。能於此數物酌而用之。則痺去而宜子矣。

黃芩黃連黃柏梔子考

世人謂精寒者不宜嗣。辛以溫煖之劑主之。此不可執也。蓋天地冲和而萬物發育。朔方寒勝。固令不毛。南服蒸炎。亦令焦土。明於精寒不嗣。昧於血燥不胎。非良手也。故述芩連梔柏。以爲廣嗣者告。能令氣血冲和。則生生之道矣。

人胞鹿茸糜茸鹿峻蛤蚧龜板猪脊髓總考

凡年高精弱。難於生育。草木無情不能補之。故宜上件酌而入藥。蓋取其爲血氣之屬。補之易易爾。

延年門第七十二

敍曰。服食引年。術之末也。能寡慾以至無慾。斯長生矣。故慾不滅。則苦亦不滅。

苦不滅。宜生滅。雖令太乙處方。神皇品藥。軒轅切問。廣成烹調。亦夭殃道耳。胡年之延哉。茲考方藥七條。述醫云爾。他如金丹玉液之術。則吾不敢爲斯世誑也。

九蒸地黃

地黃味厚。爲陰中之陰。故能滋養陰血。必欲九蒸者。欲其氣味純和云爾。

九蒸黃精

黃精氣味與地黃等。故可以生長陰精。真人云。久服能脫舊膚。美顏色。烏鬚黑髮。長生引年。

百鍊松脂

不見風日者良

松亘千年不謝。傲霜雪不凋。以其脂實也。服食家用之。亦欲其松其身而千其年爾。

雲母水方

上白雲母二十斤。薄擘。以露水八斗作湯。分半洗雲母二次。又取二斗作湯。內芒硝十斤。以雲母水器中漬二十日。陰乾。於木石臼中揉搥極細。得好

粉五斗。餘者棄之。每好粉一斗用崖蜜二斤。攪令如粥。入生竹筍中。削去竹青。漆固其口。埋入地中。入土六尺覆之。春夏四十日。秋冬三十日出之。當如澤爲成。若洞洞不消者。更埋三十日出之。服時取水一合。內藥一合。攪和服之。日三。

孫真人云。此藥服十日。小便變黃。是先療勞氣風疹也。二十日腹中寒癖消。三十日齟齬更新。生四十日不畏風寒。五十日諸病皆除。顏色日少。長生延年。自溺。

老人夜臥口乾亡泄。取自己溲溺。時進一杯。能長生引年。此以吾身之坎。交吾身之離。諺稱輪迴酒是也。

玄黃丹

硫黃製一

青黛飛一兩六錢

用硫黃爲丸。青黛爲衣。

老人寒痰內盛者。此方服之。去疾延年。○硫黃。火之精也。人非此火。不能以有生。故用之以益火。以青黛爲衣者。制其燥咽云爾。硫黃詳論在虛損勞瘵門。補。

火丸下。

鹿峻鹿血鹿角膠鹿茸麋茸猪脊髓總考

老弱之軀。木石不能榮養氣血。故用上件血氣之屬。入藥調和。以配服食。取其以類相從。榮養易耳。七十非肉不飽。亦是此意。

後記

《劉涓子鬼遺方》約撰於公元四八三年。相傳爲晉人劉涓子於丹陽郊外射獵所得，時劉從宋武北征，有被金瘡者，以藥塗之，隨手而愈。後由其姐之重孫南齊·龔慶宣氏「定其前後，蒞類相從」，編纂成書。因托名「黃父鬼」所遺，故名。據《隋書》載，是書原爲十卷本，今流傳者，僅見宋刻五卷本，惜有散佚。此外，一九〇二年在新疆吐魯番出土《劉涓子方》殘紙兩葉，載有劉涓子方十首有二，均不見於今傳世之《鬼遺方》中，乃爲本書的一種早期傳本。

本書是我國現存最早的一部外科專著，總結記錄了兩晉南北朝時期在外科方面的主要成就。卷一論癰疽病因及鑒別；卷二爲金瘡外傷治法；卷三述癰疽、發背、妬乳、腸癰等證治；卷四乃黃父癰疽論及癰疽治方；卷五除癰疽方外，尚有皮膚疾患等方藥。有論有方，方論相彰，立論宗《靈樞·癰疽》，匯集前賢經驗並有所發揮，對癰疽的名候診斷、發病機理、預後判斷、早期治療及疾病不同階段、周身不同部位之治療法則等，均有闡述發微，頗有見地；在所述之一百四十余首方藥中，廣泛地運用清熱解毒、活血化瘀、托補內消、涼血生肌等大法，尤偏於托補，對外科「消、托、補」三大法則的建立奠定了基礎，爲後世醫家所推崇。在外科局部處理上強調早期切開或針烙引流，並收載多種劑型之外用方藥。本書對後世中醫外科發展有較大影響，在

當時國內外醫學領域中具有較高聲譽。

茲據人民衛生出版社一九五六年版宋刻五卷影印本爲校本，在保持《大成》本原貌基礎上正其錯訛。

《醫方考》六卷，明·吳崑編著。初刻於明萬歷十二年甲申（公元一五八四年）。崑，字山甫，別號鶴皋，安徽歙縣人，生於公元一五五一年。家中藏書甚多，初業儒，後棄而學醫，悉心攻讀古典醫籍，頗有心得，游歷江、浙、皖等地，並在宣城一帶行醫，頗負盛譽。著有《醫方考》、《脈語》、《吳注黃帝內經素問》、《針方六集》、《藥纂》等書，其中以《醫方考》流傳較廣。吳氏在醫學理論方面推崇《內經》，在臨診治療，主張針藥並舉，對後世醫家有一定影響。

本書集歷代常用醫方七百有奇，除重覆者及單味藥外，實有五百六十四方，以病爲綱，分爲中風、傷寒、感冒、痿痹、虛損勞瘵等七十二門，每門集同類方若干，「揆之於經，酌以心見，訂之於證，發其微義」。每門方前均有短叙，略述選方範圍；方後並附方義解說，「考其方藥，考其見證，考其名義，考其事迹，考其變通，考其得失，考其所以然之故」，引經據典，深入淺出，啓迪後學，頗有見地。是書廣搜博引，兼容並蓄，雖難免魚目混珠，瑕瑜互見，然仍不失爲古今方書中佼佼者，深受醫家歡迎。

茲據上海圖書館珍藏之明代萬歷十四年丙戌（公元一五八六年）亮明齋刊本爲校本進行校勘。

宋光飛